

МИРРИЖОМИН

АСАРЛАР

ТҮРТ ЖИЛДЛИК

ТОШКЕНТ

Гафур Русланномидаги Адабиёт ва санъат нашриёти

1982

ИМРМУҲСИН

АСАРЛАР

учинчи жилд

МЕЪМОР

ЧОТҚОЛ ЙЎЛВАРСИ

Р о м а н л а р

ТОШКЕНТ

Фафур Фулом номидаги Адабиёт ва санъат машриёти

1982

ЧОТҚОЛ ЙЎЛБАРСИ



БИРИНЧИ ҚИСМ

I боб

ДҮНДИҚ ГУЛГУН ВА ЧАНДИҚ ҚОРАЖОН ҲАҚИДА СҮЗ

Моддий дунё доимо ҳаракатда, ўзгаришда — бирор келади, бирор кетади. Ҳаётни бир ерда ушлаб туриб бўлмаганидек, ҳар бир туғилиш уни қайтадан яшартира беради. Елиб-югуриб ўқийсан, ишлайсан, қарийсан, вақти келиб ёруғ дунё билан видолашасан... Бу, табиатнинг ўзгармас азалий бир қонунидирки, бўйсунмай иложинг йўқ. Бир ҳисобда шундай бўлгани, яъни ҳаёт дарёсининг айқириб оққани маъқул. Муҳими шуки, сен жамият учун иш қилиб, одамлар корига яролдингми? Ёки?.. Мана шу «ёки»дан кейин келадиган хаёллар гоятда даҳшатли! Дабдабалар, тўю ҳашамлар — бари ўтади! Ёшигни яшаб, ошингни ошаб, пилла қуртидек вақти етгач, ўзингни турмушнинг ипак иллари билан ўраб, бу ҳаётни ёш авлодга қолдириб кетаётганингда кечмиш-кечирмишларингни бир лаҳза бўлса ҳам хаёлингдан ўтказасан. Қилган меҳнатинг, яхшиликларинг, садоқату олижанобликларинг учун одамлар сенга ташаккур айтиётгандек бўлади. Қувонасан, ўлим ҳам бир ухлаш каби енгил ўтади. Шодлик билан туғилиб, обрў билан кетишдек толега мушарраф бўласан. Аммо, хиёнатинг, пасткашликларинг... ёмон от қолдириб кетиш даҳшати танингга чирмашган дард азоби билан қўшилиб, сени бўгиб ташлайди, бу бир оний азоб умринг бўйи кўрган роҳату фароғатларингни йўқ қиласди!

Еш инженер Қоражон Мингбоев баъзан мана шундай хаёллар гирдобига чўмарди. У икки бор жарроҳ курсисига ётиб, икки бор ўлимга панд берган. Бу ёруғ дунёдан ҳеч кимсанинг кетгиси келмаганидек, у ҳам ўзининг йигитлигини бошқалардек муносиб ўтказиб, келгуси йилларга умидворлик билан боқарди. Ҳаёти ўлжага қолгандек, баъзан қизишиб, енгилтакликлар қилиш, ҳовлиқишиш унга бегонароқ кўринарди.

Лекин дунёда ўзини чиройли, тўқис ҳисобламайдиган одам бўлмаганидек, чандиқ Қоражон Мингбоев ҳам ҳеч вақт ўзини хунукман демасди. Ҳатто қора чўтирилар ҳам, лаби тириқ, оёғи чиллак, қорни хумчалар ҳам ўзини алланимаман деб ҳисоблайди-ку?! Шундай экан, Қоражон ўксимаса бўлади, унинг тўрт мучаси соғ, қадди расо, куч-қудратда бениҳоя. Фақат юзининг чап томони, бўйни чандиқ бўлиб қолган. У баъзан ойнага қараб, чандиқларига тикилиб қоларди. Қошининг ярми, чап қулоги, ияги ва бўйни куйиб кетган эди...

Танк ичида ёнганиман, беомон, қонли жангда,
Шарт ўзимни отмоқ бўлдим, тўппончам чиқди қиндан.
Аммо, узоқ-узоқлардан келарди дилбар овоз:
Мардга ўлим йўқдир, жоним, кутаман ҳар оқ тонгда!

«Сен мени кутганмидинг?! Қани, айт-чи, жонон?!
Мени ҳеч ким кутган эмас! Ёниб ётган танк ичидан
кийимларим, қалпоғим тутаб, ўзимни ташқарига
отганимда икки фашист менга ташланди. Бирини
тўппончам билан отиб ўлдирдим, иккинчиси билан эса
йиртқичлардек олиша кетдик. Қуролларимиз қўлдан
учиб кетди, балчиққа ботиб, узоқ ёқалашдик. Қўлмак-
да юмаланиб, бир-биrimизни бўғардик. Бу ерда бир
киши омон қолиши, иккинчиси ўлиши керак эди.
Худди мана шу, Белоруссиянинг Бобруйск шаҳри
ёнида, ўрмон ёқасидаги йўл четида Ватан тақдиди ҳал
бўларди. Ё мен, ё у... Биз тамоман ҳолдан тойиб
ёқалашардик. Мен Чотқол сувини ичиб, баланд тоғла-
римдан қудрат олиб ўсганим учунми, ортда юртим, шу
юрт бахтини сақлаб қолиш юрагимга жасорат солдими
ёки мени ёшлигимда «Йўлбарсвой» дейишгани — лаб-
ларим қалин, билакларим йўғон бўлганиданми, кучли
чиқдим. Фашистни тагимга босиб, кекирдагини ғажиб
ташладим. Эҳтимол, мен ўша йиртқични ўлдирганини
катта ғалаба тарозисига бир кичик ҳисса бўлиб босгандир.
Қонли жангда омон қолдим, аммо ўзимнинг ҳам
абжагим чиқиб, дабдала бўлган эдим. Чап юзиму
бўйним куйиб кетган, ўнг елкамни ўқ ялаб ўтган,
қўйлакларим жиққа қон эди. Мен яна ўз юртимга
келаман, ёр-биродарларимни, онаизоримни кўраман,
деб ўйламаган эдим. Омон қолишим — ўлжага қолган
умр. Узоқ вақт госпиталда ётдим, жарроҳлар ҳаётимни
қайтариб беришди-ю, лекин ҳуснимни сақлаб қолишшол-
мади. Сен жасур солдатсан, деб Ватан кўксимга Қизил

Юлдуз ордени тақиб қўйди. Мана ҳамма гап... Мен безорилик қилиб, мажруҳ бўлганим йўқ!» Бу гаплар Қоражон дилидан ўтди. Бир-бирини қадрлайдиган, хушфеълу ширин сўз кишиларни у жуда ёқтиради. Оғир дақиқаларни бошдан кечирган кишилар аксар шундай бўлади. Аммо тақдир уни ҳусндан сиққани билан, у ўзининг төғ оралиғидаги гўзал қишлоғини, баланд чўққиларни, унинг шарқироқ сойларини севарди. У ўз Чотқол водийси шаънига ёзилган шеърни ҳам китоблар ичидан қидириб топиб, ёдлаб олган эди:

Асаблар чарчаса, тоқقا бор зинҳор!
Адирларда қолма, төғ сари юксал.
Бунда ҳамма ердан гўзалдир баҳор —
Чўққиларга тикил, сойга қулоқ сол.
Булутлар келади, қушлар, қулунлар...
Сен нега келмайсан, деб учади ел.
Асаблар қақшаган, зил ўтар кунлар,
Чотқол тоғларига кел, азизим, кел!
Чотқолу Чимённинг бағрида бордир
Юз Венецияга арзир Бўстонлиқ.
Бунда тўрт фасл ҳам аввал баҳордир —
Хондайлиқ, Бғистон, Сижжаги дўндиқ...
Берида Хумсону нарида Нанай —
Кўрку жамолингдан ўзим айнанай!
Кўйлакларинг яшил, юзларинг лола,
Қаҳқаҳанг тоғлардан тушган шалола.
Кўкламда лоладан юз қирмизисан,
Яшил адирларнинг оқ қимизисан.
Баҳайбат тоғларнинг эрка қизисан,
Гўзаллик деганинг худди ўзисан,
Эй, Чотқол бағрига яширинган жаннат!

Инженер Мингбоев рассом Тансиқбоевнинг бир суратини рамкага солиб, ўз хонасига осиб қўйган. Шундоқ гўзал табиат қучоғида туғилиб, рассом бўлмаганига ачинарди. Ҳа, жаннат у дунёда эмас, бу дунёда, ўз еrimизда! У Чотқолу Писком, Угому Қурара тоғлари орасида, айқириб оқаётган олти дарё бўйларидаидир. Эш инженер ўз ерлари ҳуснига тўймасди.

Осмон мусаффо.

Бунда куз фасли ҳам ўзгачадир. Қоялар тагида қуриб, сарғайган ўт-ўланлар, юқорироқда эса олтин ранг лиbosга ўранган дарахтлар... Арчалар гўё бу

ерларни забт этган куз нафасини сезмагандек, ҳамон ям-яшил. Саҳарлаб оппоқ туман чўкади, сўқмоқлар, тошлар шудрингда чўимилишади...

Шу куз кунларининг бирида Сижжакнинг қуи, дарё бўйига яқин ҳовлилардан бирида тўй бўлди; бу ерларнинг эътиборли қарияларидан Чоршанба ота ўғлини уйлантирди. Ота эрта билан элга ош берди. Бутун қишлоқ Чоршанба отаникига кўчиб келгандай, ҳамма ёқ одамга тўлиб кетди. Кечқурун кўркам боғда базм бошланди. Катта ҳовлининг саҳнига «П» ҳарфиги ўхшатиб стол ясатилган. Дарвозадан кираверишда, ўнг томондаги олмазор ичига Писком дарёсига қаратиб солинган кўркам шийпонга ҳам жой қилиниб, пар ёстиқлар ташлаб қўйилган. Пастда дарё, кунчиқишида Асқартоғ ва жанубда Чотқолнинг баҳайбат чўққилари фалакка бўй чўзиб турибди. Шинаванда йигитчалар ҳовлининг у томонидан бу томонига сим тортиб, бир неча катта лампочкалар билан боғни чароғон қилишиди.

Зиёфат столининг чап томонидаги ҳовли саҳнига икки катта тўнка қаланиб, гулхан ёқилган. Қўш чирмандинг гижбанги авжига чиқиб, шу қишлоқлик яллачи аёл белини боғлаб ўйинга тушди. Унинг ўйини, хатти-ҳаракатлари кишида беихтиёр кулги қўзғатарди. У атай базмни бошлаб бериш учун гулхан атрофида бир-икки айланиб, навбатни ёшларга берди. Келин билан бирга келган меҳмонлар, қиз-жувонлар стол устига қўйилган ноз-неъматларни гуногун ейишар, кимлардир қимиз, кимлардир уялинқираб озгина бўлса ҳам вино симиради. Баъзан ўйин, гижбанг тўхтаб, шаҳардан чиқсан пурвиқор бир хонанда шосупадан ашула қилиб қоларди. Каттадан-кичик жим тинглашар, аммо стол юқорисида келин билан куёв атрофида ўтирган шўх қизлар мақомнинг узоқ давом этишига тоқат қилолмай, яначувиллашиб кетишарди. Базмга келаётган меҳмонларни дарвоза олдида тавозе билан кутиб олаётган ота гоятда кайфи чоғ, ҳовлида, ёшлардан сал четроқда — хонандалар ёнидаги чорси каравотда ўтирган бир гуруҳ меҳмонлар ёнига дам-бадам бориб: «Хуш келибсизлар! Нима этишмайди?» — деб муловзамат кўрсатиб турарди.

Чоршанба отанинг катта ўғли Абдуманноп Чорвоқ қурилишида «БелАЗ» машинасини ҳайдайди. У қурилишдаги ўз ошналари ва бошлиқларини тўйга таклиф этган. Қишлоқнинг эътиборли кишилари қаторида,

қош-киприклари сап-сариқ, сергап, доимо лаблариди ёрилиб юрадиган Иван Иванович Шишкун (у яқинда қурилиш партия ташкилотининг секретари қилиб сайланди), СУ-2, яъни тўғон қурилишидаги участка бошлиғи Қоражон Мингбоев ва яна шаҳарлик қаддиқомати келишган, хушбичим бир йигит — учовлон қўр тўкиб ўтиришарди. Бу йигит инженер Қиёмхўжа Ҳазратов бўлиб, Қоражоннинг бирга ўқишиган ошнаси. Ҳозир Узгидроэнергострой трести бошлигининг ўринбосари.

Шаҳардан чиқиб қолган дўстини Қоражон қўярда-қўймай тўйга олиб келганди. Ҳовлига киришлари биланоқ одамларнинг диққати уларга қаратилди — баъзилар уларни облости раҳбарларидан деб ўйлашди. Қоражон кечак дўсти Қиёмхўжани ўз қишлоғига олиб ҳам борган эди. Бурчмулла, Юсуфхона, Бофистон, Нанайни кўрсатди. Тепаликларга чиқиб, Чотқол водийсини, табиат гўзалликларини томоша қилишди. Ёнқўргонда дўсти шарафига қўй сўйиб, меҳмон қилди. «Беш юлдуз»ликлар обдан ичилди. Бугун деярли ўша зиёфатнинг дағоми бўлаётгандай...

Инженер Қиёмхўжа Ҳазратов камгап, сипо одам, унча-мунча гап билан уни кулдириш қийин. У бирон нима демаса ҳам, киши ундан ҳайиқиб туради. Лекин ҳаммага эмас, ёнида ўтирган Шишкун билан Мингбоевга гап қотар, тикилиб турган нигоҳларга ўзини яна ҳам эътиборли, пурвиқор кўрсатишга уринарди.

Уч оғайнини бир-икки рюмка бўшатишгач, кайфлари чоғ, «ман сизга айтсан...» бўлиб қолишидди. Шўрвадан пуфлаб ҳўплашар, калла-гўшт, думғазаларни ёқтирадиган Қиёмхўжа билан Шишкун лаганга пайдар-пай қўйл узатишарди.

Тўрда, келиннинг ёнида ўтирган қийиқ қўз, бодом қовоқ, кўринишдан анча шўх бир қиз Қоражон диққатини ўзига тортиди. У бир-икки бор ўша момақаймоққа қараб қўйди. Унинг қилиқлари ўзига ярашиб турибди. Ёқимли. Гўзал қиз аввал ўзига қадалаётган бу нигоҳларни — «тийр борон»ни унча сезмаган бўлса ҳам, бир муддатдан сўнг пайқаб, ўнг томонда ўтирган ўша қора йигитга ялт этиб қараб қўйди. Қизнинг қарашлари ўткир эди. Бу лаҳза Қоражон ҳам ҳеч нарсани сезмагандек ва «гўзал қиз»га шунчаки кўзи тушиб қолгандек бепарво ўтириди. Ҳа, киши гўзалликка қарайди-да! Бундоқ бир-икки марта қараб қўйган бўлса нима бўпти! Эҳтимол, унинг қулоғидаги ёниб турган ёқут

сирғасига қарагандир! Лекин, ҳар қалай, ўнг томонда қатор ўтирган йигитлар ичидан бир йигит келиннинг дугонасига тикилиб-тиклиб қўярди. Аслида Қоражон ўша қийиқ кўз, мажусийларга ўхшаган қиздан ҳеч кўзини узгиси келмасди.

— Анави ўнг томонда ўтирган киши мендан кўзини олмаяпти,— деди ғижиниб қиз ёнида ўтирган дугонасига,— таъвияга бир қараб қўй! Маданиятсиз! Худди безориларга ўхшайди.

— Қайси бири?— сўради пучуқина иккинчи қиз секин билинтирмай, ўша томонга қараб,— бизга ҳеч ким тикилаётгани йўқ! Тикилса тикилаверсин, мен парво қилмайман!— деди бу тикилиш дугонасига эмас, ўзига қаратилганини қатъий эътироф этиб.

Бир лаҳзадан кейин ўша қиз пойлаб туриб, ўнг томондаги ўзларига тикилиб қараб қўяётган йигитни «ушлади».

— Ҳа, тўгри!— деди у дугонаси қулоғига шивирлаб,— у менга тикиляпти. Сенга эмас!

— Ҳар қалай, одобсиз кишига ўхшайди,— деди у,— эҳтимол, уйда хотини бордир! Хотинини уйга ўтқазиб қўйиб, кўчада кўзлари олма-кесак терадиган кишилардан жирканаман!

— Бўйни, юзлари чандиқ-ку?! Вуй, одам қўрқади!— деди дугонаси астойдил Қоражонга тикилиб,— қарагин, бир хунук, лаблари ҳам тўрсайган, тишлари ям сўлоқмондай... Шу аҳволда мунча тикиляпти-я! Бўйни чандиқ — лунжига от тепганми?! Ҳи-ҳи-ҳи-ҳи!

— Ха-ха-ха-ха!— қийиқ кўз беихтиёр кулиб юборди,— ўша от сал берирогига тепганида кўр қилиб қўя қоларди-ю, кўча-кўйда хотин-қизларга тикилмасди!..

— От тепганга ўхшамайди!— деди пучук.

— Нимага ўхшайди?— қиқирлаб, оғзини бекитиб кулди қийиқ кўз.

— Юзини бир томони ямоқ, бўйни, қулоғи чандиқ... Вуй, одам ҳам шунаقا хунук бўладими?! Тушимга кирса қўрқиб чиқаман. У нега ҳадеб бизга қарайапти? Жуда ҳам турқи совуғ-а! Юзлари йўлбарсга ўхшайди-я,— деди яна қиз ҳаяжонланиб.

— Қўрқма!— деди қийиқ кўз дугонасига далда бериб,— бу ерда адам борлар, амаким ҳам бор! Мен ҳеч нарсадан қўрқмайман!

Чандиқ йигит ҳадеб тикилаверга, қийиқ кўзли қиз унга қараб лабини чўччайтириб, тилини чиқарип

кўрсатди. Бу билан у Қоражонни масхара қилиб! «Менга кўп тикилаверма!» — дегандек бўлди. Қоражон индамай, мийигида кулиб қўйди. Қизга ўзининг асло ёқмаётгани ва ҳатто кўзига хунук кўринаётганини пайқади. У беихтиёр ўша гўзал юзга яна бир қараганида, қийиқ кўз ўз башарасини бужмайтириб, бурнини жийирди. Бу энди жуда ҳам ёқмаётганини билдирувчи аломат эди. Ширакайф Қоражон ўзининг беихтиёр қарашлари билан унга озор бермаслик учун ёнидаги ошналарига узр айтиб, ўрнидан турмоқчи, тўйдан чиқиб кетмоқчи бўлиб турган эди, ундан олдин ўша қийиқ кўз икки дугонаси билан ўрнидан дик туриб, тўйхонадан чиқиб кетди. У юзини тескари қилиб, Қоражон ўтирган томонга назар ҳам солмади. Қоражон єу ҳолни кўриб жуда афсусланди. Уларга суқли соқишилари билан тинчлик бермаганидан хижолат бўлди. Лекин ўша қийиқ кўз бир кўришдаёқ жигаридан уриб, юрагига оташ ташлаган эди. Дунёда шундоқ чиройли инсонлар борлигидан жуда қувонди. Қизлар тўйдан чиқиб кетаётганида Қоражон атрофида ўтирган йигитчалар ҳам уларнинг қадди-қоматига суқ билан тикилишди. Йигитчалардан бири бу гўзал Милтиқбой аканинг қизи Гулгун эканини айтди. Қоражон ўша йигитчанинг оғзига жон қулоғини тутди:

— Кимнинг қизи дединг, ука?

— Милтиқбой акамларнинг қизлари-да! — кулди йигитча.

— Шу қишлоқданми?

— Ҳа.

Қоражон Гулгуннинг кетидан тикилиб қараб қолди. У жуда ўксинди; ҳамма баҳтли, ҳамма ўз хотини билан қўша қарип юрибди. Биргина унинг омади келмаган. Мана, Шишкиннинг Галина деган доно хотини бор. Ҳазратовнинг хотини — Гулбадан ҳам ниҳоятда чиройли ва ақлли аёл. Гулбаданнинг латофатию уй тутишларини кўрган Қоражоннинг бу оиласга ҳаваси келган эди. Ширин сўз, озода, кийинишни ҳам яхши билади, овқат пиширишни ҳам. Бу хонадонда бақириқ-чақириқлар, бир-бирини ҳурмат қилмай сўқинишлар йўқ, аксинча, Гулбадан ўз эри — инженер Ҳазратовга ишонар, суюнар, болаларимнинг отаси, деб ҳурмат қилас, Қоражон уларникона бўлганида буни пайқаган эди. Гулбаданхон данғиллама уйларнинг бекаси бўлиб, кўпроқ бола боқиши, эрига овқат тайёрлаш билан банд эди. «Менга ҳам шундоқ бир ҳаловатни, шундоқ бир

яхши хотинни буюра қолса нима бўларди...» дерди баъзида ошналарига ҳаваси келиб Қоражон.

Орадан бўрон ҳафталар ўтгач, Қоражон Мингбоев Писком дарёсининг суви кўтирилиши ҳамда шу атрофдаги хонадонларни кўриш мақсадида қурилиш бошлиғининг топшириғи билан Сижжакка келиб, «Милтиқбой аканинг қизи Гулгун»га ҳам йўлиқди. Лекин Гулгун бир оғиз сўз демай, ҳайрон бўлиб турди. Қора йигитнинг гапи гапига қовушмай, рўпарасида маҳлиё бўлиб турга бергач, уялиб уйга кириб кетди. Жигаридан урган Қоражон нима қилишини билмай, кўчада лол қотди. Лекин у шу Гулгунни тўйдан сўнг яна бир бор кўрганига ҳам хурсанд бўлди. Унинг исми ҳам ажойиб экан. Қоражон «Гулгун» деган номни ҳеч эшишмаган. Бундоқ чиройли исмни қаёқдан топишганига ҳам ҳайрон. Демак, бир зиёли хонадондан бўлса керак, деди. Унинг кимлигини билишга жуда қизиқди. Кейинчалик юраги сиқилиб, бу ҳақда Абдуманнондан сўради. Сўрамасликнинг ҳеч иложи бўлмади. Кечалари шу қийиқ кўз «мажусий» ҳақида ўйлай бошлади. Юрса ҳам, турса ҳам кўз олдида ўша... ярқираб кўрина бошлади. Уни гойибона яхши кўриб қолганига ўзи ҳам иқрор бўлди. Кишининг бир кўришда шайдо бўлиб қолиши шу бўлса керак, деди у ўзига-ўзи. Киши кимгадир юрагидаги ҳасратини айтиб, кўнглини бўшатиб олиши азалий одат. Одам тафтини одам олади, дейдилар, бусиз мумкин эмас. Бирон қадрдан кимсаси йўқ киши бўлмайди. Машойихларнинг айтишича, қадим замонда бир одам хамирдан қўғирчоқ ясаб, курси четига қўққайтириб ўтқазган. У юрагида дарди кўпайганида, ҳасратини шу хамирдан ясалган одамга айтиб, дилини бўшатган. Кунлардан бир куни унга нимадир тегиб, ерга қулаг тушган. Шу атрофда ўйнаб юрган бир кучук боласи югуриб келиб хамирни тишлагани ҳамон тил тортмай ўлган. Бу хамир алам рутубатини ютавериб заҳри-қотилга айланиб кетган экан. Қоражон бу латифани Абдуманнонга айтиб бериб, бу билан унга бир нима демоқчи бўлган эди.

Қўёш нурларининг инсон танига тушиши, табиатни — дарахту гиёҳларни кўриш, ер устида соғ-саломат қадам ташлаб юриш, одамлар билан гаплашиш, ишлаш — қандай баҳт! Бунинг қадрига етмайдиганлар ҳам бор — улар на офтоб нурларини, на табиат гўзалликларини кўришдек баҳтдан бебаҳрадирлар! Бунинг қадрига етмайдиганлар бор.

Қоражон ўлжага қолган умрини мазмунли кечириш, беҳаловатликни ёқтирмай, босиқ ва осойишталык билан умр ўтказишни афзал кўради. Баъзилардек шуҳрат кетидан қувмас, ўз умрию кунларидан қаноат қилиб, яхши ишлаб, ҳаётда нону насибасини териб юришдан бошқа нияти йўқдек эди.

Аммо...

Тоғ оҳуларидек ўйноқи Гулгуннинг жоду кўзлари уни сеҳрлаб қўйди. Шунча вақт уйланолмай, ёши ҳам ўтинқираб қолган ёш инженер Қоражон Мингбоев ўша қийиқ қўз ишқида оҳ ура бошлади. Ҳуснисизлик баланд девор бўлиб, ўтолмасди. Унинг ҳаловати бузилиб, беҳаловат кунлар бошланди...

II боб

ТОҒДА ЖАЛА

Ҳа, унинг ҳаловати бузилиб, беҳаловат кунлар бошланди...

Яна кўклам.

Бу йилги кўкламда ёғин-сочин кам бўлиб, ҳаво қуруқ келди. Ҳамма жойда ўт-ўлан ёзниңг ўртасидаёқ жизганак бўлиб қуриб кетди. Тоғ этаклари, қирлардаги буғдою арпаларгача қовжирај бошлади. Ҳар йили қир ён бағирларидан чорва учун қишига хашак тўпланарди. Чотқолу Чимён водийларидагина эмас, Оқсоқота, Кўксув, Писком, Угом, Қоронқулсой, Оқтош, Саргардон, Оқбулоқ тепаларида ҳам ёз бўйи пичан ўриш қизгин борар. Ҳамма ёқда хўroz бир хил қичқи-парди; Ғалвасой атрофларида мол емайдиган эрмана, кийик ўт, итсиyr, талха, қизилмия, карнайгул каби доривор ўтлардан бўлак гиёҳлар қуёш тафтида қовжираб кетган. Ёмғир бўлмаганидан қўнғирбош, ялтирибош, буғдойиқлар кўкламдаёқ қуриб битди. Қизгалдоғу сариқ лолалар ҳам кам бўлди. Бунинг ўрнига бўзnoch, қариқизга ўхшаган, тиканакли каррак, турли-тумчн бўтакўзлар гуллаб ётибди. Ҳиди чўл ялпизига ўхшаган, барги кумуш қизилпойга ҳар қадамда учрарди. Сертуқ айиққулоқ, зангори туслаги авруклар ҳам кўп. Гуллари кунгабоқарга ўхшайдиган андиз, соябон гуллилардан «чайир», тулки қуйруқ, ширач, гулхайри ҳамда пушти, оқ наъматаклар одатдагидек гуллади. Баландликларда дўланаю учқатлар ҳам кўкариб кўзга

ташланади. Лекин улар тогу қирларга ҳусн бўлиб, яшнатиб тургани билан намгарчилик бўлмай, барра ўтларнинг жизғинақ бўлиб кетгани тоғликлар кўнглини гаш қилган эди. Ёгин кам бўлганига қарамай доривор эрмана кўп ўси. Бу гиёҳ қадимдан маълум бўлиб, оғату кулфатдан сақлар, сафарга чиққан кишилар чарчамаслик учун уни оёққа ҳам боғлаганлар. Ибн Сино иштаҳа очишда, асаб, безгак ва бош оғригини даволашда ундан фойдаланган. Ҳозир эрмана гиёҳи қайнатилиб, қорин шиши, меъда ҳамда ошқозонни тозалашда ишлатилади. Қуриган эрманани қишида мол лагмон егандек иштаҳа билан туширади. Гулидан асаларилар аримайди... Хуллас, эрмана гиёҳи Чотқолу Чимёнда шу даражада кўпки, дунёнинг ҳеч ерида бунчалик эмас.

Тоғлар гўзал, аммо улар қуруқ савлат бўлиб турмай, инсонга хизмат қилиши керак. Ўлкамиздаги бебаҳо тоғларимизни соғин сигирга қиёс этса бўлади. Бу улкан тоғлар минг йиллар мобайнида элни боқиб келмоқда. Ҳатто инсон қадами етмаган, фалакка бўй чўзган Чотқолнинг Обиқашқа чўққилари ҳам кийик, қоплон, какликларга паноҳ бўлиб келмоқда. Тоғлар инсоннинг дўсти! Ёз ниҳоятда иссиқ бўлди; тепаликлар устида жимлик ҳукмрон, фақат иссиқ қуёш тафтида юқори волътили электр симлари товушидек тинмай визиллаб ётадиган ҳашаротларнинг овозидан бўлак товуш йўқ. Жазирамада қадам босишингиз билан ғишлон чигиртканинг «ғишлон-ғишлон» деган овози чиқади; бу овоз «Ишланг! Ишланг!» деган хитобга ҳам ўхшашиб кетади.

Бир иссиқнинг бир совуғи бор, деганларидек, куз кириши билан водийда ёгин-сочин кўпайиб кетди. Осмонда бақироқ түясимон булултар карвонининг кети узилмасди. Табиатнинг ёқимсиз қилигини кўрингки, шу намгарчиликлар баҳорда бўлмайдими?!

Қовоқ солиб турган қўнғир булултар чоршанба куни кечга яқин томчи ташлай бошлади. Шамол ғувиллаб, йўлларда тўзон кўтарилиди, шатирлаб ёмғир ёға кетди. Газалкент бекатида, асфальт йўл четида турган икки аёлнинг рўмолларини, устидаги кийим этакларини торткилаётган шамол бўрига ўхшаб увиллар, айланиб келиб яна ҳужум қиласарди. Ёмғир кучайди. Йўл четида улардан бўлак ҳеч кимса йўқ. Кенг водийда фақат ёмғир ҳоким. Узоқ-узоқларда симрайиб, чордана қуриб ўтирган баланд тоғлар ҳам ёмғирни томоша қила-

ётгандек. Улар йўл четида шамолга таланиб, ёмғирда ивиб турган икки аёлга бепарво боқардилар. Қош қорайиб қолгач, ёмғир жалага айланди. Бирон машина ўтиб қолишидан умидвор бўлиб, йўлга нигорон турган икки аёлдан бири устидаги плашини ечгач, икковлари бошларига соябон қилишди. Узоқда икки кўзини ялтиратиб, куч билан гуриллаб келаётган машина кўринди. Соябондан чиққан ёш жувон йўл ўртасига тушиб, қўл кўтарди. Унинг кўйлаклари баданига чиппа ёпишган, соchlари ҳам юзи билан битта, ҳозиргина сувга пишиб чиққанга ўхшарди. Машина яқинлашгач, у ўзини четроқда олди. Улкан машина тўхтамай вағиллаганча ўтиб кетди. Унинг устига чўян қувурлар ортилган, кабинада ҳам тиқилиб уч киши ўтиради.

— Қайтиб кета қолайлик, Гулгун! — деди тугунини қучоқлаб, ивиб турган аёл, — мана, бир соатдан берি турибмиз. На автобус бор, на биронта ўткинчи машина...

— Бир оз турайлик, опажон! — деди узоқдан машина овозини эшишган қизи яна асфальт йўл ўртасига тушиб. У одатдагидек қўл кўтарди. Яна юк машинаси вағиллаганча ўтиб кетди. Унинг ҳам усти тўла кабель, темир-терсаклар... Гулгун яна жойига қайтди. — Э, ўлсин, яна юк машинаси экан! Ҳаммаси Чорвоққа ўтяпти. Наҳотки, биронта автобус ўтмаса!

— Ўйимиз олис, кел қизим, қайтиб кета қолайлик. Мана, ивиб кетдик, — деди титраб аёл, — бугунчалик бувингларницида ётиб қоламиз. Эрта билан ёмғир тинса, Сижжакка жўнаймиз.

— Мен сизга, барвақтроқ кетайлик, дедим! Ўзингиз ивирсиб, мана, жалага қолдик! — деди йифлаганга ўхшаб Гулгун.

— Бу худонинг хоҳиши, қизим. Айб менда эмас. Ҳадеганда ошни олиб келиша бермади. Ахир, бошқалар ўринларидан қўзғалмагандан кейин биз ҳам туролмас эдик-да! Чақириқ ҳам шунаقا бўладими-ю! Рихси кенайингнинг ўзиям ўлгудай имиллаган. Мен унга неча маротаба айтдим, ҳой, келинпошиша, биз Гулгуной билан узоққа борамиз, ошингизга гуручни барвақтроқ солинг, деб! Тепса-тебранмас бу Рихсихон бўлса, ҳа, ҳозир бўламан, опогойи, деб мана, бизни жалага қолдирди. Дунёда одамзод сал чаққонроқ бўлса-да! Бунақа ивирсиқларни кўрсам юрагим сиқилади. Айтганча, ойимницида ётиб қолайлик, десам, аданг хавотир олиб, бир нима бўлдими, деб қўлтиқтаёқда қидириб келиши

тайин. Адангга, пешинга қолмай қайтиб келамиз, деган әдим. Укангдан ҳам кўнглим тинчимаётиби, томоги оғриб, сал иссиги чиқиб турган эди...

— Бунаقا экан, шунча ўтириб нима қиласардик!

— Қариндош-урӯчилик келди-кетди билан, қизим! Бир-биримизни шунаقا йигинларда кўрмасак қачон кўрамиз? Ётлашиб кетамиз. Яхши ҳам бувинг бор, агар у киши бўлмаса, тогангникига борармидик! Кимга зарур келибди! Ўша кишининг ҳурмати учун келдик-да, шундан шунга. У киши дунёдан ўтиб кетса, қариндош, ака-укалар бир-бирларининг ҳолидан хабар олармикан?

Ивиб, эти жунжикиб турган Гулгун миқ этмади. Онасининг ўгитлари қулоғига кирмасди. Унинг тишлари такиллаб, қалтирай бошлади. Жала авжга минди, ҳудди челаклаб қуярди. Гулгун яна ўша меҳмондорчиликка қайтиб кетишга ноилож рози бўлай деб турганида Чорвоқ томондан келаётган машинага кўзи тушиб, жаҳл билан қўл кўтарди.

— Бу машина Чорвоқдан келяпти-ку? — сўради онаси, — бизга бу ёқдан — шаҳардан чиқаётган машиналар керак эмасми?

— Энди барибир! — деди Гулгун титраб, қўлини ҳавода силкитар экан.

Машина прожектори Гулгунга тушди. Жалада икки кўзи ёниб, Гулгун ёнидан вағиллаб ўтиб кетган машина нарироққа бориб тўхтади-да, орқасига тисарилиб, жалада ивиб, титраб турган қиз ёнига келди.

— Биз жалада қолдик! — деди Гулгун газик эшигини очиб. Шоффёр рухсат берса-бермаса ҳам машинага чиқа бошлади.

— Кўриб турибман, — деди шоффёр йигит.

— Айнаниб кетай, болам, бизни машинанизга олинг! — деди югуриб келган Санобархон ҳам, — бизни Сижжакка олиб бориб қўйинг. Илоҳим, барака топинг!

— Марҳамат, чиқинглар! — деди йигиг чекиб турган сигаретини кўчага ташлаб. Машина ичи қоронги бўлганидан бир-бирларини яхши кўриб бўлмас эди. Она-бона орқага чиқиб ўтириб олишгач, машина кетига бурилиб, шиддат билан келган томонига елиб кетди. Ёқасини кўтариб, шапкасини бостириб олган шоффёр бир-икки орқасига қараб қўйди. Машина тепасидаги ойнасини ўзи билан ўзи овора бўлиб қолган қизга тўгрилаб қўйди. Машинага чиқиб олганидан хурсанд бўлиб кетган Санобархон шоффёр йигитга миннатдорчи-

лик изҳор этиб, кечикиб жалада қолганларни, Рижси-хоннинг ошни тезда олиб кела бермагани, уйда инвалид эри — Милтиқбой ака безовталанаётгани, ўғлининг томоги ангина бўлгани... бари-барини гапириб берди. Милтиқбой ака номини эшигитан шофёр йигит яна бир орқасига қараб қўйди.

— Илоҳим, умрингиздан барака топинг! Газалкентликмисиз, иним?

Йигит бош чайқади.

— Хондайлиқдан бўлсалар керак? — Ўулгун рулда ўтирган йигитнинг тепадек кенг елкаларига қаради. У қанча ҳаракат қиласа ҳам шофёрнинг юзини кўролмади. У костюми ёқасини қайнириб, шапкасини бостириб олган эди,— ёки Сойликданмисиз? Чимбойликдан эмасмисиз?

Гулгуннинг жўрттага савол бераётганини сезган йигит қисқагина жавоб қилди.

— Шу ерлик. Чотқол томонданман,— деди.

— Хумсонликлар камгап бўлади, дейишади. Йўлингиздан қайтардик, хафа бўлмайсиз-да,— совқотган Гулгуннинг дилбар овози титроқ янгради. У миннатдорчилик туйғуси билан елкадор йигитга боқди. Нотаниш йигит талаффузининг тиниқлигидан хондайлиқликка ўхшарди.

— Зарари йўқ,— деди йигит пинагини бузмай. Унинг икки кўзи йўлда. Югуриб чарчамайдиган чайир машинаси дам тепаликка, айланма йўллар оша дам пастликка, кишининг нигоҳи тушса юрак шигиллаб кетадиган жарликлар ёқасидан ўтиб, яна кўтарилиб қоларди. Тинмай жала қуяр, машинанинг икки ён томонидаги ойнасидан шариллаб сув оқар, олдинги ойнага урилаётган жала тарновдан тушгандай шариллар, машина кўзларидан тушиб турган нурда ярқирав, орачора чақмоқ чақиб, момақалдироқ гумбурларди.

— Шундоқ жалада «чақириққа» боришни бизга ким қўювди! — Санобархон ўртадаги жимликни бузиб койинди.

Йигит яна индамади. Машина эчкига ўхшаб тобора баландликларга кўтарилиарди. Баланд тепаликдан шофёр йигит ўнг томонидаги пастликка қаради; пастликда айқириб, буралиб, дам тоғ қоялари ичига кириб, дам сайҳонликда ёилиби оқаётган дарё чақмоқ ярқирашида кўзга ташланарди. Унинг устидаги омонатгина қурилган Эшаккўприк ҳам бир лаҳза кўринниб кетди. Қия, айланма йўлларда кўп юрганига қарамай, йигит

жуда эҳтиёткорлик билан машинани олиб борарди. Бундай баландликларда салгина эҳтиёtsизлик даҳшатли фожиага сабабчи бўлиши мумкин. Негадир у, баъзи шофёрлардек, машинасига чиққан чиройли жувонга ўзини кўрсатиш учун қуруқланмасди. У миқ этмай борарди. Бу ҳол Гулгунга гайри табиий кўринди. Аксар у бирон бегона машинага тушиб қолса, йигитлар ўзини кўрсатмоқчи бўлиб унга тинмай гап отишарди. Ҳатто ичи одамга тўла автобус ҳайдовчиси ҳам «гўзал жонон»га бир қараб қўйгач, жиндак ҳунар кўрсатарди. Негадир бу нотаниш йигит босиқ, хомуш кўринарди. Бироннинг ичидагини билиш қийин, гапирмаса гапирмас, шундоқ жалада бағритошлиқ қилиб уларни ташлаб кетмади-ку! Ёки бола-чақаси кўп, аёлманд одам бўлса, беш-тўрт сўм пул ишлаб олай, деб йўлидан қайтдимикан? Ёки нияти ёмонроқ одам бўлса-я? Миқ этмай кетиши Гулгуннинг юрагига ваҳима солди, жарпар оралиғида пичноқлаб кетса-чи? Босқинчилик қиласа-я? Онаси қўлидаги тугунни қимматли бўхча деб ўйламаслиги учун унинг нон, қанд-қурс эканини билдириб қўйди. Эҳтимол, у кун бўйи ишлаб, жуда чарчагандир. У ўзини яхши танитиб, «хавфли» кўринган одамнинг андак бўлса ҳам раҳмини келтириш ниятида онасига мурожаат этиб, укасининг томоқ оғриғи бўлгани, кечак босинқираб чиққанини тилга олди. Ундан сўнг, «фронтчи адаси»нинг бундай ёмғирли кунларда қирқилган оёқ учлари, ўқ тегиб яраланганди кифтлари зирқираб оғришини, у дори ичиб ўралиб ётишини айтди. Фронтчи инвалид адасига ўзи укол қилиб қўйишини ҳам гапирди. Илгари адаси ўзига-ўзи укол қиласди. Лекин кейинги пайтларда қизининг жуда яхши укол қилиши, бу ишнинг машҳини олганидан хурсанд эканлигини ҳам гапирди. Шофёр йигит ҳамма гапни эшитарди-ю, лекин индамасди. У Гулгуннинг отасига ўзи укол қилиши, ўзининг врач бўлишини орзу қилишига-ча билди. Лекин гапга сира аралашмай машинасини ҳайдаб кетаверди. Ўртага яна узоқ жимлик чўқди. Машина гуриллаб борар, қоронғида дам у ёққа, дам бу ёққа бурилар, уч киши ўртасида жимжитлик собит. Ташқарида чақмоқ чақиб, момақалдироқ гумбурлар, бир соатлардан буён тинмай жала қуярди...

Бир муддатдан сўнг машина тўхтади. Гулгун билан Санобархон бирон жарлик ичida тўхтамадими, деб хаёл қилиб, шофёр йигитга ваҳима билан қарашди.

— Марҳамат, етдинглар! — деди шофёр йигит ўтирган ерида пинагини бузмай.

Санобархон машина ойнасидан кўчага қаради: ҳа, дарҳақиқат, ўзларининг дарвозалари ёнида туришарди. У эшикни очиб, пастга тушди.

— Гулгун, қизим, ҳалиги пулни бер! — деди Санобархон ерга тушиб олгач, машинадан чиқиб келаётган қизига.

Гулгун костюми чўнтағидан пул олиб йигитга узатди.

— Катта раҳмат сизга! Мана буни олиб қўйинг...

— Йўқ, овора бўлманг.

— Олинг, ўғлим, умрингиздан барака топинг, ҳожатимизни чиқардингиз. Бер, Гулгун, пулни узат! Дунёда сиздек инсофли, диёнатли одамлар борлигига шукур, олаверинг, ўғлим! Агар камлик қиласа, ҳозир югуриб кириб, уйдан олиб чиқамиз.

— Ола қолинг,— деди Гулгун қўлини узатганича.

Йигит Гулгун қўлидан ёмғир тегиб ивиган пулни олди-да, гимнастёркаси чўнтағидан дафтарчасини олиб, қатига солиб қўйди. Шу лаҳза у андак ўгирилганида, Гулгуннинг кўзи унга тушиб, юраги шиғиллаб кетди; бу юзи чандиқ кишини қаердадир кўрган эди! Йигит пулни олди-ю, Гулгуннинг ўзига тикилиб қолганини сезиб, хайр, деди-да, яна машинасини гурйлатиб жўнаб қолди...

Гулгун уйига киргунча ўйлади. Бу йигитни у Абдуманноп аканинг тўйида кўрган экан... Унинг кўз олдида ўша чандиқ кимса пайдо бўлди. Яна икки нарса хаёlinи қамраб олди: биринчидан, адресларини айғасалар ҳам тўппа-тўғри ўз эшиклари ёнига олиб келгани, иккинчидан, Ғазалкентда, автобус пойлаб турганларида атай келиб машинага олиши... Ниҳоят, ўз юзига тушган ўткир нурда у одам албатта уни таниғанлигини ва машинада юзини кўрсатмай, индамай келишида сир борлигини пайқади. Бу воқеа ҳам тасодиф, ҳам сирли эканини билди. Гулгун қисқа гапларни, ишорани ёқтирарди. Пардали гаплар, лутф билан фикр баён этиш унга ёқар, узоқ алжийдиган, такрор-такрор гапирадиган, ўз фикрини лўнда қилиб тушунтиролмайдиган кимсалар олдида юраги сиқилар ва тезда туриб кетгиси келарди.

Ҳамма нарса китобларда ёзилганидай бўлавермас экан, ҳаётда баъзан кутилмаган воқеалар ҳам содир

бўладики, сиз бош чайқаб, бундай бўлиши асло мумкин эмас, дэёлмайсиз. Ўша кеча тўйдан чиқиб кетган Гулгуннинг зардаси узоққа бормади, улар — икки дугона кўчада бир са юриб, юқориликка кўтарилишгач, «чандиқ юзли сдам»нинг тикилиб қараганлиги эсларидан чиқиб, ўзларини қизиқтирган мавзу — янги кўйлаклар, институт ва бошқа гапларга ўтиб кетишган эди. Ўйга қайтгач, Гулгуннинг кўз олдига яна лоп әтиб ўша одам келди. Уни «ғар кўз»ликда айبلاغан эди. Ҳар қалай, «ахлосқи помиза» одам эмаслигини, бундай қўрқинчли кишилар Сижжакда қаёқдан пайдо бўлиб қолганини ҳам ўйлади. Балки бунинг аксиdir; баъзан ношуду беомад кишилэр шундай тўрт томонга тош отиб юрадилар... Ҳаётда атрофингиздаги кишиларнинг феълу атвори, хатти-ҳаракатини кузатиб борсангиз, дудуқлар кўп гапиригни яхши кўришлигини сезмай иложингиз йўқ. Ҳаёт қизиқ, хотин-қизлар устидан кулиб, ишратни кўп гапирадиган, мақтанчақ кимсалар аслида бу масалада ожиз эканлиги кўпдан маълум. Кал тароқни, қўрқоқ йўлбарсги, дудуқ нутқ сўзлашини яхши кўрганидай, кишидаги сжизлигу етишмовчилик доимо ўзини кўрсатиб туради.

Ўша чандиқ, дўлсег одам Гулгуннинг тушига кириб, қўрқитди. У дам ай ёқ, дам йўлбарсга ўхшаб, кенг далада срқасидач қузлағмиш. Кошиб кетаётган Гулгун шунча интилгани билан олдинга босолмасмиш. Йўлбарс қиёфасидаги одам бўкириб, чопиб келармиш. Гулгунга ташланганида у бақириб, уйғониб кетди. Қараса, қора терга тушиб кетибди. Ёстиқдан бош кўтариб, яна ўша чандиқ, «барзангি» одамни ўйлади. У тушига кириб, қўрқитганидан таажжубга тушди.

Шу кеча Гулгуннинг лабларига учук тошиб чиқди.

Кийиниб, шай бўлиб, «тойча»сини (Милтиқбой ака қўлтиқтаёғини шундай атайди) ушлаб турган ота Санобархон билан Гулгуннинг кириб келишаштаганини кўриб хурсанд бўлиб кетди. У яна жойига ўтириб, юрагидаги ғулгула ғуборини ўчирди. Чекди. Лекин барибир унинг чап мўйлови лип-лип уча бошлади. (Асаби бузилиб, диққат бўлган ҷоғлари шундай бўларди.)

— Ҳа, нима бўлди?

— Автобус келавермай, жалага қолиб кетдик,— деди Санобархон,— ойимлар-ку майли, бу Рихсхоннини имиллашини айтмайсизми! Акам бечора умр бўйи шу шалтоқ хотинга чидаб келяптилар. Ҳай-ҳай, унинг гапларини эшитмабсиз, ғалтак ютиб, битта гапни бир соат-

да ҳам тушунтиrolмайди. Шу Рихсиҳон сабаб бўлиб, кечикиб қолдик...

— Сизлар келавермаганларингга энди ўрнимдан туриб Газалкентга бормоқчи бўлиб тургандим.

— Бахтимиз бор экан, шундоқ жалада бир яхши шофёр йигит учраб, олиб келиб қўйди. Сизнинг ҳурматингиз, сизни таниса керак, бир оғиз Милтиқбой ака фарзандларимиз, дейишимиз билан шу жалада кетаётган йўлидан қайтиб, кўчамизни айтмасак ҳам эшигимиз олдигача олиб келиб қўйди. Худо етказди уни бизга.

Кутавериб асаби бузилган Милтиқбой ака юрагини фахр қучди — собиқ фронтчини одамлар шунчалик қадрлаши — бу қувонч юракдаги диққатликни қувиб чиқарди.

— Боринглар, кийимларингизни ўзгартириб чиқинглар. Ивиб кетибсизлар. Шамоллайсизлар. Шўрва қайнатиб қўйдим...

— Илоҳим, барака топинг, адаси! Шўрва қайнатиб боплапсиз! — деди ичкари хонага кириб кета туриб Санобархон.— Ўғлингизнинг томоги тузукми?

— Уйда ётибди.

Гулгун жиққа ҳўл бўлган кийимларини ечиб, бошқасини кийди-да, кейин айвонга чиқди. Жала андак пасайган, лекин барибир тарновлардан сув шариллаб оқиб турарди. Ҳовли юзидағи ёмғир оқиб тушган гулхона марзалари тўлиб, кўл бўлган эди. У ичкари хонада ётган укасидан хабар олди. Ундан сўнг яна айвонга чиқиб, ёмғирга тикилди. Кечки ёмғирни томонча қилиб, хаёлга чўмган Гулгунни бехосдан онаси чақириб қолди.

— Шўрва совиб қолмасин, қизим!

— Хўп, ҳозир кираман,— деди у ичкари хонага қараб. Лекин унинг қаршисида ўша одам турарди. Нега у кетида юрибди? У чотқоллик эмиш. Назаридা Чотқол дараларидан келган бир қоплон унинг изидан юргандай...

Жала қандай яхши, ғубору рутубатни ютади, япроқлару ўт-ўланни ювади. Эртага ҳаво очилиб кетса, Асқартоғдан бош кўтарган қуёш ҳаммадан аввал кунгай Хумсону Сижжакни чароғон этади.

III боб

ҚАЛЪА ДЕВОРИДЕК ЖАРОҲАТЛИ БИР ЧЕҲРА ЁКИ УНИНГ КЕЧМИШ-КЕЧИРМИШЛАРИ

Эртасига ҳаво, дарҳақиқат, очилиб кетди. Асқартогдан бош кўтарган қуёш ҳаммадан аввал Хумсону Сижжакни чароғон этди.

Инженер Қоражон Мингбоев ўзини иш билан қанчалик алаҳситмасин, ҳеч иложи йўқ, ўша қийиқ қўз, бодом қовоқни бир кўришда севиб қолганига иқорор бўлди. У ўзига-ўзи ишонмасди: пахса девордай қалин кўкси пиёс пўстидек юпқа бўлиб қолдими? Ёки бу қиз сеҳргарми? Унинг турмуш қуриб, муросалари келишмай, қисқа вақтда ажралишганини ҳам эшилти. Ёши ҳам йигирма бешлар атрофида... Инженер Мингбоевнинг ҳам бодрингдек диркиллама, қирчиллама пайтлари ўтиб кетган. Лекин шу маҳалгача ҳеч кимни бунчалик севмаган эди. Унинг жигар-бағридан уриб, шайдо бўлиб қолди. У кўзини юмди, дегунча, хаёлан Гулгунни кўради. Унинг ёқимли қилиқлари, овози эшитилиб кетгандай бўлади. Қоражон каравотига бағрини бериб, ёстиқни қучоқлаб, изтироб чекарди; наҳотки, қизлар ҳаммадан кўп эътибор берадиган ҳусндан уни худо қисган! Унинг ҳам ўзига яраша ҳусни бор эди — у ўрнидан туриб, девордаги мактабда ўқиб юрган йиллари тушган фотосуратига тикилди. Ахир, бу... беомон, қонли жанг оқибати-ку! Ёшлигида у лўмбилилаган, қорамағиз, кўринишда ҳам бошқалардан ажралиб турадиган, ҳозиргидай хунук эмас эди-ку! Лекин ҳозир одамлар ичига кирса, унга бир ялт этиб қараб қўймайдиган кимса бўлмайди. Уни биладиганлар учун бу чандиқлар бир ҳусндеқ кўринади, аммо танимаганлар уни бедаво деб, назар-писанд қилмайдилар. Кейинги йилларда Қоражоннинг ўзи ҳам бунга анча кўнишиб қолган эди. У ҳамма вақт иш билан овора бўлиб, меҳнат билан ўзини ўзи овутар эди. Аммо, тўйдаги воқеа Қоражон Мингбоев ҳаётида кутилмаган бир бурилиш бўлди — одамлардан четроқда юрадиган бу дўлвор йигитнинг нигоҳи ўша Гулгунга тушиб, юраги жуда алғовдалғов бўлиб қолди.

Ўша куни Ҳўжакент, Сижжак довонларини кезиб, тоза чарчаган Қоражон, сўнг, тунда ўз уйига кириб келиб, бурчакда турган катта тошойнага қаради. «Мен бедавоманми? Мен шу даражада хунук одамманми?

Мен бирон кимсани яхши кўриб, ололмайманми? Мендан ҳазар қиладиларми? Наҳотки, ҳусн ҳамма нарсадан муҳим бўлса?! Қоражон бошига бостириб кийиб олган шапкасини диванга отди. Костюмини ечиб, ойна ёнига яна ҳам яқинроқ борди. У чап юзи ва бўйинларининг чандигига жон-жаҳди билан тикилди. Куйиб яримта бўлиб қолган қоши — қора булутлар ичига кираётган ойни эслатарди. Қўзнинг эгаси бор, дейдилар, ўшанда кўзи ҳам кўрмай қолиб, госпиталда очилган бўлса ҳам эти куйиб, кўз омон қолган эди. У яна ўзига-ўзи хитоб қилди: «Демак, мен бир бедаво одамман, мендан ҳамма қочади, мен севган одамимга етишишим мумкин эмас. Мен номига хотин деган кимса билан умр ўказишим керак... Мен текис йигитлар, чиройли қиз-жувонлар тўпига қўшила олмайман! Мендан ҳамма қочади! Узумнинг яххисини улар ейдилар! Ҳусн деган нарса фақат шунинг учун керакми? Мақсад, фақат «узум ейиш»дан иборат эмас-ку! Баъзилар мана бу ишни мақсад қилиб олган — биз фақат узум еймиз, давринг кепти, суриб қол, қабилида иш тутадилар. На ўқишида ва на ишда тайин бор. Вақт ўтиши билан бу ҳусн захкаш деворлардек шўралаб, нурайди...»

Машинадан тушаётган Гулгуннинг кўзи бехосдан унинг юзига тушиб, заҳраси учиб кетгани ҳам кўз олдидан нари кетмасди.

Қоражоннинг томоғидан овқат ўтмади...

«Мен бедаво эмасман! Бу гапни ўша қизга қандай тушунтирай?! Шиддатли жангда, танқ ичиде ёнганимни қандай айтаман. Ахир, онам шундай чандиқ тугмаган-ку! Урушга бормасдан аввал мен ҳам силлиқини йигитча эдим-ку!»

Бир карра нобоп одам қўлига тушган кимса ҳаммани ўша нобопга ўхшатади. Гулгуннинг назарида ҳамма йигитлар лўттибоз эди. Улар аввал муҳаббат изҳор қиладилар, ялинадилар, кейин... Улар фақат мақсадларига етгунча қадрдон. У ҳеч кимга ўхшамасди. Ўрта мактабни тугатгач, турмушга чиқди. Нобоп эридан тезда чиқиб кетди. Институтга киролмай, мана бир қанча йилдан бўён ота-онаси бағрида уй қизи бўлиб ўтирибди. Зеҳни ўткир, чиройли, шаддод қизнинг умри фақат ҳовли супуриш, дўппи тикиш билан ўтиши тўғрими?! У бирон ерда ишламайди. Абдуманнопнинг айтишича, қаллоб эри бошига қанча шўришлар солган... «Биз ўша Белоруссиянинг Бобруйск шаҳри ёнидаги қалин ўрмонда ё ўлим, ё ҳаёт, деб жанг қилдик. Сақлаб қолинган

бу бахтли ҳаётда ҳозир икки куч вақти-вақти билан тўқнашиб турибди; бири — меҳнат аҳли, софдил, ҳалол, юртга муносиб кишилар. Иккинчиси, ниҳоятда оз — қўл билан санарли бўлса ҳам кўзга ташланиб туради. Улар — текинхўрлар, фақат ўз шахсини ўйлайдиганлар... Улар тупроғимизнинг қаериладир ётиб гашимизга тегяпти, ҳаром ишга қўл уряпти. Уларнинг кўпчилиги буқаламундек терисини ўзгартириб, баъзан ювош ва кераклидек кўринадилар. Уларнинг ичи мараз! Мана, икки куч ўртасида жанг кетяпти. Лекин ҳеч қачон мен фронтда қон кечиб жанг қилганимни одамларга писандা қилган эмасман. Мен мингларча кишилар ичидаги оддий бир кишиман...»

— Ҳой, ўғлим, овқатинг совиб қолди,— деди хонага кирган Қандил буви ўғлининг ойнага қараб хаёл суриб турганини кўрэб,— тинчликми?

- Тинчлик, ойижон.
- Юз-қўлингни юв. Овқатинг совиб қолди, болам.
- Хўп бўлади.
- Анави ўртоғинг, телефон қилсан, деган эди.
- Садовниковми? Хўп, ойижон, албатта телефон қиласман.

— Шунча вақт ёмғир бўлмай, мана энди ўт боши қайтиб, қир-дала қовжираганда жалани қара! Бу ҳам худонинг марҳамати, болам. Бандасининг қўлидан нима келарди! Бу ёмғирларнинг ишларингга зарари тегмайдими?

— Йўқ, зарари тегмайди. Қор ёғсаям, ёмғир ёғсаям, саратон ёндирысаям бизнинг ишимиш тўхтамайди.

— Ҳа, ишқилиб, яхшилик бўлсин. Анзират буви тўсатдан қазо қилибдилар, қишлоқдан хабар келди. Болалари шошиб ҳолиб, ўлимлигимни суриширишибди. Сандиқдан олиб бердим. Магазинларда дока кўринса йигирма метр олиб қўй, болам. Эртаминан мошинангда мани қишлоққа ташлаб кет, ман энди бир-икки ҳафта ўша ерда бўламан.

— Хўп, ойижон. Бувини худо раҳмат қилсан!

Қоражоннинг бошидаги хаёллари учиб, яна қайтиб ташқарига чиқди. Юз-қўлини ювиб, кейин столга ўтиради. Қампир пиширган эт ва шилпилдоқдан озроқ еб, чой ичди. Унинг иштаҳаси йўқлиги, хаёли ўзида эмаслигини она пайқарди. Онасининг ўсмоқчилаб сўраганларига Қоражон ётиғи билан жавоб бериб, уни тинчишигга уринди. Ишидан бир хато чиқиб қолдимикин? Она хомуш ўтиради. У сўроқлар билан аниқлашга

ҳаракат қилиб кўрди. Ўглидан тайинли гап чиқмагач, чарчаб, ивиб келган фарзандини қийнамай жойини тўғрилади ва кириб ухлашга унади. Қоражон ичкари хонага кириб, каравотга ўзини ташлади. она кўзига ухлаб қолгандек бўлди. Аслида яна беҳудуд хаёллар уни ўз комига тортган эди.

Инженер Қоражон Мингбоев Чотқол дарёси қуи оқимида, тоғ бағридаги кичик Ёнқўргон қишлоғида туғилган. Унинг ота-боболари шу ерларда яшаб, чўпонлик билан умр ўтказганлар. Бобоси Мингбой чўпон бу ерликларга «Чирчиқ бува» номи билан ҳам машҳур эди. У етти ўғил ва бир қиз кўрибди. Қишлоқ Советида кўп йиллардан бери ишлайдиган Шамсиқамар деган сергап хотин ҳужжат беришда Қоратойинг нимаси, Қоражон бўлсин деб, қора тушь билан ёзib берибди. Шундан кейин «той» ўрнига «жон» бўлиб кетган. Маҳмадона, ўзбилармон Шамсиқамар яна кўпларнинг номини ҳам қотириб «тузатиб» берган.

Ана шу Мингбой бува наслу насабидан бўлган Қоражон басавлат, йўғон йигит бўлиб чиқди. Унинг лаблари шерникидек қалин, соchlари типратикан, муштлари сўйилдек залварли. У қорамагиз, ўткир кўзлари ёниб турарди. Бирон нарсадан тез жаҳли чиқмас, ошналари билан баҳслашганда ўзини тутиб турар, бекорга сўкиниб, тажанг бўлавермасди. Ёқалашиб қолса, рақибини тоза дўппослаб, чўзилтириб қўймагунча қўлидан ҳеч ким ажратиб ололмасди. Ишлаб чарчамайдиган, ўта соддадил бола эди. Юзлари гўштдор, семизлигидан уни «бўлис» деб ҳам аташарди.

Ипллар ўтди.

Улуғ Ватан урушидан қайтиб келган Қоражон Мингбоев Тошкент политехника институтига ўқишга кирди. Аввал бирорларнинг уйида ижара тўлаб туриб, кейин ётоқхонада яшаб, анча мashaққат билан ўқиди. Очин-тўқин қолишилар, фирром йигитларнинг «қишлоқи» деб камситишлиари, дарсларнинг мураккаблиги, туғилиб ўсан қишлоғини соғиниш... каби қийинчиликлар аевалига уни кўп қийнади, кейинчалик кўнишиб кетди. Имтиҳондан ўтиб, институтга кириб олсан бас, бу ёғи ванғиллаб кетаверади, деб калта ўйлаган экан. Неча бор ўқиши ташлаб кетмоқчи ҳам бўлди. Аммо қандайдир чидам юрагида событ эди, уни йўлдан қайтарди. Отасидан пул юборишни сўрашга юзи чидамай, шаҳарда иморат solaётган кишилар ҳовлисида ишлаб пул топди. Қуруқ иону қайнаган сув ичиб ўқишга бор-

гап кунлари кўп бўлди. Кийимларини ўзи ювиб, ўзи дазмолларди. Кўп вақт арzon-гаров картошка сотиб олиб, сувда қайнатиб еган пайтлари ҳам бўлган. Эт еб, катта бўлган чўпон ўғли учун картошкаю кўкатлар ичагига юқ бўлмасди. У кейинги пайтларда бир қадар озиб, қуруқ бурни қолди. Қишида юпқа шим, брезенг туфли кийиб институтга келган ҳам Қоражон бўлди. Бу олифталиқдан эмас, йўқчиликдан эди... Шу аҳволда йиллар ўтди. Ўзига қолса аллақачон институтни ташлаб кетиши аниқ эди-ю, аммо қонидаги бир сабот уни маҳкам ушлаб, машақатлар олдида бош эгдирмади. Атрофдаги баъзи ҳасадгўй кимсаларга ҳам забун бўлмади. У ҳар ишни босиқлик билан ўтказиб, шайтонга ҳай берарди. Охирги курсларга ўтганида, кутилмаганда, Наима деган келишган бир ёш жувоннинг қўлига тушди. Бу жувонга «харсанг тошдай гадир-будур» Қоражон ёқиб қолиб, қўярда-қўймай ётоқхонадан ўз уйига, шаҳар марказидаги икки хонали квартирасига кўчириб олиб кетди. Унинг лаби устида қалин тук, мўйлови бор эди. Қўзига қон тўлган Қоражон никоҳсиз, ҳеч нимасиз ва ҳатто ота-оналарига хабар қилмай шу жувон билан бирга яшай бошлади. Унинг турмуши бирдан яхши бўлиб кетди. Кийимлари ҳам, ейиш-ичишлиари ҳам — ҳамма ишлари жойида. У билан эру хотин бўлиб яшаётганини курсдошлари ҳам билди — улар ҳайрон, баъзилар, бахтинг келибди, деса баъзилар, адойи тамом бўлдинг, дерди. Қоражон ҳеч нарсага тушунмас, уйи бўлса, ёнида чиройли хотин, квартира... Бундан ортиқ яна нима керак? У қандини уриб яшайверди. Келгусида Наимани Чотқолга, ўз қишлоғига олиб бориб, ота-оналарига кўрсатиб, никоҳ қилиб олишини ўйлади. Наима ўта замонавий кийиниб, қошу кипригигача, оёғининг тирноғигача бўйайдиган, муҳаббат бобида анча «эркин», кўнглига ёққан кимса билан бирдан ош-қатиқ бўлиб кетадиган кимса эди. Ўзи унинг айтишича, аёллар билан мулоқотда бўлишни кўп хушламас, фақат эркаклар билан чақчақлашишни яхши кўрар эди. Наиманинг дарду дунёси, жони дили ресторон, ўта замонавий кийим — сертугма, тор шимлар. «Хой, хумпар! Гап кийимда эмас, ахир. Улуг Ватан урушининг мислсиз қаҳрамонлари — Олег Кошевой, Зоя Космодемьянскаялар жуда содда кийингланлар. Америка хиппиларидан эмас, биз ўз қаҳрамон ватандошларимизнинг кийинишидан, хулқу авторларидан ибрат олишимиз керак», деган эди бир куни Қоражон,

Наима полга тупуриб, бурнини кўрсатди. Бу қилиқ Қоражонга жуда жирканч кўринди. «Мен сенинг философиянгга, идеянигга тупураман! Сен цивилизациядан узоқ, папуас, аборигенларга ўхшаган ўзбексан! Вақт ўтиши билан қабилаларингнинг урф-одати йўқолиб кетади! Европа цивилизацияси доимо ҳоким бўлади!»— деди етти бўғинли чаёндек кўкариб, титраб Наима. «Қабила-мабилангни билмайман, мен совет гражданиман! Шуни яхши биламан!»— деди Қоражон.

Ўртага шунча оғир гаплар тушишига қарамай, шу куни кечга яқин Наима ҳеч нима бўлмагандек, «эри» ни қучиб, унга конъяқ қуийб берди. Яна бамайлихотир бағрига кирди... Бу масхарабозлик-ку, деди ичидা Қоражон. Бу ўзи қанақа инсон!!!

Орадан бир ҳафта ўтгач, ярим тунда Наиманинг қовоқ таглари кўкарган ҳолда шалвираб уйга келди. Ундан ичкилик ҳиди анқирди. Қоражон унга қўл тегизишга ҳам жирканди. Қаёқда эдинг, деб сўрамади ҳам. Чунки уйда қиёмат-қойим бўларди. Ўзининг суюқ оёклигини «ўта замонавийлик» ниқоби билан яшириб, кўнглига ёққан кимса билан ишрат суриш йигирманчи аср ёшлирига хос эмиш.

Қунлар шундай ўтавергач, Қоражон, бор-э, деб эски чамадонини кўтариб, уйдан чиқиб кетди. Чиқиб кетишига чиқиб кетди-ю, аммо уни «ахлоқи нопок» киши сифатида институтда муҳокама қилишди. Наима Қоражон Мингбоев устидан аввал юмaloқ хат ёзди. Кейин очиқдан-очиқ олиша бошлади. Аёл ўзини руҳий касал деб қандайдир справка ҳам олиб қўйган экан. Агар бирон киши билан жанжаллашиб, унга жароҳат етказса жавобгар бўлмас экан. Унинг бу қилигини кўриб, Қоражон ҳайрон бўлиб қолди. Муштумдек боши билан шунча фитналарни ўйлашга нима мажбур қилди. У жиноят қонунлари кодексини яхши биларди. Бу ишларни кўриб ҳанг манг бўлган Қоражон илгари уни «чесний бўлсанг айланай», деб кулган эди.

Қоражон янгилишиб қўлга тушди. Эътимод қўйиб, гўзал деб юргани бу жувон тамоман тескариси бўлиб чиқди. У бир куни: «Биз ёш жувонларнинг иложимиз йўқ, қандоқ қилайлик, ёшлиқ...»— деган эди. «Ўзингнинг ошнанг мени қўярда-қўймай кинога судради. Мен фаришта эмасман, мен инсонман...»— деди бир куни. Улар ажralиб кетишиди. У ҳозир Хайрушка деган бир йигит билан юрар эмиш.

* * *

Институтни тамомлаган кунларининг бирида шаҳар четидаги ресторанда бир ошнаси билан овқатланадиган Қоражон Мингбоев зал чеккасидаги столда фифон бўлиб, бўғилиб ўтирган инвалид одамга кўзи тушган эди. Унинг ёнгинасидаги катта столда қизлар билан беибо қилиқлар қилиб, елкаларига қўл ташлашиб ўтирган йигитчалар дамо-дам бақиришарди. Улар бу залда ўзларидан бўлак одам йўқдек, ўтирганларни менсимай, бемалол қичқиришар, оёқлари билан полни тепиб, столни муштлаб гаплашишарди. Ҳуштак чалиб, ашула қилишарди. Баъзан сигарета тутунини орқага пулфлашганида тўппа-тўғри бояги мўйловдор инвалид одамнинг юзига уриларди. Қўлтиқтаёгини девор бурчагига тираб қўйган бу одамнинг кўкрагида бир неча жанговар орденлар лентачаси кўриниб турарди.

— Барака топкурлар, тўполон қилмай ўтилинглар!— деди инвалид беодоб йигитларга илтимоснамо мурожаат этиб,— шовқин менга ёқмайди.

Йигитлар бу гапга тушунар-тушунмас кулишди. Бароқ кучукчага ўхшаш соchlari кўзлари устига осилиб тушган қизлар инвалидга бир қараб қўйиб, хахолаб юборишиди. Мўйловдор инвалид бу ҳақоратомиз қаҳқаҳадан сўнг ўрнидан туриб, қўлтиқтаёғи билан уларнинг бошига туширмоқчи бўлди. Лекин ўзини куч билан тутиб қолди. Ўтирганлар атая инвалидинг ғашига тегишарди. Узоқроқда ўтирган Қоражон билан ўртоғи бу кўнгилсиз манзарани кузатиб туришарди. Безориларнинг таҳқиромиз қилиқлари давом этаверди. Инвалид одам паноҳ истаб у ёқ-бу ёғига қаради, ҳамма ўзи билан ўзи овора. Лекин нарироқда икки кекса одамнинг ҳам тоқати тоқ бўлиб, чидай олмаётганликларини кўрди. Залнинг чеккарогида ўтирган Қоражонга ҳам кўз ташлади— Қоражон бу одамни сал-пал танигандек бўлди. Унинг фронтчи инвалид эканини бир кўришдаёқ билган эди.

— Ҳой, ярамаслар, мен инвалидман, кекса одамман, овқат егани қўясизларми, йўқми?!

— Уйингда овқатлан!— деди бир йигит инвалидга ўқрайиб.

— Нега?! Мен бунда овқатланолмайманми?! Ресторанга киришга ҳақим йўқми?! Бу қандай бедодлик?!

— Ҳа. Шундай! Сенинг вақтинг ўтиб кетган! Бу ер бизники, бизнинг давр!

— Аблаҳ! — қўлтиқтаёгини олаётган эди, официант югуриб келиб инвалидни туртиб, залдан ташқарига чиқиб кетишини талаб қилди. У қолган овқатни ҳам емай, хафа бўлиб, залдан битта-битта қадам ташлаб чиқиб кетаётганда бояги йигитлардан учтаси наридан-берн ҳисоб-китоб қилиб, олдин кўчага чиқиб кетди. Бу ҳаракатларни кузатиб ўтирган Қоражон билан ўртоғининг ҳам юраги орзиқиб, дук-дук уриб, ташқарига чиқишиди. Ресторандан чиқсан уч йигит катта кўчанинг қоқ ўртасида инвалидни ерга думалатиб, қорнига, башишараларига тепишарди. Унинг дод солаётганига ҳеч ким қарамас, сичқоннинг ини минг танга бўлиб кетган эди. Инвалиднинг қўлтиқтаёги бир томонда, қалпоги бир томонда ётарди.

— Ажратмасак бечорани ўлдириб қўйишади! — деди Қоражон шеригига, — нима бўлса бўлди, мен муштлашаман!

У югуриб бориб бир безорининг қўлини ушлади:

— Сенда инсоф борми, ярамас?! Бу одам инвалид-ку! Инвалидни тепасанларми, номардлар!

Сочи елкасига тушган, қаншари паст, совуқ йигит Қоражоннинг лунжига бир туширди.

— Ие, сенлар уришни билмас экансанлар! — у бояги йигитнинг ёқасидан ушлаб, чунонам калла қўйдики, безори умбалоқ ошиб, ариққа тушиб кетди. Йиккинчи безорининг тумшуғига солди. Шу лаҳза ўзини чоғлаётган учинчи безорини ҳам қаторасига уриб юборди. Ариқдан чиқсан безорининг бурнидан тирқираб қон оқар, шерикларини гирибонидан олиб, биқин-биқинига ураётган забардаст, басавлат Қоражоннинг ёнига яқинлашолмасди. Ердан тош олиб отмоқчи бўлган эди, Қоражоннинг шериги югуриб бориб қулочкашлаб юборди. Икки бор калла зарбини еган безори ўрнидан туриб қоча бошлади. Қоражон қолган икки «ўта замонавий»-сини чунонам дўппосладики, инвалид одам ўрнидан туриб, тепки оғриқларини ҳам сезмай: «Бормисан, ука! Ур, яна бир-икки ур бу ярамасларни!» — дерди. Қоражон икки олифта йигитчани ерга чўзилтириб қўйди. Анчадан буён унинг қўли қичиб, ғазабланиб юарди. «Укажон, сен ҳам фронтовикка ўхшайсан, ур! — деди инвалид, — ҳаромиларни яхшилаб ур!» Узоқдан милиционер қораси кўриниши билан безорилар тумтарақай қочиб, кўздан ғойиб бўлди. Тўполонни эшитиб югуриб келган милиция ходими безориларни ушлолмади. Биқинига, юзларига тепилган инвалид юролмай, скамей-

кага ўтириб қолди. У Қоражонга ўзининг Сижжак қишлоғидан келганини, бир кўнгли тортиб ресторонга кириб қолганини айтди. Қоражон бир шофёр билан гаплашиб, инвалидни қишлоққа олиб чиқиб кетди. Йўлда инвалид одам бир неча бор кўнгли беҳузур бўлиб, ҳушидан кетди. У ўзининг «Қўйбоқаров Милтиқбой» эканини, ҳовлиси Сижжакдаги қишлоқ Советига яқин жойдалигини тайинлади.

— Мен, Қоражон Мингбоевман,— деди у ҳам инвалидга ўзини танитиб.

Шу кечада Қоражон машина билан Сижжакка бориб, инвалид Қўйбоқаровни опичлаб уйига олиб кирди. Капалаги учига кетган хотинига бўлган воқеани наридан-бери гапириб, ўзи яна шу машинада тоғ оралиқларидан, дарё кўприкларидан ўтиб ярим тунда Чотқол бағридаги қишлоғига кириб келди. Шофёр йигитга шунчак, бизницида қолинг, эрта билан йўлга чиқасиз, деганига қарамай, у кетмаса бўлмаслигини айтди. Ёнидаги пулларини унга берди.

— Кўп беряпсиз, ошна,— деди шофёр бир миқдор пулни қайтариб.

— Йўқ, олинг!— деди Қоражон,— жуда инсофли одам экансиз. Хизматингизни аямадингиз. Раҳмат!

Шофёр йигит пулни олиб, яна жимжит тоғ йўлларидан машинасини ҳайдаб шаҳар тушиб кетди. Қоражон бўлган воқеани онасига айтиб бериб, кейин ётиб ухламоқчи бўлди, аммо кўзига уйқу келмади.

Бу воқеага ҳам кўп бўлгани йўқ.

IV боб

КУНЛАРДАН БИР КУН...

Баланд Чотқол тизмаларидан бири — Қўнғирбуқа тепалигида ёлғиз ўтирган Қоражон хаёлига яна яқин ўтмишда Иван Иванович Шишкин билан учрашган кунлари келди.

Мақсадсиз киши — жиловсиз от — боши оққан томонга кетаверади. Институтни тамомлаш олдида бошига иш тушган Қоражон ўша кезлари қишлоққа келиб, нима қилишини билмай юрган эди. Оға-инилари қаторига қўшилиб, мол боқа бошлади. Шу ерлик баъзи йигитчалар ўнинчини тамомлаб — яхши имтиҳон топшириб шавқу завқ билан ўқишга жўнаётганида, у

«шунча йил ўқиб, яна подачиликка қайтгани» баъзиларни ўйлатиб қўйди. «Ўқиш юққанга юқади», — деганлар ҳам бўлди. Устидан ариза тушиб, ишлари юришмай турганини билишмасди. «Подачининг боласи подачи, мулланинг боласи мулла бўлади», — деди яна бир ҳамқишлоғи. «Урушга ҳам бориб, ботирлик кўрсатиб келди, ҳамма ишни қилди, лекин илм ҳаммага ҳам юқавермайди», — деди қишлоқ сўфиси ўз ўғлининг қанча ўқиб, одам бўлмаганини пардалаш мақсадида. Бу шивир-шивирлар Қоражоннинг ҳам қулоғига етмай иложи йўқ эди. Начора! Институт муҳитидаги кучли тўлқин уни айни диплом оладиган бир пайтда қирғоқ-қа итқитиб ташлади. У ҳовлисига узун кириб, узун чиқиб юрмай подачи инилари билан далага чиқиб кетди. Баъзан кенг қирлар, баланд тоғлар оғушида, барра ўтлар узра ётиб ўйларди: ўйлдан озганларни, мишатга берилиб кетганларни ҳаёт тўлқинлари четга итқитиб ташлаши, эҳтиётсизлик қилганлар оёғига чўгиrtаклар портиллаб кириб кетиши аниқ эканлигини хаёлидан ўтказди.

Мана, олти ойдирки у подачилик қилиб юрибди. Лекин кутилмаганда, иттифоқо бир куни институтдаги ошнаси Вания, яъни Иван Иванович Шишкун қишлоқда пайдо бўлиб қолиши уни ҳайрон қилди. Елкасига эски костюмини солиб, сарпойчанг ҳовлига чиққан Қоражон ланг очиқ эшик олдida турган Шишкинга рўпара бўлди. Кейин қўл сиқишиб ўтирумай қучоқлаша кетишиди. Бу йигит институтда бир неча йилдан буён комсомол комитети бюросининг аъзоси эди. Уни кўп вақт Иван Иванович деб ўтирумай, жўнгина қилиб Вания деб қўя қолишарди. У бюро топшириғи билан Мингбоеv ёнига келибди. Хат ёзиб ўтируманлар, ўзим бориб келаман, дебди.

— Қайси шамол учирди биз томонларга? — Қоражон кутилмаган бу келишдан ҳайратланиб сўради.

— Кўргим келди, — деди у Қоражон билан ёнма-ён хона томон юриб, — албатта сени анави гаплар қизиқтирса керак. Ҳар хил хаёлга бормаслигинг учун гапни лўнда қилиб аввал айтиб қўя қолай: устингдан ёзилган ариза ва анонимкалар, асоссиз, бўхтон бўлиб чиқди. Текширдик. Бу комсомол комитетининг фикри. Всё! Ариза бўлгандан кейин текширишимиз шарт эди. Билдингми? Бу ёғига ҳушёр бўл!

Қоражон ерга қаради. У хомуш, миқ этмай турарди.

— Энди гап бундай! Дипломни олгач, биз ёирга ишга борамиз! Жуда катта иш бошланган. Бизнинг факультетдан кўпгина йигитлар комсомол ташкилоти қарори билан ишга йўлланялти. Тушундингми? Ҳамма гап шу! Энди, ўзимга келсам, мен бугун сенинида қоламан, у ёқ-бу ёқларни томоша қилдиарсан, деб ўйлайман. Эртага тушиб кетаман. Хоҳласанг, бирга шаҳарга тушамиз.

— Келганинг жуда яхши бўлди-да, Ваня,— деди Қоражон онаси, сингилларига уни танишириб,— жуда ҳам зериккан эдим. Сени тезда қўйиб юбормаймиз, учтўрт кун қоласан! Бу ерда кўрадиган жойлар бор,— деди.

— «Валерий Чкалов» фильмини кўргансан-а?

— Ҳа.

— Унда бир ери бор: гуноҳ иш қилиб қўйган Чкаловни учишдан четлатадилар. У алам билан Волга бўйига, ўз қишлоғига кетади. Балиқчилар ичида юради. Бу вақтинчалик эди. Улуғ учувчи яна ўз касбига қайтади...

— Ҳа, шундай.

— Мен айтмоқчи бўлганим, мана бу Чотқол дарёсию баланд тоғлар... юракда қанча дарду ғубор бўлса, барини олади. Бу тоғларни бир томоша қилайлик, тоғни яхши кўраман. Ўқиб юрганимизда, сени кўриб, қиё-фангдан шу томонларни кўргандек бўлардим. Сен қувлик-шумлиқдан узоқ йигитсан. Қалай, ўша жонон ўзи созмиди? Қичиги зўр девдинг-а?

— Э, қўйсанг-чи! Ўшани эсласам юрагим сиқилади. Туҳматчи-ку!

— Қадди-қомати келишган нарса экан. Тарбиялаб олмабсан-да? Хипча бел...

— Ў-ў... Уни тарбиялаш! Бу иш сен билан менинг қўлимдан келмайди!

— Биламан, сен билан менинг қўлимдан бошқа иш келмайди. Ҳа-ҳа-ҳа.

— Вой, азиз дўстим-эй! Хизрни йўқлаган эканман. Сенинг келишинг менга дори бўлди. Сен — Хизр пайғамбарсан!

Улар хахолашиб кулишиб, ичкари уйга киришди.

— Уч кун аввал йўлбарсга дуч келдим,— деди яна кулиб Қоражон.— Йўқ, уч кундан кейин, мана ҳақиқий йўлбарсга дуч келдим...

Улар яна кулишди.

— Шу гаплар ростми? Ёки ваҳима гаплар, шунча-

ки олди-қочди ҳикояларми? Сен институтда ҳам гапирган эдинг?

— Рост! Чотқол оралиқларида чироғли йўлбарслар бор. Тўғрироғи, тугмача гулли қоплонлар. Ужар қонун бўйича муҳофаза қилинади, ов қилиш мумкин эмас. Баъзилар, Чотқол ичкарисидаги қамишзорларда йўлбарслар йўқолиб кетган, дейди. Бу тўғри эмас! Йўлбарс бор.

Қоражон яқинда рўй берган бир воқеани ҳикоя қилиб берди.

Ҳа, дарҳақиқат, Чотқол дарёси атрофида, бир томони Терс дарёсию Янгибозор, ундан то Сандалашгача етган тўқайзорларда баъзан йўлбарсу қоплонлар учрайди. Чотқол тизма тоғларида, Бештор чўққилари остида тугмача гулли кичик қоплонлар ҳам кўп. Бу ерлик кишиларнинг лоф уриб айтишича, йўлбарслар йиртқич бўлгани билан одамга тегмас эмиш. Агар у оч қолмаса, ўзига қасд қилмаган кимсага тегмас эмиш.

Куз кунларининг бирида кечга яқин қишлоқда қийчув бошланди: қўтондаги қўйларни мўлжаллаб, тогдан тушган оч қоплон ҳай-хувдан қочиб, тор кўча ичига кириб қолган. Калтак кўтарган одамларга ириллаб, ўкириб тургану, ҳеч кимга ёпишмаган. У тоққа чиқиб кетишини мўлжаллаб, деворлардан ҳатлаб томга чиққан, томдан томга сакраб, уйиб қўйилган пичан ғарамларига ўзини уриб, сочиб юборган. Бир муддатли тўполнанд сўнг йўл топиб, яна тоққа чиқиб кетган...

Шў куни Шишкин ётиб қолди. Эртасига уларнинг бири саманга, бири тўриққа миниб, Чотқол бўйи — яси қирлар сари жўнашди. Ёнқўргон қишлоғидан чиқиб, дарё бўйлаб ичкариликка кириша бошлади. Шишкин дарё четидаги баланд қоятошларга, осмонда чарх уриб учган (личинга маҳлиё бўларди. Икки томонда баҳайбат тоғлар савлат тўкиб турибди. Улар гўё чордана қуриб ўтирган алп-паҳлавонларга ўхшарди. Ям-яшил майсазор қирлар алплар остидаги гиламга, баъзи ерларда ёйилиб оққан фируза рангдаги Чотқол дарёси алп тоғларнинг олтин косасига ўхшарди. Олис қирларга сочилиб, узоқдан қарғага ўхшаб кўринган қорамолларга тикилишарди. Қоражон Шишкинга қоплонлар сув ичгани ўтадиган сўқмоқни ҳам кўрсатди.

— Бизга қадрдон бўлган манзаралар бир куни келиб ўзгаради,— деди Шишкин,— лекин биз қариб-қартаиганимизда ҳам ўша манзарани асло эсдан чиқармаймиз. Қишлоқдаги пастқам уйлару деворлар, тан-

дирларгача қадрдон. Миллион йил илгари яшаган петикантроп одамидан тортиб, кейинги миллион йиллар одамлари ҳам ўзига қадрдон бўлган манзараларни севади, эслайди! Инсон табиати шунаقا. Ҳиндистонда жуда хушманзара ерлар бор, дейишади, аммо киши яшаган еридан гўзалроқ ер дунёда йўқ!

Икки отлиқ бир муддатдан сўнг мол боқиладиган кенгликка етиб келишди. Саҳарлаб чиқиб кетган укалари жуда олисдан туриб ўз оғалари келётганини кўриб, Олапар билан баробар югуришди. Тезда етиб келиб, отларнинг жиловини ушлашди. Қоражон хуржуни от устидан олди, бундаги шолча, ихчамгина брезент чодир — капани, қозиқларни олиб, укаларига берди.

— Ҳув авави ерга олиб бориб қоқинглар!

Меҳмонлар олдига келиб, ҳаллослаб тилини осилтириб турган бўрибосар Олапар гўё, «менга ҳам иш топширинглар», дегандай Қоражонга тикилиб турарди. Қоражон хуржуннинг иккинчи кўзидан декча, косалар ва уч-тўрт палён ўтин чиқарди. Шишкин мингандан отдаги хуржундан дастурхонга ўроғлиқ овқат, кулчалар ва бир-икки шиша ичкилик ҳам олди.

— Роса зиёфат бўларкан! — деди Шишкин гўштларга кўз ташларкан, кафтига кафтини ишқалаб, — ишқилиб, йўлбарс келиб ўзимизни зиёфат қилиб кетмасин-да!

Шолчалар ёзилиб, чодир — капа қўйқайтирилгач, Қоражоннинг укалари дастурхон ёзишди. Қандил буви бериб юборган хўраклардан ташқари, Қоражон укаларига қозон осишни, яхшилаб шўрва қилишларини тайинлади. Қармоқларни ҳам тайёрлаб қўйиши, чунки Шишкин дарё бўйига бориб қармоқ ташлаб ўтириши яхши кўрарди. Шундан сўнг икки ўртоқ «қиттак-қиттак» қилишди-да, кейин дарё бўйига бориб ўтириши. «Бирон адашган, улоққан балиқ келиб қармоқни ликиллатармикан», деди ичидা Қоражон.

— Балиқ борми? — сўради кайфи чоғ Шишкин болалардан. У ёнига яқин келган қўзичоқларни тирақайлатиб қувлаб қоларди. Бирини тутиб олиб қучоқлаб, ўпид эркалади. Олапарнинг рашки келиб, симрайиб турарди. Тилини осилтириб, думини супурги қиласарди.

— Балиқ кўп. Биз ҳар куни қанчадан-қанча тутамиз-ку! — деди болалардан бири.

— Маст одамга балиқ яқин келмайди, — деди Қоражон.

— Тагин орқадан ваҳима қилган йўлбарсинг келиб қолмасин!

— У ҳам келмайди.

— Ҳозир иккалангиз йўлбарс бўлиб кетдингиз-ку,— деди укаларидан бири қулиб.— Қоплон ҳам бирон унгурда ётиб, сизларни томоша қилаётгандир.

Икки ўртоқ тоза томоша қилишди, бу яқин орада ҳеч ким қўзичоғу зерикаб юрган Олапарларни эркала-маган эди. Улар ўзларини лўкиллатиб, чоптирадиган одамларни хуш кўришарди. Жониворларни гапга тушунмайди деб бўлмайди, улар ўзига нисбатан яхши ёки ёмон муносабатда бўлаётган кимсанинг ниятини важоҳатидан, қилиғидан сезиб туради. Каттакон пода-нинг бамайлихотир ўтлаб юриши, қўзичоқларнинг эркаланиши, Олапарнинг думи билан ер супуриши бу-дан далолат бериб турарди.

Кеч кирди. Осмон тўла юлдузлар. Улар шу даражада паст кўринар эдики, қўл узатса етгудай.

— Азизим... — деди кайфи ошган Қоражон юрак сирини дўстига очиб.

— Юрагингда дард борлигини биламан... Юрагинг кесак эмаслигини пайқаганман. Лекин...

— Шу «лекин»ни айтма! Хато қилганман. Бу гапни сендан бўлак ҳеч ким билмайди.

Шишкин Қоражонга тикилиб қараб қолди.

— Киши ёдида фақат пиёда юрган ерлари қолади,— деди Қоражон ёши катталарга ўхшаб,— маши-нада визиллаб ўтиб кетган жойлар эсда қолмайди.

— Отда юрса-чи?— деди қулиб Шишкин.

— Отдагиси ҳам ёдда қолади. Лекин эшакка миниб тоғда юриш ундан ҳам файзли.

Қоражон дўстига жавоб бермай, шу куни ҳам қишлоқда олиб қолди, ҳамма ёқни кўрсатди, зиёфат қилди. Эртасига улар биргалашиб шаҳарга тушиб кетишли. Қоражон инстиғутга бориб, дипломини олди. Шишкин айтганидек, улар икковлари ҳам Чорвоқ қурилишига, ишга йўлланма олишиди...

Бу яқин кечмишлар Қоражон Мингбоев хаёлидан бирма-бир ўтди.

Чотқолу Писком дарёлари туташадиган ерда, баланд Чотқол тизмаларидан бири — Қўнгирбуқа тепалигида ўтирган Қоражон хаёл сурарди. Ўзидан икки ёш кичик Шишкин калласи бор йигит эканлигини, у билан оға-иницек бўлиб қолишганини, бошига бир иш тушса ёнида «саритой» борлигини кўнглидан

ұтказди. Инженер Шишкин кейинги пайтда бошқа ишлардан озод этилиб, қурилиш партия ташкилотининг секретари қилиб сайланган. Бўйтонлиқ район партия ташкилоти бюро аъзоси ҳам. Ниҳоятда софдил бу йигитни «қурилиш авторитетлари» ҳисобланадиган Садовников, Каминский ва бошқалар худди Сергей Сергеевич Парадоксовни ҳурмат қилгандай ҳурматлашарди. Врач Парадоксовнинг олижаноблиги Чорвоқда ҳаммага маълум.

Қош қорайиб, Чирчиқ водийсида беҳисоб чироқлар милитираб кўринди. Қулоқлари шамолда ачишгандан кейингина Қоражон Мингбоев секин-аста баланд қоядан пастга туша бошлади. У баъзан чарчаса, дик-қат бўлса чап томондаги баланд қояга — Қўнғирбуқа чўққисига чиқиб, тегирмон тошдан каттароқ ясси бир харсангга ўтиради. Ёз ойларида бу ер гоятда баҳаво, гир-гир шабада. Бу ердан ҳамма ёқ кўринади. Пастда буралиб, тошдан тошга урилиб оқаётган Чирчиқ тўқ зангори тусда кўринарди. Қоражон тоғдан тушиб келаётганида, пастда, лаборатория ойнаси тагида ўтирган Галина Шишкина ҳам шундоқ кўриниб турарди.

— Ана, «Чотқол йўлбарси» тоғдан тушиб келяпти, Ваня! Дўстингга яна бир гап бўлганга ўхшайди,— деди Галина эрини туртиб.

— Нафасингни ёмон қилма! Ҳеч гап йўқ. Тогда ўсган тоғни қўмсайди,— деди хотинига Шишкин,— хотиндан омади келмаяпти.

— Айб ўзида!— деди Галина,— эҳтимол, ўзи ношуддир...

Тоғдан тушаётган Қоражонга тикилиб қараб турган Галина ўйланиб қолди: ўзбек қизлари бечоранинг ҳусни йўқлиги учун тегмаётган бўлсалар керак. Агар унинг синглиси Валия келса, гап ҳуснда эмас, бу йигит «порядочный» кимса эканини айтмоқчи бўлди. Кейинчалик Галина ўз синглисини мақтаб Қоражонга кўп хушомад қиласди. Буни сезган Қоражон хаёлига қишлоғида катта бобоси қўшни қизлардан бирига, «сени келин қиламиз», деганида у бечора ҳар куни бобо ўтиб кетаётганида унга кўриниб, тинмай эшик супуришини эслади. Бу билан у бобога ёқмоқчи бўлган эди. Ўша бечора қиз бобо айтганига теголмай, бошқага узатилиб кетган эди. Аммо Галина Шишкина шу яқиндаги Сижжак қишлоғида Гулгун деган қиз яшашини мутлақо билмасди, албатта.

ҚИЙИҚЧАГА ТИКИЛГАН ЁЗУВ

Зихи давлатлик ул икки қошинг-ким,
Кумуш таҳт узра оғоношиб ётурлар...

Лутфий

Дунёдаги барча қишлоқлар ичидә энг гүзали Сижжак, дунёдаги барча гүзал қизлар ичидә энг гүзали Гулгун, дерди Қоражон ўзига-ўзи. Сижжак, деса бу йигитнинг юрагини ширин ҳаяжон қоплар, қандайдир бир куч уни тўлқинлантириб юборарди.

Ўша кунги ресторанда бўлган кўнғилсиз воқеадан кейин бир ҳафта ётиб ўзига келган Милтиқбой ака отини эгарлаб Писком дарёси кўприги орқали Бофистонга ўтиб, ундан Кўксув орқали Чотқол ёқасидаги қишлоққа келди. Қоражонни тополмай, укаларига ўз миннатдорчилигини билдириди. Мендан эсадалик, акангга бериб қўй, деб дўппи билан қийиқча тухфа қилди. Айвонда ўтирган Қандил буви ташқарига чиқмай, эшитилар-эшитилмас ўғли Чорвоқда инженер эканлинини, агар зарур бир гапи бўлса у ёққа бориб сўраса топиб беришликларини эзмаланиб гапиради.

Инвалид Милтиқбой ака қўлтиқтаёғини тўқиллатиб кета туриб:

— Азамат йигит экан, доимо омон бўлсин! — деди, — бизнинг ҳовлига меҳмон бўлиб келинглар. Албатта келинглар!

Шундан сўнг у яна тўриқда қишлоғига қайтди. Йўл-йўлакай Бофистонга тушиб, ошхонада «юзта»ни уриб олди. «Фронтовойларнинг ичмайдигани бўлмайди. Гуноҳимиз шу, жиндек оқидан тортамиз. Йигитнинг гули ичади», — дерди мўйловини бураб.

Шанба куни Қоражон эрта билан газик машинасида Чорвоқ орқали Сижжакка ўтди. Машинани дарвозда тўхтатиб, ёлғиз ўзи Милтиқбой ака ҳовлисига кирди. Таклиф этилганига кўра йўл-йўлакай, бирровгина кўриб, ҳол-аҳвол сўрашиб кетмоқчи эди. Милтиқбой аканинг сўзини ерда қолдирмаслик, шоҳи белбоғ, дўппи учун ҳам миннатдорчилик изҳор қилмоқчи эди. Энг муҳими, Гулгунни кўрмоқчи эди. Қийиқчага ипак билан тикилган гуллар орасида «Азамат йигитга» деган сўз ҳам бор эдики, буни кўргач, йигитнинг уйқуси келмай қолди. Бу сўз Қоражон учун атай ёзилганми ёки шунаقا ёзиги бор белбоғни унга тухфа

этдилармикан? Ана шуни билишни Қоражон Мингбоев кўнглига туғиб қўйди. Фронтда ҳам бундай адреси ноаниқ тұхфаларни кўп олишган эди...

Қоражон ҳовлига кириб, айвон томон юрар экан, шийпонда турган Гулгунни кўрди. Бир қараашда нотаниш кўрингган одамнинг айвонга қараб келаётгани Гулгуннинг юрагига ғулғула солди.

— Опа, бирор келди,— деб юборди у беихтиёр.

Қоражон ялт этиб юқорига қаради-да, тўхтади.

— Салом!

— Салом!

Гулгун югуриб ичкарига кириб кетди. Қоражон ариқ устидаги тахтада қотиб туради. У яна қайтиб чиқди:

— Тахтадан нарироқда тураверсангиз ҳам бўлади! Мен сиз билан «замри» ўйнаётганим йўқ!— ҳазиллашгандай гап қотди.

— Кечирасиз, Гулгуной.

— Менинг отимни қаёқдан биласиз?

— Зарурат туғилса киши ҳамма нарсани билади...

— Ўҳ-ҳў! Сизга адамлар керакмилар?— Гулгун яқинроқ келиб Қоражонни бирдан таниб қолди. «Бу ўша йигит», деди ўзига-ўзи. Негадир юраги орзиқди. Унинг кўз олдида хунуклик билан олижаноблик гир айланана бошлади. У нима қилишини билмай лол бўлиб туради.

— Ҳа, менга Милтиқбой акам керак эдилар.

— Адамлар йўқлар. Совхозга кетганлар.

Йигит бир зум нима қилишини билмай ўйланиб қолди, сўнг сал дадилланди-да:

— Мана бу қийиқчани сиз тикмаганмисиз?— деб ёнидан қийиқчани чиқариб Гулгунга кўрсатди.

— Ҳа.

— Жуда чиройли. Милтиқбой акамни кичик қизимисиз ё каттасимисиз?

— Милтиқбой акангизнинг биттагина қизлари бор. Уша мен...

— Доимо омон бўлинг.

— Адамларга нима деб қўяй?

— Ҳозир кетаман,— Қоражон билагидаги соатига қаради.— Қийиқчадаги мана бу ёзув илгаридан бормиди ёки атай тикдингизми?

— Атай тикдик. Мен ўзим тикдим. Яна саволингиз борми?

— Йўқ. Ташаккур! Жуда миннатдорман! Мен бу

қийиқчани ўлгунимча асрайман. Бу менинг учун жуда ҳам қимматли. Сиз тикканингиз учун ҳам қимматли, раҳмат!

— Тикиш осон. Адамлар айтсалар яна бошқа қийиқчаларга ҳам тикиб беравераман.

— Йўқ, ундоқ деманг, мана шу бир марта тикканнингиз етади. Шу маъқул!

— Қизиқ?

Гулгун соддадил чандиқ йигитнинг ҳаяжонланиб гапираётганига қараб туриб кулиб юборди. Унинг кулиши ниҳоятда чиройли — икки ёноғида кулгич пайдо бўлиб, ҳуснини яна ҳам очиб юборарди. Қоражоннинг одамгарчилигига қойил қолиб, унга ҳурмати ошган эди. Ҳар куни ота-онаси тилида «чотқоллик йигит» достони бўлишини ҳам биларди. Аммо ҳозир Гулгуннинг ғурури у билан тезда эл бўлиб кетишга йўл бермади. Қоражон, «хайр», деб ҳовлидан чиқиб кетаётганида, Гулгун беихтиёр унга мурожаат этди:

— Адамлар келганларида нима деб айтай. Яна келинг.

— Албатта келаман! — деди Қоражон зўр меҳмондорчиликдан мамнун чиққан кишидек. Гулгун бу гал «йўлбарс важоҳатли кишидан» унча чўчимади. Унинг чандиқ юзини бомбаю ўқлардан жароҳатланган Брест қалъаси деворларига қиёс этиб, Милтиқбой aka кўп гапиради.

Қоражон наздида кундан-кунга ишлар яхши бўлаётганга ўхшаб, юрагини муҳаббат шавқи қучга бошлиди. Бу шавқу завқлар баҳор келишидан дарак берувчи қалдирғочларга ўхшарди.

VI боб

ЛОЙИХА УСТИДА СУҲБАТ ЁКИ УЧ ДАРЕ ҚУШИЛГАН ЖОЙДА

Кундан-кунга юракларни шавқу завқ қучча бошлиди. Бу баҳор элчиси қалдирғочларга ўхшарди — кўтаринки руҳ катта қурилишларда жуда муҳим омилдир.

Қурувчилар шаҳарчаси тушадиган яланг майдонда ҳали сувоқдан чиқмаган бинолардан бирига Бошқарма жойлашган. Майдон Чирчиқ кўппригидан ўтгандан кейинги сайҳон тепада бўлиб, охири Хумсон қишлоғига борадиган йўлдаги жарликкача туташган. Кенг хонада деразага яқин қўйилган катта стол устида бир

нечта катта тахта қоғозлар, қора тушь билан чизилган чизма лойиҳалар турибди. Қоғозлар устидаги лойиҳада Ўзбекистон харитасига ўхшаб қора чизиқлар билан бирга зилол ва қўнғир бўёқлар ҳам бор. Улкан тоғлар оралигидан ўтаётган Чотқол, Писком, Кўксув ҳамда бир неча кичик сойлар зилол ранг билан белгиланган. Диққат билан лойиҳаларга кўз ташлаган киши мутахассис бўлмаса ҳам бу ерда катта тўғон кўтарилаётганини чизик ва бўёқлардан бемалол билиши мумкин.

Лойиҳалар ёзиб қўйилган столнинг ўнг томонида қурилиш бошлиғи Георгий Исаевич Садовников ўтиради. Баъзи лойиҳалар хона дёворига ҳам осиб қўйилган. Стол атрофида Геннадий Моисеевич Арамбицкий, Игорь Ильич Каминский, қурилиш партия ташкилотининг секретари Иван Иванович Шишкін, инженер Қоражон Мингбоев, прораблардан Трифон Никаноренко, экскаваторчилар — Виктор Можаев, Ҳамид Раҳимбобоев, Николай Колбасин, Абдуманноп Чоршанбахўжаев ва бошқалар ўтиради. Садовников яна кимларнингdir келишини кутарди. Бир оздан сўнг коридорда кирза этикларнинг бетартиб дукурдукури эшитилди. СУ-2га бириктирилган шофёрлар, портлатувчилар, бетончилар, тоғни ўйиб, туннель қазиёттандардан ҳам вакиллар кириб келди.

— Бошқа кутмаймиз-а? — сўради Садовников ёнида ўтирган Шишкіндан.

— Бошлайверинг, Георгий Исаевич.

— Ўртоқлар! Дарёни бўғиб, янги изга солдик. Митинг ўтди, яхши бўлди. Туннель қазиши график бўйича вақтида кетяпти. Мен уларнинг матонат кўрсатаётганликларини алоҳида қайд этишим керак! Бугун гап асосан СУ-2, яъни тўғон қурилиши устида боради. Лойиҳалар ҳаммаси жойида. Давлат комиссияси тасдиқлаган. Лекин иш жараёнида лойиҳанинг баъзи ерларига ўзгартиш киритишими мумкин. Унинг авторлари, Ўзгидропроект ходимлари доимо биз билан бирга. Лойиҳа бўйича иш қизгин бошланиб кетди. Маълумки, биз анча-мунча иш қилиб қўйдик. Кеча газетада Ўзгидропроектнинг тупроқни ўрганиш бўлими мудири, инженер Леднев мақоласи босилиб чиқди. Бундан сал илгарироқ журналда Ўзбекистон Фанлар академиясининг мухбир аъзоси, инженер Музаффаровнинг мақоласи ҳам чиққан эди. Ҳаммамиз ўқидик. Бу мақолаларда мухим проблемалар ўртага ташланган. Бизнинг тўғонга ҳам қандайдир алоқаси

борга ўхшайди. Мен мақола босилган газета ва журнални бир ҳафта аввал бу ерда ҳозир бўлган ўртоқларга берганман. Биз маҳаллий хом ашёдан катта тўғон қуряпмиз. Янгишмасам, бу тўғон СССРда биринчи. Биз қурган тўғон асрлар давомида яшashi керак. Маҳаллий хом ашё — тупроқ, шагал, қум, майда харсанг бўлаклари, йирик харсанглар шу даражада шиббаланиб, бир-бирига бирикиб кетиши керак, бўлмаса иш биз ўйлагандек бўлмайди. Биз эксперимент ёки таваккал қилолмаймиз, чунки ҳавзада икки миллиард кубометр сув тўпланади. Кейинчалик бундан ҳам ошади. Бу ҳазилакам сув эмас. Денгиз. Пастда республика пойтахти Тошкент турибди... Сиз бир нима дейсизми, Йғсръ Ильич?

— Майли, бир-икки оғиз гапиришим мумкин,— деди кўзойнакли кекса инженер Каминский,— мен иккала мақолани ҳам ўқиб чиқдим. Инженер Файзулла Аҳмедович Музafferовни яхши танийман. Мақоласи назарийроқ, аммо бизнинг қурилишга алоқаси бор. Ледневники ҳам. Ўрта Осиё шароитида кўп районларда, айниқса, Тошкент облати, Фарғона водийсида маҳаллий хом ашё билан тез ва арzon тўғонлар қуриш муаммосига бағишлиган иккала мақола ҳам муҳим! Маҳаллий шароитни, бу ер табиатини мен унча яхши билмайман. Карьеरларнинг яқин бўлиши, шагал-қумдан ташқари соғ тупроқ масаласи яхши. Инженер Мингбоев шу ерлик, Арамбицкий ҳам маҳаллий шароитни яхши билади. Улар гапирсин, эшитайлик.

Садовников пастроқда ўтирган ёш инженер Мингбоевга қаради. Қоражон ўрнидан туриб, стол ёнига яқин келди. Гарчи хунук, харсанг тошдек ғадир-будур юзига барча ўтирганлар ялт этиб қараган бўлсалар ҳам, бу йигитнинг ҳаёти ўлжага қолгани, танк ичиде ёниб кетганини эслалиб, унга қандайдир бир ҳурмат билан тикилишди. Бу ерда ҳозир бўлганлар ичиде лойиҳа муаллифларидан гўзал рус аёллари Резникова билан Городецкая ҳам аввал бу «чандиқ» кимсага тикилиб туриб, Шишгин билан шивирлашиб олгач, қараашлари ўзгарди.

— Тупроқ тўғонлар ҳамма мамлакатларда кенг тарқалган,— деди инженер Қоражон Мингбоев,— тўғон қуришнинг қадимий усулларидан ҳисобланади. Тупроқ механикаси ва ер ости сувлари тозаланиши назариясининг тараққиёти, шунингдек, механизациянинг кенг ривожланиши ҳозирги пайтда тупроқ тўғон-

ларининг анча баланд ва катта ҳажмли қилиб қуриш имкониятини бермоқда. Мен, Музafferov билан Леднев мақолаларини жуда фойдали, деб ҳисоблайман. Тўғон ичидаги элакловчи оқим ҳаракати ва унинг пойдевори ички ювилиш ва нурашга йўл қўймаслиги керак. Тупроқдан қурилган тўғонлар мутлақо ёпиқ бўлади, сув тошиб, устидан ошиб ўтиши мумкин эмас. Шу жиҳатдан Георгий Исаевичнинг, «тўғонимиз абадул абад», деганларида жон бор. Тупроқнинг механик таркиби бир хил, жумладан, эгилувчан ёки қаттиқ материалдан қалқон ўрнатилган тўғонлар бор. Бундан ташқари, турли хил тупроқдан тикланган, жумладан, фильтрланишга қарши марказий кўтарма призмали тўғонлар ҳам бор. Шунингдек, маркази сув ўтказмас тупроқ ёки диафрагмали тўғонлар ҳам бор. Тўғоннинг муҳим бўлакларидан бири ер ости қувуридир. У элакланган сувнинг қияликка оқиб кетиши ва тўғон емирилишининг олдини олади. Ер ости қувурлари, яъни бизнинг туннель махсус саралаб олинган қум ва майда тошлардан иборат кичик қатламлардан аста-секин шагал ва тошлардан тузилган йирик қатламлар асосига қурилади. Сувни элаклаш йўлини узайтириш учун кўпинча сув ўтказмас материаллардан тўсиқ ўрнатилади. Бу тўсиқ юқорида айтилган қалқоннинг давомидир. Бизнинг тўғон шундай. Тўғон деворлари ни тўлқин, муз ва шамол натижасида емирилишдан сақлаш учун бетон, темир-бетон тахталари, тош ва харсанг ётқизиш кўзда тутилади. Қияликнинг паст қисмини сақлаш учун эса майда тош ва шагал қатлами ё бўлмаса чим ётқизилади. Бизда асосан карьердан олинган катта харсанг тошлар кўзда тутилади.

Ҳурматли ўртоқлар! Ўзгидропроект ҳамда лойиҳа авторлари кўп йиллар мобайнида ниҳоятда катта иш қилишгани ҳаммамизга маълум. Кейинги икки мақола бошлаган ишимизга қарама-қарши эмас. Аксинча, сифатни, маҳаллий хом ашё бирикмаси, шиббалашни пухта ўтказишини олдинга суради. Мен бу суҳбатда иштирок этаётган катта мутахассис ўртоқлар олдида бир нима дейишга ожизман, лекин менинг болалигим мана шу ерларда ўтганлиги, бу ерларни билишим сабабли айрим мулоҳазаларимни айтаман. Қум-шағал карьери лойиҳада жуда узоқда — Газалкент остонасига белгиланган. Мен тупроқни ҳам, қум-шағални ҳам тўғоннинг ёнгинасидан — Қўнғирбуқа тоги остидан олишни таклиф этаман. Йирик харсангларни дарёнинг

чап томонидан, Сижжак йўлидаги Писком төғ этакларидан портлатиш йўли билан олиш анча қулай. Кўп пул тежалади. Лойиҳа бўйича бу карьерлар ўн беш километр узоқ ерда. Тўғоннинг ўнг ва чап қанотлари-даги баландликка кўтариладиган йўллар «БелАЗ» учун унча қулай эмас. Бу иш тепасида турган ўртоқлар йўлни яхшилашлари керак. Мен, асосан, карьерларни тўғонга яқин ердан белгилашни таклиф этаман.

Инженер Каминский Садовниковга жилмайиб қаради:

— Мана, айтмадимми, Георгий Исаевич, ҳамма ишмиз пишиқ, лойиҳа бўйича кетяпти, деб ўтирумасдан, маслаҳатлашиб олганимиз яхши бўлди! Етти ўлчаб, бир кес, деганлар. Лойиҳани Давлат комиссияси тасдиқлаган, лекин баъзи ерларига биз шароит билан ҳисоблашиб, таҳрир киритишими мумкин. Инженер Мингбоев таклифи менинг дилимдаги гап. Карьерларни узоқ қилмаслик керак. Бу, миллион сўмларни тежашдан ташқари иш сифатини яхшилайди. Инженер Мингбоев бу нарсани вақтида яхши пайқаган. Шу ернинг боласи-да, ҳар тепалигу ҳар қояни яхши билади.

Шишкин, Никаноренко, Раҳимбобоевлар ҳам «шиббалаш» ва «карьер» ҳақидаги гапларни мамнуният билан маъқуллашди. Суҳбат анча вақтгача давом этди. Йиғилганларнинг деярли ҳаммаси бир оғиздан бўлса ҳам гапиришди. Бу суҳбат Садовников учун жуда ҳам фойдали эди. Суҳбат охирида у бу учрашувдан мамнун эканлигини, анча масалалар аниқлаб олинганини айтди. Бу ҳақда обкомга ҳам, Трестга ҳам хабар қилишини, қимматли таклифлар амалий ишда ҳисобга олинажагини билдириди.

Қош қорайишига яқин тарқашди. Қоражон билан Иван Шишкин аллавақтгача дарё бўйида айланиб юришди.

Ҳаво мусаффо, дарё шовиллар. Атрофда баҳайбат төғ чўққилари...

* * *

Чорвоқда катта қурилиш ишлари бошланиб кетгани, дарё бўғилиб, бир юз олтмиш саккиз метр баландликда тўғон бунёд этилаётгани, водийда денгиз пайдо бўлиши ҳақидаги хабар оғиздан оғизга кўчди. Ғарбийшимолдаги Хондайлиқ, Сойлиқ, Чимбойлиқ, Хумсону

Хўжакент, Писком дарёси ёқасидаги Сижжак, Богистону Нанай, Чотқолу Кўксув ёқасидаги Бурчмулла, Ёнқўрғон, Юсупхона, жанубда — Чимён, Фижолу Қоронкўл, тоғ оралиқларидағи Қапал, Така ёнгоқ, Чақчам, Қорамозор, Яқкатут... қишлоқларининг аҳолиси бу мұждани эшилди. Азamat йигитлар талабгор бўлиб келиб ишга кириша бошлиши — бу ерда ҳаммага иш топилиши ҳақида қишлоқларга хабар қилинди. Тошкент — Чорвоқ йўлида тинмай поездлар қатнаб, платформаларда қурилиш материаллари, кранлар, экскаваторлар, бульдозерлар, скреперлар, улкан «БелАЗ», «КРАЗ», «МАЗ»лар олиб келинаётгани ҳаммага маълум эди. Чирчиқнинг ўнг томонидаги Хумсон йўлида — сайҳонликка вагон-уйлар жойлаштирилганини ҳам қишлоқ аҳли, каттадан-кичик кўрди. Поезддан ташқари Тошкент — Чорвоқ йўлида кучли «БелАЗ»лар тинмай вағиллаб югурга бошлиди. Уларга қувуру темир ускуналар, ёғочлар, транспорт учун эҳтиёт қисмлар, барча қурилишларнинг «нони» ҳисобланувчи цемент, ёқилғи цистерналари ортилган. Хуллас, дарёлар туташадиган Чорвоқ водийсида ҳаёт кайнай бошлиди. Буюк қоялар, тоғлар асрий сукунат уйқусидан уйғониб, бу ерларда чумолидек ўрмалайтган инсон измига ўзларини топширган эдилар. Қатор қирқ туяни бир кичик бола етаклаб кетганидек, қатор тоғлар силсиласи инсон измига бўйсуниб, ўринларидан қўзғалаётгандай бўларди.

Тоғ оралиқларининг номдор кишиларидан бўлган сижжаклик Милтиқбой ака билан Чоршанба ота маслаҳатлашиб, бугун Хўжакент томон йўл олишиб. Уларнинг бири, Улуг Ватан урушининг иҷвалиди, кўкрагида орден-медаллар, совхоз беғбони бўлса, иккинчиси, кўп йиллар қишлоқ Советининг раиси бўлган, йигирманчи йилларда тоғдан тушган босмачиларга қарши қўлига қурол олиб курашган, ҳозир зукко кексаликда умр ўтказаётганд қариялардан эди. От-ара凡ни қўшишиб, эрта билан йўлга чиқишаётганида отанинг невараси — ўн икки яшар Ҳикматжон ҳам уларга эргашди. У тизгинни қўлга олди. Бу ҳолни кўрган шўх Гулгун ҳам жим ўтиrolмади; у йўлда тушиб қолиб, автобус билан Газалкентга — бувисиникига зарур иш билан боражагини, буни онаси жуда жуда тайинлаганини айтиб, адасидан рухсат олди. Аравада тўрт киши — энг олдинда Ҳикматжон, ундан кейин Милтиқбой ака билан Чоршанба ота, охирида

Гулгун ўтириб, Чорвоқ томон йўл олишди. Кейинчалик шу атрофдаги қишлоқларни сув босади, деган ваҳимали хабар икки оқсоқолни ўрнидан қўзғатган эди. Нега сув босади? Наҳотки, Совет ҳукуматимиз бунга йўл қўйса? Минг йиллардан буён яшаб келган, ота-боболаримизнинг гўри турган бу қишлоқлар сув остида қолиши мумкинми?! Бу ерда қанча боғу роғлар бор, уларни сув босишига ким рухсат беради?! Ахир, бу қишлоқда уруш ветерани Милтиқбой ака Қўйбоқаров билан инқилоб ветерани Чоршанба ота яшайди! Шундоқ элга таниқ мўътабар одамларнинг ҳовли-жойини сув босиши мумкинми? Йўқ, бундай бўлиши ҳеч ақлга сиғмайди! Шўро ҳукумати учун жонини берган бундай одамлар завол топмайди! Шўро ҳукумати бор экан, бу одамлар яшайди, наслу насаби, оталари билан фахрлана берадилар! Шу одамларнинг ўзи Шўро ҳукумати демак! Хўш, шундоқ экан, нега қишлоқни сув босади? Нега улар билан маслаҳатлашмай бундоқ ишларга йўл қўйишиди экан? Шу тақлид ўйлар мўйловдор Милтиқбой ака билан лўмбилилаган, тақир бош Чоршанба отани жунбишга солиб, «ҳозирги замон ёшларининг нима иш қилишаётганини билмоқ ёки бу ишнинг олдини олмоқ» мақсадида Чорвоққа тушиб, қурилиш бошлиги билан бир гаплашиб қўйишмоқчи бўлишди.

Янгигина арава қишлоқдан чиққач, пасту баландликлардан ўтиб, Чорвоқ қайдасан, деб қалдираб кета бошлади. Эрталаб йўлга чиққан аравадагилар пешинга яқин Хумсон йўлидаги қурувчилар учун уй-жой қурилаётган сайҳонликка етиб келиб, штаб қайда эканини одамлардан сўрадилар. Бу ерда ҳам ҳамма ёққа қурилиш материаллари уйиб ташланган; гишту цемент, қувурлар, ёғочлар сочилган. Экскаваторлар бақириб-чақириб ер ковларди. Мингларча одам, бирор билан бирорнинг иши йўқ, турли миллат вакиллари енг шимариб ишларди. Милтиқбой ака билан Чоршанба отанинг: «Хой, нима қиляпсизлар? Тўхтанглар!»— деганларининг фойдаси йўқ. «Агар қишлоқларимизни сув босса, биз бунга рози бўлолмаймиз», дегандек Чоршанба ота у ёқ-бу ёққа назар ташлаган бўлди. Ҳув, пастдаги Эшаккўприк рўпарасида Чорвоқ сайҳонлигига чанг буруқсаб ётибди. Улар от-аравани тепаликдаги «штаб» деб аталган икки қаватли гиштин бино ёнида тўхтатиб, ерга тушишди. Бир оз ўзларини тартибга солиб, у ёқ-бу ёққа анграйиб, йўл қураётганлардан:

«Бошлиқнинг идораси шуми?» — деб сўрашди. «Иккинчи қаватга чиқиб, коридор билан борсангиз, тўғридаги хона. Эшигига фамилияси ҳам ёзиб қўйилган», — дейишиди. Олдинда қўчқор шох бурама мўйловли Милтиқбой ака, ундан кейин зинадан ҳаллослаб чиқаётган тақири бош Чоршанба ота, ундан кейин юпқа зар рўмол ўраб, дўлпи кийиб, сочини иккита қилиб ўрган, «қийиқ кўз, бодом қовоқ» Гулгун. Ҳикматжон аравага қараб қолди. Милтиқбой ака тўппа-тўғри қурилиш бошлиғи қабулхонасига кириб, телефон ёнида ўтирган хушбичимгина жувондан бошлиқни сўради. Георгий Исаевич Садовников объектда эканини эшитгач, тарвузлари қўлтиқдан тушиб, бир-бирларига қараб қолишиди. Секретарь жувон қурилиш бошлигининг тезда келиб қолишини, агар зарур ишлари бўлса, кутганлари маъқул эканини ҳам қўшиб қўйди. Берироқдаги, эшиги қия очилиб қолган бир хонадан кимнингдир сўзлаётгани эштилиб турарди. Милтиқбой ака одобдан бўлмаса ҳам секин эшикни очиб, ичкарига қаради. Бу хонада, устига катта тахта қофозлар қўйилган стол атрофида ўн-ўн беш киши ўтириб, мажлис қураётган экан. Юқорида туриб гапираётган одамга ҳам кўзи тушди. У ўз кўзига ишонмай, яна тикилироқ қаради. «Ия, ўзимизнинг анави укамиз-ку» — ҳайратланди Милтиқбой ака. Отасининг ёнида турган Гулгун ҳам ялт этиб хонага қаради — гапираётган одам дарҳол унинг диққатини ўзига тортди: «Бу ўша чандиқ йигит-ку!» Гулгун уялиб кетганидан ўзини четга олди. Милтиқбой ака, одобсизлик бўлмасин дегандек эшикни қайтадан секин ёпди. Хона эшигига «СУ-2. Инженер Қ. Мингбоев» деб ёзиб қўйилган. Гулгун учун бир лаҳзада ҳамма нарса аён бўлди. Бу йигит шофёр эмас, қурилишда инженер экан... Мабодо, шофёр бўлганида ҳам энг яхши шофёр, инсофли киши эканини ўша жала куни билган эди. Гулгунга бу «қўрқинчли» одам бошқача кўрина бошлиди, эркакларнинг қош-кўзи чиройли бўлиши шартми! Гап виждану юракда!

Шу лаҳза эшик очилиб, Қоражон коридорга чиқди. Гулгуннинг ранги ўчиб, саросимада қолди.

— Келинглар! Хуш келибсизлар!

— Ассалому алайкум! — деди биринчи бўлиб Қсрарожон Мингбоевга қўл узатган Милтиқбой ака, — шу ерда ишлар экансиз-да, укажон? Буни қаранг, биз буни билмас эканмиз. Бўлмаса сизнинг ўзингизга учрашиб кетаверсак ҳам бўлар экан-ку!

Қоражон деворга суюниб, ҳаллослаб турган Чоршанба ота, ундан нарироқдаги Гулгун билан ҳам қўл беришиб омонлашди. Гулгуннинг нозик қўлларини сиқаркан, юраги уриб кетди. Тўғрироғи, шу лаҳза уларнинг икковларининг ҳам юраклари бирдек тепар эди.

— Агарда Георгий Исаевич Садовниковда ишларингиз бўлса, бир оз кутинглар,— деди Қоражон Мингбоев,— жуда яхши одам. Ҳозир келиб қолади.

— Бизни сўрайдиган сўроқларимиз бор,— деди Чоршанба ота,— қўп гапларни ўртоғингиз Абдуманнопдан эшитдим. Қишлоқни сув босармиш. Хўш, бизлар қаёққа борамиз?!

— Ҳамма ёқни босмайди, қисман...

— Ҳа, ана, демак, гап бор экан. «Қисман» бўлса ҳам «миш-миш»ларнинг тагида гап бор экан. Сиз инженерсиз, билиб гапиряпсиз. Демак, Абдуманноп ҳам бу гапни ҳаводан олмаган экан. Тушундингизми, Милтиқбой? Мана, гапнинг таги чиқди. Биз бу ерга бекорга келганимиз йўқ. Абдуманноп бир нимани билмаса гапирмайди. Анави тепадаги савдогарларни эмас, бизларнинг ҳовлимизни сув босади. Камбағални туяниг устида ит қопади, дегани шу-да!

— Шу иш тўғрими, укажон?— сўради Милтиқбой ака.

— Қурилиш бошлиғи билан албатта учрашишларингиз керак экан,— деди Қоражон.— Мен бундай саволга жавоб беришим одобдан эмас. Қурилишда менга ўҳшаган ўттиздан ортиқ инженер ишлайди. Бизниг бошлигимиз ўртоқ Садовников, менимча, у киши билан гаплашсангиз жуда яхши бўлади. Ўзи ҳам одамохун, гаплашадиган киши. Ҳозир келиб қоладилар...

— Майли, кутамиз!— деди Милтиқбой ака,— сиз кириб мажлисингизни қиласверинг.

Қоражон Гулгунга табассум қилди-да, ичкарига кириб кетди.

Гулгун кабинет эшигидаги хатга яна қаради:
«СУ-2. Инженер Қ. Мингбоев».

Орадан бир муддат ўтгач, зинапоядан бир тўп одамлар билан ўйл-йўлакай гаплашиб чиқиб келаётган паст бўйли бир киши коридордаги стулларда ўтирган Милтиқбой ака, Чоршанба отага салом бериб тўғридаги ўз кабинетига кирди. Қабулхонада ўтирган бежирим сөкремтаръ жувон ҳам бир даста қоғозларни кўтариб, у

одам изидан эргашди. Кўп ўтмай, секретарь аёл қайтиб чиқиб, Милтиқбой акага мурожаат этди:

— Георгий Исаевич келди. Марҳамат, киришингиз мумкин.

Улар ичкарига киришди. Гулгун ҳам. Икки оқсоқол қурилиш бошлиғига ўзларини танитиб турганларида Қоражон ҳам кириб келди. Садовников ўзи билан бирга келган прораблар, хўжалик ходимлари билан наридан-бери гаплашиб, секретарь олиб кирган қофозларга имзо чекди-да, кейин ўрнидан туриб кабинет четида дераза яқинида турган катта стол ёнига келди. У сижжаклик оқсоқолларнинг мақсадини дарҳол пай-қаган эди. Бундан бир ҳафта бурун Богистон, Бурчмулла томонлардан ҳам одамлар келишганди.

Садовников истараси иссиқ, доимо кулимсираб турадиган хушфөйл бир одам эканлигини икки кекса пайқади. У икки оқсоқолга қурилиш макети атрофига стул қўйиб бериб, ёнида турган кичкина таёқчани қўлга олди. Кабинетда Гулгун, Қоражон ва бошқа прораблар билан бирга ўн чоғли киши ҳам бор эди. Улар ҳам беихтиёр бошлиққа тикилиб, жим қолишли.

— Мана бу — Чотқол билан Писком дарёлари қўшилаётган ер,— у таёқча билан йилтираб турган шиша чизиқларни кўрсатди,— юқорироқда Чотқолга Кўксув қўшилади, мана бу Кўксув. Тўғрими?

Икки кекса бош қимирлатиб тасдиқлаши.

— Мана бу Чирчиққа қурилган эски омонат кўпrik. Буни Эшаккўприк дейилади. Тўғрими? — Георгий Исаевич ўзбек тилида яхши гапиради. У отаси билан Ўзбекистонга кўчиб келганида уч яшар бола экан. Тошкентда ўқиб, таълим олганлигини ҳам гап ичида қистириб кетди.

— Тўғри,— деди Милтиқбой ака.

— Баракалла! Мана шу икки қоя оралиғига, Қўнғирбуқа билан Асқартоққа баландлиги бир юз олтмиш саккиз метрлик тўғон қурамиз. Чирчиқ бўғилиб, сув кўтарилади. Пастда электр станцияси қурамиз. Шунда Тошкент обlastida юз минг гектар ерга сув чиқиб, пахта далалари кенгаяди, бор-роғлар бунёд этилади. Мана бу иш бир неча йилга мўлжалланган. Қурилиш Иттифоқ аҳамиятига эга. Мана, ўртоқ Мингбоев шу ерлик,— Гулгун ялт этиб Қоражонга қараб қўйди.— У — инженер. Қурилишда шу ерлик ўзбеклар кўп. Шу билан бирга руслар, тоҷиклар, қозоқлар, кирғизлар ҳам кўп. Ҳаммамизнинг ниятимиз битта — хал-

қимизнинг яна ҳам яхши яшаши, фаровонлиги учун қурилаётган бу иншоотни вақтида қуриб битириш. Партия ва ҳукуматимиз бу катта ишни сиз билан бизнинг зиммамизга юклади.

Дикъат билан кузатиб турган Чоршанба отанинг назарида Садовниковнинг салмоқланиб, ўз ишига комил ишонч билан гапириши Охунбобоевга ўхшашиб кетарди. Унинг юзлари ҳам Охунбобоевга ўхшаш, ўттиз бешинчи йилда гидростанция қурувчилари билан учрашган Йўлдош Охунбобоев станция макети ёнида худди шундай гаплашган эди. Бу учрашувда Чоршанба ота ҳам қатнашиш шарафига муяссар бўлган.

— Узбекгидроэнергострой трести, Гидропроект институти асосан бизга ёрдам беради. Буни инженер Мингбоев ҳам яхши билади,— деди Георгий Исаевич кексалар олдида Қоражонга ўхшаш шу ерлик йигигларга суюнаётганини билдириб. Унинг сўзлари Чорвоқнинг истиқболи порлоқ эканини, шу ер фарзандлари бошқалардан кўра ҳам бу улуғ ишга кўпроқ ҳисса қўшишлари кераклигини билдириб турарди.

Қурилиш бошлиғи қилинадиган ишлар ҳақида отахонларга анча муфассал гапириб берди. Вақтини аямади. У ҳатто қишлоқ одамлари бу ишлар билан кўпроқ қизиқишларини истарди ҳам. Чорвоқ қурилиши партия ташкилотининг унга топшириғи ҳам шундай.

Милтиқбой ака билан Чоршанба ота Садовников кабинетидан мамнун чиқиши. Уларни пастгача Қсражон кузатиб қўйди. Арава Хўжакент томонга жўнади. Милтиқбой ака билан Чоршанба ота чоёхонага тушиб дам олиш, эски ошналари билан шакаргуфтсурлик қилишни мўлжаллашди. Шу ердан Гулгунни автобусга чиқариб юбориши. Гулгун Қоражон ҳақида ўйларди. Ўйламаслиги мумкин эмас эди.

VII боб

«ЕИР НОТАНИШ БУЗДИ ОРОМИМ...»

Узи гулрангу гул монанд зоти,
Еўлуб Гулгун халойиқ ичра оти.
Навоий

Ҳа, Гулгун кейинги кунларда инженер йигит ҳақида оз-моз ўйладиган бўлиб қолди. Отасини безорилар қўлидан ажратиб олиши билан эҳтимол уни

Ўлимдан сақлаб қолгандир. Яримта, инвалид одамни яна бир-икки ортиқроқ төпганларида ўша ернинг ўзида ўлиб қоларди. Бу гапни отасининг ўзи неча бор тақрорлаган эди. Чотқоллик йигитнинг мардлигига тасанно айтган. Шунча оғир жанглардан омон-эсон келиб, түртта безорининг қўлида ўлиб кетса, бундан ёмони йўқ. Гулгун ўша куни Мингбоевга ташаккур айтмай, муомалани қуруқроқ қилганидан хижолат бўлди. Бу йигитнинг ким эканлигини муфассалроқ билишни истарди. Умрида бировга дагаллик ёки найранг қилмаган, дилозор дугоналарини асло ёқтирамайдиган Гулгун ўйланиб қолиб, афсусланди. У ўз феълига ҳеч тўғри келмайдиган иш қилган эди. Иккиламчи: шу «чандиқ йигит»нинг нимаси уни ўйлатиб қўйди? Қошлари ҳам кўмир билан чизиб қўйилгандек. Бунинг устига у қора, исми ҳам Қора, кўринишидан ёши ҳам анча жойга бориб қолганга ўхшайди... Лекин барибир у билан учрашиши керак! Ўзиям инженер экан. Бу йигитда бир сирли қудрат бор — ўтқир қараашларидан пайқади. Белбоқни баҳона қилиб, атай қишлоққа келиши бежиз эмас! Гулгун йўлда ўзи билан ўзи гаплаша бошлади. Агар мен кимнидир яхши кўриб, йигитлар ҳақида ўйлар эканман, бу дугоналаримга албатта ёқмайди. Илгари синфдошлари ичida бир бола Гулгун ишқида оҳ уриб, шеърлар ёзib юрарди. Қаерданdir Гулгуннинг фотосуратини топиб, ёнида олиб юрганини болалар кўрган. Ўқитувчилари, синф раҳбари бир неча бор ёшлар ахлоқи ҳақида гапириб, юқори синф болалири бу масалада жуда ибратли бўлиши, фақат ўқишни, имтиҳонларни ўйлаши керак, деган эди. Ўнинчи синфда ўқийдиган бир йигит ёмон иш қилиб қўйгани сабаб бўлиб, мактабга комиссия келгани, таълим-тарбия ишлари бўш, деган баҳо берилгани ҳаммага маълум эди. Бу кўнгилсизликдан кейин мактаб директори анча вақт касал бўлиб ётди.

Гулгун жуда ўйланиб қолди. Лекин барибир яна кўз олдига чандиқ йигит кела бошлади. У фақат олижаноблик қилган йигитни бир кўрмоқчи. Бошқа ҳеч қандай нияти ўйқ!

Нима қилиш керак?

Гулгун ўша йигит билан яна бир учрашишини негадир истарди. Бунинг учун нима қилиш керак? Отасига айтиб, ўша Мингбоевни уйга таклиф этишсамикан? Йўқ. Бу жуда ноқулай. Ёки Чорвоқ қурилишига борсамикан? Йўқ, бу ҳам ноқулай. Йигит кишининг

изидан қидириб бориш уят! Лекин унинг ўша куни қийиқчани кўрсатиб, «бу сўз аслида ёзиғлиқмиди ёки атай ёзилдими?» деб сўрагани Гулгуннинг эсига тушди. Демак, у ҳам Гулгунни ўйлар экан-да?

Куз. Намгарчилик. Шивалаб майда ёмғир ёғарди. Хона ичидаги овоз қилиб қўйилган радио латиф бир музика чаларди. Гулгун адасига косада аччиқ чучук олиб келиб бергач, яна ошхонага, онаси ёнига кирди. Қозонда ош дамлоғлиқ...

Лекин уларга бениҳоя яхшилик қилган бир одамни суриштириб билиш гуноҳ әмас-ку! Бу енгилтаклика кирмайди. Улуг Ватан урушининг қатнашчиси, саломатлигини йўқотган, инвалид бир одам ҳаётини сақлаб қолган кишини суриштиришнинг нимаси уят? То Берлингача жанг қилиб борган одамлар саноқли — унинг отаси Қизил Байроқ, Биринчи даражали Ватан уруши ордени, Қизил Юлдуз орденлари, медаллар билан мукофотланган. Совет Иттифоқи Қаҳрамони даражасига етайдеб қолган. Шундоқ отанинг ҳаётини сақлаб қолган киши билан танишмоқ гуноҳми? Унинг отаси мол-дунё орқасидан қувиб, қўйини совуқ сувга урмай, обрў талашиб юрган кимсалардан әмас-ку! У яримта одам, яна кўчкат экиб, боғ қиляпти. Совхоздаги катта олмазор боғ унинг қадоқ қўллари, меҳнатидан бунёд бўлган. У бирорвага панд берай, мансабу шуҳрат топай, деб яшаётгани йўқ. У доим олма дараҳтларининг пайванди, ҳосили ва янги кўчкатлар ўтказишини ўйлади. Шу одам ўша куни ўлиб-нетиб кетса нима бўларди?! Ҳукуматга шундай одамлар керак, тўғрироғи, шундай одамлар ҳукумат демак. Агар шундай одамлар кўп бўлмаганда мамлакатнинг ҳоли нима бўларди? Шундай покиза одамни ўлдириш — мамлакатга суиқасд ғарбиёд! Қора йигит мамлакатга қарши қилинган суиқасдга кўкрагини тутиб, сақлаб қолган. Гарчи безориларнинг онгсизларча хуружи бўлса ҳам, уни даф этиш қайси жассратдан кам?

Гулгун ёшлиқ ҳиссиятларини бир томонга йигиштириб, масалага жиддий қаради. Бу мулоҳаза ҳам унинг кўзига инженер Мингбоевни бошқача кўрсата бослади.

Орадан яна бир ой ўтди. Декабрнинг ўрталарига бориб қалин қор тушди. Ёмғир аралаш лайлак қор билан бошланган ёғингарчилик аччиқ изғиринга

айланди. Сурункасига бир ҳафта қор ёғиб, томлар, кўчалар, йўллар қорга кўмилди. Ҳар куни ҳовлида қор кураб, йўл очадиган укаси, қорниң қалин бўлишига қарамай, пастликда, Чотқол билан Писком дарёларининг қўшилиш ерида уч оёқ устига ўрнатилган дурбин билан адирларга ўлчов тахтаси тиклаб, гоҳ у томонни, гоҳ бу томонни кўраётган одамларни кўрибди. Чодир — капалар қуриб, ер ўлчаётган одамлар пайдо бўлибди. Улар орасида ҳовлиларига икки бор келган ўша чандиқ қора йигит ҳам кўриниб қолармиш. Бу йигитни бола-чақали, деб ўйлашарди. Унинг ҳали бўйдоқлигини билмаган эди. Кишини сеҳрловчи қандайдир бир куч унинг кўзларига яши-рингандек. Унинг сиртқи кўринишидан кўра ҳам қилган ишлари, қўрқмаслиги Гулгунга кўриниб турарди. Қизларга ҳадеб суйкалаверадиган, ипакдек йигитларни хуш кўрмайди, аксинча, йигит киши йигитдек бўлса, мард, бир сўзли бўлса, дерди. Лекин, барибир, юраги жизилламаган синфдошига ҳам ҳурмат билан мулоқатда бўларди.

Кунлардан бир кун Гулгун ортиқ хаёл суравермай, жасорат кўрсатиб Чорвоққа, қурилиш штабига келди. У Қоражон билан учрашмоқчи, агар вақти бўлса бафуржа ўтириб гаплашмоқчи ҳам бўлди. У врач бўлишни ёшлиқдан орзу қиласди. Унинг ўзи адасига укол қиласди — бу ишда қизнинг маҳорати оиласда тан олинган. Бу ишни Чорвоқ поликлиникасидан келган кекса врач Сергей Парадоксов ҳам ўргатган эди. Гулгун Чорвоққа келиб Қоражонни тополмади. Бирор объектда, СУ-2 да деса, бирор Тошкентга тушиб кетган, деди. Тарвузи қўлтиғидан тушди. Бир муддат бунда айланиб юргач, кейин нимадандир уялиб яна қишлоғига жўнади. Жим бўлиб кетган Қоражоннинг ёнига у атай келган эди. Ғурури ва шаддодлигини ҳам бир ёққа қўйиб, отаси баҳона, инженер Мингбоев билан бир карра гаплашишини кўнглига туккан эди. У ўзидан-ўзи хижолат бўлди, қиз бола совуқ кунда шундоқ изгиб юргани яхшими? Хайрнат, унинг ниятини отаси ҳам, укаси ҳам биланмади. Аслини олганда, уни инженер — қорача йигит сеҳрлаб қўйган эди. Қоражонни тополмагани Гулгун асабини қўзғаб, жаҳли чиққандек бўлди. Қиз болаки уни кўргани келса-ю, жойида ўтираса! Нима қилиб тентираб юаркин? Шу қиш ойларида шаҳарда нима бор? Тинчгина уйида ўтирса бўлмайдими? У энди мутлақо бу томонларга қа-

дам босмасликни, Қоражон қидириб келса яхши мус-
мала қилмасликни дилидан ўтказди. Яна бир лаҳзадаи
кейин Қоражоннинг айби йўқлиги, ўзи хабар қилмай
келганлигини ўйлади. Эҳтимол, бу йигитнинг шаҳарда
бирон кишиси бордир? Эҳтимол... Одамнинг ичини би-
лиш қийин. Ҳар қалай, қидириб бу ерга келиши яхши
иш бўлмади! Эҳтимол, Қоражоннинг шаҳарда ҳақиқа-
тан ҳам зарур иши бордир?

VIII боб

НУРАЕТГАН ПЕШТОҚ

Тошкентга, Ўзгидропроектга маҳсус иш билан
тушган инженер Мингбоев йўл-йўлакай курсдош ошна-
си Қиёмхўжа Ҳазратовникуга киришни кўнглидан
ўтказди. Ҳазратов уни илгари ҳам бир неча марта
ўз ҳовлисига таклиф этган эди. Кечаки ҳам телефон
қоқди. Ҳар гал имконияти бўлмай, Тошкентдан буюқ
ургандай жўнаб кетадиган Қоражон Мингбоев бу
сафар ошнасининг телефон қоқиб, атай чақирганини,
мабодо кирмай кетса, астойдил хафа бўлишини пайқа-
ди. Бу «Тошкентча мулозамат» эмаслигини ҳам пай-
қади. Кечга яқин у инженер Ҳазратов ҳовлисига кириб
келди. Институтда ўқиб юрган кезларида ҳам бу ҳов-
лига бир неча марта келиб, ошнасиning музей бўлиб
кетган уй жиҳозларига жавон тўла жилди ҳал
билан ёзилган қалин китобларига маҳлиё бўлиб қара-
ган эди. Ўша пайтларда Қиёмхўжа Ҳазратов янги
уйланган, Гулбаданхон деган ёш, дилбар хотинининг
девзира гўручидан дамлаган ошининг мазаси ҳамон
жизида, ҳалигача эслаб юрарди. Ниҳоятда иффатли,
келишган бу жувон дўстининг боғини обод қилиб
турганига, уйининг бекаси бўлиб, файз киритиб юрга-
нига ҳаваси келган эди. Хотин-қизлар қаттиқ эътибор
берадиган ҳусн деган нарсадан маҳрум Қоражон кўп
вақт одамларга қўшилавермас, айниқса жоду кўзларни
қадайдиган гўзал жувонлар тўдасидан узоқда юрар-
ди. Шу сабабли ҳам ошнасиникига киравермас, ҳусни
бир қарашдаёқ кўзни оладиган Гулбаданундан дарҳол
нигоҳини олиб қочишини биларди. Бу беихтиёр бўла-
диган ҳол уни камситгандай сезилиб, руҳан қийналар-
ди. Гарчи бундай андишадан ғоятда узоқ бўлгани

билин бари-бир у Гулбадандан ийманиб, унга кўринишидан ўзини тортарди...

Шу куни Қоражон соч-соқолини текислатиб, янги костюмини, янги оқ сорочкасини, чипор гулли галстугини тақиб, ошнасенинига кириб келди.

Қиёмхўжа қирқ бешларга борган, кўркам, сарбаст киши. Ёш жувонлар унинг чертиб гапириши, салобати, кўркамлиги олдида сеҳрланар, унинг атрофидан кетолмай қоларди. Баъзи ёш-яланглар бу серсавлат одам олдида тортиниб, гапларини ҳам йўқотиб қўярди. Меҳрибон, осуда бўлиб кўринган кўзлари баъзан маккорона чақнаб қоларди; оқ айиқнинг газабини ҳам, шодлигини ҳам юзидан билиб бўлмаганидек, Ҳазратов ҳар қандай оғир лаҳзани гарчи ичдан қиринди ўтса ҳам билдирамаслик «санъати»га эга. У ўзини бепарводек тута оларди. Жанжалли ишларга бениҳоя кўп дуч келганими, ўйнашларининг макру ҳийлаларига бардош беравериб, қашқатаёқ бўлиб кетганими, ҳар қалай, ногаҳоний ташвишда ўзини қўлга олиб, сабот билан ўтказарди. Чертиб-чертиб гапирав, японларга ўхшаб энг қайгули хабарни ҳам тишининг оқини кўрсатиб, ха-ха-ха, деб кулиб, нописандлик билан қарши оларди. Совуқ илжайиш ва кўзларининг сирли чақнаб туриши, тетиклик, доимо зоҳир, сезгир аёллардан бири унинг японча илжайишини «Ҳазратовона кулги», дебди. Бу гапни эшитган бошқа панд еган жувонлар беихтиёр «ха-ха-ха-ха...» деб мириқиб кулишган. Кулиб туриб яна беихтиёр ўйланиб қолишган... Бобир Мирзо Ҳиндистонга бостириб кириб, уни қилич ва қон ила фатҳ этгани билан ҳинд аёллари Мирзони золим деган эмас экан. Аёллар руҳияси ўзи катта фах, дерди баъзан со-вуқ илжайиб Ҳазратов. Унинг асли ота-бобоси Тошкентнинг шайхантоҳурлик хўжаларидан бўлиб, ошналари ўртасида ўзини «пешанаси дўнг» туғилган қўчқор ҳисоблар, исмига «хўжа» сўзини қўшиб айтишларини ёқтиради. Қиёмхўжа ўзига етгунча серфикр, мулоҳа-закор киши; кимдир сиртини силаган, ишратбозларнинг ақли бошида эмас, кўзида бўлади, дебди. Бу гап Ҳазратов хусусида бўлса унча тўғри эмас. Офтоб нури микробларни қириб ташлаганидай, киши жамслининг илиқлиги майдо-чуйда гийбатларни куйдириб йўқотади. Қоражон Қиёмхўжа олдида у тўғрисидаги ҳамма гапларни исқирт гийбат деб, ошнасига очиқ дил, очиқ чеҳра билан боқарди. Ҳасадгўй, заҳил — симёнлар эмас, кўзга яқин, шаддод жувонлар ҳақида кўпроқ

яхши-ёмон гаплар юради. Эътиборли одамлар ҳақида шаҳарга гап тарқалади. Ҳар куни ўлгудай ичиб, таралабедод қилиб юрадиган ости кир, ўпкаси йўқлар ҳақида шаҳарга гап тарқалмайди, албатта!

Эшикдан кириб келган Қоражонни ҳовлида Қиём-хўжа билан Гулбаданбегим кутиб олишди. Болалар ичкарида эди. Бу хонадоннинг яна бир аъзосига ўхшаб кетган кексагина ола мушук ҳам хона ичидан чиқиб, зина тепасида думини калтак қилиб, меҳмонга қараб турарди. Қоражон ошнаси билан омонлашиб, ҳол-аҳвол сўрашиб, ичкари хонага кириши билан димогига нафталин ҳиди урилди. Ёқимсиз бу ҳидни наҳотки улар сезмаса? Ўрганиб қолишганимикан? Кенг меҳмонхонага уч қизил гилам ташлаб қўйилган; уларнинг деярли ярми биринчи гилам остида. Деворга қоқилган гулдор гиламнинг эт-бетига кичкина дока халтачада нафталин тўлдириб, илиб қўйилган. Ойнадек ярқираб турган жавону шкаф, бошқа хоналардаги шифонъер, креслою каравотлар уйни тўлдириб ярқирабди. Ўй складга ҳам ўхшаб кетган. Жавон ойнаси ичидаги матросча кийиниб тушган ўғилчасининг фотосурати — дўмбоқ бола тишини кўрсатиб кулиб турибди. «Бу ўғилчамиз!» — деди Қоражонни бошлаб, хоналарини кўрсатаётган Ҳазратов. У ўзини жуда ҳам болаларни яхши кўрадиган, болажон эканлигини билдиromoқчи бўларди. Болаларга меҳрибон бўлиш ҳақида кўпроқ гапиришини ҳам эслади Қоражон. Трестдаги бир маъжлисда сўзга чиққан Ҳазратов Наманган обlastидаги Чортоқсой тўғони (бу сув омбори қурилишида инженер Ҳазратов тўғон участкасининг бошлиги бўлиб ишлаган, кейинчалик сув омбори битгач, саккизинчи беш йиллик илгорлари мукофотланганда умумрўйхатда унинг номи ҳам бўлиб, Меҳнат Қизил Байроқ ордени билан мукофотланган) қурилишнинг халқ хўжалигидаги хизматини битталаб санаганида оғзидан бол томарди. Чортоқ қўли атрофида қанча-қанча санаторийлар, пансионат, пионер лагерлари, спорт майдонлари ва ҳоказолар қуриш мумкинлигини айтиб, ёш авлодга меҳрибонлигини кўрсатган бўларди.

Бир зумда меҳмонхонадаги устига йилтироқ парча, катаклари ичидаги фиръавнлар ва ўша замон раққосалари тасвири солинган дастурхон устига целлофан ташланиб, нозу неъматлар ҳозирланди. Ичкиликнинг ҳамма тури, биллурий қадаҳлар ювилиб, силқитиб қўйилди. Патир нону закускалар ҳам муҳайё. Таомил

бўйича Ҳазратов олдин бир пиёла чой узатди. Қоражон чойни ҳўплаб, пиёлани ёруғга тутиб кўрди; кичкина, атрофига олтин ҳал берилган бу юпқа оқ чинни ичида яланғоч гўзал хотин тасвири бор эди. Тўғри чой ичиб ўтирган киши уни кўрмас, фақат ёруғга солиб қарагандагина юпқа чинни ичидаги тасвир кўзга ташланарди. Қоражон ҳушёрик қилиб, пиёлани ёруғга солиб кўрганидан Ҳазратов мамнун бўлди. Бу билан у ошнаси ноёб нарсалар эгаси экани, таги кўрган, бой ва таъби нозиклигини тан олгандай бўлиб кўринди.

— Қисталоқ японлар жуда уста-да! — деди Ҳазратов, — мана бу дастурхон ҳам Арабистондан...

— Кўрдим, зўр! Нефертигининг тасвири бор экан.

— Неферти? Йўқ, бу Мисрники-ку? Неферти нима?

— Нефертити — бундан тўрт-беш минг йил илгари Миср тупроғида ҳокимлик қилган фиръавнлардан бирининг қизи. У жуда гўзал бўлган. Қисқа умр кўрган...

Ҳазратов бир нима демай донг қотиб қолди. Лекин ўз буюмининг асил эканлиги кўнглини тўқ қилди. Институтда ўқиб юрган пайтларида «чандиқ йигит»-нинг синчков, имтиҳонларда доимо ғолиблигини биларди, лекин Миср тарихларину фиръавнлардан гап очиши уничг маълумот доираси кенглигидан далолат бериб турарди. Бу Ҳазратовга унча ёқинқирамади.

Гулбаданга қишлоқи йигит анча дағал кўринди. Йўғон гавдали, қорача, юzlари чандиқ Қоражон Мингбоев ўтирганида нозик стулнинг суяничиқлари ғирчиллаб кетган эди. Ўнг қўлни билан пишоқ, чап қўли билан вилка ушлашни ҳам билмай, ўртадаги салатни қошиқ билан олиб оғзига солди. Қоражонга сездирмай Гулбадан билан Ҳазратов бир-бираига имо қилиб, кулиб қўйишди. Инженер Мингбоевнинг алланима деб донғини эшигтан Гулбаданхон рўпарасида дўлол, турқи совуқ, тўпори бир одам тургандай бўлди. У овқатни шапиллатиб еяётгандай кўринди, шапиллатиб овқат ейдиганларни Гулбаданхон асло ёқтирасди. Хайрият, ботинкасини ечиб хонага кирди, бу ишга диди етганидан, полга ташлаб қўйилган чўғдек гиламларни ботинкаси билан босмаганидан хурсанд бўлди.

Лекин бу «дағал одам» жуда ҳушёр, бирровга ўзини гап билан бўлса ҳам таҳқир эттириб қўймаслигини

Ҳазратов яхши биларди. Шу сабабли у хотинининг ортиқча имо-ишорасига эътибор бермади. Шунга ўхшаган дағал, қассобнамо кўринган бир профессор пианинони ниҳоятда яхши чаларди, акварель бўёқларда табиат манзараларини чизарди. Бундан бир йилча бурун Намангандан келаётганда вагон-ресторанда худди шундай «дағал» бир одам маст бўлиб ошналари ўртасида айтилган бир ноқулай сўз учун арақ ичиб турган юпқа стаканни кутурлатиб чайнаб ташлаган эди. Бу ҳолатни ўз кўзи билан кўрган Ҳазратовнинг юраги ўйнаб, ўрнидан туриб, купесига жўнаган. Бояги йигитнинг оғзи қип-қизил қон, қандни кутурлатгандай шишани чайнарди. Дарҳол ошналари унинг қўлларини ушлаб, энгаштириб, оғзидағи шиша парчаларини туфлаб ташлашни буюришди. Кимdir сувга югурди, кимdir рўмолчаси билан унинг оғзидан майда шиша парчаларини артиб ола бошлади... «Бу мастилик оқибати! Аҳмоқлик!»— деди Ҳазратов. Бошқалар ҳам шундай деб, у одамни лаънатлашган эди. Бу иш мардликка кирмайди! Лекин, барибир, бу даҳшатли ҳодиса Ҳазратов кўз олдида туарди. Ўзи ёки хотини томонидан бирон ноқулай гап ўтса, бу «қишлоқи», дейилиб, ҳақоратомуз гапларга тоқат қиладиган кимса эмаслигини Ҳазратов сезарди. У ўзига етгунча чакказарб, зардаси тез кимса, деб биларди. Ҳазратов наздида бу, фронт тамғаси, оғир ярадорликдан қолган асабийлик, деб ҳисебларди.

Қоражон бир-икки қадаҳ билан кайфи ошадиганлардан эмас, у жуда босиқ, ичишни ҳам билиб иcharди. Ҳазратовнинг гапларидан, унунтеги ҳаснини қайта топиши, Чорвоқнинг «устунларидан бири» — Мингбоев билан ош-қатиқ бўлишининг боиси: Трестни ташлаб, қурилишга боришни мўлжаллаётганини сезди. У борадиган бўлса бош инженер ёки кам деганда бош инженер муовини бўлиб боришни кўзларди. Бу ишда Мингбоевнинг ҳам қўмаги тегиши мумкин. У Садовниковга яхши гаплар айтса бас, бу ёғи анча-мунча чоки чокига келтириб қўйилганга ўхшарди. Суҳбат пайтида Қоражон Ҳазратовнинг ниятини тушунди. «Ҳазратов қичиыйдиган ерини олдиндан қашиб қўядиган» лигини атрофидаги ошналари биларди. «Ҳар қаерни қилма орзу, ҳар ерда бор тошу тарозу», — деди ичиди Қоражон. Лекин начора! Агар у астойдил Чорвоқча бораман, деса, боради! У бу ерда ҳам яна битта орденни қотир-

моқчи... Ўнта Мингбоевнинг кўрсатган қаршилиги уч пул бўлиб қолади. Гап билганга минг танга, иш билганга бир танга, деган мақол Ҳазратовга атаб чиқарилгандай, у ўзига етгунча сўзамол. Эҳтимол, Амир Равнақ деган шоирнинг шеъри ҳам унга қаратилгандир.

Жавраш билан умринг ўтиб бородир,
Пўрсилдоқ гаплар-ла борурсан қайга?
Ҳунаринг шу экан, ҳунаринг «нодир»,
Бир кун ботишлигинг аниқдир лойга...—

деган мисралар ёдига тушди. Начора! Инсоннинг феъл-автори тоғлар тизмасидек мустаҳкамки, даврлар ўтиб кетади, аммо емирилмайди. Инсон феълини ўзгартириб, текислаш амри маҳол! Ошналаридан бири Ҳазратовни ўз мақсади йўлида ҳар қандай ишдан тоймайдиган кимса, у ёздан қолган чивинdek ўзини дераза ойнасига уриб, ғинфиллаб, тўғри келганни чақади, деган эди. Ана шундан ўзингиз хулоса чиқара-верасиз!

— Тегирмон ҳам гали билан,— деди Қоражон Ҳазратовнинг қадаҳига конъяк қуийиб,— мен ўзим ҳам қуяй сизга.

— Ташаккур! Азизим, сиз қайси бир денгизда пароходларни қаърига тортиб кетаётган, самолётларни ҳам бедарак йўқотаётган жой борлигини эшитгани мисиз?— деди ўзини билимдон кўрсатиб. Чунки баъзи ошналари Ҳазратовни инженердан кўра ҳам кўпроқ администратор бўлиб қолган деганлари қуолғига етиб келган эди. Бу гап тўғри эмаслигини исботлаш учун у кўп вақт мана шундоқ ўтиришларда ўзини билағон кўрсатишга уринарди.

— Эшитганман. Бу гап анчадан бери бор. Бу, Атлантик океанида, қитъага яқин, «Бермуд уч бурчаги» дейилади. Дарҳақиқат, сиз айтганингиздек, бу жойда пароходу самолётлар маълум вақтда бедарак йўқолиб кетяпти. Буржуа матбуоти турли гаплар тарқатиб, узоқ коинотдан келганлар бу пароходу самолётларни олиб кетяпти, демоқдалар. Баъзи олимларнинг айтишича, уларни ер остидаги магнитга ўхшаган куч тортиб олиб кетаётгани, қандайдир кучли тебраниш пайдо бўлаётгани ҳам маълум қилинган. Яна бир гуруҳ олимлар, Қуёш, Ой, Ер бир чизиққа келиб қолганида шундай тортиш қудрати кучайиб, фожиали ҳалокатлар пайдо бўляпти, дейиша-

ди. Ҳар қалай, бу воқеа ҳозирча жуда сирли ва муаммодир... Таажжуб!

Икки йигитнинг кайфи ошиб қолди. Айниқса, меҳмондан олдин ўзи маст бўлиб қоладиган Ҳазратов ош киргунчачёк «мен сизга айтсан» бўлиб қолди. Гулбаданхонимнинг ошхонада ўзи билан ўзи оворалиги, кенг хона ичида уларнинг икковларидан бўлак кимса йўқлиги — бўлиб ўтган ишрату баъзи «сирли гаплар»ни ҳам юзага чиқарди. Ичиб олган Ҳазратов жуда серғап бўлиб кетарди. Бундай пайтларда мақтанар, ҳамсуҳбатига «мехри товланиб», уни ялай бошларди. Иттифоқо Қоражон қурилишга Ҳазратов билан машинада бирга келиб кетган «чикка бел» жувонни эслади. Кимлигини сўради.

— Ҳа, азизим,— деди секин шивирлаб Ҳазратов,— биз унчалик «ошиқ-маъшуқ» эмасмизу, аммо анчадан буён кетимдан эргашиб юрибди. Уни «Обакихон» деб атایмиз. Асли оти — Кимсанхон. Ўзи жуда жойида, билади... Ҳа, жуда зўр... ха-ха-ха-ха! Лекин, қисталоқ тилда тақинчоқларни ниҳоятда яхши кўради. Кийимга ўзини уради. Бузилиб кетишига ҳам асосан шу пулга ўчлиги сабаб. Брильянт кўзли узук олиб бердим. Менга шундоқ ёпишиб олган, қаерда бўлсам топади. Наманганди ташлаб Тошкентга келди. Тўғриси, мен ўзим уни алдаб олиб келдим...

— Кеннайим билиб қолсалар нима бўлади?

→ Теримга сомон тиқади! — деди Ҳазратов рўпаратидаги ошнаси юзидағи чандиқقا тикилиб.— Сездирмаймиз, алдаймиз, муомалани яхши қиласмиз... Биз шўрликларнинг бошқа иложимиз йўқ. Доимо юрагимиз така пука. Азизим, ҳув авави тўйда ёнр қиз сизнинг ҳам юрагингиздан урган эди. Ёдимда. Қўлга туширдингизми? (У Гулгунни эслатаётганнини сезди-ю, Қоражон миқ этмади.) Шу Обакихон Намангандан битта чамадон билан келди. Икки хонали квартирага жойлаб қўйдим. Бирон йил ўтмай, бу қуп-қуруқ квартира шифонъер, гиламу турли моллар билан тўлиб кетди. Жуда молга ўч...

— Ўзлари билан ҳам Наманганд?..

— Ҳа, албатта. Ўша ердан топганмиз...

— Сиз хотинингиз билан чақчақлашиб ўтирганингизда у квартирасида ёлғиз қолиб изтироб чекади! Тошкентга у сизни деб келган. Шундоқми?

— Тўғри.

— Шу ҳолда қачонгача бориш мумкин?

— Ярим кечада ҳам эшик тақиллатиб борганман... Умуман, бундай жувонларнинг қисмати вой; ахир бир кун ё заҳар ичиб ўлади, ё ўзини сувга ташлайди.

— Бечора!

— Нима, нодон бўлса биз жавобгармизми? Унга худо ҳусн бераб, ақл бермаган. Доимо тараллабедод базм - бўлса-ю, иш бўлмаса. Кийимлари башанг, қўлларида қимматбаҳо тилла узуклар, ёнида келишган йигит бўлса... Айш суриб, одамларнинг кўзини ўйнатиб юрса. Мана шу керак. Ўзлари ҳам гап бўлғанликларини эшитганмиз. Ўзлари ҳам фаришта әмаслар-а?

— Ҳа.

— Вей, ман сизга айтсам, бу иш аввал жуда ширин бўлиб, кейин албатта миси чиқади...

Қоражон кайфи ошган Ҳазратовнинг гапларини тинглаган бўлиб, бақрайиб ўтиради-ю, хаёлини бошика бир кимса чулғаган эди. Ўша пайтларда Амир Равнақнинг бир ҳажвий тўртлигини ўқиган эди:

Каптарлар тўпига кирган қарғасан,
Адашиб кирмадинг, киргансан билиб.
Вақти етгач, чиқиб кетишинг осон —
Қурилиш қалъасин хўп шилта қилиб...

Демак, орамизда баъзи нопок йўл тутган кимсалар борлигини шоир биларкан-да, миқт пардаламайлик, бундай кимсалар борлигини шоир сезиб юраркан-да, деган эди Қоражон Мингбоев. Лекин ҳозир бу эски гапни Ҳазратов яна тилга олиб, Қоражонга эслатиши қизиқ бўлди. Бу билан у учинчи бор Наима воқеасини Қоражонга эслатарди. Илгари у Садовников ёнида Қоражонга ҳазил қилган бўлиб, бу гапни айтиб юборган эди. Қизариб хижолат бўлган Қоражонга «бу ҳазил» эканлигини айтиб, узр сўраган. Аслини олганда: «Сен, Мингбоев, ҳадеб, фронтчиман, деб ошаверма, тилингни қисиб юр! Бўлмаса, Наима билан бўлган жанжалларингни очиб ташлайман!» — деб дўқ уради. Шу йўл билан Қоражон Мингбоевнинг тилини қисиқ қилиб олмоқчи эди. Қоражоннинг оғзига қаймоқдек татиётган арман конъяги бирдан заҳар бўлиб кетди. Унинг ичгиси ҳам, егиси ҳам

келмади. Эчкиники доимо очиқ, қўйнинг айби бир марта очилса ҳамма ёқда дув-дув гап экан-да, деди ўзига-ўзи Қоражон маст бўлиб қолган Ҳазратовниң тәпакал бошига тикилиб.

Сұхбат мавзуи адабиётга ўтди. Бунга сабаб жавондаги китоблар бўлса, ундан ташқари, нариги кўчада турадиган инженер Файзулла Аҳмедович Музafferовнинг ҳамда маҳалладоши шоир Амир Равнақ эди.

— Ёзувчилар пулни кўп топади, дейдилар, бу учча тўғри эмас экан,— деди Ҳазратов,— мана шу Амир Равнақни йигирма йилдан бери биламан, косаси оқармайди... Битта костюмни уч йил, тўрг йил кияди.

— Ҳа, эшитганман,— деди Қоражон,— шисир шу маҳаллада турадиларми?

— Ҳаммаҳалламиз.

— Шеър ёзиб, бойиб бўлмаса керак.

Шиғирини болалар ўқимаса, биз шигир ўқимаймиз. Ёки битта-яримта ошиқ-маъшуқ бўлиб юргани ёшлар ўқийди. Кейинги пайтда бундоқ қўлга олиб ўқийдиган бирон роман чиқмаяпти,— деди Қиёмхўжа,— «Ўтган кунлар», «Қутлуғ қсан», «Бўрондан кучли» бир ёзилиб қолгэн экан-да. Баъзи китобларни ўқийсану, сира маза қилмайсан. Театрдаги ёғочдан ясалган меваларга ўхшайди. Кўриниши «мева», аммо ушлаб кўрсангиз — ёғоч

Шу пайт телевизорда катта ашуланни обдан маҳорат билан ижро этаётган хонанда ҳақида сўз кетди:

— Урушдан илгари, ўттизинчи йилларда Уста Олим, Муҳиддин Қори, Тамарахонимлар Лондонда концерт бериб, бонлашган!— деди Ҳазратов ҳаяжон билан,— ўзбек санъаткорларини Лондон таин олган.

— Ҳа, санъаткорларимиз билан фахрлансак арзийди,— деди Қоражон жавоб қилиб,— лекин чириган-ириган ўша Лондон ўлчов эмас! Умуман, шундай деб илм ва санъат юксалишини ўлчаш, менимча, тўғри эмас! Бизнинг ўз Москвамиз, ўз Тошкентимиз бор! Санъатимиздан Ватанимиздаги халқларимиз мамнунми? Чиндан ҳам бу санъат уларга керакми? Ана шу муҳим! Мен шундоқ деб ўйлайман.

Ҳазратов жим қолди.

— Зикинага қойилман!— деди яна Қоражон,—

у дилрабо рус қўшиқларини беқиёс ижро этиши билан санъаткорларнинг нималарга қодир эканлигини дунёга намойиш қилди. У бу ердаги баъзи хонандалардек обрў оламан деб турли яхши қўшиқларни мошхўрда қилиб айтаверса, баъзи сурнайчилар «Ҳарғалар...»ни чалиб ўтганидан ҳам хароб бўлардику!

Шу гапдан сўнг санъат ҳақидаги баҳс тугади. Уртага бир муддатли сукут тушди. Бу паузани қадаҳларга конъякнинг қултиллаб тушиши бузди. «Қани, олинг! Қани олинг!»дан кейин улар ўзлари ҳақида ўйлай кетдилар.

Қиёмхўжа илгариги хотини Ҳумайрани учта боласи билан қўйиб юборган. Тошкентнинг Ҳажимал маҳалласидаги ота ҳовлисини уларга ташлаб, кейинчалик ўзи Камолон томондаги бир номдор одамнинг оиласига ичкуёв бўлиб кирган. Шўх, келишган Қиёмхўжа Гулбаданга «ошиқ» бўлиб юриб, уйланди. Ундан турмуш қургани, учта боласи билан хотинини ташлаб кетганини яширган. Орадан йиллар ўтгач, бу воқеа очилиб, Гулбаданнинг ота-оналари ҳам эшилди. Гулбадан бўлса бир-икки кунлик дилсиёҳликдан сўнг тақдирга тан бериб, эрининг гуноҳидан ўтди. Қонни қон билан ювмайдилар, сув билан... деган ҳажималлик холаси — Нозима кампирнинг айтишича, куёвнинг илгариги хотини эри ташлаб кетгандан кейин ўзини хор қилмай Текстилькомбинатга ишга кириб, йўлини топиб кетган экан. Икки боласи боғчага, бири мақтабга борар экан. Комбинатда зарбдор бўлиб ишлаб, газеталарда сурати чиқсан, орден ҳам олган дейишади... Нозима кампир кўрган билганини оширмай-тоширмай Гулбаданга айтиб берарди-ю, аммо юрагида бир воқеа тикандек қадалиб ётарди. Қанчалик тили қичимасин, бу гапни ҳеч айтгиси келмасди; Қиёмхўжа ўша Ҳумайра деган жувон билан турмушлари бузилмаган вақтда бош боласи — олти яшар қизчаси Яйра қўшнисининг қизи билан хона ичида шўхлик қилишиб, жавон тепасида турган чинни вазани тушириб юбориб, чилчил қилган. Кечга яқин ишдан келган Ҳазратов шу қизини чунонам урганки, қизчанинг чинқириги, оҳу фифонига қўшнилар чидолмай ҳовлига бостириб киришган. Шунда Нозима кампир Ҳазратовга ўқрайиб: «Болам, қиз болани уриб бўлмайди, отаси урган қиз бахтсиз бўлади!» — деган әди. Лекин Қиёмхўжа

кампирга ўдағайлаб: «Сиз аралашманг, бу ёмон бўлиб кетган! Мен бу вазани етмиш беш сўмга олган эдим!»— деган. Шу қизча бир куни кўча бошидаги дераза ёнида туриб, ичкарида қўшниларнинг пианино чалаётганини эшитиб, маҳлиё бўлиб турганида отаси Ҳазратов келиб, қўлидан силтаб тортиб, уйга олиб кириб кетган эди: «Эшшак, мен сени папиростга чиқариб юборсам, шунча кечикасанми!» Бу воқеани ҳам кўриб қолган Нозима кампир: «Вой, шўрини қурсин, сен қизчага қийин экан»,— деган эди. Ҳазратовни инженер деб эшитгани, лекин турмушда қилаётган ишлари ҳеч инженер киши қиласидиган иш эмаслигини ўйлаб, кампирнинг боши қотарди. Қиёмхўжанинг ота-онасига хаёли кетарди: ота-оналари бунчалик паст одамлар эмас, таги кўрган, сажаралик хўжалардан эди. Лекин бу йигит шу даражада пасткаш одам бўлганига ҳеч ақли етмасди. Катта қизининг музикага ишқибозлигини сезган Ҳумайра, уни Глиэр номидаги музика билим юртига киритиб қўйибди. Ҳумайра болаларини Ҳазратовга кўрсатмас экан. Уч фарзандини чиннидек, ораста қилиб тарбиялаяпти. Етмиш беш сўмлик чинни ваза учун қизини чинқиритириб ургани Ҳумайранинг дилини чилпора қилган. Бу воқеадан кейин у ташлаб кетган эри устидаң шикоят ҳам қилмади. Чунки у шикоятга арзимайди, унинг ўз оёги билан кетгани яхши бўлди, деган эди. Лекин ўн йил умрим бекорга ўтди, яхши ҳам уч фарзандим — уч бахтим бор, бўлмаса менга жуда ҳам жабр бўлган бўлар эди...— дебди.

Шу-шу бўлиб Нозима кампирнинг Ҳазратовдан ихлоси қайтган, инженер деса, кўз олдига Ҳазратов келади, бундан бошқа инженерни кўрмаган. Агар бошқа инженерлар ҳам шунаقا бўладиган бўлса, ҳаммасини ер ютсин! Бундан кўра маҳалладаги Одил пияниста яхши, у ҳар куни ичиб, маст бўлгани билан болаларини жонидан афзал кўради. Шу инженердан кўра Нортой қори яхши, куф-суф қилиб, одам ўқиб юргани билан бирорвога озор бермайди, болаларининг бири институтда ўқийди, бири поликлиникада врач...

Тунда Қоражон Қиёмхўжа Ҳазратов ва унинг гўзал хотини, болалари билан хайрлашиб, ташқариги чиқди. У билан ёнма-ён зинапоядан тушган ошнаси кўчага бирга чиқиб, хайрлашиб қолди. Кайфи ошган Қоражон шу ҳолда Чорвоққа чиқиб кетиши асло

мумкин эмас эди. У бу уйда ётиб қолгиси ҳам келмади — бу уй ажойибхона — музейга ўхшарди. Дўлвор, «қишлоқи» бир одамга пайтаваларини у ёқ-бу ёққа ташлаб, ёнғоқ дараҳтидан қилинган венгр каравотида, пар ёстиқларда ётиш эриш кўринди. Бунинг устига, ошнасининг уйидан нафталин ҳиди анқиб туради. Қайси хонага кирмасин, димоққа нафталин ҳиди уради. Қоражон бўлса нафталин ҳидини асло ёқтирмасди, бунақа жойда ухлаш у ёқда турсин, бирпас ўтирса ҳам асаби қўзгарди. Ошнам бойишга бойибди-ю, аммо пасткашроқ бойибди, кўнглидан ўтказди. Унинг кўз олдида пештоқлари нураётган иморат тургандай бўлди... Қоражон кайф билан тўппа-тўғри Эски Жўва томон юрди. Себзорда турадиган яна бир бошқа ошнасининг ҳовлисига борди. Бунда ўзига ўхшаган дўлворроқ, Ташсельмашда ишлайдиган бир дўсти яшарди. Шу кечада ўша ошнасиникида тунаб қолди.

Эрта билан ионушта қилишди: бир коса қаймоқ, иссиқ исонлар хонтахтани безаб туради. Қоражоннинг кечада иччилик ичиб келганини кўрган дўсти хотинига эрта билан аччиқ хўрда қилишни тайинланган экан, икки коса хўрда келди. Мурч сепиб, маза қилиб ичишди. Бош оғриқлар ҳам қолди: одамзод қизиқ, бир ошнаси бою кўнгли тор, иккинчисининг мол-дунёси йўғу кўнгли кенг. Кўп нарса одамнинг феълу атворига боғлиқ, инсон ўз феълу хусусияти билан жуда ҳам мураккаблигини ўйларди. Ҳазратовнинг қўярда-қўймай ўз уйига таклиф этишида бир мақсади, мўлжаллаган иши борлигини фаҳмлади. Аслида, келмай қўя қолса яхши бўлишини, ўтириш қандайдир носамимий бўлганлигини, дўстининг бир илинжи борлигини фаҳмлаб, хафа бўлди. Ишчи ошнаси, Сижжакдаги мўйловдор Милтиқбой ака Қўйбоқаровлар бошқача. Бу кекса одам билан мулоқатда бўлган киши баҳра олади.

Инсон ташвишни мардонавор кўтаришга қодир, аммо фавқулодда бахту омадни номардларча кечириш касалига ҳам мубтало. Шу сабабли муносиб кексаяётган ақли расо, бир сўз билан айтганда, бутун одамларни кўриб, киши тоғларга тикилгандай юракни завқ қучади. Бундай одамлар ноёб кигоблардан мўътабардир, деди ўзига-ўзи Қоражон.

ЗАМОН ФАРҲОДЛАРИ

Кесиб ҳар тешаси қилғач хароши,
Фалак пили юқидек пора тоши.
Чу метин зарбидин айлаб синтеза,
Қаттиқ харони айлаб реза-реза..

Навоий

Чирчиқ водийсига барвақт қиши тушди; совуқ шамол эсиб, эрталабки изгирин танин ачитарди. Кечаштабдаги маслаҳатга кўра Мингбоев ионуштадан сўнг тўппа-тўғри асосий туннель томон жўнади. Бу ерга Садовников, Шишкинлар ҳам келиши керак эди. Петухов ва Мансуровлар бригадаси тун бўйи ишлади. Сув ичидаги «совуқ душ қабул қилишган» эди. «Проект — чалпак эмас, уни бир зумда пишириб бўлмайди», деб юрадиган кекса инженер ҳаммадан олдин асосий туннель қазиётганлар тепасига келиб, қутуриб оқаётган Чирчиққа қараб ўтиради. Қоражон ҳам унинг ёнига келиб, буралиб-айқириб, дам қирғоқларидаги улкан қоятошлар ичига кириб, яшириниб, дам кенгликларда ёйилиб оқаётган кучли оқимга тикилди. Тушган нарсани чархпалак қилиб, қаърига тортиб кетадиган сув негадир бепарводек. Бу кечаштабдаги жадвал 700 га чиқиб кетган. Кечагина 300 рақамида эди. Сувнинг бу даражада кўтарилиши туннель қазиётганларга, пастки каналда ишлаётганларга хавф соларди. Туннель ва пастки каналга кирган сувни тезликда насослар ёрдами билан чиқариб ташлаш керак эди. Сув ичидаги юрган уч бригада кишилари насосларни ишга солиб, лойқа сувни чиқариб ташлаша бошлади. Садовников билан Шишкиннинг юқорида серрайиб турмай, сув кечиб юрган бригадага аралашиб кетганини кўрган Мингбоев ҳам уларга эргашди. Кекса инженер Каминский канал четидаги туриб, сувнинг уриб кетаётган томонини кузатар, бульдозерчининг тез келмаётганидан диққат бўлиб, атрофига олазарак қаради. Узоқда, тўғон томонда тўп отгандай гумбурлатиб бульдозер моторини юргизаётган йигитга қўлини баланд кўтариб имо қиласарди. Агар уч-тўрт кун Чирчиқ шундоқ кўтарилиб, қутуриб оқса, котлованга сув тўлади, пастда қазилаётган

ёрдамчи каналларни вайрон қиласи. «ЧП» сабабли шу куни кечгача Қоражон Мингбоев пастки канал, котлованда бўлди. Тушликни ҳам бунда дўстлари билан бирга ейиши. Кўпдан қуён қочиб қутулмас: икки бульдозерчи, тўрт кучли насос ва бу ерда шахсан ишнинг тепасида турган қурилиш бошлиғи ва парторг одамларга далда бўлди. Сув-лойга ботгандарига қарамай тошиб, бузиб кирган ерларга тошу тупроқ уйиб, кичик дамба қуриши. Бу ўтган кунги жала оқибати, дерди қурилиш бошлиғи. Чирчиқ билан ўйнашиб бўлмайди! «Саратонда ҳам унинг кўпайиб, тошиши бор», — гапга аралашди Қоражон Мингбоев. «Асримизнинг бошида бу дарёни «Парпирак» деб атаганлар, — деди Каминский қандайдир бир китобни ўқиганини маълум қилиб. У, дарҳақиқат, тарихий ва бадиий китобларни кўп ўқирди, — улкан харсанг тошларни парпирак қилиб кетишидан исми жисмига монанд. Лекин ўн бешинчи аср, Амир Темур замонида «Чир» деб аталган»...

Туннель, котлован ва ёрдамчи каналларга сув кириб кетиш хавфи йўқотилгач, кечга яқин Садовников билан Каминский штабга қайтиши. Қоражон ҳам этиги, телогрейскасини кийиб, ўз участкасига — тўғонга, ундан харсанг тошлар автомашиналарга ортилаётган каръерга, экскаватор ёнига келди. Бу ер унинг асосий иш жойи — бунда фарҳодлар тог синдириб, тўғон қуришарди.

Қурилишда сув босиш, катта кранларнинг аварияга учраши, тоғдай харсанг тошларнинг қулаб тушиши каби кутилмаган воқеалар уч йил мобайнинда бир неча бор рўй берди. Бунинг устига Хўжакентда аzon маҳали рўй берган кўчкин бутун бир катта гаражни, Тошкент — Чорвоқ бетон йўлини босиб қолди. Бир неча одам кўчкин тагида қолиб кетди. Кучли экскаватор ва бульдозерлар билан йўл очилди, аммо гараж қоровули ва яна бир кампирдан ном-нишон бўлмади... Бу ерда Мирзачўл ёки Қарши даштидагидек иссиғу совуқча бардош бериб ишлаш билан бўлавермайди — қўрқоқча олисда тикилиб турган тоғларнинг ҳар бири улкан девга ўхшаб кўринади. Улар асрий уйқусини бузган моторлар гумбурлаши ва портлашларга чидолмай, қоятошларни узиб олиб отар, дарёни тошдирар, жала қуярди... Садовников ҳам, Шишкин ҳам бундай чоқларда Чотқол фарзанди — инженер Мингбоевни ухлаб ётган еридан олиб

чиқиб кетардилар. Деразадан кўчага машина келиб тўхтаганини кўрган Қандил буви ҳозир эшик тикирлаши, ўғлини кийинтириб, қайси бир участкага олиб кетишларини биларди. Бу гумонларининг тўқсон тўққизи тўғри чиқарди. «Ҳой, Шошқин болам, Чорвоқда кўриб олганларинг битта Мингбоевми? Чорвоқда минг-минг одам ишлайдиги! Қаерда бир кори ҳол бўлса, ўғлимни олиб кетасизлар! У гап қайтармайди-да. Мўмин». Қурилиш бошлиги кампирнинг сўзларини дикқат билан тинглаб, жавоб қиласиди: «Ҳа, онажон, ўғлингиз ҳеч гап қайтармайдиган яхши йигит. Уни уйлантириб қўйганингиздан кейин тегмаймиз. Иккиламчи, у бюро аъзоси. Биз ҳаммамиз ишга баб-баробар жавоб берамиз».

Бу гап кампирга ёқар, кимда-ким тўй ҳақида гапирса, у яшнаб кетарди. Одамларнинг эрга теголмай, вақтини ўтказиб юбораётган қари қизлари бўлади. Лекин, кампир бечоранинг умри ўтиб бораётган бўйдоқ ўғли тоғдек бўлиб юради. Аввал фронт деди, уруш босилгандан кейин институт, ундан кейин Чорвоқ... «Ишқилиб, шундоқ ўтиб кетмасанг яхши эди, болам,— дерди баъзида Қандил буви.— Наҳотки, шунча тумонат одам ичидан сенбоп қиз чиқмаса?! Ёки сувда юравериб, хотин олни ҳам эсингдан чиқиб, совуқ мижоз бўлиб кетдингми?»

Одатдагидек саҳарлаб Қоражон тўғон бошига келди. Икки баланд тоғ оралиғидаги кенг майдонда ёлгиз ўзи айланиб, кунчиқар — бўлғуси денгиз томонга тўкилган харсанг тошларни кўздан кечирди. Ҳар бири уйдек-уйдек метин тошлар аганаб ётарди. Тўғоннинг бошдан-охиригача, узунасига харсанг ташланиб, ундан кейин тупроқ билан шағал қўшилмаси тўкилган. Ўрталиққа қум ва яна харсанг... Тўғоннинг кунботар томонига ҳам тупроқ билан майда тош аралашмалари тўқилиб, «МАЗ»нинг тишилик оғир гўласи билан қайта-қайта шиббаланарди. Қоражон кеча кечқурун анализ учун лабораторияга олиб кетилган ерга келиб тупроқ зичлигини кўздан кечирди. Каръердан ташиб келинаётган майда харсанг тошлар жуда текис тўкилаётгани, айниқса «БелАЗ» ҳайдаётгандардан Можаев, Омоновлар оралиқни текис олиб, тўғоннинг бошидан охиригача етти юз эллик метрлик масофадаги камарга чизиб қўйилгандек тўкаётгандикларини сезди. Икки баланд

Тоғ оралиғидаги бу майдон аэропорт учиш майдонидаги бетон трассаларга ўхшарди. Унинг кенглиги ҳам бир неча стадионга тенг келарди. Майдон бўлиб кўринган бу жой ҳозир ердан йигирма метр кўтарилиган. Бир томони Кўнғирбуқа, бир томони Асқартоғ оралиғидаги бу улкан майдондаги тўғон келгусида бир юз олтмиш саккиз метрга кўтарилади. Чотқол, Кўксув, Писком дарёлари сувлари тўпланиб, қирқ бир квадрат километрда ложувард денгиз ярқираб маёж уради... Денгизнинг ўрталиридаги чуқурлик юз эллик, икки юз метрдан ҳам ошади. Унинг баъзи жойлари Атлантик океан чуқурликларига тенг келади. ГЭСнинг қудрати олти юз минг киловатт бўлиб, машҳур ДнепроГЭСдан кучли бўлади. Эрта тонгда тўғонни айланиб юрган Мингбоев кўз олдидан бу гигант тўғоннинг, Чорвоқ ГЭСнинг келажаги ўтди. Чирчиқ водийсида узоқ йиллар мобайнида илмий-техникиш ишлари олиб борган, бундан йигирма йиллар асвал дастлабки лўйиҳаларни тузган Николаев, Семинихин ва бошқаларни эслади. Гидропроект институтининг иши ниҳоятда катта эканлиги кўриниб турарди. Ўзининг домласи, инженер Борис Иванович Бородинийнинг бегараз ёрдами бир фронтчани оёққа турғазди.

Бир муддатдан сўнг узоқда, тоғ остидаги карьерда мотор гуриллади. Экскаваторчи йигит агрегатини ишга солаётган эди. Бирин-кетин буқага ўхшаган кучли «КрАЗ» ва «БелАЗ» машиналари қаторлашиб, Хўжакентдаги гараждан чиқиб йўлга тушиди.

Қуёш нурлари қояларда ярқирай бошлади. Прораб Никаноренко ва бошқа йигитлар ҳам етиб келишди. «БелАЗ» ҳайдаётган йигитлар харсанг тош ортиб, тўғон майдонига кириб келашди. Участка бошлиғи Мингбоев тоғ кесиб келаётган фарҳодлар билан салом-аликдан сўнг лабсраторияга борди. ГЭС котловани юқорисидаги вақтинчалик қурилган хоналардан бирида тўғон қатламининг зичлигини, қаттиқлигини аниқловчи асбоблар ёнида ўтирган Галина Шишкина ёнига кирди. Ташланётган масса зичлиги жойида эканини билгач, Галинага бир-икки ширин ҳазил-мутойиба гап қилиб, яна «БелАЗ» ҳайдаётганлар ёнига чопиб кетди. Прораб Никаноренко билан гаплашиб, машиналарни сал жадаллаштириш лозимлигини тайинлади. Ўзи ҳозир Чирчиқ бўйига, қум олаётган экскаватор ёнига боришини,

тўғонга босилаётган қатлам зичлиги меъёрида әкан-лигини айтди. Шиббалаётган машиналар сонини олтитага етказишни сўради. Шундан сўнг ўзи қум карьерига жўнади. Чотқол тизма тоғ этакларидағи карьердан харсанг тош ташиётган «БелАЗ», «КРАЗ»-лар ўкириб, кучаниб, елкаларида тош кўтариб тўғонга шошилишарди. Бу кучли машиналар узоқдан қатор келаётган филларга ўхшаб кўринарди. Улар нинг кифтидаги филбонлар замон фарҳодларидир, улар тоғ кесиб, тўғон қуришарди.

Инженер Мингбоев кун бўйи тўғонда, ўз участкасида бўлди. Икки бор ўзи ҳам Абдуманноп «БелАЗ»-ида карьерга бориб, харсанг тош келтириб тўқди. Инженернинг машина ҳайдовчилар ичидаги юриши, харсанг тош ташиши ишлаётганларни руҳлантириди. Ёз бўйи бошига сомон шляпа кийиб, қўлида лойиҳа-чертёж, сояда ўтириб ишни кузатадиганлар ҳам бор. Улар «БелАЗ» ҳайдаётганлар ичидаги обрў қозонолмаган. Инженер бўлсанг ўзингга, нима бўпти! Қурилишда ҳозир терга ботиб ишлаётганлардан кўра инженерлар кўпроқ. Политехника институтини тугатдингми — инженерсан. Бу ерда қофоз ушлаб, гўдайиб турганларни эмас, «БелАЗ» ҳайдаётганларни, электр пайвандчиларни, цемент қораётган, арматура ясаётганларни севадилар! Кранларни бошқараётган аёллар бу ерда парилардан ҳам гўзал саналади.

Чорвоқ катта даргоҳ. Бунда замон фарҳодлари ишламоқда. Бу ерда инженерлар ҳам жуда кўп. Хамма бор... Бу ер ўзи бир катта дорилфунунга айланган.

X боб

ТИЛСИМ

Сиртдан қараганда тўғон қурилишидаги ишлар кишини зериктиарли даражада бир хил кўринарди: кучли машиналарнинг вагиллаб югуриб, баландликка кўтарилиши, бульдозерларнинг кучаниб, у ёқдан бу ёққа суриниши, тупроқ, шағалларни тўплаши, шиббалаш, ётқизилган тошу тупроқнинг зичлиги ҳақида лаборатория анализи ва ҳоказо, ва ҳоказо... Аммо, бу ерда ғимирлаётган мингларча одамлар — мутахасислар, Хумсон йўлидаги сайҳонликка тушаётган

юзлаб синолар, йўллар, кўпригу кранлэр, тортилаётган йўғон симлар тоғларнинг асрий уйқусини бузиб, янги тонгдан дарак бераётганга ўхшарди. Ухлаб ётган буюк паҳлавон депсиниб ўрнидан туриб, енг шимараётгандай кўринарди. Кун бўйи қурилишда бўлган Қоражон Мингбоев кечга яқин Чотқол баландлигидаги ўнг томон қояга — Қўйнғирбуқа тепалигига чиқиб, яласқи тош устига ўтирди. Бу ер жуда баланд, бундан бутун водий кафтдек кўринади. Келгусида у турган қоягача тўғон кўтарилади; әҳ-ҳа-а, ҳали қанча иш қилиниши керак! Бошқалар учун бу баланд, тик қояга чиқиш анча машиқат бўлса, Қоражон учун зинапоялардан иккинчи қаватга кўтарилишдай гап. Чирчиқ устидаги лопиллаб турадиган Эшаккўпrik чотқолликларнинг шаҳарга тушадиган асосий йўли бўлиб, бу ерга у Ёнқўргондан пиёда келарди. У чўнтағидан қоғозга ўроғлиқ нону гўштни олиб, тош устига қўйди. Этиги қўнжидан ўткир пичогини суғуриб, рўмолчаси билан артгандек бўлди-да, гўштдан кесиб еди. Пастда чумолидек ўрмалаб ишлаётган одамларга боқди. Олис-олисларда ГЭС қурилишида электрпайвандчиларнинг учқун чиқараётгани, қоя остидаги карьерда эскаваторларнинг гуриллаб, бақириб самосвалларга тош ортаётгани, ўнг қирғоқдаги қурувчилар шаҳарчасида иморатлар кўтарилаётгани шундоқ кўриниб турарди.

Қоражон ишга янги келган кунларини эслади. Ҳадемай анча вақт ўтиб кетибди. Уша, 1963 йили ҳам худди шундай кеч куз, намгарчилик эди. Бу ерга келишига ҳам Иван Иванович Шишкин сабаб бўлган.

Эрта билан ишга келган Қоражон ёрдамчи туннель орқали тўғон остидаги йўлакка тушди. Бу узун йўлак тўғоннинг бошидан-охиригача чўзилган бўлиб, махсус кишиларгагина тушиш рухсат этиларди. Инженер Мингбоев коридорнинг металл эшигини бураб, ғилдирак мустаҳкамлагичларни бўшатиб олгач, электр чироқларни ёқди. Шериги, прораб Никаноренко билан бирга ичкарига киришди. Чироқ ёқилиши билан вентиляция ҳам ишлаб кетди. Сиртдан қараганда унча сезилмаса ҳам аслида тўғон кун сайин бўй чўзарди. Ҳар куни ўн минг кубометр масса ётқизилиб, шибаланарди. Қўшилаётган дарёлар суви аста-секин кўтарилаётгани ҳам сезила бошлади. Икки ён девор ва тепаси темир арматура билан кўтарилиган,

узун коридордаги ҳар ўн қадамча ерга ўрнатилган чироқ ва намлиқни ўлчаб турувчи аппаратлар тўғон остида бирон ердан сув силқиб чиқишини дарҳол кўрсатарди. Коридордаги намлик доимо бир меъёрда бўлиб, деворнинг бирон ерида сув силқиса тревога кўтаришарди. Аппаратлар ташқаридаги маҳсус навбатчи хоналарга хабар қиласа, қизил чироқлар ёниб, сигнал бериларди. Яқин эллик йил ичидага тўғонга хавф соладиган сувнинг силқиб чиқиб, тревога кўтариш ҳодисаси назарий жиҳатдан ҳеч бўлиши мумкин эмас. Юқорида тўкилаётган харсанг тошлар, машиналар гуриллатни пастга — коридорга эшитилиб туаркан. Қурилиш бошлигининг топшириғига кўра участка инженерлари маҳсус аппаратларни вақти вақти билан назорат қилиб туришлари керак. Инженер билан прораб коридордаги қўша-қўша катта будильникка ўхшаган асбобларни кўздан кечиргач, ҳамма ёқ жойида, деб яна ташқарига чиқишиди. Калитни топшириб, умумий дафтарга: «Аппаратлар нормал ишлаб турибди, нам йўқ, 1965 йил, 2 ноябрь», деб ёзиб қўйишиди. Юқорида «Зубра»ларнинг кучаниб, тошу тупроқ ташиётганига назар ташлашди. Кувшинов деган шоффернинг иситмаси борлигини, ё кеча кўпроқ ичган, ё ҳақиқатан шамоллаганини айтган прораб, зарари йўқ, ҳали сменадан кейин Хўжакентга, чинор тагига борамиз, касали тузалиб кетади, деб қўшиб қўйди. Лекин Мингбоев бу гапга лоқайд қаролмади, узоқдан бўкириб келаётган Кувшиновнинг «БелАЗ»и устидаги майда харсанг тошларни тўкиб бўлгач, Мингбоев уни қўли билан имо қилиб тўхтатди. Унинг назаридаги фақат Кувшинов эмас, у билан бирга «БелАЗ»нинг ҳам иситмаси чиқаётгандай, гандираклаб, беҳол бўлаётгандай туюларди. У машина ёнига бориб, кабинада ўтирган йигитга мурожаат этди:

— Ҳа, нима гап?

— Ҳеч гап.

— Мазанг йўқроқ кўринади?

— Узоқдан қараб туриб сезилдими, а? Бу ерда ҳеч нарсани яшириб бўлмас экан-да? Ёки прораб айтдими?

— Қани, туш пастга!

— Долзарб пайтда-я?

— Пастга туш! Калитни бер,— шоффер йигит кабинадан пастга тушди. Одамларга сездирмай, дарҳол кабинага Мингбоев чиқиб ўтирди:— Уйинг

га бориб, ўралиб ёт! Келинга айт, сут пишириб ичири-
син.

— Хўп,— деди дарҳақиқат иситмаси чиқиб,
бўшашиб титраб турган йигит.

«БелАЗ» гумбурлаб юриб, каръер томонга кетгач,
унинг ўзи тўғон қиясига келиб, сўқмоқ йўл билан
пастга туша бошлади. У пастга, ГЭС қурилаётган
жойга келиб, ундан Чирчиқ қўпригидан ўтиб, тўппа-
тўғри уйига жўнади. Қоражон Мингбоев «БелАЗ»ни
вагиллатиб каръерга олиб борди. Экскаватор ортган
қирқ тоннacha майда харсанг тошларни кўтарган
машинани эпчиллик билан ҳайдаб, тўғон устига
чиқди. Прораб кулиб, одатдагидек қўли билан ишора
қилган ерга тўқди. У яна вагиллаб жўнаб қолди. Шу
бўйи тушгача Мингбоев харсанг ташиди. Бошқалар-
дан тезроқ юрар ва кўпроқ кубометр ташишга
интиларди. «Инженер Мингбоев шахсий намуна
кўрсатяпти», деб кулиб, ҳазиллашаётган шофёрлар-
га ҳам эътибор бермасди. Баъзан улар қиялилка
кўтарилишда йўл бериб, четроққа ўтар, инженернинг
кучли машинани усталик билан бошқараётганига
ҳайратланиб қараб қолишарди. Фақат тушликка
яқин Абдуманноп (Абдуманноп «иккинчи» деб ата-
шарди. Чунки ГЭС қурилишида, арматурада ҳам
Абдуманноп деган йигит ишларди) Кувшинов маши-
насида Қоражон ўтирганини кўриб қолди. Инженер
тез-тез мана шундай ишга тушиб кетишини билган
Абдуманноп фақат кулиб қўя қоларди. «Қурилиш
битгач, алоҳида ташаббус кўрсатганликлари учун
биринчи орден Шишкинга, иккинчи орден Мингбоев-
га берилади...»— деб киноя қилишарди. Бу гаплар
кўпроқ гаражда бўларди. «Баъзи шофёрлар ҳам
хотинлардек гап ташишни ёқтиришади, улар бирор-
нинг иғосини қилмасалар уйқулари келмайди»,—
деган эди бир куни Иван Иванович Шишkin. Қоражон
Мингбоев бўлса бу гапни тарқатган ҳезимкаш
Соломко деган табелчига: «Менинг Қизил Юлдуз
орденим бор, бу орден бутун умримга етади»,— деган
эди.

Тушлик пайтида Никаноренко Мингбоевнинг ўн бир
марта бориб келганини — уч юз тоннадан ортиқ
масса тўkkанини табелга ёзди. Унинг қўлидаги
дафтарчада ўз фамилиясини кўрган Қоражон дарҳол
эътиroz билдири; Кувшинов фамилиясига ёзиш
кераклигини таъкидлади. «Бюллетенъ орқали пул

олади»,—деган эди прораб, Қоражон: «Кел, шу арзимаган иситмани врачга билдиримай қўя қолайлик. Кувшинов жуда ажойиб йигит. Ҳаммамиз ҳам Кувшиновдек ишлаганимизда, биринчи участка чангимизда қолиб кетарди»,— деди Абдуманноп узатган чойдан ҳўплаб. Инженер Мингбоев атай кечгача Кувшинов машинасида ишлади. У телгрейка, қалпогини ва белидаги энли фронтовой камарини ҳам ечиб қўйиб, «БелАЗ»ни бошқаарди. У чангга ботган, лаблари пўст ташлаб, кифтлари тердан жиққа ҳўл бўлиб кетган эди. Сменадан кейин у машинада гаражга бориб, ювиниб-тараниб олди-да, яна тўғонга қайтиб келиб, ўнг томондаги тепаликка, баланд Қўнғирбуқа тепалигига ўрмалаб чиқиб кетди: «Одамлар хотин, бола-чақаси ёнига боради. Мен кимнинг ёнига борам...»— деди у ўзига-ўзи Чотқол тепалигидаги ўзининг улкан ясси тошига ўтиаркан. Бу ердан бутун қурилиш кафтдагидек кўриниб турарди. Писком дарёси юқорисидаги кўм-кўк дараҳтлар билан ўралган Сижжак қишлоғи ҳам бундан яққол кўриниб турарди. У баланд, қўнғир тоғлар оралиғига тушиб қолган бир қатра яшил томчига ўхшарди. Бу яшил қишлоқда Гулгун деган ажойиб сулув яшайди. Қоражон кўз олдида ўша яккаю ягона Гулгун пайдо бўлди. Бир лаҳзадан сўнг Гулгун хаёлан Чотқол тоғидай буюк бўлиб, ясси тош устида ёнбошлаб ётган Қоражон рўпарасига келди. Уни эркалаб, пешанасини силагандай бўлди: «Кун бўйи ишлаб, чарчабсиз, Қоражон ака. Юринг, бизникига кетайлик», дегандек туюлди. Қоражон кўзларини юмар, кўзларини юмса Гулгун жамолини кўрар, очса йўқоларди: «Мен диққат бўлсан, бирон нимани ўйлаб ечолмасам Қўнғирбуқа тепасига чиқиб кетаман. Қаттиқ хурсанд бўлсан ҳам, қаттиқ хафа бўлсан ҳам Чотқолим кифтига минаман. Бу тоғ менга қаноту ақл беради, фикримни тиниклади, чарчоғимни йўқотади, юрагимга қудрат беради. Бу кун мен яна сени эсладим, эй қийинқ кўз, бодом қовоқ мажусий! Одамлар ўз қадрдонлари ёнига борадилар, мен қайга борай?»

Қоражон Мингбоев хаёлга чўмди. Чорвоқ водийсига сурма ранг оқшом чўка бошлади. Бу қадрдон водий ичра айқириб оқаётган дарёлар остида тилсим яширингандек кўринарди. Бу ерда тилсим борлигини ота-боболари ҳам айтишган. Мана, ўша тилсим очиляпти. Чўққилар остида, дарёлар қаърида шу

тилсум ўз дурри жавоқирларини яшириб ётибди. Унинг сирли калитини меҳнат қилиб, тер тўкаётганлар топа олади.

XI боб

НАВОИЙ ОРЗУ ҚИЛГАН ТҮГОН

Январь ойида Тошкентда янгича бир грипп тарқалиди. У Лотин Америкасида пайдо бўлиб, океан оша ер юзининг кўп катта шаҳарларида авж қилди. У Чорвоқ-қа ҳам етиб келди. Бу дарднинг вирусларига қарши дори-дармон, чоралар деярли йўқ эмис. Телевизорга чиққан врач кўпроқ ҳўл мева, суюқ овқат истеъмол этишни, чой ичишни, уйда ётишни даъват эгарди. Дарҳақиқат, январнинг иккинчи ярмида бу грипп авж олиб, кўп кишилар ишга чиқмади.

Инженер Қоражон Мингбоев озгиниа иситмаси билан ишга чиқди. Унинг боши оғриб, аъзойи бадани зирқи-рарди, суяклари чақилиб қақшарди. Иситмаси чиқиб, уйига титраб кетган Кувшиновни хаёлидан ўтказди. Парторг Шишкун эрта билан объектларни айланиб чиққач, тўғонга келиб, диспетчер хонасига кирди. Тинмай жиринглаб турган алоқа аппаратларини бошқариб ўтирган Исаак Ратманга йўлиқиб, ундан участка бошлигини сўради.

— Мингбоев барваёт келган. Тўғон устида...

— Машина ҳайдовчиларнинг ҳаммаси ишга чиққанми? Касаллари йўқми? Поликлиникага телефон қилмадингизми?

— Асло сўраманг, Иван Иванович! Беш «БелАЗ—540» ҳайдовчиси, икки «МАЗ — 525» шиббаловчиси, карьердаги экскаваторчи, арматурачилардан икки киши ишга чиқмаган. Грипп қутуряпти. Бошқармадагилар ҳам деярли ётиб олишибди-ку!

— Ҳа, шундоқ. Ишқилиб, сиз билан биз ҳам ётиб қолмайлик. Илгаригиси Шанхайдан келган эди...

— Чеснокни кўпроқ истеъмол қилинг, Иван Иванович! Инженер Мингбоев қатиқча пиёз тўғраб ичишни тавсия этяпти. Ӯзи шундоқ қилиби. Мингбоевнинг кампири кўп нарсанӣ биларкан. Тоғликларда ҳикмат кўп. Бугун анча яхши эмис. Юз грамм отиб юборилсан ҳам ёмон бўлмайди. Галина Сергеевнадан яшириб бўлса ҳам отиб юринг. Мен Сара Давидовнага ҳеч билдири-

майман. Хоҳласангиз, столим остида бир бутилка оқидан бор, қиттак қиласизми?

— Одамлар кўриб қолса нима дейди?! Ҳа, майли, шу ярамасдан озгина қуя қолинг!

Исаак Ратманга жон кириб, икки стаканга ярим-ярим қилиб арақ қўйди. Одамлар кўриб қолмасин учун шоша-пиша уриштириб ичib олишди-да, кейин Шишкин бош диспетчер билан илиқ хайрлашиб, машинасида тўғон бошига чиқиб кетди. Тўғонда харсанг бўлакларини нотўғри тўкиб кетган бир йигит билан ғижиллашиб, фифон бўлиб турган Қоражон Мингбоев ёнига келди. Жуда қувноқ бўлиб қолган Шишкин тушунар-тушумас шофёр йигитни сўкди:

— Ўзингдан катта одам бир нима дегандан кейин қулоқ солгин-да, хумпар! Сени ким айтади 1963 йилдан бўён ишлаб келаётган Можаев деб! Участка бошлиғи тўғри танбеҳ беряпти! Кечак тухумдан чиқиб, хўрозга ақл ўргатяпти-я! Бизлар фашистларни дўппослаганимизда сенлар эмбрионда ҳам йўқ әдиларинг! Бор, аравангни торт, валаки салак!

— Тушундик, Иван Иванович, хато менда эканини Қоражон Мингбоевичга ўзим айтиб турган әдим,— деди юмaloқдан келган йигитча Шишкеннинг жиндак тортиб олганини пайқаб. Ўзи ҳам ҳар куни ишдан кейин уйига соғ бормас эди. Шишкеннинг «қувноқлиғи» унга жуда ёқиб кетди,— энди тўғри тўкаман. Сал шошиб, ёнбошга тўкиб қўйибман... Кечирим сўрайман.

— Ёнбошга? Аския қиляптилар-ку! Ҳа, сенларнинг тилларинг ҳам ёмон! Мингбоев сезяпсизми, менга қочирим гап қиляпти бу хумпар. «Сайко, сайко» деган анекдотга ишора қиляпти! Бор, аравангни торт!

— Хўп бўлади,— деди Можаев машина кабинасига кўтарилиб.

— Тезроқ смена планини бажар! Катталар бир нима деганда қулоқ солгин!— Кейин у Қоражонга қаради:— Одамлар грипп, бир доно киши, юз граммча тортиб юринг, деган эди, озгина тортганмиз, Мингбоев, узр!

Қоражон билан кабинада ўтирган шофёр Можаев илжайиб кулишди. Ўртада жаҳл йўқолди. Шишкеннинг кўнгли очиқлиги, юрагида кир сақламаслиги, гап бекитмаслиги ҳаммага ёқарди. Фақатгина унинг гўзал хотини Галина: «Парторг бўла туриб, ичib юргани уялмайсанми!»— деб турткилар ва тез-тез танбеҳ,

бериб турарди. Агар шу хотин бир нима демаса, бошқа ҳеч ким бу сариқ одамга қаттиқ галирмас, унга тегиши-са увол бўлаётгандек кўринарди. У кўп ичмасди. «Ичинг, майли, ичманг, демаймиз, йигитнинг хўроzi ичади. Лекин закуска қилишни унутманг. Жанжал кў-тариб, партбюорога тушманг. Ана буниси ёмон! Эпла-сангиз, Исаак Ратманга ўхшаб ичсангиз, ичинг, майли! Одамлар ичмаса, бу ярамасни нега чиқарганлар?! Магазинга териб қўйиш учун эмас, озгина-озгина ичиш учун! Бўлмаса чиқармаслик керак!» — дерди у сергап бўлиб.

— Кайфингиз яхши кўринади, Иван Иванович?

— Вания де!

— Ҳа, Вания. Шундоқ пайтларда партбюорога ёзиб, илтимос қилганимиз баъзи масалаларни ҳал қилиб оладиган фурсат экан-а,— деди Қоражон Шишкинга қараб.— Гидропроектдаги ўртоқларга хат ёзган эдим. Пъезометр — фильтрация режимини кузатиш аппара-ти яхши ишламаяпти.

— Қани, аввал бир кўришиб қўяйлик, Мингбоев! Панжангни ташла, йўлбарс!

— Йўқ, азизим, панжамни ташлолмайман! Грипп деган ярамас менга ҳам юққанга ўхшайди. Дардларнинг ичида энг хунасаси шу! Тўшакда мундоқ касалга ўхшаб ҳам ётолмайсан, ишлаб ҳам юролмайсан. Совқотиб, суюкларим сирқирашидан, юққанга ўхшайди.

— Йўғ-э?!

— Ҳа!

— Хўш, шундоқ экан, бу ерларда нима қилиб юрибсиз?! Беш «БелАЗ»чи, икки «МАЗ», экскаваторчи ва бошқалар грипп бўлиб ишга чиқмаган бир пайтда бошқа ишлаб юрганларга ҳам юқтириб, тўғонда ишни тамоман тўхтатмоқчимисиз?!

— Йўғ-э! Ваҳима қилманг, Иван Иванович.

— Вания де!

— Ҳа, Вания. Мен ҳеч ким билан қўл беришиб кўришганим йўқ, ўпишганим ҳам йўқ.

— Ўпишиш шарт эмас! Бу — Шанхай гриппидан ҳам ёмон! Бу жуда баттарин. У билан ўйнашиб бўлмайди! Мен бу ерга сиз — ҳазратларининг грипп бўлганингизни эшитиб келдим. Жаноби олийлари, дарҳол уйингизга кетинг! Врач юбораман! Агар истасангиз, ачави поликлиникадаги сестра Маечкани юбораман. Укол қилишга жуда уста!

— Ҳазилингизни қўйинг. Укол таъсир қилмас эмиш.

— Қатиққа пиёз тўғраб ичиш-чи?

— Бу яхши!

— Шу ишни қилиб ётасиз, азизим! — Шишкун у ёқбу ёққа аланглаб, тўғон четида бир одам билан гаплашиб турган прорабни чақирди: — Ҳей, Никаноренко, ўртоқ Никаноренко!

— Лаббай, Иван Иванович!

— Тўғондаги ҳамма раҳбарлик ишлари ўзингизга юклатилади! Участка бошлиги грипп, мен уни уйига олиб кетяпман.

— Тушунарли. Ҳамма иш яхши бўлади, безовта бўлманглар.

— Қани юр, уйингга ташлаб кетмасам, сен Чотқол йиртқичи бунда чўзилиб қоласан. Сен йўлбарслар дунёда камайиб кетяпсанлар; «Қизил китоб»га ёзилгансанлар... Қани юр, олдимга туш!

Қоражон билан Шишкун машинага ўтиришди. Машина зинфиллаганча посёлкага жўнади.

Қоражон уч кунгача уйга қамалиб ётди. Қандил буви эрманадан қайнатиб ичирди. Шолғом хўрда, қатиқва пиёз гриппни енгишга ёрдам берди. Қандил буви бу тоғ оралиғидаги жойларда қаланғи-қасанги дардларнинг оралаб юрганига ҳайрон бўлди. «Ширғай гериб» деган касаллар ҳам чиқяпти-я, ё қудратингдан! Бунақаларни бизнинг ота-боболаримиз кўрган эмас. Тоғдаги эрмана ўтимиз бор, бу доривор ўт ҳамма «ширғай гериб»ларни ҳайдаб чиқаради! — деди кампир. Қоражон ҳам кўрпа-тўшак қилиб ётавермай ишга чиқиб кетди. Эрта билан у Шишкунга телефон қоқди.

— Ўртоқ парторг, салом! Мен ишга чиқиб кетяпман, ўзингизни одамларга ғамхўр қилиб кўрсатиш учун мени уйимга жўнатиб юбориш керак эди... Биламан сизни. Мен грипп эмасман. Үн беш кун, йигирма кун бекорга ётиш тўғрими?

— Врачларнинг буйруғи! Итоат этмай иложинг йўқ, Мингбоев!

— Сиз эрмана деган доривор ўтни биласизми?

— Йўқ.

— Сиз, мажлис қарорини бажараман, врачнинг айтганини қиласман, деб ўтирмай, иситмаси чиқиб, грипп бўлиб ётганларга тогдаги эрмана ўтини қайнатиб ичишни айтинг! Қатиқ ичишсин. Чеснок, пиёз ейишсин. Керак бўлса онам сизга консультация беради. Биз тоғ

и чида ишлайпмиз. Еримиз шароитини биз яхши била-
миз. Ойимнинг айтишича, қишлоқларга бундақа «қа-
ланғи-қасанғи» дард ҳеч қачон йўламаган. Буни шаҳар-
дан кимдир олиб келган.

— Ха-ха-ха-ха... — Шишкунинг кулгиси жарангла-
ди. — Мингбоев, ҳозир ёнингга бораман! Мени кутиб
тур!

— Хўп, келавер,— деди кийиниб шай бўлиб турган
Қоражон трубкани қўя туриб. Сўнг онасига мурожаат
этди,— эшитдингизми, Шишкун келяпти. Унга эрмана-
ни қайнатиб ичишни ўргатиб қўйинг.

— Мен унга битта эрманани эмас, бошқаларини ҳам
ўргатаман. Қуритиб қўйганларимдан бераман. Лекин,
мана шу Шишкун худонинг раҳмати одам экан. Ўзи
сап-сариқ бўлса ҳам элнинг меҳри тушса, киши мана
шунаقا бўлади. Кўнглининг тозалигини қара, худо
юқтирган-да! Маржа хотини ундан яхши.— Хотин» де-
ган сўзни айтди-ю, Қандил буви бирдан жим бўлиб қол-
ди. Ёши кетиб, уйланолмай юрган Қоражонга хотинлар
ҳақида гапириш ёқмаслигини биларди.

Шишкун келиб ярим соатча Қоражоннинг онаси би-
лан доривор ўтлар ҳақида гаплашиб ўтириди. «Бу баланд
тоғларнинг ичи бойликларга тўла бўлиши билан унинг
сиртида ўсган доривор ўтлар ҳам киши учун жуда
зарур. Абу Али ибн Сино ҳаким буларнинг барини ўз
китобларида ёзган...»— деди Қандил бувий. Доривор ўт-
лардан Шишкунга намуналар берди. Дарҳақиқат, ўша
куни иссиғи чиқиб, титраб-қақшаган Қоражон икки кун
и чида ўзига келиб, отек ер депсиниб турганини кўрган
Шишкун бу ерда туғилиб-ўстанларнинг гапига қулоқ
солиши кераклигини, доимо булоқ сувларидан ичиш
лозимлигини ҳам яхши англади. Айниқса, Наволисой-
дан. Шишкун ўз машинасида Қоражонни тўғонга —
диспетчерлар биноси ёнига ташлаб кетди. Участка бош-
лиги бош диспетчер Исаак Ратман билан салом-алик-
дан сўнг, юқорида қанча машина ишлайдиганини сўради.
Касал шофёrlар ўrniga гараж бошқа участкадаги беш
машинани бу ёққа ташлаганини, умуман, аҳвол ёмон
өмаслигини таъкидлади. Тўғонга майда харсанг тош,
шагал, тупроғу қум ётқизилиб, шиббалангандан кейин
янгидан тўклиладиган қаватга етарли даражада сув
сепиш кераклигини, қўйилётган янги қават «МАЗ —
525» билан шиббалангандага масса яхши бирикиб, метин-
га айланиб кетишини инженер Мингбоев таклиф этган
эди. Бу таклиф аввал ўтмади. Каминский қаршилик

кўрсатди. Тўғон йигирма метр кўтарилигунча бу иш қилинмади. Кейинчалик Гидропроектдан келган мутахассислар иштирокида бошқармада бўлган муҳокамада «Мингбоеv усули» қўллаб-қувватланди. Чорвоқ қурилишининг бошлиғи, инженер Георгий Исаевич Садовников Мингбоеv тақлифини астойдил маъқуллади. Шу усул ҳақида Қоражон Мингбоеvning «Чорвоқ чироқлари» газетасида икки марта мақоласи босилди. Шишкин кейинчалик: «Мана шу усул бир кандидатлик диссертациясига мавзу бўладиган иш», деган ёди.

Қоражон кетаётган «БелАЗ» кабинасида тўғон бошига чиқиб, аҳволни кўздан кечирди. Прораб билан қўл беришиб кўришгач, шиббадан кейин яхшилаб сув сепилаётганини кўрди. Цистернали икки машина тўғон устида айланиб сув сепарди. Шундан кейин у прораб билан бирга тўғоннинг ўрта қисмидаги б-стбор ёнига келди. У тўғон остини кўриш учун шахтага тушиб, асбобларни кўздан кечирмоқчи бўлди. Прораб касалдан туриб келган Мингбоеvning шахтага тушишига розилик бермади. Кейин мажбур бўлди. Шахта ичидаги темир нарвондан секин-аста пастга тушаётган Қоражон экстензометрнинг кўрсаткичлари нормал ҳолда турганини кўрди. Шахта таги жаҳаннамдек қоронги — салкам йигирма метр. Қоражон шахта нарвончасидан яна пастга туша туриб, сейсмоаппаратларни ва икки трубали пъезометр — намлини ўлчайдиган аппаратураларни ҳам кўздан кечирди. Шундан сўнг у шахта қудугидан қайтиб чиқди. Терлаб кетди. Тепада турган прорабга ҳамма асбоблар жойида эканини айтиб, ёнидан тўғон проектини олиб очди. Шамол харсанг тош устига ёзилган каттагина чорси қоғозни тортқилар, текис туришига қўймасди. Прораб тўрт тошни чизманинг тўре чеккасига бостириб, қоғозни текислади. Участка бошлиғи билан прораб лойиҳага, чизмаларга кўз ташлашиди. Ишнинг боришини кузатишиб, қоғозга баъзи белгилар қўйишиди.

Чотқол тоғлари орасидаги мовий денгиздан келаётган кучли шамол юзларни ачитарди. «БелАЗ»лар тўғон устида вағиллаб югуруар, оғир «МАЗ»лар япасқи ғилдираклари билан шағалу тупроқни шиббаларди...

Мана, декабрь ҳам кирди, қордан дарак йўқ. Қора-совуқ, гизғизон... Майда ариқлар қотган, лекин қудратли Чотқолу Писком, бу томонда Чирчиқ айқириб, буралиб оқиб ётарди.

Чотқол ва Угом тизмалари узилган ерда Қўнғирбуқа чўққиси билан Асқартоғ бирлаштирилиб, «тангрининг азалий бир хатоси» тўғриланмоқда. Узоқдан қараган кишига Қўнғирбуқа чўққиси Миср эҳромига ўхшаб кўринади. Икки тог оралиғидаги тўғри чизиқ — инсон даҳосининг самараси — кўтарилаётган тўғон кўзга ташланади. Бу мўъжизани Алишер Навоий «Садди Искандарий» достонида орзу қилган әди... Орадан беш ярим аср ўтди, кишилар ўзбек ерида «Садди фуқаро»ни қура бошлидилар. Чорвоқ пиёласи ҳаёт майи билан лиммо-лим тўлдирилмоқдаки, инсон яратаетган бу маъво олдида тангрилар лол! Эҳромни қуллар юз эллик йил мобайнида қурниб, фиръавн шаънини улуғладилар. Унинг бағрига ҳукмдорнинг жасади яширилди. Бу тўғонни замон фарҳодлари қурмоқдаки, у мамлақатни нур ва сувга сероб этажак. Бу буюк тўғон давримиздан ёдгорлик бўлиб, келгуси узоқ асрларга етиб бора-жак.

Бу замину бу эл ғоят қадимий —
Манглайда ажиндек юз дарё, юз тог...
Пахта иши бу элга кўпдан қадрли,
Бу юртда яралмиш тенгсиз «Авесто».
Олдинга босаркан йўловчи, баъзан
Қайрилиб бир ортга қарашиблик одат —
Ҳалок бўлган юрт учун паҳлавон Широқ
Берай деб халиққа эрку саодат.
Йўқотиб бўлмайди халқ даҳосини,
Яралди «Алқонун», «Хамса»ю «Алжабр»...
Бизнинг давр беролди қадру баҳосин,
Ютиб кетолмади йиллар ўта қабр.
Ажиндек кўринган юз дарё, юз тог —
Эл баҳт дер Чотқолни, Чирчиғу Сирни.
Озодлигу баҳтга етгунча мундог,
Оёқ яланг босдик қанча асрни.
Аждодлар орзуси, эй Ватан — гулшан,
Сенга осонликча келмадик етиб.
Яратилдинг Ленин даҳоси-ла шаън,
Курранинг энг кунгай томони этиб.
Октябрь қуёши, Октябрь қуёши!
Ҳаёту баҳтимиз асоси ўзинг.
Янги ва абадий умримиз боши,
Порлаган ҳаётбахш қуёшдек юзинг.
Гўзал Ўзбекистон, гўзал Ўзбекистон,

Тупроғу дарёю бөгинг қучаман.
Менинг кўзим билан кўрсиналар сени,
Сен асло тенги йўқ бир буюк чаман.

* * *

Ер сатҳидан кўтарилиган ҳар бир тепаю төғнинг бағри бўм-бўш бўлмаганидек, фалакка бўй чўзган тўғон бағри ҳам қуруқ харсанг тошу тупроғу бетондан иборат эмас. Бу тўғон бағрида қимматбаҳо ва мураккаб аппаратлар яширгандирки, улар қўлтиққа қўйилган термометр каби тўғоннинг саломатлигинчайтиб туради. Маҳаллий ашёлар асосида қурилаётган тўғонларнинг бунёд этилиши ва фойдаланишга топширилиши жуғрофий жиҳатдан зилзила бўлиб турадиган ерларга кўчаётганлиги, уларнинг сони эса тобора ортиб бораётганлиги, илмий-тадқиқот ва лойиҳаловчи ташкилотлар олдига қатор масалаю муаммоларни қўймоқда. Мустаҳкамлик, чидамлилик ва тежамлиликни ўз ичига олган бу масала иншоотларнинг бевосита иш жараёнларини чуқур таҳлил этиш асосидагина ҳал этилиши мумкин. Таҳлил этищ эса ўз навбатида бевосита илмий-текширишларни ва муфассал маълумотлар олишга имкон берувчи назорат-ўлчагич ускуналарнинг бўлишини тақозо этади. Тош-тупроқ асосидаги Чорвоқ тўғони етарли даражада назорат-ўлчагич ускуналар билан жиҳозланадётган Иттифоқимиздаги биринчи ва энг улкан тўғондир. Сув омборининг йилдан-йилга тўлдирилаётганлиги, унинг чуқурлиги, тўғон қурилиши технологиясининг ўзига хослиги, айниқса, тез суръат билан кўтарилаётган босқичда ҳар томонлама мунтазам текширилиб, назорат қилиб борилишини талаб қиласади. Баландлиги бир юз олтмиш саккиз метр бўлган бу тўғон симметрик шаклдаги марказий лой-балчиқ ўзакдан, икки қатламли поғонали қум-шагалдан, шунингдек, тоф харсанг тошидан ишланган ён тараф призмалардан иборат. Тўғон назорат-ўлчагич ускуналар билан жиҳозланган бўлиб, бу ускуналар қутиладиги кузатув ишларини олиб боришга имкон беради: тўғон тузилишидаги шаклий бузилишлар, тўғон ўзаги ядрои босимининг назорати, ўзакдаги, шунингдек, призманинг пастки ерга тиralган қисмидаги босим назорати, тўғоннинг ерга тиralувчи қисмida, ўзагида ва иншоотнинг айланасидаги фильтрацион тартиб назорати, дарз кетишлиар, арматура ва бегондаги

босим назорати, ер қимирлашни кузатиш назорати.... ва ҳоказо, ва ҳоказо. Тўғон бағридаги узун коридор ёки тик шахталарга кирсангиз, бунда жуда кўп ўлчагич аппаратлар ўрнатилганини, улар кечаю кундуз тўғон «саломатлиги»ни кузатиб, яхшилаб турганини кўрасиз. Бу кўриниб турган баланд тоғлар бағрида қанча бойликлар борлиги ҳаммага маълум. Бу қад кўтариб, кундан-кунга юксалаётган тўғон ҳам сиртдан қараган кишига бир қуруқ тепага ўхшаб кўринади. Бироқ бу тўғон бағрида ҳам тинимсиз ҳаракат қилиб турган, соатдек чиқ-чиқ-чиқ... уриб, ишлаб турган қанчадан-қанча аппаратлар турибди, улар тўғоннинг ички аъзолариdirki, уларсиз тўғон яшолмайди.

ИЖКИНЧИ ҚИСМ

XII боб

ТОҒ ОРАЛИҚЛАРЫГА ЯШИРИНГАН ЖАННАТ

Гараз гар жон эди, олдинг они, ҳой.
Үлук тандин не истарсен, яна, ҳой.
Күнгүл қонин ичардин түйгил әмди,
Мени ўз меңнатимға қўйғил әмди.

Навоий

Баъзи истеъфога чиққан генералларга ўхшаб кўрган-кечирганларини қайта тиклаб эсадаликлар ёзиш, кўргазмалар тузиш билан банд бўлиб қолган пенсиядаги инженер-гидрострітєль Файзулла Аҳмедович Музаффаров олтмиш олти ёшга кирди. «Бу рақамлар бошини кўтариб тикка турсин!» (99 демак)— дерди шоир дўсти Амир Равнақ. «Илоҳим ёнига яна бир рақам қўшилиб, учталик бўлсин!»— деб ҳазиллашган Марҳаматхоннинг ҳам ширин сўзлари, қочиримлари Музаффаровга қаймоқдек ёқарди. «Ёлғондан гапирсанг ҳам гапиравер, фаришталар омин деб юборсин»,— деб куларди Файзулла Аҳмедович Музаффаров. Бирорга бирор умр тиласа қандай яхши! Айниқса, ҳаётни Музаффаровчалик яхши кўрадиган бир одам кейинги йилларда қон босими ва диабет касалига мубтало бўлиб юарар экан, бу гаплар қанчалик ёқиши ҳаммага маълум. У баланд бўйли, барваста одам. Кўзида кўзойнак, бирон одам билан жиддийроқ гаплашганида кўзойнаги тепасидан мўралаб туради. У, от калла, тепакал одам. Орқа бўйнида қолган жонсиз укпардакқина сочини авайлар, у аввал оқариб, кейин саргайиб кетган эди. Орқа бўйни ҳам юмшоқ, ҳилвираган этдан иборат— йиллар ўз ишини қилиб, чандир-пайларни ҳам бўшаштириб қўйган. Кўзойнаги юзининг чўзинчоқлигини қисқартириб, бир қадар ҳусн қўшиб туради. Кўзойнак унинг жисмидаги яна бир аъзосига айланиб кетган— баъзан каравотда ёстиққа бош қўйганида шу кўзойнак-нинг борлигини сезиб, тумбочкага олиб қўймаса, бошқа вақт бурни устидан жилмайди. У турмушнинг аччиқ-чучугини татиган, бу дунёда кўрмаган нарсаси қолмади. Аммо бу ёруғ оламдан ҳеч кимсанинг кетгиси келмаганидек, у ҳам ўзининг ҳаёт оқшомини яна ҳам қувноқ, яна ҳам мазмундор ўтказишга интиларди. Ке-

саликнинг мўртлиги, кейинги йилларда анча бўшашиб қолганлиги кўпинча андуҳли хаёлларга толдиради. Музаффаров бундан олти йил аввал республика министри лавозимидан пенсияга чиқиб, Тошкент кўчаларидан биридаги ўзининг катта ва кўркам ҳовлисида умрини фарогатда ўтказарди. У қирра бурун, қўй кўзлилиги, бурни устидаги «велосипед» кўзойнаги билин барчага таниш. Мўйлови ҳам ўзига ярашиб туради. Тепакаллиги, икки қулоғи орқасида қолган бир парча соч ҳам оқариб, сарғиш тортиб кетган. Қиши кунлари ҳассани фасонга эмас, заруратдан тутарди. Баъзан тенгдошлари суҳбатида: «Соқол оқи ўлимга пешровдир, тириклик сабзаси узра қировдир...»ни айтиб, бу дунё вақтинчалигидан шикоят қилиб бош чайқарди. Лекин кексалик инжиқликлари билан шафқатсиз жанг қилар, қувноқлик, меҳрибонликни доимий одат этиб, устида озодалик «ҳилқати» яшнаб турарди. Врачлардан ўзини тортмас ва лекин уларнинг ҳамма гапларига ҳам қулоқ солавермасди. Феъли айниб, асаби қўзғаган пайтларда ўзини қўлга ола билар; ичмас, чекмас ва лекин дори-дармонларсиз юрмасди ҳам. Баъзан бундоқ қараб туриб, умри бекорга ўтмагани, анча-мунча ишлар қилиб бергани, юрти мартабасини баланд қилиб, мукофотлару унвонлар олгани, шахсий ҳаётда ҳам баҳт топгани — икки қиз, икки ўғил кўргани, бир қиз ва икки ўғилдан неваралар борлиги билан фахр этарди. Аммо ҳамма ишларни тартибга солиб, баҳтга етдим, деганда бундоқ кўзини очиб қараса, ёш ўтиб кетиб, бедармон бўлиб қолганидан ҳам ачиниш, ҳам пушаймон чангали юрагини ғижимларди. Шу паллагача у инженер-олимлиги, жамоат ишлари, бола-чақа ташвишлари билан бўлиб, ёши ўтиб кетганини пайқамай қолибди. Мана энди анча узоқдан бўлса ҳам унга ёшлик — йигитлик йиллари ўз жамолини кўрсатиб, ҳавасини келтира бошлади.

Бир томонда сурбет ўлим турарди. Музаффаров кумушдан гуллар солинган ҳассасини кўтариб, у сурбетни олисларга ҳайдаб солмоқчи бўлар, унинг башарасини кўришга тоқати йўқ, ширин ҳаёт лаззатини сурарди. Бунга унинг ҳаққи бор.

Шундоқ кунларнинг бирида Файзулла Аҳмедович Музаффаров хотини Марҳаматхон билан ёнма-ён ўтириб, гапга тушиб кетишиди.

— Баъзи ошноларимизга жуда ҳайронман, гўзалликда тенги йўқ жойлар шундоқ биқинимизда турса-ю,

от-арава овора қилиб, Қофқозу Қримга жўнашса! Бир-икки кун чамадон тайёрлайсан, бир кун учасан, жойлашасан, ўрганасан... яна бир-икки кун кетади. Беш-ўн кун юрар-юрмас яна қайтиш тайёргарлигини кўриш бошланади. Совға-салом излайсан. Чамадонинг қўлингда, аэропортда об-ҳаво учишга қулайлигини кутасан... Мана, аҳвол шунаقا! Шундоқ Тошкентимизнинг ёнгинасида жаннат борлигини билмаймиз! Чорвоққа боргач, Угом, Писком, Кўксув, Чотқол, Чимён водийлари, пастда — Облиққа боргач, у ёғи Оҳангарон, Кўлбулоқ водийлари... Бу жойларнинг об-ҳавоси қандай яхши экани, бу ерларнинг манзараси дунёning ҳеч ерида йўқлигини одамлар билармикин? Шоир Амир Равнаққа ҳам ҳайронман, шундоқ оёғи остидаги беқиёс жойлар қолиб, Венеция, Париж... ва аллақаёқларга интилади! Рассомларга қойилман! Етти жаннатнинг бири — Оҳангарон водийсини тасвирилашяпти. Ҳали олтита жаннат бу ёқда турибди.

— Майли, олиб боринг ўша айтган жаннатингизга. Сиз қаёққа бошласангиз, мен ўша ёққа бораман. Олиб боринг! Чотқолингизни ҳам, Угому Пискомингизни ҳам кўрсатинг! Лекин Оҳангаронга олиб бориб, мени тошкўмирга бўяб келмасангиз бўлгани!

— Эй, нодон-э! Лекин Чотқолда ҳали чинни ванналару кийим, безакларни бозорга соладиган жой йўқ! У ерлар ҳали теша тегмаган ерлар. Табиат қучоги. Чотқол тоғларининг гўзаллиги, Наволисойдек биллурий сувларнинг шилдираб оқиб ётиши, қушлар сайраши, ҳавонинг тиниқлиги... Бунақа жойга бир ўрганиб олсанг, кейин жонингнинг ҳузурини билиб, ҳар доим ўша ёққа йўргалайсан! Ана, бўйнингни чўзиб қара, ҳув ўша кунчиқиши томонда кўриниб турган — Бешик тог! У Чотқол тогининг мингларча чўққиларидан бири. Унинг этакларида Қумушкон, Заркент, Сўқоқ, Навдак, Телов қишлоқлари бор. Пискому Чотқол оралиқларида Янгиқўргон, Обираҳмат, Бурчмулла, Сижжак, Хумсон, Бофистон, Нанай қишлоқлари ҳам бор. Шундай баҳаво жойларимиз бўла туриб...

Бир дамдан кейин бошқа гапга алаҳсиб, бир қадар асабдан тушган Музаффаров яна илгариги гапга қайтиди. Эзиб, узоқ гапириш, ўз фикрини ниҳоятда «муфасаллаштириш» кексалик касали. Буни Файзулла Аҳмединичнинг болалари яхши тушунишарди. Шунинг учун оталарининг эзмаланишини сабр-тоқат билан тинглашарди.

— Жаннат у дунёда, ўлгандан кейин тушаман, деб канчалар ўтди,— деди Музаффаров сал ўзига келиб.— Йўқ, жаннат шу ўзимизнинг ёруғ дунёда. Юр, мен ўзим сени жаннатнинг ўзгинасига олиб кираман! Самарқандан йўлга чиққан киши бир соат учиб, бир соат машинада юради. Хоразмдан эса икки соат учиб, бир соат машинада юрилади. Тошкентдан эса бир соат машинада юришнинг ўзи кифоя. Мен сени албатта Чотқсл тоғи оралиқларига олиб бораман, жаннат дегани шу ёруғ дунёning ўзгинасида эканини ўз кўзинг билан кўрасан!

Гаплашиб ўтириб, пенсионер Музаффаров баъзан тувақиб ҳам кетарди.

— Баъзан йигинларда бирон ошнамиз ҳақида: «Унинг юраги пок, умрида бирон кимсага қаттиқ галириб, дилини оғритмаган, у ҳаммага яхшилик қилган...» деймиз. Бу, дарҳақиқат, тўғри, кишиларга яхшилик қилган олижаноб одамларни эъзозламоқ — адолат! Аммо, бошқа бир кимсага ишора қилиб, уни сўкиб, ўч олмоқ мақсадида кўнглига яқин «мўмин» бир одамни меъёридан ошириб мақтамоқ — мақтаётган кимсанинг дили кир, ифлослигидан далолат беради. Ширин гапни қуюқлаштириш орқасида у кўнглига ёқмайдиган бошқа бир одамдан ўч олади. Хўш, энди ўша «умрида бирон кимсани ранжитмаган», «юраги пок» одамга келайлик; агар унга ҳалқ ва давлат манфаати нуқтаи қазридан қаралса, пора олиб қўлга тушганида, «башаранг қурсин!» демай илож йўқ. Ҳар қалай, ҳеч ким «офарин, азизим!» демайди. Мен уни «иккисизламачи!» деб балога қолганман. Демак, жамиятимизда баъзан учраб қоладиган кишилар билан ҳам муроса қилиб, уларнинг дилини оғритмаслигимиз керакми?! Демак, биз ялписига, орамиздаги порахўр шилталарга олижаноблик кўрсата беришимиз керакми?! Шунда ҳамма хурсанд бўлиб, мабодо бирон сайловда номзодимиз қўйилиб қолса, ўша шилталар ҳам: «Йўқ, бу мўмин одам, бироннинг дилини оғритмаган, юраги пок...» деб, бизнинг номимизни чизиб ташламай, аксинча, юз фоиз овоз олишимизга асос бўлади, деб қарашимиз керакми?! Қани, айт-чи! Биз, меҳнат қилаётган ҳалол одамларни, «юраги пок» деб, эъзозлашимиз керак, биз ҳаммани эъзозлашимиз керак. Аммо шахсиятпарастларни эмас! Биз юзлаб дўстларимиз орасидан бир-икки мана шунақасини ранжитишдан қўрқмаслигимиз керак! Ярамас одамлар бор, улар ўз ярамасликларини дафъатан сездирмайдилар — бу ишда улар хирп бўлиб кетган. Ҳар

қалай, мен «мўмин одам» бўлиб, «бироннинг дилини ранжитмаган» деган гапдан воз кечаман, халқу давлатимга керак одам бўлиб яшайман! Мен баъзи ярамас иш содир бўлганида, ўша шахснинг башарасига тарсаки тортиб, ўн беш кун қамалиб чиқишдан ҳам ҳазар қилмайман! Ўшандай «мўмин одам» бўлганимдан кўра бўлмаганим яхши! Мен шилталар билан келишолмайман! Мана, мени дуду тутундан яратилган фаришта бўлмай, тупроқдан яратилган одам бўлганигимниң сабаби! Менинг кайфиятимга, этагим учигами, чангтупроқ тегиб юради. Мен, кафтида кири йўқ, фаришта әмасман! Мени ҳамма ҳам яхши одам, деб мақтайвериши шарт әмас, мен хонақоҳдаги зоҳид әмасман. Одамлар ичидаги одамман!

— Адаси, жон адаси! Чарчагансиз,— деди Марҳаматхон эрини эркалаб, елкаларига қоқиб. Чунки шундай тувақишдан кейин бир кору ҳол бўлиши, юрагида санчиқ бошланиб, ўзини ташлаб юбориши мумкин эди. У гапни бошқа ёққа буриб, Музafferовни креслодан турғазди,— хўп дедим-ку. Адаси, ўша Чотқол тоғи оралигидаги яхши жойларга борайлик! Мен, анави ойимтиллаларга ўхшаб, сизга курортга олиб боринг, брильянт зирак олиб беринг, деяпманми?! Менинг ўрнимда бирор симён-заҳар хотин учраб қолганида нима қиласдингиз? Анави ўртоғингизнинг хотини эри томонидаги ҳамма қариндош-уругларини ҳайдаб юбориб, эрининг топган пулига тилла асбоб олиб, зарга кўмилиб ўтирибди. Бай-бай, унинг заҳар тиллари, ачиб-сасиб мингиллаб ўтиришлари! Ким кўринса чақади. Ўшанақа хотин бўлганимда нима қиласдингиз?

* * *

Файзулла Аҳмедович Музafferов кунлардан бир куни кўчадан уйга қайтиб кела туриб, гастрономдан иккичиши вино олди. У конъягу арақдан «воз кечиб», унча-мунча сухой вино ичарди. Овқат олдидан Марҳаматхоннинг кўзини шамғалат қилиб, қадим мусаллас ичадиган кўк пиёлага қизил вино қуийб, маза қилиб ичаётганида хотини кириб қолди:

— Энди мен сизга доктор ҳам чақириб бермайман! Сиз, ўз жонига ўзи қасд қиладиган одам экансиз! Бунимаси?!

— Бу узумнинг суви. Шарбат!— деди қўлга тушган Музafferов илжайиб,— бу ёмон нарса әмас, глюкоза...

— Ҳа-а, глюкоза?!

— Хотинжон, бу дарҳақиқат глюкоза!— деди илжайганча, лабининг таноби қочиб Музafferов.— Буни асло ичкиликлар қаторига қўшиб бўлмайди! Аксинча, фойдали! Юрак айтармишки, ҳей, инсон, сен мени доимо бир коса шарбат ичиди сақлагин! Ана ўшанда менинг қанақа ишлашимни томоша қиласан... Шунақа дермиш юрак!

— Мен ўша юракнинг ишлашини томоша қилавериб зериждим!— деди Марҳаматхон тутақиб,— мен ҳамма вақт дор ўйнаётган одамдек, юрагим така-пуга. Доимо қил ўстида туришдан зериждим! Ичкилиқ деганинг оти ўчсин! Қачон сиз бу ярамасни ташлайсиз?!

— Ҳей, сен ҳаддингдан ошма! Пиён бўлиб, ариқларга думалаб ётганимда нима қиласдинг?!

— Менга ундақа эр керак эмас!

— Ҳа-ҳа, керак эмас! Бу гап айтишга осон! Мен пиён бўлиб, лойга ботиб, ёқалашиб юрганимда ҳам, тақдир шу экан-да, деб кўнникардинг. Худога шукур қил, бир катта фан арбобига тегиб олгансан. Бир қадаҳ сухой вино ичганим учун менинг партия масаламни кўрмайдилар. Карл Маркс айтган: «Ҳамма инсонларга хос хислатлар мен учун ҳам ёт эмас!» деб. Ҳа, маршал Будённий билан маршал Ворошилов ҳам сухой вино ичишган. Бунга нима дейсан? Қани айт-чи, нодон! Менинг Будённий билан Ворошиловдан нимам ортиқ? Қани гапири! (У ҳўнгиллаб йиғлади.) Мен Ўзбекистондаги бир оддий фан арбоби, Академиянинг мухбир аъзоси бўлсаму, сухой вино ичишга ҳам ҳаддим сифмайдими?! Октябрь инқилоби бўлмаганда, тоза эри дўппослайдиган хотинсан! Бахтингга инқилоб бўлди!

— Үҳ-ҳў, ҳаддингиздан ошяпсизми?! Сизнинг анави... ярамас жувон билан гап бўлиб, қилган ишларингизни ҳам бошқалар қилганмикин?! Ўртоқ Ворошилов билан ўртоқ Будённий сухой вино ичганлари билан сизга ўхшаб бир жувон билан гап бўлмагандирлар? Сиз унақа керилманг! Менга сиёсатни ҳам пеш қилманг! Академия... эмиш! Кошкийди, сухой вино ичиб, жим ўтирангиз! Сиз бу винони ичганингиздан кейин йўргаглаб қоласиз, ўйнашларингиз эсингизга тушади!

— Эй, хотин-э,— дейди Музafferов бир оз бўшашиб, бош чайқаб, қизариб,— менга туҳмат қилма! Мен умримда бирорнинг қўлини ушлаган кимса эмасман! Агар мен ёмон одам бўлганимда, ўша сен айтган хотинга уйланиб олганимда нима қиласдинг?!

— Гумои қиласман, дарҳақиқат, кўзим билан кўриб, ушлаб олганим йўқ. Аммо ушлаб олганимда ўзим билардим, икковингизнинг ҳам патингизни тўзитардим! Икковингизни ҳам болта билан чопиб ташлардим! (Марҳаматхон юрагига ғулгула тушди.) Ҳозир бориб ошхонадан болтани олиб чиқайми!!!

— Жинни бўлдингми! Ҳай-ҳай! Тўхта! Қани энди мен ҳозирги олтмиш олти ёшда бўлмай ўттиз уч ёшда бўлсаму, сен болта ушлаб мени қувласанг. Оҳ-оҳ, қани эди! Ўша болтанг кўзимга қўлингдаги гулдастага ўхшаб кўриниб кетарди... Мен ҳингиллаб, тирақайлаб қочардим, сен бўлсанг боплаб қувлардинг... Қани энди ўша кунлар. Ҳозир болтага эҳтиёж йўқ, хотинжон, юз фоиз ва батамом сенинг эрингман!

— Мени вақтида кўп куйдиргансиз! — деди Марҳаматхон андак бўшашиб, — қадримга етмайсиз, агар мендан бошқа шаллақи — закончи хотин бўлганида раҳбарларимиз ёnlарига чиққан бўларди! Чиқмадим-ку. Ҳеч қаерга арз қилмадим. Қадримга еting, дадаси!

— Ҳа, етаман. Раҳбарларимиз сенинг арзингга қулоқ солиб, мени савалардилар! Уларнинг сенинг арзингни тинглашдан бошқа ишлари йўқми? Бас, бўлди, Марҳаматой, энди қалтис гапларни тўхтатайлик. Ҳар қалай, мен бошқаларга нисбатан анча покиза одамман. Битта хотин билан яшаб умримни ўтказяпман. Сухой вино ўлсин, шу нарсадан ҳам мени бебаҳра қилма! Бу ярамас, вино зотидан кўра ҳам глюкоза зотига яқинроқ. Айниқса, манавиниси глюкозадан ўтиб, сирка бўлиб қолибди. Ичмай дейман, аммо эркаклигим эсимга тушиб қолиб, бу ярамасдан симираман, кайф беришнинг ўрнига, жигилдонимни қайнатиб, зарда қилиб кўнглимни айнитади.

— Мен сизнинг фойдангизни кўзлаб гапиряпман. Мен ҳамма вақт фойдангизни кўзлайман...

— Ҳа, сен жуда рўзгорбор хотинсан. Шу томонингни билиб уйланганман. Ошналарим, хотин олишга устасиз, дейишади.

— Ҳар нарсага жаҳлингиз чиқавермасин-да, адаси. Үнда яшаб бўладими! Жонингиз бекорга келибдими! Қўшинисининг эшаги думсиз турса ҳам Тошпўлат тажангнинг жони чиқиб кетган экан, лойга ботиб қолса, қаеридан ушлаб тортаман, деб,— Марҳаматхон қизиқчилик қилди. Лекин бу «қизиқчилик» унга жуда қимматга тушди.

— Ҳа, бу билан нима демоқчисан?! — деди бўнини кўтариб Музafferов, — қорамолни, умуман чорванинг овқатини еб қўяди, деб эшакларни қириб ташланганини тўғри деб топасанми?! Самосвал машинасига ўттиз-қирқтасини солиб, жарга ағдариб келишганини билсанми?! Телов деган қишлоқда бир муттаҳам қўлига кичик калибрли милтиқ ушлаб, бозордаги ҳамма эшакларни отиб ўлдирганини эшитганмисан?! Битта эшакнинг баҳоси уч сўм. Уч сўмга ҳам ҳеч ким олмаяпти. Шаҳарда бу мол тамом қолмади. Тоглиқ ерларда озгина жон сақлаб қолди. Шу ҳам ишми?!

— Узоқни кўролмайдиган одамлар бундай нотўғри ишларга фармон берадилар, — деди Марҳаматхон гўё эри гапига монанд ақлли гап қилгандай бўлиб. Музafferов қисқа ва ўйлаб гапирганларни ёқтиарди.. Бундай лўнда гапирадиган одамлар билан учрашганда асаблари ором олиб, жони киради.

— Шунча ақлли, яхши гапларни топиб гапирадиган ўз хотинимдан айланай!

— Асаб бузадиганлар билан эмас, адаси, менинг ўзим билан гаплашаверинг доимо.

Баъзан хафа бўлган пайтларида Файзулла Музafferов дўсти Амир Равнақнинг ушбу мисраларини дилидан ўтказарди:

Менсиз-да бу нафслар ўз ризқин ошайверар,
Улфатда яна майдан май жоми бўшайверар.
Ўлимимга ҳаёт ҳеч чок этмас ёқосин,
Сув ҳамда балиқсиз, албатта, яшайверар...

— Шундоқ дейсану, лекин ярамас шахслар бор. Биз энди шундоқ гўзал мамлакатни ўшаларга ташлаб кетаверамиزمии?!

— Адаси, ундоқ деманг! Яхши одамлар ҳам кўп, иккиласмчи, биз ҳали кетаётганимиз йўқ.

— Оқтепалик Ҳайнтбой оқсоқол айёр, лўттибоз кимсалар билан ундоқ-бундоқ деб пачакилашиб ўтирамай, тўппа-тўғри қамчи солиб юборарди. Тўғри қиларди!

— Яна айнидингиз! Асабни бузманг. Мен нега сиз билан боядан бери гаплашиб ўтирибман? Кўнглингиз ёришсин, десам, сиз яна айнияпсиз! Қанча қиладиган юмушим бор, кир ювишм керак, тахта-ўқлоги... ишим бошимдан ошибб ётибди!

Телевизорни бураган Марҳаматхон зангори экранда рақсга тушаётган хипча бел, келишган жувонга кўзи тушди. У анграйиб, ошхонадан чой олиб чиқишини унүтиб турган эди, эри гап қотди:

— Мунча имиллайсан, аяси! Сен ер айланишига қараб ишламайсан, йигирма тўрт соат сенга етмайди. Сен, қуёш системаси ҳаракатига қараб ишлайсан. Сен бу дунёда беш-олти юз йил яшамоқчисан...

— Ҳа, сиз, адаси, анави хипча бел раққосанинг айланишига қараб яшайсиз,— деди чимирилиб Марҳаматхон.— Бошқа программага оламан!

— Йўқ! Ўзи тураверсин! Чакки эмас... Ҳар кимса бир нима иш билан ўзини кўрсатгиси келади: ашула айтибми, бирон мансабда яхши ишлаётганими, ҳам вражу ҳам қўшиқни яхши айтишими, ишқилиб, кишилар нимаси биландир баландроққа чиқиб, ўзини кўрсатиш пайига тушади. Ўзини тутиб олган кишилар анча босиқ бўлганидек, ҳисоб-китоб, мақсад билан ишлаш ва доимо ишлаш, меҳмондўстликни ҳам ҳисобида ва икки томон бир-бирини баробар ҳурмат қилган ҳолда бўлиши, дангасалик, лақмалик гирдобига тушмаслик етуклидан дарак беради. Биз фақат ўзимизни эмас, келажагимизни ҳам ўйладиган кишилар бўлайлик. Ҳа, юрт манфаати йўлида, халқимиз баҳти йўлида қуевроқ бўлишимиз керак. Баъзи нодон кишилар еб-ичиб, ўзини ўйлаб ўтиб кетаверадилар. Халқ бундай шахсларга суюнмаслиги керак!

— Ҳақиқатан, чарчабсиз, адаси. Ҳар нарсадан жаҳлингиз чиқиб кетяпти. Тоғ оралиғига борайлик, ўша жаннат деяётган жойларингизга борайлик! Зора озроқ бўлса ҳам дам олиб келсак.

Шанба куни эрта билан бир оз тайёргарлик кўрган Музafferов илгари ваъдалашганига кўра «тоғ сайлига» дўсти Амир Равнақни ҳам таклиф этди. Икки машинада улар Чимёну Чотқол қайдасан, деб жўнашди. Фронтчи ошнаси Милтиқбой Қўйбоқаров илгари уни бир неча бор таклиф этиб, келмагани учун анчадан бўён гина қилиб юради. «Бизлар кичкина одаммиз, академик эмасмиз, бунинг устига бир оёғидан ажралган инвалид одамнинг ҳолидан хабар олиш олижанобликка кирмайдими! Ахир биз қон кечиб, неча марта ўлимга тик қараб, ўшандоқ ердан соғ-саломат келган эдик. Омон-эсон юртимизга борсак, қиёматли оға-ини бўламиз, борди-келди қиласиз, деб аҳдлашмаганмидик?!» Бу гаплар Файзулла Аҳмедович юрагидан ўтди.

Дарҳақиқат, ошнасини узоқ йиллар мобайнида икки-уч марта кўрди. Бир маротаба Қўйбоқаровнинг ўзи Тошкентга тушиб, Музаффаровнинг ёрдами билан стационарга ётиб, даволанди. Яна бир марта совхоз иши билан келганида...

Марҳаматхон эрининг ошнасига костюм, хотинига атлас кўйлак, ширинликларни тугун қилиб, кўтариб олди.

Қадрдон дўсти шоир Амир Равнақ Музаффаровдан олти ёш кичик бўлиб, сұҳбати ширин, камтар, оқибатли киши. Улар анча йиллардан бўён ошначилик қилишар, қариндошлиги бўлмаса ҳам қариндошлардан аъло эди. Бу хонадонда бирон маросим Амир Равнақсиз ўтмасди.

— Э, у бутун одам,— дерди Музаффаров Амир Равнақ ҳақида,— у билан бирга юрсам дам оламан, юракда ғубор қолмайди. Фариштаси бор одам. Сен ўзинг Амир Равнақнинг кимлигини биласанми?

— Ҳа, биламан. Лаврият!

— Офарин! Шуни билганингга ҳам шукур қиласман. Унинг асарлари Москвада нашр этилган. Москвада бо силган китоб жаҳондаги кўп тилларга таржима этилади...

Биринчи машинага Амир Равнақ билан Музаффаров ўтирди. Шоир машинасини нотаниш бир йигит ҳайдарди.

Йўлда, одатдагидек, Музаффаров билан Амир Равнақ сұҳбати яна авжга минди.

— Китоб — бебаҳо бойлик,— деди Файзулла Аҳмедович,— Абу Али ибн Сино демишларки: «Мен мантиқ, табииёт ва риёзат илмларини яхши ўргандим. Кейин илоҳиётни ўрганишга ўтиб, Арастунинг «Мобаъда ат-табия» («Табиатдан ташқари бўлган нарсалар»), «Метафизика» китобини қирқ бор қайта ўқидим. Лекин шундай бўлишига қарамай, мен унинг мақсадларини тушуна олмасдим. Қунлардан бир куни саҳобларнинг ёнига бориб қолдим. Унда бир даллол қўлига муқоваланган китобни ушлаб, мақтарди. Даллол менга: «Бу китобни ол, нархи арzon — уч дирҳам, эгаси пулга муҳтож», деди. Қарасам, у Абу Наср Форобийнинг «Мобаъда ат-табия» китобининг мақсадлари ҳақида ёзган асари экан. Уйга кела солиб ўқишга тушдим. «Мобаъда ат-табия» дилимда ёд бўлиб қолганлиги сабабли, шу ондаёқ китоб мазмуни менга аён бўлди. Бундай китобнинг топилганига шукур қилиб, эртасига ёқ камбағал-

ларга анча нарса садақа қилдим...» Шундай деб ёзган-лар Абу Али ибн Сино.

Бу гап Амир Равнақнинг чеҳрасини очди. Китоб ҳақидаги ҳар қандай сўз бу одамни қувонтиарди. Шахсий кутубхонасида ўн минг жилдан ортиқ китоби ҳам бор, улар орасида ноёб, қадимий қўйл ёзмалар ҳам бор эди. Амир Равнақ ҳам гап қотди:

— Шу улуғ мутафаккир, дарахтнинг камолга етгани меваси билан белгиланади, деган эди.— Мевасидан дарак йўқ, ҳозирги вақтда мансаб кетидан қувадиганларга «Сиёsat ал-мадания» ҳамда «Сийрат ул-фозила»¹ китобларини тавсия этишимиз керак.

— Чет эл арбобларининг сўзи билан китобга баҳо бериш эскидан одат,— деди Файзулла Аҳмедович,— менимча, китобга энг яхши баҳони халқ берсин. Ватандошлар берсин. Бу асар ҳақида «Мистер Литтон бундай деган» эмас, халқларимиз севиб ўқиган, деган гапни айтиш керак. Асар мистер литтонлар баҳоси билан ўлчамайди!

— Яхши даврлар келяпти,— деди яна Амир Равнақ,— бўляётган ишларни кўриб қувонасан, киши. Лекин мен жуда оғир шароитларни ўтказдим — урушдан қайтиб келиб, лой қориб, ўз қўлим билан гувала ясаб уй солдим. Деярли ҳамма қора ишни ўзим қилдим. Мих қидириб, магазинма-магазин юрганларим, охир, шаҳар четидаги бир дўкондан уни топиб, икки баҳога сотиб олганим, уйнинг дераза, эшикларини ҳам хусусий кишилардан икки баҳога сотиб олиб, ўрнатганим... бари ёдимда. Ҳозир тайёр квартиralарга кираётган ёшларга ҳасад қилмайман, аксинча, шундай бўлиши керак, дейман. Урушнинг оғирлигини биз тортдик ва галабани ҳам биз қилдик. Лекин Европа ёшлари тайёр квартиralарга кириш, ўйнаб-кулиш имтиёзларини биздан аввалроқ олиша бошлади. Ғолибларнинг фарзандлари ҳаммадан аввал кўп қаватли уйларга кириши керак эди... Ҳа, мен ўтган умримдан норози бўлмайман, аксинча, умрим жуда мазмунли ўтди, деб фаҳр этаман. Ҳар қандай қоронғи кунлар ортидан албатта ёруғ кунлар келади, ахир қуёш бор, қуёш нурлари ҳар қандай рутубатларни қириб йўқотади...

Икки машина олдинма-кетигин зингиллаганча тасмадек йўлда чолиб борарди; Шўртепа, Дўрмон, Қибрайдан ўтгандан кейин ҳавонинг ўзгаргани сезилди,

¹ «Фозил ҳулқлар».

Музаффаровнинг руҳи кўтарилиб, орқасига қайрилиб қараб хотинига имо қилиб, бу ёққа қара, табиатни томоша қил, демоқчи бўларди. Машинани жуда тез ҳайдамасликни таъкидларди.

— Мен айтган жойлар Чирчиқ шаҳридан ўтганимиздан кейин бошланади. Агар бир баланд тепаликдан орқада қолган Тошкентга қарасангиз, шаҳар сап-сариқ губор ичидаги турганини кўрасиз. Бу ерда химкомбинат рутубати ҳам Чирчиқ шаҳрини босиб ётади. Искандарга деган ердан жаннат бошланади. Унгача сабр қиласиз.

Дарҳақиқат, бир муддатдан сўнг машина кўтарила бошлади, икки томон баланд тепаликлар, ясси қирлар, рўпарада қават-қават баланд қорли тоғлар савлат тўкиб турарди. Улар Марҳаматхоннинг назарида, кенг ўтлоқларда чордана қуриб ўтирган басавлат Милтиқбўй ака Қўйбоқаровга ўхшарди. «Келинглар, азизларим, биз томонга ҳам ташриф буюар эканисизлар-ку! Тошкентда, шу иссиқ июль ойларидаги ёниб ўтиргандан кўра, гир-гир шабада, биз томонларга чиқиб келсанглар бўлмайдими? Ахир, мана шу хушманзара жойларимизни, тоғларимизни ҳам душмандан сақлаганмиз, оёқ ости бўлмасин, деб ўқ отишганмиз. Бунда баъзи савдо-гарнамо одамлар эмас, сиз билан биз дам олишга ҳақ-қимиз бор. Келинглар, азизларим!» — дегандек бўларди рўпарадаги баланд тоғлар. Чирчиқ кўпригидан ўтиб Ғазалкентга, ундан Чорвоқча — қирлар оралаб енгил машиналар тоқча юксалганида пастликдаги улуғвор манзара яққол кўрина бошлади. Айланма йўллар борган сари юқориликка олиб чиқарди. Баландликдан улар Чотқол, Писком, Кўксув дарёларининг бир-бири билан қўшилиб, Чирчиқ бўлиб оқаётганини томоша қилишди. Тоғ тепасига чиқишганида улар машиналардан тушиб, чор атрофга суқланиб тикилишди.

— Табиатнинг гўзаллигига қаранглар! — деди Музаффаров, — айтганимдек бу ерлар жаннатми, йўқми?

— Жаннатдан ҳам аъло! — деди уй ишларидан бир кун бўлса ҳам қутулиб, «озодликка чиқсан» Марҳаматхон тўйиб-тўйиб нафас олиб. — Тасаннони ҳам олиб келсак бўларкан, буларни кўриб баҳри-дили очиларди. Боёқиши эридан ажралгандан кейин юраги сиқилиб юрибди. Невараларимни ҳам олиб келсам бўларди.

— Эҳ, онасан-да, онаизор! — деди Музаффаров, — сал яйрагандек бўлган эдинг, дарров эсингга болаларингу невараларинг тушди.

— Тасаннохонни ўша қуруқ сумбатчага бериб хато

қилганмиз! Янглишдик. Ўртага тушган одамлар бизни чалғитди. Бир ерда камчилиги йўқ, ойдек қизимни ўша аперистга бериб увол қилдим...

— Ҳой, хотинжон! Мен сени ғурбатдан олиб чиқиб, бир оз яйрагин, деяпман! Рутубатдан қутилиб, мана бу тоғ ҳавосидан тўйиб-тўйиб нафас олсанг-чи! Ҳали бориб яна ўз ташвишларинг билан қовуриларсан, куярсан, обидийда қиласан... Як изфаси ҳузур — давлати Сулаймон! Бир лаҳза бўлса ҳам ғурбатни унут, ана, тўрт томонингга қара, мана шу ерларни жаннат дейнлади!

Шоир ёнидаги дафтарчасини олиб, нималарни дир ёзарди. У гапга камроқ аралашиб, кўпроқ хаёл сурарди.

— Шу ерга бир уй солиб, томоша қилиб ётадигач жой экан,— деди Таманно,— қандай гўзал жойлар! Жак, мана бу панорамага бир қарагин!

— Вижу,— деди Хайрушка синглисига мамнуният билан қараб, Таманно акасини эркалаб «Жак» деб атарди.— Худди самолётда кетаётганга ўхшаймиз.

— Шу ерларда пансионат очицса бўлмайдими?!— деди яна Таманно,— шунча жойлар бекор ётиби.

— Бекор ётгани йўқ, қизим,— деди Файзула Аҳмедович,— сен кўриб турган бу панорама — совхоз ерлари, ўрмон хўжалиги совхозлари, қишлоқлар...

— Папочка, всё таки жалка! Шунча яхши ерларни пансионат, туризм базалари қилиш керак эди.

— Улар ҳам бор. Мана бу рўпарада — Бурчмулла. Обираҳмат, юқорида Богистон, Нанай, мана бу томонда Хумсон, бу томонда Чимён бор. Мана бу азим тоғлар Чотқол тоғларидир. Чотқол бу тоғларнинг энг буюги. Чотқолнинг ичкари томонлари Қирғизистонга қарайди. Мана бу Асқартօғ, бу томонлар — Писком, Угом тиэзма тоғларидир. Ўзбекистонимиз қандай гўзал-а? Бунақа жойлар дунёning ҳеч ерида йўқ!

— Папочка! Биз борадиган қишлоқ тоғ тепасида-ми?

— Ҳув ана, кўриниб турибди.

— Үшами?— Таманно тоғ оралигидаги яшилликка тикилди.— Қишлоқни тоғ тепасига қуришса бўлмайдими, томоша қилиб ўтирадик?!

— Сен айтгин, қуришар!— деди Марҳаматхон талтайиб, тилини буриб, қандайдир бир бузук талаффуз билан гапираётган Таманнога ялт этиб қараб,— унда овқатга сувни ҳув пастга тушиб, дарёдан олиб чиқишидими? Уларнинг экин-тикини бор.

— Мамочка, қишлоқилар анойи әмас, шундай яхши ерларда яшашар экан-а?

— Мана бу ножӯя камситиш гапингни бундан буён эшитмай! — деди жаҳли чиқиб Музатфаров. — Ўзбекистоннинг ҳамма ери ҳам чиройли, ҳамма ерида ҳам одамлар яшаб, меҳнат қиласиди. Ажратиш керак әмас! Сенинг ўзингни ҳам шундоқ дейиш мумкин!

— Кечиринг, папочка!

— Айтмадимми, биз «жаннат»да ҳам яйрай олмай, асабимизни бузяпмиз, — деди Марҳаматхон, — Таманно, бундан бу ёғига жаҳл қўзғайдиган гаплар гапирма!

— Хўп, мамочка!

— Биз турган ер денгиз сатҳидан икки минг беш юз метр баланд экан, — деди Амир Равнақ бир муддатдан сўнг гапга аралashiб, — ана, ёзиб қўйибди.

Хайрушка ҳам, Таманно ҳам ялт этиб тог тошига ёзиб қўйилган рақамга қарашди.

— Папочка, чумолилар! — деди Таманно харсанг тошлар орасидан чиқиб, ғужгон бўлиб югуришаётган тез чопар сариқ чумолиларга тикилиб, — улар тог тепасида маза қилиб ўйнаб юришибди. Биз бўлсак бундай чиройли ерлардан узоқда яшаймиз. Эҳ, сенлар! — Таманно чопиб кетаётган бир чумолини туфлиси билан босиб ўлдирди.

— Чакки қилдинг, қизим! — деди Файзулла Аҳмедович қатъий эътиroz билан, — тирик жонни ўлдириш ярамайди!

— Илонни ҳамми?

— Албатта! Инсон табиатга жуда боғлиқ. Эҳтимол, ўша илон ҳам керак. Бўрини қириб ташлашга ҳукм этилган эди, кейинчалик бу ҳукм хато чиқди. Бўри йўқ жойларда чорва туёғи камайиб кетди. Ота-боболар тирик жонни ўлдирмаслик керак, деган гали мағзида катта фалсафа ётади. Бунга диний бир руҳ бериш керак әмас. Инсон табиат билан қаттиқ боғлиқ, — деди Файзулла Аҳмедович, — аммо ҳаётда баъзи шахслар бор, улар бошқалар меҳнати эвазига шуҳрат қозониб, ғишиниб, бузуқчиликлар қилиб, охири фош бўладилар...

— Зиёлилар ичида ҳам шунақа шахслар йўқ дейизми? — деди Амир Равнақ. — Бор. Улар ўта шуҳратталаб. Меҳнат қилмай нон ейдилар. Бизни, қатламдаги маъдандек ер остида ётаверади, дейдилар. Йўқ! Биз ҳам қатламдан чиқиб, ярқираб, қуёш нурларида жилва қиласиз! Меҳнат қилганлар бу улуғ юртда ҳеч қачон хор бўлмайди!

— Адаси, яна асабингиз бузияпти,— деди Марҳаматхон табассум билан эрига боқиб. Үндан сўнг шоир амакига ҳам жилмайди,— арзимайди.

— Тушундим. Бўлди, гапирмаймиз. Гап чумолидан чиқди. Уни Таманно бекорга ўлдириди!

Шу лаҳза бир кичик пашша Файзулла Аҳмедович боши атрофида ғинғиллаб айланади бошлади.

— Папочка, пашшани ҳам ўлдириш керак эмасми? У фойдалими?

Музаффаров кулиб юборди.

— Буни айтолмайман, қизим. Ҳамма ёқни томоша қилиб бўлдингларми? Қани, кетдик!— деди у машинага ўтириб. Лекин қизининг саволи уни ўйлатиб қўйди.

— Ҳамма ёқ гўзал! Бу ердан ҳеч кетгим келмаяпти,— деди эринчоқлик билан машина томон юриб Таманно,— Жак, аксига фотоаппаратни олиб келмабмиз. Қара, панорама қандай зўр! Анави томон архипелаг...

Марҳаматхон билан Таманно тоғ тепасидан чор атрофга суқланиб тикилишарди. Улар ҳақиқатан ҳам жаннатга тушиб қолишган эди.

Машиналар айланма тоғ йўлларидан яна зинғиллаганча югуриб кетди.

XIII боб

ФРОНТ БИРЛАШТИРГАН ДУСТЛАР УЧРАШУВИ

Кўп ўтмай икки машина Хумсонни чап томонда қолдириб, Сижжак қишлоғига кириб келди. Нишаби Писком дарёсига қаратилган қоя, тор кўчалардан ўтиб, бир неча ерда машинани тўхтатиб, болалардан сўраб, ниҳоят, Милтиқбой Қўйбоқаров ҳовлисини топишиди.

Эшикка машина келиб тўхтаганини кўрган Милтиқбой aka наридан-бери қўлтиқтаёқларини олиб, бир оёқ-лаб кўчага интилди. Дарвоза олдида турган эски қадрдени, новча, қирра бурун Музаффаровни кўриб, у билан қучоқлаша кетди. Улар бир муддат бир-бирларини қўйиб юбормай кифтларига қоқиб, юзларига юзларини суркашди. Икковларининг кўзларида ёш пайдо бўлди. Ҳовлидан чиққан ёш-яланглар, машинадан тушган шаҳарлик меҳмонлар икки кексанинг қучоқлашиб омонлашишларини томоша қилишарди. Узоқ йиллар мобайнида бир-бирини кўрмаган фронтчи қадрдонларнинг ҳаяжонли ҳолатини ҳайрат билан кузатишарди. Неча

Ўлимдан қутулиб, умри ўлжага қолган бу кишиларнинг бир-бирини қучоқлаб, кўз ёш қилишаётгани маъноси равшан, албатта. Ҳаммадан ҳам Амир Равнақ жуда ҳаяжонланиб кетди.

— Азизим Файзулла ака, Тошкент дегани бундан икки соатли йўл бўлса-ю, чиқиб келмасангиз,— дерди Милтиқбой ака белбоғи билан кўз ёшини артиб,— сизни ҳам кўрар кун бор экан. Хуш келибсиз! Хуш келибсизлар!

— Э, азизим, шаҳар тупроғи жуда оғир, ҳеч одамни қўйиб юбормайди. Мана, пенсиядамиз,— деди кулимсираб Музаффаров,— бу ёғига вақт кўп, отамлашаверамиз. Одер дарёси яқинидаги Ландберг шаҳрида қилган ишимиздан ҳам қилаверамиз...

— Ҳа-ҳа-ҳа-ҳа-а-а! Эсингида бор экан, Файзулла ака,— деди қотиб кулиб Қўйбоқаров. У қўчқор шохига ўхшаган бурама, узун мўйловини силаб қўйди,— хўп қойил ишлар қилганмиз! Шўх эканмиз ўшандা!

— Ҳозир қалайсиз?..— деди новча, узунчоқ юзли Музаффаров андак эгилиб, Қўйбоқаровнинг қулоғига шивирлаб.

— Водопровод...— деди секин шивирлаб Милтиқбой Қўйбоқаров ва бирдан ўзини тутолмай қаҳ-қаҳ уриб юборди.

— Отангизга раҳмат!

— Адаси, меҳмонларни ичкарига таклиф этинг,— деди оппоққина бир жувон ёнида оҳудек ҳушёр кузатиб турган қизи билан Милтиқбой акага мурожаат этиб:— Эсон-омонмисиз, хуш келибсизлар!— у Марҳаматхон, Таманно билан Хайрушкани ичкарига таклиф этди.

Олдинда қўлтиқтаёқли Милтиқбой ака, Файзулла Аҳмедович, Амир Равнақ, ундан кейин бошқалар кетма-кет дарвозадан ўтиб, ҳовлига киришди.

Ҳовли кенг, гулзор. Атроф чиройли ишком. Ҳовли ўртасида ихчамгина ҳовуз ва ўнг томонда шоҳсупа. Дарвоза тепасидаги шийпонда ўтирган киши кунчиқар томондаги Асқартог, Бўғистон қишлоғи, пастликдаги Писком дарёсини шундоқ кўриб турарди.

Сижжак қишлоғи Писком дарёсининг ўнг қирғоги, Уғом тизма тоғлари этагига жойлашган. Рўпарада Асқартог қад кўтариб турибди. Қишлоқ ўрни қиялик бўлиб, то Писком дарёси бўйигача айланма тор кўчалар билан тақалиб боради. Ҳамма кўчаю ариқларнинг нишаби дарёга қаратилган. Бу дарё анча чуқурликдан оқиб, Хўжакентда Уғом билан қўшилади. Чотқол, Кўк-

сувлар ҳам унга қўшилиб келади. Сижжак рўпарасида Богистон ва юқорироқда Нанай қишлоқлари бор. Сижжак билан Богистонни торгина кўприк боғлаб турди. Нанайга ўтадиганлар ҳам шу кўприкдан юрадилар. Богистон қишлоғида Шайх Умар vale мақбараси бўлиб, қадамжо ҳисобланади. Сижжак қишлоғининг юқори қисми то Наволисойга етгунча олмазор боғлар. Асқартоғ орқасидан кўтарилиган офтоб эрта билан биринчи галда Сижжакка тушади. Бу пайт Богистон билан Нанай тоғ соясида турадилар. Писком дарёсининг икки томони то Бешторга боргунча ёнгоқзор, толзор, теракзордир. Бу ерда эрталабдан бошлаб турли қушлар қанот қоқиб, сайрашади — тинмай ўз инларига хўрак ташишади. Загизон, кўкқарға, майна, ёввойи капитарлар жуда кўп. Тогни қалин қор босган қиши кунлари овқат излаб келган какликлар тап тортмай қишлоқ ҳовлиларига ҳам кириб қелаверишади. Баъзан кечга яқин тоғ чўққилари устида калхатлар сузиб, айланиб юради.

Йигирма тўрт, йигирма бешларга борган хушбичим, чикка бел қиз ичкари хонадан беқасам кўрпача, пар ёстиқлар олиб чиқиб, ҳовуз бўйидаги супага тезда жой тайёрлади. У югуриб-елиб онасиға кўмаклашарди.

— Бу — қизим Гулгун,— деди Милтиқбой акъ мөхмонларни супага таклиф этиб,— Санобархон ӯзнадонимизнинг бекаси. Мана бу — ўғлимиз Асқаржон. Урушдан келиб, топган давлатим шулар.

— Бахти бўлишсин! — деди Файзулла Аҳмедович билан Амир Равнақ.

— Сизнинг фарзандларингиз қанча бўлди?

— Икки қиз, икки ўғил. Мана, ўғлимиз — Хайруллахон. Кенжатой қизимиз — Таманно. Марҳаматхоннинг ҳам, менинг ҳам давлатимиз шулар.

— Омон бўлишсин!

Гулгун билан Санобархон, бирлари чой қўйиб, бирлари дастурхон ёзиб қўллари-қўлларига тегмай қолишиди. Милтиқбой аканинг илтимосига кўра қўшнилари Чоршанба ота билан Эргашали aka қора қўйлардан бирини боққа олиб чиқиб сўйиб юборишиди. Асқаржон бидон кўтариб қимизга кетди...

Тушга яқин Тошкентдан мәҳмонлар келганини эшитиб, Милтиқбой аканикига бошқа қўшнилари ҳам чиқишиди. Қимиз сузилиб, шўрваю эт тортилди. Зиёфат авжга минди. Ўзига иш қолмаганини кўрган Гулгун Таманно, Хайрушка ва яна шу ерлик икки дугонасини олиб, дарё томонга тушиб кетишиди. Отасининг қадрдон

дўсти Тошкентдан атай кўргани келгани Гулгунни ниҳоятда хурсанд қилиб юборган эди. Шўх Гулгун ўзида йўқ шод, у меҳмонларга Сижжак қишлоғидаги «диққатга сазовор» жойларни кўрсатарди...

Шу куни зиёфат ўтиб, эртасига Милтиқбой аканинг бир уруғи меҳмонларни уйига чақирди. Унинг ҳовлиси Наволисой томонда. Улар бир тўда бўлиб, пиёда жўнашди. Йўл-йўлакай совхоз боғига ҳам киришди. Баланд тепаликдан туриб Писком дарёси ўзанини томоша қилишди. Милтиқбой ака шоирни тўхтатиб, ўз асалари қутилари ёнига олиб бориб, ниманидир тушунтиради.

Олдинда кетаётган Марҳаматхон, Санобархон ва Файзулла Аҳмедович гаплашиб боришарди:

— Милтиқбой акам урушдан қайтиб келганидан кейин чиққанман турмушга. Бир қиз, бир ўғил кўрдик. Милтиқбой акамнинг фронтчи дўсти Музafferов катта ишда ишлашини, катта олим эканлигини кўп эшитганимиз.

Сансбархон баҳтли, ўз турмушидан мамнун эканлигини Марҳаматхон билан Файзулла Аҳмедович яхши пайқаб туришарди.

— Юринглар, Милтиқбой акамга етиб олайлик!— деди Санобархон.— Қалай, қишлоғимиз ёқдими, Марҳаматхон?

— Жуда чиройли!— деди ўйланиб турган Марҳаматхоннинг ҳуши ўзига келиб,— мен Сижжакнинг бунчалик чиройли жой эканини билмас эканман.

— Шу ердан бοғ қилинглар, ер топиб берамиз.

— Қани эди,— деди Марҳаматхон қувнаб турган Санобархоннинг юзига қараб. Узоқда Милтиқбой акамнинг қўлтиқтаёққа тираниб бир тўп меҳмон ва мезбонлар олдида йўл кўрсатиб кетаётганини кўргач, қадрдон дўстининг хотини билан узоқ гаплашиб, кулишавериши ўзига эп кўрмай, Музafferов қадамини тезлаб уларга қўшилди.

— Бу ерлардан юз марта ўтган бўлсам ҳам яна адапиб қолмайлик,— шаддод Санобархон наъматаклар орасидан ўтиб кета турниб Музafferовга гапирди,— тог сўқмоқлари жуда айланма.

— Зора адашиб қолсак...— деди Файзулла Аҳмедович. Бу гапни Марҳаматхон эшитмади.— Ҳаётимда бир маротаба адашиб таъзиримни еганман...

Санобархон юрагида кири йўқ, ниҳоятда қувноқ аёл. Музafferовнинг кўнгли ёришиб, кечмиш-кечирмишлар ширин рўёдек бир лаҳза қалбини эркалади. Ёки қалби

покиза аёллар шундоқ шўх бўлармикан? Бир инвалид, яримта одамнинг бодини обод қилган Санобархон Марҳаматхон билан Музаффаров назарида китобларда ёзиладиган ажойиб қаҳрамон хотинларга ўхшаб кетганди. Аслида, деди ўзига-ўзи Музаффаров, ҳаётда бундай хотинлар жуда оз.

Милтиқбой аканинг қариндоши ҳам тошкентлик меҳмонларни қучоқ очиб кутиб олди. Зинапоя билан чиқиладиган болохонага яхшилаб дастурхон тайёрлаб қўйилган эди. Бу ердан ҳам бутун Писком водийсининг беқиёс манзараси кўриниб турарди.

— Баланд болохона қуриш бунда жуда яхши одат экан,— деди Музаффаров чор атрофига тикилиб,— бир катта рамкани кўтариб қай томонга тўғриласангиз, Тансиқбоев чизган манзаралар чиқаверади.

— Гўзалликни сезиб турибсиз. Жуда катта баҳо бердингиз, домлажон,— деди Амир Равнақ.— Бу ернинг ҳавоси-чи. Ҳаво эмас, кислороднинг шундоқ ўзи. Тошкентга посилка қилсангиз бўлмайдими! Бизлар унда ўлиб бўлдигу!

— Ошнажон, бу ёққа кўчиб чиқинг,— деди Милтиқбой ака,— хоҳласангиз бизницида, хоҳламасангиз яхши ҳовли топиб бераман. Энг яхши шигирларни бунда ёзасиз. Асал билан боқаман. Асал шигирлар битасиз.

— Ақл — Ҳасан, одоб — Ҳусан, дейдилар. Ҳимматингизга тасанно! Насибамиз қўшилган бўлса, албатта келамиз..

Ҳақиқатан, шаҳарда диққинафас бўлиб, ҳар куни тажанглиги тутиб юрган Музаффаров бу ерга келиб яшнаб кетди. Тоғ ҳавоси ёқиб, асаблари жойига тушди. Кечадан буён кайфи чоғ, ниҳоятда хушмуомала бўлиб қолди. Таманно ҳам заҳар адасининг бунчалик очилиб-сочилиб юрганига аввал таажжубланди, кейин асаблари қақшаган кекса одамлар денгиз бўйларида, тоғликларда, кенгликларда ўзини бардам ҳис қилишини эслади. Марҳаматхон учун ҳам Музаффаровнинг касал бўлмай, тинч юргани ва бунинг устига қувнаб юриши доридек зарур — айниқса, кейинги пайтларда одамлар билан тез-тез айтишиб, жигибийрон бўлиб юрганидан кўп хавотирда эди. Умр бўйи почтачиларга ўхшаб тинмай югуриб-елиб ишлаб юрган кишиларнинг пенсияга чиқиши хавфли экан, улар яна чопқиллаб ишлаб юрса хўп, аммо ўтириб қолса, бирон икки йилдан сўнг ўлиб кетаркан. Шундай бўлган одамларни Марҳаматхон билади. Елиб-югуриб юрган одамларни уйга

тиқиб қўйгандан кўра енгилроқ бир иш бериб, овора қилиб қўйган айни муддао, дерди у. Шу сабабли инженер Файзулла Музafferovning уйда ўтириб, хотинларнинг холаси, қизларнинг янгаси бўлиб қолиши, дам ошхонада тахта-ўқлоги тепасида, дам жомашов ёнига курси қўйиб хотини билан ҳасратлаша бериши унга ёқмасди. Эркакнинг эркакдек бўлгани, ундан одеколон ҳиди эмас, ишхонасининг ҳиди келиб тургани маъқул экан. «Эркакларга ўхшаб иш қилсангиз-чи, адаси, тахта-ўқлоги тепасида нима қиласиз?» — деган эди бир куни Марҳаматхон. Ўшанда: «Мен сенга картошка ўра қазиб бердим, ҳадеб ҳовлига ўра қазий бераманми, нодон!» — деб ўдагайлаган эди Файзулла Аҳмедович. Бугун унинг эркакларга ўхшаб, салобат билан савлат тўкиб юргани, гаплари, хахолаб кулишлари Марҳаматхонга мойдек ёқарди.

Жаннатдек жойга келиб қолганидан кайфи чоғ Файзулла Музafferов зиёфатда фронтчи ошнаси Милтиқбой Қўйбоқаров билан «оқ»дан тортишди. Хотинларнинг кўзини шамғалат қилиб, яна бир-икки бостириб-бостириб ичишди. Товук гўштларини бурдалаб ейишди. Кайфи ошган уч ошна «ман сизга айтсам...» бўлиб, бир-бирларини чунонам ялашдики, асти сўраманг. Одер дарёси бўйидаги қаттиқ жангларда кўрсатган баҳодирликларини хотирлашди. Дам ийғлашди, дам кулишди. Ландберг шаҳрида бўлган, умр бўйи ёддан чиқмайдиган ошиқона воқеаларни ҳам эслашиб, тиззаларига уриб, тоза кулишди.

Зиёфат ярим кечагача давом этди. Ундан сўнг мезбон маст кишиларни кўчага чиқаргиси келмади — тог сўқмоқлари бир неча жарликлар ёқалаб ўтганидан, бирон кори ҳол рўй бермасин, деб зўрлаб бўлса ҳам олиб қолди.

Эртасига Милтиқбой ака, Амир Равнақ ҳамда Файзулла Аҳмедович болаларни қолдириб пастликда, дарё бўйида ёлғиз турадиган Чоршанба отаникига боришли. Бу чол яхши сайроқи беданалар боқарди. Таъби ринд, кўнглига ёқсан ошналари билан ширин улфатчилик қиласиди. Унинг девзира гуручидан дамлайдиган оши жуда ширин бўларди. Оз-моз бўза ҳам ичарди. Асли у хўжакентлик Сайдваққос бойнинг корандаси бўлиб, умр бўйи шу қирларга буғдой сепган, бойнинг қизига ошиқ бўлиб қолиб, куйиб юрган. Бой бўйи етган қизини бошқа бир бойнинг ўғлига бериб юборгач, Чоршанба Писком дарёси бўйидаги ота-бобосидан қолган бир пар-

ча ерга ҳовли-жоъ қилди. Уйланолмагач, пешанасига бир уриб, нашавандликка берилиб кетди. Инқилобдан кейин бир боши икки бўлиб, оила тузди. Катта ўғли урушда ҳалок бўлди, кичик ўғли — Абдуманноп Чорвоқ қурилишида ишлайди. Қизи, неваралари чолдан тез-тез хабар олиб туришарди. Лекин Чоршанба ота қизи ва куёвининг шунча зўрлаганига қарамай ўзининг алмисоқдан қолган бир парча ери, эски уй-айвонини ташлаб кетмасди. Қишлоқнинг Сижжак деб аталиши, асли «се-чек»дан келиб чиққанини ҳам шу Чоршанба ота айтган.

Чоршанба ота қишлоқда ҳаммадан кўра Милтиқбой акани ёқтирас, шу инвалид одам билан юлдузи тўғри келарди. Баъзида атай уни чақириб олиб келиб, ош дамлар, аллавақтгача ўтган-кетганлардан гаплашиб ўтиришарди. Милтиқбой ака ҳам дўстини атай Чоршанба отаникига бошлаб келди, ярим кечагача сухбат қилишди.

Шу бир кўхна ҳовлидаги уй-айвон унинг олтин қасри, «оқ саройи» эдики, уни ҳеч нарсага алишмасди. Қийшайиб, шифтлари исдан қорайиб кетган уй-айвон билан Чоршанба ота бир-бирларига жуда ўхшаб кетардилар. Ўзи ғарibu кўнгли подшоҳ бу чол Амир Равнақ-қа ҳам ёқиб қолди. Улар анча вақтгача дардкашлик қилиб ўтиришди.

Ҳар куни зиёфат, тоғ сайри, қимизхўрликлар билан Файзулла Аҳмедовичу Амир Равнақлар бунда беш кун қолиб кетишиди. Олтинчи куни улар ошнасидан ижозат сўраб, уларни ҳам Тошкентга, ўз ҳовлиларига таклиф этиб, ўйлга чиқиши тайёргарлигини кўришди. Таманно билан қадрдон дугона бўлиб қолган Гулгун адаси билан гаплашиб турган Музаффаров ёнида ўралашиб илҳақ турарди. Таманно ҳам Гулгунни жуда қизиқтириб, менинг хонамда иккаламиз турамиз, институтга имтиҳон топширишингга ўзим ёрдам бераман, деган эди. Адасининг қадрдон дўсти Музаффаров оиласида турish иштиёқи — романтикаси ва яна институтга кириб олиш истаги юрагига ҳаяжон соларди. Гулгуннинг учишга тайёр турган каптардек энтикаётганини сезган Марҳаматхон билан Файзулла Аҳмедович Милтиқбой акага қарашиди.

— Қизим ўнинчини тамомлагач, ўқишга кираман, деб бориб киролмай, қайтиб келди. Агар уни ўзингизлар билан биргэ олиб кетиб, институтга киришига ёрдам берсангизлар, ўла-ўлгунимча миннатдор бўлардим.

Унинг ўзи ҳам сизларни кига боришга жон деб турибди,— деди Милтиқбой ака дўстига мурожаат этиб.

— Жуда яхши. Бемалол,— деди Файзулла Аҳмедович.— Менимча, бу жуда тўғри. Ёшлар ўқиши керак. Жуда керак!

— Бизни кида турадилар,— деди Марҳаматхон Гулгунни қучиб,— ҳеч хавотир бўлманглар. Мана шу иккита ширин қизим яқин дугона бўлиб қолишибди, ўзларининг хос хоналари бор. Институтга кириб, ўқишилари керак. Шунга ҳам ёрдам бермасамиз, сизларни нинг фронтчи дўстлигингиз қаёқда қолади.

Тошкентга бориши аниқ бўлганидан хурсанд бўлиб Гулгун чапак чалиб юборди.

Санобархон бўлса нима дейишини билмай бир чеккада ҳайрон турарди.

Худди шу дарё томонда, Чотқол тоги этакларида кучли бир портлаш рўй берди. Ҳамма ёқ титраб кетди. Бир зумдан сўнг пастликда, Чорвоқ, Хўжакент томонда осмонга чанг-тўзон булатдек қайнаб чиқди, портлашлар бирин-кетин уч-тўрт бор такрорланди.

Ҳовлида турган меҳмонлар ҳам, мезбонлар ҳам бир дақиқа жим бўлиб қолишибди. Дараҳтларда ўтирган қушлар ҳам кўкка парвоз этиб, чағиллаб, Наволисой томонга қочишибди.

— Бу нима?— сўради таажжуб билан Файзулла Аҳмедович. Унинг жисмида бундан ўттиз йил илгаригидай тўплар канонадаси, портлашлар ларзаси сезилиб кетди.

— Чорвоқда тоғ қулатиб, дарёларни тўсишяпти, катта қурилиш бўляпти,— деди Милтиқбой ака Файзулла Аҳмедович билан Амир Равнақча фахр билан.

— Ҳа, дарвоқе...— деди Файзулла Аҳмедович Чорвоқда катта қурилиш бошланиб кетганини эслаб.

XIV боб

БИР ОНИЙ ШИРИН ҮПИЧ...

Тўйлари яқин қолган бир пайтда иттифоқо Гулгуннинг Тошкентга кетишини эшигтан Қоражон Мингбоеv ўпкасини қўлтиқлаб, тўғон трассасидан тўппа-тўғри Сижжакка келди — эшик олдида қамти келган Таманно «Гулгунларниң қариндоши», «юзлари чандиқ, басавлат қора йигит»га бошдан-оёқ тикилди. Бу йигит

унча кўримли бўлмаса-да, кишини тортадиган қарашлари бор эди. Гулгуннинг унга бўлган илиқ муносабати, шошиб, гапини йўқотиб гапириши, қизариб кетишидан бир сир борга ўхшарди. Қоражон Таманно билан бош иргаб саломлашгач, ҳовлига кириши билан Гулгунга рўпара келди. Дарҳақиқат, Таманнонинг сезишича, Гулгун андак қизариб Қоражонга салом берди. Негадир ҳаяжонланган, бир нимадан норозидек бу йигит Сано-бархонга йўлиқди. Шу томонга келганида, иттифоқо Гулгуннинг Тошкентга кетаётганини эшитиб ҳайрон бўлганини айтди. Мактаб ёнидаги боғда қандайдир иши борлигини баҳона қилиб, наридан-бери чиқиб кетди. Дугонасидан уялиб турган Гулгун онасига бир гапни шивирлаб, кўчага чиқди. Эшикда турган Таманнога тез қайтиб келишини билдириди.

Қоражон шу лаҳза бошқа кўча билан айланиб мактаб орқасига ўтди. Бу фақат Таманно билан Хайрушкадан яшириниш учун керак эди. Жимжит майдонда — сада соясида улар бир-бирига рўбарў келиб, бир муддат жим туриб қолишлиди. Гулгун ерга қаради.

— Тошкентга кетаётган эмишсиз. Ростми?

— Ҳа. Үқишига кетяпман. Адамни ўртоғиникида турман. Дугонам Таманно, имтиҳонга тайёрланишда ёрдам бераман, деди. Адам ҳам, опам ҳам Музаффаровлардан, шоир Амир Равнақдан жуда илтимос қилишлиди. Мен Таманно билан бирга тураман. Алоҳида хона ажратиб, имтиҳонга тайёрланишга шароит яратиб берамиз, дейишиди...

Қоражон кулди. Гулгун яна ҳаяжонланиб гапира бошлади:

— Үқишим керак, Қоражон ака! Барибир ўзингиз ҳам ўқитишингиз керак эди-ку! Музаффаровларнинг келгани яхши бўлди. Омад ўз оёги билан келади, ҳеганлари мана шу бўлса керак...

Устидан совуқ сув қуийлгандек, бир лаҳзандаги Қоражоннинг ҳаяжонлари йўқолиб, жим бўлиб қэлди. Гулгуннинг раъйини қайтарадиган бирон сўз айтсалмади. У нима дейишини билмай яна кулди. Қизариб кетди.

— Кел,— у Гулгунни ўпмоқчи бўлиб елкаларидан ушлаётган эди, қиз эътиroz билдириб қочди.

— Йўқ!

— Нега?

— Кўриб қолишади...

Лекин Қоражон бунга қарамай зўрлик билан Гулгунни маҳкам қучиб, лабларидан шундай қаттиқ ўпди-

ки, унинг пастки лаблари кейинчалик албатта кўкариб қолиши турған гап.

— Сен нима ишлар қиляпсан?! Эрта-индин тўй деганда бу нима гап?— Қоражон эҳтиросда ёниб Гулгунни бағридан бўшатмай титрар, ҳаллослар, атрофга олазарак боқарди.

— Барибир ўқитишингиз керак эди, озгина сабр қилинг,— деди Гулгун ҳам қаршилик кўрсатмай, Қоражоннинг бағрида жим туриб.

Гулгун аллақайси бир журналда кўргани фотосуратга ўхшатиб, сочини орқага қубба қилиб, енгиз оқ батист кофта, тор юбка, оёғига баланд пошнали туфли кийиб олган эди. У эркаланиб, кафти билан Қоражон юзларини силаб қўйди. Елкасига бошини қўйди. Дарвоза олдида уни Таманно кутиб турганини яна бир марта Қоражонга айтиб, қучогидан чиқиб, ўз ҳовлиси томон пориллаб учиб кетди. Йўл-йўлакай орқасига қарраб қўлларини силкиб, Қоражонга хайр ишорасини қилди. У ниҳоятда шод эди. Шўх Гулгуннинг бирон нима билан шахтини қайтариш, йўлига ғов бўлиш мумкин эмас. Унинг қишлоқдан чиқиб кетаётгани, тўйнинг яна бир қанча вақтга кечикаётгани Қоражон юрагига алам solaётган бўлса ҳам, у буни Гулгунга сездирмади. Тўғри сўз, шаддод Гулгун: «Сиз фақат ўзингизни ўйламаслигингиш керак. Сиз институтни тамомлагансиз, инженерсиз, мен ҳам ўқишим керак»,— деган гапни айтиб юбориши ҳеч гап эмас эди. Ҳар қалай, бу кутилмаган воқеа инженер Қоражон Мингбоевга ёқмади.

Аммо, бир оний ширин ўпич шу лаҳзанинг ўзидаёқ Қоражон юрагида дашту биёбонни боғу бўстонга айлантириб юборди. Дунёнинг нақадар чиройли ва тотли эканини англатди. Рўпарадаги Чотқолдек қадди-қомати кўтарилиб, ўзини йўлбарсдек кучли ҳис этди...

Шу лаҳза бирдан кучли портлаш — гумбурлаш бўлиб, ҳамма ёқ титраб кетди. Тоғлардан акси садо келди...

Қоражон Гулгунларникига яна қайтиб бориб, у билан хайр-хўшлишиб, тўғон томонга жўнади. У худди жанг майдонидан бир муддатга қадрдонини кўргани келиб, гумбурлашни эшитиши билан яна олдинги линияга югуриб кетган жангчига ўхшарди.

Яна Қоражоннинг омади келмади. Етдим деганда ийқилгандек бўлди. Ҳамма ишлар ҳал бўлиб, тўй қила-миз деганда бу не гап? Тошкентдан чиққан одам ким экан? Қизнинг: «Ўқишига кириб олсан, эҳтимол, тўйни

ҳам қилиб олармиз... Мен ўқишига киришим керак, Қоражон ака», — деган сўзи йўл-йўлакай қулогида жарангларди. «Ҳа, у ўқиши керак. Нега мен бунга қарши бўламан! Ўзим ҳам барибир уни ўқитардим. У энди меники. Ўзи айтгандек, мен уни кўргани тез-тез Тошкентга тушиб тураман». Шундай хаёллар билан Қоражон тўғонга қайтиб келди. Лекин ҳар қалай унинг юрагида ҳам қувонч, ҳам дард бор эди.

XV боб

БИР БАЛОСИ ҶУЛМАСА, ШУДГОРДА...

Илгари Наманганда, Чортоқ қурилишида, Ўзбекэнергострой трестида, кейинчалик хўжалик ва маъмурӣ ташкилотларда ишлаб юрган инженер Қиёмхўжа Ҳазратов Чорвоқча ишга келди. У таъминот бўйича бош инженер муовини вазифасига белгиланди. Бу ерга у икки мақсад билан келган эди: биринчидан, пул яхши тўпланади, таъминот ҳам юқори, иккинчидан, қурилиш тугаллангач, қурувчилар, инженер-техник ходимларнинг катта группаси орден ва медаллар билан мукофотланади. Бу гапларни у эътиборли одамлардан эшитгани учун трестдаги вазифасини ҳам ташлаб, Чорвоқча югурди. Наманганда ҳам Чортоқ қурилишига мана шундай «лакаровка» қилингани сабабли орден рўйхатига илиниб қолган эди. Мазахўракка ўрганганд Ҳазратов яна «лакаровка» қилинди. Бу одамнинг темир-терсаклар, бетон-арматуралар ичида бекорга юрмагани маълум эди. Кейинчалик у ўзининг яқин бир ошнасини Тошкентдан олиб чиқиб таъминот ишлари бўйича бошлиқ қилиб қўйди. Бунинг учун у қурилиш бошлиғи Садовниковнинг розилигини олди, албатта.

Бу йигитнинг тўла номи Ишларбек Худойберганович Сапчабошевдир. Баъзи ошналари Ишларбек эмас, «Шиларбек», деб ҳам аташарди. Сапчабошевнинг Чорвоқча келиш тарихи дикъатга сазовор. Бу «старих» таҳминан мана шундоқ: кунлардан бир кун Хўжакентдаги минг йиллик баланд чинорлар тагида улфатлари билан ошхўрлик қилаётган Ишларбекнинг нигоҳи тинмай бетон ва арматура ташиётган йўлбарсга ўхшаш кучли юқ машиналари — «БелАЗ»лар орасида «Снаб» ва «Пишчеторг» сўзлари ёзилган, сал нозикроқ, елинлари осилган соғин сигирга ёки қимиз соғиладиган байталга

ўхшаш фургон машиналариға ҳам тушди. Улар ҳам пастдаги бетон йўлда физиллаб Чирчиқ кўпригидан ўтиб, юқорига чиқиб кетишарди.

— Узоқдан туриб шуни ҳам кўрдингизми-а? — деди улфатлардан бири Ишларбекка қойил қолиб, — биз «ёғлиқ жойларни» эшитиб билардик. Сиз кўрасиз. Кўриб бориш — афзал!

— Қиргий бўлиб кетинг-э! — деди яна бири.

— Қиргий нимаси! Бургут, сорбургут! Ишларбек соҳиб чангаль, у кўрсичон овламайди, у кам деганда қўю қўзини кўтаради.

Ишларбек мамнун илжайди.

— Қани, ошдан олинглар, ош бўлсин! Қолган ҳамма гаплар бўлаверади. Қаторимиздан кам бўлмайлик, ўрнимиз йўқолмасин! — Ишларбек пиёладаги арақни қултуллатиб ичиб, афтини бужмайтириди. У бундай ҳолатда бурнининг кичикилиги билан маймунга ўхшаб кетарди. Тузланган помидордан бирини тишлади, эҳтиётсизлик натижасида помидорнинг суви сачраб, бунда «камтарона» ўтирган Ҳазратов баҳарасига урилди. Ишларбекнинг юраги шифиллаб кетди; бу ярамас помидор келиб-келиб хўжайнинг баҳарасига сачрайдими! Оббо хумпар-е! Лекин Ҳазратов ўз «қўзичноқлари»нинг бундай қилиқларини «олижаноблиги» билан кечирарди. Хижолат бўлган Ишларбекка кулиб қараб қўйди. «Бордан юқади-да», — деб кулди. Ишларбекнинг «бургут нигоҳи» дам Ҳазратовга, дам посёлка томонга тушарди. Шундай қилиб, Ишларбек Сапчабошев Чорвоқ қурилиши бошқармасида ўралашиб қолди; Садовников, Шицкин ва бошқалар билан учрашиб турар, таъминот ишларида шоввозлик кўрсатарди. Унга Тошкентдаги баъзи казо-казолар яхши тавсиянома ҳам ёзиб берган. У қурилишдаги мансабдорлар билан алоқани мустаҳкамлади. Садовниковнинг икки жажжи ширин қизчаси кўп вақт Сапчабошев идораси атрофида оҳулардек чопқиллаб ўйнаб юришарди. Ишларбекнинг, Ҳазратовнинг қизлари билан қалин дугона бўлдилар. Шу атрофда бу қизларни «ўз папочкалари» машинаси ҳам кутиб турарди. Бу машинада баъзан қийим-кечак, баъзан қора икра, апельсинлар... олиб кетишарди.

Ишларбек Сапчабошев антиқа одам; баъзан ўзини ўта гўлликка солар, баъзан ўта айёр. Баъзан юзига тупурсангиз қўли билан артиб ташлаб, ҳингиллаб кулиб қўя қолади. Бу пайтда у бир нимани ўмарид, сизни шилаётган бўлиб чиқади. Баъзан ошналари: сен Худой-

берганович эмас «Худоурганович»сан, дейишарди. Аввал бу «ҳазил»га жириллаб кўрди, кейинчалик кўни-киб, кулиб қўядиган бўлди. «Мен атеистман, майли, худо урган десангиз ҳам хафа бўлмайман, чунки мен худони танимайман! Худони танимаганимдан кейин нима десангиз деяверасиз-да! Мени худо берган эмас, мен материядан пайдо бўлганман», — дерди. Бундан анча илгари маҳалла чойхоначиси унга тикилиб туриб, катта йигит бўлганини кўриб ҳайратланган эди. Доим кўзи бежо бу йигитни ўша шилдирлиги билан маҳалла-да яхши танишарди.

Ишларбек Сапчабошев қирқ саккиз, қирқ тўққиз ёшларга борган, новча кимса. Унинг барвақт сочи тў-килиб, тепакал бўлиб қолган. Икки қулоги усти, орқа бўйнида маккажўхори попугидек жонсиз, қўнғир сочи бор. Икки тола сочни яхмалак отса бўладиган бошида у ёқдан бу ёққа тортиб қўяди. Пучуқроқ бурни остида нос тупуриб қўйгандек кичик мўйловчаси ҳам бор. Лаб-лари қалин, кўзлари чақчайтан. Барвақт соchlари тў-килганига баъзи урувлари таажжубланарди. Ўзи бўлса, буни диққатбозлик, «илмий ишни кўп қилгани» оқибати дерди. Умуман, у ўзини кўп фикрлайдиган, кўп ўйлайдиган одам сифатида кўрсатарди. Бир ҳисобда бу тўғри. Щу сабабли, ҳаммага равшанки, бошдан тезда соч тушиб кетади. У ўз уйида, рамка ичида ёш-лигидаги, боши тўла жингалак сочлигида тушган суратини сақларди. Бу сурат ўн тўққиз, йигирма ёшларда-ги вақти бўлса керак.

Ҳазил ҳазил билану лекин мана шу Ишларбек Сапчабошевнинг ҳам ўз фожиаси бор эди. У ўз избораси билан айтганда, «бизнесмен» бўлиб, ариллаб-дариллаб юргани билан бир муштипар она уни «паҳлавоним», «орқамда қоладиган бўстоним», деб, унинг қингир-қийшиқ ишларини билмас, ҳукуматга садоқат билан ишлаб юрибди, деб ўйларди. Савдо, хўжалик ходимларига «бўрининг оғзи еса ҳам, емаса ҳам қон...» қабилида қараш баъзи жойда одат тусига кирган эди-ю, аммо Чорвоқда ҳеч ким Ишларбекка шубҳа кўзи билан қарамасди. Бу одам ниҳоятда меҳмондўст, чопонини сотиб бўлса ҳам ошна-օғайнилари кўнглини оладиган, бир аломат улфати кимса эди.

Иттифоқо бир куни Ишларбек уйга аҳдлашиб қў-йишган беш-ён ошинаси келиб, атаб қўйгани қора қўйнинг «масаласини ҳал қилмоқчи» бўлишди. Якшанба куни кечга яқин Ишларбек ижарага турган ҳовлига

ошналари бирин-кетин кириб келишди. Эшикда туриб, ошналарини кутиб олаётган Ишларбек таклифга кўра бу ерга келган Қоражон назарида сал бошқачароқ кўринди. Ҳамма вақт чақнаб юрадиган бу йигит ҳаммага илтифот қилас, овқатга ва ичкилик ичишга таклиф этарди-ю, ўзи бир ерда ўтиrolмай, у уйдан бу уйга хомуш кириб чиқарди. Унинг икки боласи ҳам кулишмас, меҳмонлар ёнига кириб, одамларга тикилишиб, яна чиқиб кетишарди. Меҳмонлар тоза ёб-ичиб, тунда тарқалишди.

Эрта билан маълум бўлишича, худди шу пайт Ишларбекнинг касал ётган онаси қазо қилган экан. Меҳмон чақириб қўйган Ишларбек ошналарнинг кайфу шодлигини бузмаслик учун қазо қилган она энгагини боғлаб, юзига дока ёпибди-ю, буни билдирмай, меҳмандўстликни давом эттираверибди... Бу воқеадан хабар топган Қоражон Мингбоев эрта билан ошинасиникига югуриб келди. Дўст-ёларга хабар қилишди. Кампир жасадини Тошкентга олиб бориб жаноза билан тупроқ-қа топширишди. Қоражон Мингбоев Тошкентда то қабристонгача дамо-дам она тобутини елкасидан қўймай кўтариб борди. Аввал куни зиёфатда ўтирган йигигларнинг кўпчилиги келиб хизмат қилишди.

Маросимлар ўтди. Бир ойдан сўнг Ишларбек билан учрашиб қолган Қоражон, тортиниб, унинг юзига меҳмондўстлик бундақа бўлмаслигини шартта айтмоқчи бўлиб турган эди, Ишларбек гап бошлади:

— Биз дунёга мол-дунё орттириш учун эмас, дўст орттириш учун келганимиз, қандоқ қилай, қисмат шундоқ экан, онамларнинг қазолари худди шу кунга тўғри келиб қолди...

— Қазони бекитмаслик керак эди! — деди кўзини ола-кула қилиб Қоражон, — она қазо қилармишу, биз ичиб, кайф қилиб ўтирамизми?! Хўш, шундоқ мусибат бошга тушган экан, зиёфатни тўхтатиб, барчамиз сизнинг ёнингизда туришимиз керак эди. Бундай сохта меҳмондўстликни сизга ким ўргатган?! Ичингдан қиринди ўтиб турганда ҳам меҳмоннавоз бўлгин, деб ким ўргатди сизга?!

— Биз тошкентликлар шунақамиз...
— Сизлар-а?!
— Ҳа!

— Ҳамма тошкентликлар сизга ўхшаган эмас! Бундақа меҳмондўстликнинг падарига минг лаънат! Бу меҳмондўстлик эмас, пасткашлиқ! Ҳа, очиқдан-очиқ пасткашлиқ! Аввал ўзингга қара, меҳмон чақиришинг

көракми — шароитинг қалай, нарсаларинг етарлими, имкониятинг борми, агар имконияти бўлса, унда мәҳмон чақир ёки меҳмонман, деб келганларни қабул қил. Агар имкониятинг йўқ экан, меҳмон чақириш шарт эмас. Бу гапни мен фақат сизга айтаётганим йўқ, ошия, бу гапни ҳамма «меҳмондўстлар»га айтияпман. Қачон бизлар одам бўламиз?!

Ишларбек миқ этолмади.

— Онаси ўлса ҳам юзига парда ёпиб, меҳмондўстлик қиласверармиш! Суф, сиздака «меҳмондўст»га!

Улар ўртасида бўлаётган гуфтигўдан инженер Ҳазратов ҳам хабар топди.

Эртасига ишдан кейин Қоражоннинг яна Қўнғирбуқа тогига ўрмалаб чиқиб кетаётганини кўришган кишилар фронтчи йигитнинг бир нимадан хафа бўлганини пайқашди. Участка бошлиги инженер Мингбоев тоққа чиқдими, демак, бир гап бор... Қоражон Қўнғирбуқанинг қоқ белидаги япасқи тошга ўтириди. Бу тошни «эгар» деса ҳам бўларди. Онаси ўлимини яшириб, меҳмондўстлик кўрсатмоқчи бўлган нодон Ишларбек унинг асабларини дабдала қилган эди. Бурунги узун чопон «ўзвалар» ҳам бу «меҳмондўст»дан минг чандон ақлли. Ярамас! Қоражон Мингбоевнинг ўша уйда еган-ичгани ичига заҳар бўлиб кирди. Фронтдаёқ асаблари қақшаган чандиқ йигит Қўнғирбуқа устидан Сижжак томонга тикилди. Ҳув, олисда кун сайин кўпаяётган Чорвоқ денгизининг бир четида ажойиб қишлоқ бор. Бу қишлоқда дунёда ҳеч тенги йўқ гўзал қиз туради. У ҳозир Тошкентга кетган. Тошкентдаги Гулгун ўрнидан туриб, Қоражонга кулиб боққандай бўлди. «Хўш, йигит, жим бўлиб кетдингиз, қаёқдасиз?» — дегандай бир товуш қулоғига эшитилди. «Бирдан қаттиқ киришганлар бот айниб кетадилар, деб эшигтан эдим. Шундоқ бўлмаётганмиқан? Мана, қанча кунлар ўтиб кетди, лекин сиз келиб ҳолимдан хабар олмадингиз... Мендан айниб қолдингизми? Сабаб нима?» — дегандай бўларди. «Йўқ, бундоқ эмас, жоним, мен сени жонимдан ҳам яхши кўраман! Сен бебаҳо қизсан!..» — дерди Қоражон тог устидан ўша гўзал қишлоқ томон тикилиб.

Ўшанда грипп тарқалган январь ойида ўн кунча ётиб чиқкан Ҳазратов, «бу грипига дори йўқ, суюқ овқат, чой ичинглар», деган гап беҳуда эканини маълум қилди. Бу грипига қарши дори борлиги, у жуда қиммаг, фақат баъзи катталар учтадан укол олаётганини» айтиб, ўзи ҳам Тошкентда ким биландир гаплашиб, ким-

нингдир рухсати билан бу уколдан олганини мақтаниб гапирди. Ҳазратовнинг гапига қараганда, бу уч укол янги гриппни йўлатмайди ёки енгил ўтади... Э, тавба! Бу гапни эшитган Шишкин билан Мингбоевнинг боши ҳотиб қолди. Агар бу дори кам бўлиб, барчага етмаса, унда нега «бу янги грипп учун вакцин йўқ, фақат сувни кўпроқ ичиш керак...» деган гап телевидениелардан тарқатилди экан? Ҳазратовнинг бу гапни очицдан мақсади нима? Мингларча оддий кишилар ўз иситмасида ўзи қовурилиб ётаверади, демоқчими? Бу гапни тарқатмаганда яхши бўларди, деди Қоражон. Ошнасм Ҳазратовда кўпроқ ўзини ўйлаш, бошқани менсимай, казо-казолар сафига кириш каби одатлар эскидан бор әди. Намангандা, Чортой қурилишида орден олиши ҳам шундай суйкалиш натижаси бўлди. Агар Ҳазратов раъйига қарабалса, одамлар табақа-табақага бўлинниб кетади. Ошнасининг шу томонини Қоражон мутлақо ёқтирумасди. Курсдош ўртоғини ҳурмат қиласди-ю, димоғдорлигини хуш кўрмасди.

Кўп ўтмай Ҳазратов Чорвоқни ҳам ўзиники қилиб олди. Келишган қадди-қомати, сўзамоллиги билан атрофига одам тўплар, баъзан Садовниковни лол қилиб қўярди, Қоражон унча-мунча майда гапларни тилига чиқармас, иш бор жойда камчилик бор, турли феълу атвордаги одамлар бўлади. Шу сабабли юракни кенг қилиш керак, дерди у ўзига-ўзи.

Ўзи Ҳазратовнинг сиполиги, инженер деган номи, бир қанча қурилишларда қатнашгани кишиларни унга ҳурмат билан қарашга мажбур этарди. Мингбоев билан Шишкин ҳам ўз курсдошларига қаттиқ ишонарди. Шўҳроқ, чиройли хотинларга суяги йўқлигини кечиришарди. Чунки шу қирчиллама ёшда ким сўфи бўлибди! Ҳар қандай йигит ҳам бир гап-сўз бўлмай иложи йўқ...

Ишларбек эса сал барвақтроқ ўзининг кимлигини кўрсатиб қўя бошлади. Ўзи ишга олиб келгани сабабли Ҳазратов баъзан Ишларбекдан хафа бўлиб, бўғилиб қўярди.

Обакихон Намангандан Ҳазратов билан бирга келиб, кейинчалик Ишларбек билан ҳам қадрдонлашиб кетди. Қунлардан бир кун Ишларбек Тошкентдаги ўзининг икки хонадан иборат подвалига уни олиб тушиб, осиб қўйилган узумлардан бир бошини тутқазди. Шу ердаги устига гилам ташлаб қўйилган диванга ўтириб, Обакихон узумдан чўқилаб еди... Ҳазратовнинг хотини Гулбаданнинг «уришқоқ, ёмон хотинлиги»дан арз

қилди. Подвалнинг ичи озиқ-овқатга тўлиб кетган: шифтга қатор қазилар, иккинчи хона шифтига қирқма қовунлар илинганди. Пастда яшиклардаги семиринка, тухум олмаларнинг ҳиди димоққа уриларди. Катта бидонда қўй ёги, бир неча яшикда қонъяқ, арақ ва бошқа турли ичимликлар... бор эди. Ишларбекнинг Тошкентдаги бу подвали Ҳазратовга ҳам маълум. Бунда у кўп бўлган. Обакихон подвалга озиқ-овқатларнинг сархили ғамланганини, уч литрлик шиша банкаларда асаллар ҳам борлигини кўрди. Унинг рўпарасида қўл қовуштириб турган Ишларбекка тикилиб, жилмайиб гап қотди:

— Ишларбек ака, нега сизнинг отингизни «Шилларбек» дейишади?

Нозу неъматларнинг сархилини тўплагани, подвалнинг яхшилиги, қазилар осиб ташлангани фақат диваннинг яғир бўлиб кетганини ҳисобга олмаганди, ишлар жойида экани ва умуман, шулар ҳақида бир ниша сўраса керак, деб Обакихоннинг лабларига тикилиб турган Ишларбекка тўсатдан исми ҳақида савол тушгани уни шошириб қўймади. Бу савол унга тез-тез берилар эди. У яхши жавоб тайёрлаб қўйган эди ҳам:

— Аслида отим Ишларбек. Шаспортиимда ҳам шундоқ. Бу яхши ишловчи, забардаст деган маънони беради. Лекин ошна-оғайнилар эркалаб «Шилларбек» қилиб юборишган. Ха-ха-ха-ха!.. Хафа бўлмайман. Ёшлигимизда текисгина йигитча бўлганмиз-да. Оз-моз шўх бўлганмиз... Бўлар экан-да!

— Тавба! Шунаقا ҳам исм бўладими?!— Обакихон рўпарасида ғўдайиб турган Ишларбекка қараб кулди. Бу кулиши билан менга нима, менга деса оти бунданам баттар бўлмайдими? Менга унинг червонлари кепрак, дерди ичида. Шу лаҳза яна савол берди:—Ўзгартириб олишнинг иложи бўлмайдими? Жуда бўлмаганди «Чаққонбек», «Илгорбек», «Илдамбек»... деган сўзлар ҳам бор-ку?

— «Наматбой», «Тезакбой» деган исмлар ҳам бор. Нима, меники ўшалардан ҳам ёмонми? Бу ничево! Худойбергановични баъзилар «Худойурганович» дейди. Нима, шунга ҳам хафа бўлайми? Мен жиртаки эмасман, оғир одамман. Ҳамма гапга чидашга одатланганман. Бетимнинг қалини — жонимнинг ҳузури, деган алломалар! Ҳар нарсага жаҳлингиз чиқаверса яшаб бўладими! Ҳозир ўртacha ёш етмиш эмиш. Ҳамма ёқда дори, газ, селитра... Мен танқиднинг ҳам оғир

варбаларига чидашга одатланиб қолганман. Бир ярамас мени катта калибрдаги фирибгар дебди. Чидаганман. Чидаш керак! Ҳамма нарсага асабни бузаверсак, гезда рак бўлиб, ўлиб кетишимиш мумкин. Ўлмаслик керак? Шунинг учун индамай ишимни боллаб қиласвераман. Врачга кўриниб тураман. Мен яхши яшайман. Нариги кўчадаги бир қўшним чесний бўламан деб, бечоралар қарам шўрвадан нарига ўтишолмайди. Кийимлари ҳам инчунун... Биз яшаймиз, яшашни биламиз. Ҳукуматнинг олди тор, орқаси кенг, ўмарган ўмаради, ўмаринши билмаганлар тишининг кирини сўриб ўтираверади.

— Ўмарганлар қўлга тушиб, уч йил ўтириб ҳам чиқади...

— Қаёқдан эшитгансиз? — кулди Ишларбек, — начора, баъзан шунақаси ҳам бўлади.

Обакихон унга маҳлиё бўлиб, тикилиб қолди.

Ишларбек Обакихон ёнига ўтириб уни бағрига босди.

— Қўйинг, қўйиб юборинг, кеннайим кўриб қоладилар.

— Кеннайингиз чарларга кетгандар, қўрқманг!

— Йўқ, бўлмайди! — Обакихоннинг қўлидаги узуми ерга тушиб, сочилиб кетди.

— Бўлади! — Ишларбек ҳаллослай бошлади, — бўлади, жонидан, ахир мен... шу умид билан...

Аввал шунчаки қаршилик кўрсатмоқчи бўлган Обакихон, кейин индамай қолди...

Унга ёқиши учун бир муддатдан кейин сохта ғингшиди...

Бирон соатлар ўтгач, Ишларбекнинг тинкаси қуриб, подвал зиналаридан юқорига кўтарилиди. Кечга яқли Обакихон уйига кетди. Ётиб ухлади. Кечаси келган эрини ҳам сезмади. Эрталаб таъби хира, эри билан айтишиб олди:

— Сиз ҳам эрми? Сўфиларга ўхшайсиз. Ўйнатмайсиз, ҳеч ёққа олиб бормайсиз! Ўзингиз ҳам... Умрингизда бирон хотинга гап ташламагансиз...

— Ҳой, Кимсанхон, ундоқ деманг. Мен ҳеч қачон ўз биографиямни бузган эмасман... Мени гап бўлишим мумкин эмас!

— Биографиянгизга тупураман!

— Ия, ия!

— Биронта хотинга ёқмаган совуқ кесак кимга керак! Мени гап қилишибди...

— Нотўғри! Мен сизни ҳеч қачон одобсиз деган әмасман!

— Денг! Деганингиз яхши эди! Ундан ҳам қаттиқ-роқ гапга лойиқман. Бирон марта тарсаки тортиб юбон ришингизни кутдим. Бирон марта сўкмадингиз!

Шу лаҳза Обакихон кўз олдида Ишларбек пайдо бўлди. Унинг икки қўли галифе шими чўнтагида, кулиб, гўдайиб турарди. Обакихон бир оз бўшаши. Эрини жеркишни тўхтатди:

— Бўпти. Баттар бўлинг!

* * *

Обакихоннинг яқинда тегиб, номига эр қилиб юргани Қоризода олтмиш ёшларда. Бултур идораси қовун пишигини мўлжаллаб, пенсияга чиқиши — «юбилей» маросими ўтказди. Уни жуда ҳам жўн, лақма одамлигидан фойдаланиб, мазах қилиши мақсадида атрофдаги баъзи одамлар атайин кўкларга кўтара бошлишди. Умрида бирон тузук иш қилолмаган Қоризода аввал бу мақтовларга ҳайрон бўлиб қаради; ҳали мен шунаقا одаммани, деди ўзига-ўзи. Кейинчалик хом сут эмган инсон, мен шунақаман, деб барча мақтовору пўрсиљдоқ гапларни ўзига олди. Қоризодани атай пуфлаша бошлишди. Йнститут бухгалтери деган мана бунақа бўлади, деб ҳаммага кўз-кўз қилишмоқчи бўлишди. Қоризода босар-тусарини билмай, мақтовлардан маст бўлиб, пуфлаб турғазилган болаларнинг резинка ўйинчоғига ўхшаб гўдайиб юрди. У наздида яккаю ягона, ошналари ичиди баъзан бирон журналда ўқигани — икки бошли туғилган бузоқ каби хабарларни илмийроқ қилиб гапиради. «Арман радиоси», Афанди латифаларини ҳам дона-дона қилиб, «илмий» қилиб айтарди. Гаплари орасига мақоллар қўшар, агар шундек қилинса гаплари илмий жиҳатдан тўла бўлиб чиқаётгандай... Маҳалладаги райпишчеторг ошхонасида унинг «убилей» кечаси «тантанавор» ўтди. Энг қизиги шу бўлдики, зерикиб юрган Обакихон Ҳазратовнинг топшириги билан Қоризодага тегди. Улар иккови ҳам зиёфатда ўтиришган эди. Хотини ўлган, сўққабош Қоризода: «Худо гўзалликни кўрмоқча, ноzu неъматларни емоқча яратган», — деб «чуқур фалсафий гаплар»ни ҳам чулдираб гапирадиган бўлди. Шундай «фалсафий» гаплар Обакихонга керак эди; у домлага «кўнгли борлиги»ни изҳор қилди. Эрли хотинлар ўйнаш тутса иш бегидир бўлишини ўйлади. «Сўфи

бўлиб ўтиб кетишини ният қилганмисиз?» деб сўраган эди бир куни Обакихон. Қоризода ҳаяжонланиб гапирган эди: «Ие, дунёдан умидимиз кўп, сўфи-тақводорликни бурунги замоннинг одамлари қиласверсин! Биз янгича одаммиз. Шунча ўқиб, ўтиб кетаверамизми? Йўқ, йўқ, биз сўфи эмасмиз! Биз янгича! Колбаса кам еймиз, консерва ҳам еймиз. Кўнгил тортган ҳамма нарсани ейиш мумкин».

Қоризоданинг юзлари япалоқ, ёшлигига лақаби «чириган» бўлган. У ичини қурт еб, пўкак бўлиб қолган толга ўхшарди. Обакихоннинг унга кўз қисиб, муқом қилгани бирданига ҳаловатини бузди. Ўладиган дунёда мен ўзимни ўзим тангри нозу неъматидан маҳрум этиб юраманми, деди. Жаннатдан чиққан ҳурилиқ ўз оёғи билан келиб, кўз қисиб, қош учирив турса-ю, мен ўзимни четга тортсам! Мен ҳам сочилган насибамни терив еб, шукур қилиб юрсам, бирор нима дейдими?! Қоризода ўшанда Обакихонга муқом қила бошлаган эди. Унинг қўл-оёқлари қовушмай, лаблари гапга келмай, ғўлдирав, яхши кўриниш учун ҳар хил қилиқлар қиласерди. Шундай қилиб, улар Ҳазратов сабаб бўлиб эру хотин бўлиб олишди.

Кунлардан бир куни Ҳазратов яна Обакихон билан учрашди. Ҳазратов унга тикилиб турарди.

- Мунча тикиласиз, юзим текис, юзимда хато йўқ!
- Қаерингда хато бор?
- Буни сиз биласиз.

— Ҳа, сен,— деди Ҳазратов ҳозиргина Обакихоннинг оппоқ билагига кўкарган ерини кўриб. У бекитишга ҳаракат қилган бўлса ҳам сезиб қолди. Ҳазратов калласидаги хаёлни Обакихон пайқади.

— Домла билан диванни сураётган эдик, қирраси тегиб кетди. Қўカリб қолди. Оз-моз огрияпти ҳам...

— Ҳа, сен,— деди яна ичиди Ҳазратов,— Ишларбек билан учрашаётганга ўхшайсан!— У чарчоқ ва хомуш ўтирди. Унинг жуда таъби тирриқ эди; баъзи сирлари Ишларбекка маълум бўлаётганини кўнглидан ўтказди. Кейинги пайтларда унга хўмрайиб юарди. Назарида, ўғрини қароқчи ураётганга ўхшади. Кейинчалик Обакихон Ҳазратовдан кам илтифот кўраётгани, тақинчоқлар олиб келмаётгани сабабли Ишларбек билан яна дон олиша бошлаган. Бу билан у Ҳазратовдан ўч оларди. Бу «интиқом»ни сезган Ҳазратов Обакихондан кечиб кетмоқчи бўлди. Бунинг иложини қилолмади. У ўзини касалликка солиб юрагини чангллади,

— Бўлмаса, нега бундақа қиласан?!

— Мен ҳеч нима қилаётганим йўқ. Шубҳаларни йиғиширинг. Мен сизни яхши кўраман. Яна сизга нима керак? Мен эримга хиёнат қиляпман, сизга эмас. Сиз буни тушунишингиз керак. Виждоним олдида мепга жуда қийин. Мен нима азобларда юрибману яна сизнинг мана бу совуқ муомалангизни ҳам кўтарайми?

Обакихон бармоқлари билан оғзини бекитиб, пиқиллаб йиглади. Унинг кўз ёшлари чиройли юзларини нам қилди. Бир лаҳзадан сўнг Қиёмхўжа Ҳазратов қаҳрғазабдан тушиб, Обакихоннинг елкаларига қўл узатиб, қучмоқчи бўлди. Лекин Обакихон унинг қўлларини итариб, ўрнидан дик турди-да, нариги хонага чиқиб кетди.

XVI боб

МУЗАФФАРОВЛАР ХОНАДОНИ

Шундай қилиб, Гулгун Музффаровлар билан бирга Тошкентга келди. Олдинги тутун ранг «Волга»да Амир Равнақ билан Файзулла Аҳмедович, кейинги оч ҳаво ранг машинада эса Марҳаматхон билан икки қиз — Таманно, Гулгун ўтиришарди. Меҳмонлар тоза ўйнашиб-кулишиб, кайфлари чоғ, тоғ йўлларида тараллабедод қилиб келишарди. Хўжакентдаги минг йиллик чинорлар ёнига етишгач, машиналардан чиқиб, авлиёлар яшаган форларни, тошга ўйилган қадимий ёзувларни ва кийик шаклларини томоша қилишди. Булоқдан сув ичишди. Кун чиқиш томонда икки тоғ оралиғида ердан қад кўтараётган тўғонга ҳам узоқдан тикилишиди. Улар чинорлар остидаги қоятошларга чиқишар экан, Файзулла Аҳмедовичнинг новчалиги, Амир Равнақнинг (асли исми Мир Муслим Миршарипов) жуссаси ихчамлиги ҳаммага сезилиб турарди. Марҳаматхон бир куни ҳазиллашиб, уларни «Пат ва Паташон» деб атаган эди. Амир Равнақ дўстини «Божа», у эса шоирни «Почча» деб атарди.

Амир Равнақ билан Музффаров нималарнидир гаплашарди. Гулгун ҳам бу тўғонга тикилди; у қўлларини қошига соябон қилиб қарап экан, шу тўғон устида хомуш, унинг ќетишидан норизо бўлиб ўтирган Қоражон кўзига кўриниб кетди. Шу ой ичи тўй қиламиз, деганда ўжарлик қилиб: «Мен ўқишим керак!» — деди у. Онасига тутақиб: «Мени бир марта эрга бер-

динглар, севмаган кишига эрга тегиб хато қилдим... Энди нега шошиб керак! Мен ҳам ўқийман!» — дегани хаёлидан ўтди. Қоражоннинг ҳақиқатан яхши кўришини, бу йигит кўнглига ёққанини ҳам билади. Лекин начора! У ўқиши керак! Институтга кириб олса, эҳтимол, бир-икки йилдан кейин унга тегавериши мумкин-дир... Тошкент узоқ эмас-ку!

Машиналар Дўрмондан ўтиши биланоқ иссиқ ва оғир ҳаво сезила бошлади. Буни ёшлардан кўра ҳам кексалар тез пайқашди. Бўstonлиқ районининг ҳар қанча чиройли, табият қучогининг бениҳоя дилбарлигига қарамай, Марҳаматхон учун иссиқ ва ҳавоси оғир бўлса ҳам Тошкент яхши эди. Ўз уйим — ўлан тўшагим... Тошкентда туғилиб-ўсганлар бу улуғ шаҳарнинг на иссигию на совуғини ва на чангу рутубатини сезадилар. Тошкентликлар учун дунёда ундан кўра муаззам шаҳар йўқ. Бир йили аранг асъасаю дабдаба билан Ялтага борган Марҳаматхон уч кундан сўнг кетаманга тушиб қолиб, айни ёз чилласида яна Тошкентга қайтиб келган эди. Баъзилар, тошкентликлар ўз шаҳарларини ташлаб бошқа ерларда туролмайдилар, дуо кетган... дейдилар. «Биринчидан: Тошкент дунёда энг ширин сув бўлмиш Чирчиқ сувини ичади. Чирчиққа Наволисой билан бирга мингларча булоқлар қўшилиши ўз-ўзидан маълум. Иккинчидан: Тошкентда континентал иқлим бўлиб, минтақанинг ўрта қисмига жойлашган. Учинчидан: Тошкент билан Самарқанднинг табиий қулай минтақаларда туришини мозийдаги аждодларимиз — сугдиёнлар билан саклар ҳам қайд этган, балки уларнинг ўзи шу ерларни бунёд этгандир... Тошкент билан Самарқандга тил тегизиб бўлмайди. Тошлоқ дала ерлар қолиб, шаҳримиз атрофидаги чорбоғлар, мөвазорлар бузилиб, иморатлар қалаштириб ташланганини тарих ҳеч кечирмайди! Қанча чорбоғлар бузилиб кетди, юз йиллик ёнғогу туту ноклар... Шотут тамоман йўқолиб кетди!» — дерди ҳасратидан чаңг чиқиб Музаффаров. Бундоқ гап кетганда ўзини тутолмай қоладиган Амир Равнақ бошини сарак-сарак қилас: «Э, азизим, булар тушунишмай ётибди! Кимга айтасиз бу гапни! Қанча яхши ишлар бўляпти, тўғри, биз буни зътироф этамиз. Ҳукуматимиз зўр ишлар қиласпти. Лекин шаҳарда шилдираб оқиб турадиган ариқларнинг кўмилиб кетгани, қовун полизга дори солинаётгани бизнинг тилимизни қичитмай иложи йўқ. Биз, қалам аҳли индамай ўтолмаймиз, бу бизга теккан касал.

Шу тилимиз ўлгур қичиб, баъзан балога қоламиз. Исполкомдагилар кўпроқ мажлис қилишади: умрида битта ҳам дараҳт кўкартиргани думбул бир йигитчя шаҳримизда кўкаламзорлаштириш ва ободонлаштириш бўйича мудир. Ўзи будканинг орқасида туриб пиво ичгани ичган... Вазифа нуқтаи назаридан шу кимси яна бунинг устига районга депутат. Атрофига ўзига ўхшаганларни тўплаб, бизга ўхшаганларни бир пақирига олмайди! Э, азизим, юз йиллик ёнғоғу шотутни бул, дозер билан қўпориб ташлаш осон, аммо ҳалиги ўпкаси йўқни мудирлигидан олиб ташлаш қийин!»

Икки кекса кела-келгунча йўлда ҳасратлашиб келишди. Амир Равнақнинг машинасини ҳайдаб кетаётган шофер йигит бўлса, киши кексайган сарн инжикроқ бўлиб қолиб, атрофида бўлаётган деярли барча ишлардан норози бўлаверишини пайқаб, уларнинг ганига ортиқча аҳамият бермасди. Ҳа, дарҳақиқат, ўтиз-қирқ йил илгари шу икки одамнинг айрим ишларидан ўша вақтдаги кексалар ҳам бурнини жийириб, норози бўлган эди. Бу азалий одат, «шикоятлар»дан ёмон хулоса чиқариб, уларни қоралашнинг ҳожати йўқ. Ҳозирги навқирон киши ҳам бир куни кексайиб, ўзи қилган ишларни маъқул кўриб, янги авлод ишларини унча ёқтирумай, арз-дод қиласди. Бу аниқ! Шунинг учун ҳам ҳаёт Чирчиғу Чотқол сувларига ўхшаб тошдан тошга урилиб бўлса ҳам олдинга оқади. Оқсин! Кўлмак бўлиб қолиш ёмон.

Амир Равнақ ҳам, Музafferов ҳам гапириб-гапириб, кейин ўқинишга тушишарди. Бу инкору қисман иоризолик тагида ҳаётни севиш ва талабчанлик туйгулари ётарди.

— Шундай кишилар борки, улар онадан тўғридан-тўғри мансабдор бўлиб туғилган, яъни қўчқор туғилган... Улар одамлардан ажралиб юрадилар,— деди Амир Равнақ,— тобуткаш ҳам эмас, тўйда пешкаш ҳам эмас. У бир пиёла чойимизни ичмайди, бир пиёла чой ҳам қуийиб бермайди. Улар фақат мажлисларда ҳамма билан «ўртоқ», яъни расмий гаплашадилар.

— Анавини айтяпсиз-да,— деди Музafferов,— у кафтида кири йўқ одам, тушундим. Охири унинг кимлиги маълум бўлиб чиқди-ку!

Амир Равнақ жужунчаси чўнтағидан бир варақ қоғоз олиб, унга араб алифбосида қия қилиб ёзилган шеърини Файзулла Аҳмедовичга ўқиб берди. Шоир бу шеърида кимнидир ҳажв қиласди:

Ўн икки ой «отпуска»да,
Лекин маошлар қиссада.
Идорага ўт тушса-да,
Акамлар боғдадир, боғда.

Дўст юзига шарт тупуриб,
Минбарларда зап кўпириб,
Фитна шаробин шепириб,
Акамлар боғдадир, боғда...

— Жуда боплабсиз! — деди Файзулла Аҳмедович, — очиқроқ ёзиб юборибсиз, заарар қилмасмикан?

— «Муштум»га бераман, — деди Амир Равнақ кескин. Унинг жуда ғазаблангани сезилиб турарди. — Бу кимса ё янги йил киришида, ё бирон байрам арафасида ошналарига шум хабар етказиб, бундан завқланади. Кўринишда мусича, аммо зимдан иш тутадиган бехосият шахс. Шу кимса қилғиликни қилиб, кейин какликка ўхшаб, бошини қорга тиқиб ётаверади.

— Топибсиз.

— Яна эшитинг:

Умринг ўтажак, ғам тугамас, ёр кутарми..
Доно кишиким ғам ила ғамнок ўтарми!
Ҳар ишчи тушибди, нетасан, бор чегараси —
Ғамни унут, ақли расо дилда тутарми.

— Офарин!

— Шу рубоййни мен Нишон акага ёздим. Бошига ўлим тушиб, кўп ҳасрат чекди. У бебаҳо одам. Қирқ йилдан бери Ташсельмашда ишлайди.

— Яхши.

Бир лаҳзалик сукутдан кейин Амир Равнақ суҳбат доирасини кенгайтирди. У фақат маҳалласининг эмас, ҳалқнинг шоири эканини билдиromoқ ниятид ҳақоний масалаларга суҳбатни бурди:

— Шоир қалби дунёни тинглайди, биз фақат ўз уйимиз ҳақида қайғурадиган шоир бўлиб қолишдан қўрқамиз. Америка ҳарбийлари ваҳшийликни ҳаддан ошириб, Вьетнамдаги бутун бир Сонгми қишлоғи аҳолисини каттадан-кичигигача қириб ташлади. Болаларнинг нима гуноҳи бор эди?! Генерал Уэстморлендинг ҳам боласи, невараси бордир! Нега улар қирилмайди?! Жемс Даффи ва ёки бошқа бир лейтенантнинг буйруги билан болаларни отиб ташлашди. Бу кимсалар на ачи-

ниш ва на уволни билади. Улар Вьетнамда ўз қуролла-рини синааб, бу мамлакатни қўшинни чиниқтирадиган полигонга айлантириши. Халқлар буни асло унутмаслиги керак! Бундай қабиҳликлар қилаётгандарнинг на радиоси ва на газетаю нутқига ишониш бўлади! «Америка овози» ва Биби-силларга қулоқ соладиган нодон стиляга болаларимизнинг қулоги тагига бир-икки тарсаки қўйисак ҳеч зарар қилмайди. Баъзи болалар душманнинг катта пул сарф қилиб, ташвиқот қилаётганига тушунмай чалғишаётди!

— Баъзи болалар деганингизга бир нарса ёдимга тушди,— деди Музаффаров,— шовқин-сурон, тариллаш кишилар асабини бузниши, саломатликка зарари уч яшар болага ҳам маълум. Шаҳар шароитида тиним қунлари сирти силлиқ йигитчалар магнитофонларни тўй баҳона эрталабдан бошлаб бақиртириб қўйишлари жонга тегди! Бу безориларнинг қилиғини йўқотиша участка милиционерлари ҳам четда турмасликлари керак эди. Лекин минг афсус...

— Мотоциклни атай тариллатиб, одамларни безовта қиласидиган йигитчаларни одобли йигитлар деб бўладими!— деди Амир Равнақ.— Боз устига машҳур қўшиқларимизнинг сўзини олиб ташлаб, бошқа сўз тиқиб ижро этиш яхши эмас. Яна бунинг устига шевачиликни авж олдириб, узоқ йиллар мобайнида ишланиб, қонунлашган ўзбек адабий тилини, унинг фонетикасини ҳам бузяптилар. Бобирдек шоир ғазалини ҳам «анг», «ғанг» қўшиб айтишаётди. Умумадабий тилимиз бирлигига риоя қилмаганларнинг халқ ичида эътибори кетишига шубҳа қилмаймиз!

— Кишиларнинг савияси ниҳоятда ўсиб кетгани қувонарли ҳол,— деди Музаффаров,— аммо китоб ўқимайдиган, санъатга бефарқ, тарихимизни яхши билмайдиган баъзи ўртоқлар дўйқ, маҳмадоналиқ, киборлик билан идорани бошқараман, деб куччанаётгандарни партиямиз қоралади. Ҳозир баъзи шундайларнинг пайтавасига қурт тушиб қолди. Маърифатдан кўра кўпроқ ейиш-ичишни мақсад қилиб олган баъзи ошналаримиз эслари борида этакларини ёпиб олсалар яхши бўларди!

— Оҳ-оҳ, азизим, дилимдагини айтдингиз,— деди Амир Равнақ Музаффаров елкасига қўл ташлаб,— китоб ўқимайдиган, ичи бўш хумча, қачонлардир қилиб қўйиган хизмати билан кекириб юрадиган бундай одамларга, ҳой, озгина ўпкангни бос, дейдиган ҳам чиқиб

қолар! Азамат халқимиз, жонажон партиямиз бор, уларнинг танобини тортиб қўйишига ишонаман. Тариқдек иш қилиб, ҳукуматдан түядек ҳақ оладилар. Анойилар! Ўшалардан бири тушида ўлиб қолибди. Ўлиди-ю, ўлимими ўйлаб, гўё юраги шиг этиб кетибди. Наҳотки у ўлса? У ҳайрон бўлиб пешонаси тиришибди, ён-верига қарабди. Ҳеч ким йўқ. Чунки у тириклигида биронта жанозага бормаган экан, бировнинг тобутини кўтармаган экан... .

— Э-э, мансаб! — деди сўзни чўзиб Музаффаров, — биров — мансабга муносиб, ишчан, камтар, кўриб қуянайсан. Халқнинг баҳти! Биров — мана шунаقا миясл әлектр плитага ўхшаб секин қизариб қизийди. Бундай кимсалар юртнинг шўри! Гап ана шунда. Бизларнинг ҳўл ўтингдек тутаб, вижиллаб, тутун чиқариб гаплашибизнинг важи ана шу, азизим.

Музаффаровнинг оч ҳаво ранг машинаси ҳам гизиллаганча келарди. Хайрушка машина ойнаси орқали Гулгундан кўзини олмасди, унинг юраги шигиллаб, қўрқаётганини кўриб завқланар, олдинда кетаётган барча машиналардан ўзиб кетарди. Бир муддатдан сўнг орқада отаси қолиб кетганини пайқаб, Хайрушка машинани секинлатиб, орқада келаётган иккинчи машинага қараган бўлиб, Гулгуннинг нафис лабларига суқ билан тикилар, синглиснинг ғашига тегиб, унга тегажаклик қиласарди. «Ака, олдинга қаранг, тагин бир фалокат бўлмасин!» «Қўзимга қараб келяпман, руль менинг қўлимда бўлганида ҳеч ташвиш тортманглар». Хайрушканинг қулогига сижжаклик қизнинг ғўр нарса эмас, «эрга тегиб чиқсан» лиги чалинган эди. Қирғовулдан ҳид олган тулкидек Хайрушканинг юргургилаб, тинчи бузилди. Хотин-қизларга хушомад қилишига суюги йўқ акасининг ниятини Таманно яхши пайқаб ўтиради. Хайрушка Гулгунга суқланиб тикилавергач, Гулгун ўзини ноқулай сезиб, тез-тез дугонасига гап қотарди. Бошқа нима иложи ҳам бор?!

Икки машина юз километрча масофани босиб, куннинг иккинчи ярмида Тошкент кўчаларидан ўтиб, Музаффаровлар дарвозаси олдида тўхташди. Амир Равнақ қадрдан ошнаси билан хайрлашиб, ўз уйига кетди. Хайрушка машинадан чиқиб, каттакон ёғоч дарвозанинг темир илгакларини олиб, ланг очди. Файзула Аҳмедович. Марҳаматхондан кейин Таманнонинг таклиф-илтифоти билан Гулгун ҳовлига кирди. Гулгун машинага қараганида Таманно дарҳол пайқаб, чамадо-

нини акаси олиб киришини, безовта бўлмаслигини айтди.

Музаффаровлар ҳовлиси кенг ва чорси бўлиб, кунчиқар томонга қаратса олди пешайвонли қилиб солинганди. Катта ўғли билан ўз номига икки участка ер олиниб, ўртаси девор билан ўралмаган эди. Икки бинонинг қўшилиб қатор солингани, киравериш дарвоза тепасига чиройли зина билан чиқиладиган катта болохона қурилгани ҳовли кўркини очган. Ҳовлининг орқа томонида гараж, ошхона ва омборхоналар бўлиб, улар ҳам ганч билан сувалганидан яна бир турар жойга ўхшаб кўринарди. Катта ҳовли ўртасида ҳовуз, кираверишда қатор ток экилиб, сўри болохона ва турар уйлар устига чиқариб юборилган. Ҳовуз четига атиргул, намозшомгуллар экилган. Ҳовли четида бир-икки туп шафтоли ва олма ҳам бор. Узун пешайвонлар олдига райҳону жамбил, бир қатор гултоҷихўroz ҳам экилган. Невараларига қизамиқ чиққанда одамлардан излаб юрмаслиги, сўраганларга бериб, ҳожатини равол қилиш мақсадида Музаффаров гултоҷихўroz уруғини атай қидириб топиб келган эди. Амир Равнақ кулиб, доривор ўтларни ҳам унутмабсиз, деганида Музаффаров, ҳа, ҳовлимга сиққанида бир туп шотут ҳам экардим, деб кулган эди. Ҳовлининг кунгай томонидаги қатор хоналарга икки әшикдан кирилар, әшиклар тепаси соябон билан ёпилган, бино томи тунука, охуртарновлар тепаси кунгура қилиниб, тунукадан хўрэз тасвири қирқилган. Биридан бирига ўтадиган данғитлама хоналарга гиламлар ташланган, турли жиҳозлар, гарнитурлар билан тўла. Катта ўғил участкани битиргач, хотини қайнанаси ва айниқса, уйдаги «тишлик, тиллик...» қизлар билан чиқишолмагач, секция олиб, ҳовлидан чиқиб кетган эди. Қатор хоналардан бирида Таманно билан Тасанно турарди. Бу хона ота-она учун ўзбекча миллий жиҳозланган уй ва даҳлизнинг ўнг томонида бўлиб, хонанинг икки деразаси ўртасида бўйи шифтга етадиган катта тошойна турарди. Тошойна олдида атир-упа, турли шишалар, тароқлар, шампундан тортиб то Япониядан келтирилган ясама соchlаргача уйилиб кетган. Катта шифонъер ичи кийим-кечакка тўлиб, икки бўйга етган қиз дунёда нимаики янгі чиққан латта бўлса, ҳаммасини йигиб келишган эди. Бу икки қизини Музаффаров жуда яхши кўрар, айниқса кичиги — Таманно ўзининг пишиқ-зийраклиги, меҳрибонлиги билан ота қалбини забт этган. У сал

хунукроқ, отасига ўхшаш чўзиқ юз бўлса ҳам она кўзига ой эди. Дунёда Таманночалик қиз йўқ — бу Марҳаматхоннинг фикри. Ота-она турадиган хона тахмонлик бўлиб, қадимий катта сандиқ устига кўрпа-тўшак тахланиб, устидан қарға шойи дорпеч ёпилган. Хонанинг бир томонида қайин ёғочидан ясалган икки каравот ва пешайвонда хонтахта. Эрталабки нонушта мана шу хонтахта атрофида бўларди. Ота-она турган уйнинг чап томонида — акасининг участкасіда Хайрушка яшарди. У турган уч хона кейинги йиллар ичида икки бор ўғри тушгандай шипшийдам бўлди... Аввал эрининг юзига туфлаб, Лаълихон бор-йўғини машинага босиб олиб кетди, кейинги сафар Матлубаҳон... Кейингиси икки боласи учун нафақа ҳам олиб туради. Бу икки собиқ келин оиласа сир тутилади, ҳаммага ҳам айтилавермайди. Мабодо, тилга олинса, бутун айб Хайрушкада эмас, уларга ағдарилади. Файзулла Аҳмедович ҳовли ўртасидаги ҳовузга сув тўлдириб қўяди. У ҳамал ойлари икки томоғидан пуффак чиқариб вакиллаган бақа овозини яхши кўрарди. Кечқурун атроф-даладан қайтган сигирлар маърашини ҳам жуда ёқтиради. Оту эшак камайиб кетгач, шаҳарда сигир озайгач, бир куни катта ўғли билан айтишиб қолганида Марҳаматхонни олиб далага — Аччи томонларга кўчиб кетмоқчи бўлган эди. Асли далада катта бўлгани учунми, кексайганида шаҳар жонига тегиб, юраги дала сари интиларди...

Музаффаров икки ўғли, айниқса мана шу лаби тепасига чизиқ тортгандек ингичкагина қилиб мўйлов қўйган, гапининг учдан икки қисми кўп вақт ёлғон чиқадиган Хайрушкаси билан фахрланарди. Марҳаматхон бўлса Хайрушка деганда тилидан бол томар, уни одамларга «фан кандидати» дерди. Ваҳолонки, бундай эмас, институтни аранг битиргандан кейин илмий иш қиласман деб стандарт қоғозларни машинкада кўчиририб юрди, кимнингдир уйига қатнади... Орадан уч тўрт йил ўтгач, бу иш ҳам қолиб кетди. Бир вақт фотога қизиқиб, уч тўрт йил фотомухбир бўлди. Кейин шахматга қизиқиб, истироҳат боғига қатнаб, шахматчилар ўйинини томоша қилиб юрди... Кап-ката йигит бўлиб, уйида капитар боқди, бу ҳам ўтди... Марҳаматхоннинг ёдida ўша «кандидат» бўламан дегани маҳкам ўрнашиб қолган эди. Бу хонадонда Ўзбекистон Фанлар академиясининг мухбир аъзоси, гилростройтель Музаффаров эмас, «Филология фанлари

кандинати» бўламан деган Хайрушка олим эди. Марҳаматхон билан Файзулла ака ўғли ҳақида гаплашишганда, албатта, унинг «беш минути кам фан кандинати» эканлигини алоҳида қайд этишар ва мақтанишарди. Файзулла Аҳмадовичнинг «мухбир аъзо»лиги фақат Ирригация ва мелиорация институтига борганидагина эсга тушарди.

Хайрушка ҳамма вақт қовоқ солиб турарди. У Музаффаровнинг фарзандлари ичида энг келишган, эркаси, Марҳаматхоннинг иуридийдаси, Файзулла Аҳмадович: «Тобутим олдида йиглаб борадиганим...» — дерди уни. Катта ўғли Фатҳулла анча тўнг, чакказарб чиқкан. Хайрушкани ҳисобга олмаганда, уйда яна икки қиз — Таманно билан Тасанно ўтирибди. Хайрушка шу даражада кўп майдагуноҳлар қилганки, у ҳамма ишдан сувдан қуруқ чиқиш учун юристлар, адвокатлар билан кўп учрашавериб, жиноят қонунлари кодексларини ёд билиб олган эди. Кейинги пайтларда ҳужжатга кўп ружу қиласиди. Қонун тақиқладиган иш қилиб, уни яна қонунлаштириб қўярди. Ҳар бир қора ишни ҳужжат билан «тўғрилаб» ёпарди. Шунаقا ишларни қилавериб, қашқатаёқ бўлиб кетган Хайрушка нотаниш одамлар олдида қовоқ солиб сипо турарди. Гапларни чертиб-чertiб гапиради. Аслида Хайрушканинг фирибгар эканини баъзилар яхши билса ҳам бу хонадонда асло бундай гап бўлишига йўл қўйилмайди деб ўйлашарди. У Матлуба билан яшаганда арзимаган нарсадан уришиб, тез-тез хит қилиб турарди. Шу арзимаган нарса туфайли улар ёмон гапларни тилларига олиб, бирдан ажралишиб кетишиди. Орадан бир йил ўтгач, у иттифоқо кўчада Матлубани кўриб қолди. Хайрушка уйига қайтиб келиб, ярашиш ниятида унинг уйига онасини юборди. Лекин у бошқа одамга турмушга чиқиб, баҳтли яшаётган экан...

Шу куни Гулгунни икки қиз ўртага олиб, ўзларининг дабдабали, чиройли хоналарига бошладилар. Чамадонини Хайрушка кўтариб олиб кириб берди. Икки каравот ўртасига учинчи каравот қўйилди. Уч қиз ўзида йўқ шод, бири хонадаги юмшоқ кресло, бири тошойна олдидаги духоба тумбага, шўх Таманно эса ўзики каравотга отди. Кейин Таманно билан Тасанно гардеробни очиб беҳисоб кийимларини Гулгунга бир-бир на мойиш этиб, уларнинг тарихини гапириб бера бошладилар. Таманно кибор ва димоғдор қиз бўлиб, ўзи унча чиройли бўлмаса ҳам бошқалар уни «келишган», «чи-

ройли» дейишини жуда ёқтиради. Тасанно бўлса шалдир-шулдир, ичидагап ётмас, тухум юз қиз. Файзулла Аҳмедович баъсан қизининг думбул ишларига қараб, сенинг ақлинг ҳам тухумдек теп-текис, деб куларди. «Адажон, ундан кўра сенинг миянг билъярд соққасидек силлиқ, деб қўя қолинг. Анатомияда миянинг бурмаси қанча кўп бўлса, ақли ҳам шунча кўп бўлади, дейилади. Сиз мени ҳеч ақли йўқ демоқчимисиз?» — «Шунга ақлинг етдими, офарин, демак, сени ақли кам, деб айтиб бўлмайди, қизим», деган эди кулиб, эркалаб Файзулла Аҳмедович. Тасанно мамнун, бош мияси тухумчалик текис эмаслигини, ҳар қалай, қаердадир бурмаси борлигини билиб, ўзига тасалли берарди. Тасанно кўчага чиқса «ҳамма унга маҳлиё бўлиб қарашини, орқасидан юрадиган йигитларни ҳайдаб юборишини...» айтарди. Аслида бу гапларнинг деярли тўқсон тўққиз фоизи ёлғон бўларди. Баъзида ўзи ёлғон гапиради-ю, ўзи ҳам ишониб кетарди.

Бу хушиуд кунларнинг бирида уч қиз ясаниб уйдан чиқиши; Таманно билан Тасанно ҳамроҳлигига Гулгун ўз ҳужжатларини Тошкент медицина институти қабул комиссиясига топшириб келди. Шундан кейин Гулгун хонага қамалиб имтиҳонга тайёргарлик кўра бошлади. Бу йил биринчи курсни тамомлаб, иккинчига ўтган Таманно имтиҳон бўладиган асосий фанлар бўйича китобу конспектларни қалаштириб ташлади. Гулгун бошини танғиб китоб ўқишга тушиб кетди. Машҳур гидростроителлар — Синявский, Аскоченский, Раҳматулла Алимовларнинг сафдоши Файзулла Музafferов ҳам жим ётмади. Фронтчи дўсти, Улуғ Ватан уруши инвалиди Милтиқбай Қўйбоқаровнинг ёлғиз қизини ўқишга жойлаб қўйиш учун у ҳам бел боғлаб, ишга кириши; Бир ўринга олти-етти киши ҳужжат топшириб, даъвогар бўлиб турганини эшитган Музafferов, илгари бир унналиб киролмаган, кейин турмушга чиқиб, бахтсизликка учраган, ёши ҳам катта бўлиб қолган Гулгунни йўлга солиб юбориш учун ота ўрнила ота бўлди. Ўз қадрдонлари — баъзи профессорлар билан учрашиб, маслаҳатлашди, йўл-йўриқлар сўради. Биринчи август куни Гулгунни кимёдан «4» баҳо олиб келганини эшитган Музafferов ўзида йўқ хурсанд бўлиб кетди. Кириб уни табриклади. Она тили ва физикага ҳам жиддий тайёргарлик кўришни тайинлади. Иккى қизига, Гулгунни кўп бошини қотирманглар, кийим-кечакдан камроқ гапиринглар, деди. Кексаларга хос

эзмаланиб, Гулгунга шароит яратиш кераклиги, китобларни топиб бериш, ўзбек совет адабиёти ва она тилидан, агар Гулгун лозим топса, ошнаси Амир Равнағни бошлаб келиб, консультация уюштиришга ҳам тайёрлигини айтди. Шундоқ бўлди ҳам. Амир Равнағ унга консультация берди. Уч қиз хоналарида тек турганча отанинг эзмаланиб, узоқ гапираётганига сабртоқат билан қулоқ солишарди. Ў, бугун-эрта, эҳтимол, дўсти Милтиқбой Қўйбоқаров ҳам хабар олгани келиб қолар, қизининг бир имтиҳондан яхши ўтганини билиб хурсанд бўлар, деди.

Тайёргарликка қаттиқ киришиб кетган Гулгун физикадан «б», она тили ва адабиётдан ҳам «б» олди.

— Тўқсон тўққизу ўнда тўққиз фоиз ўтасан, қизим! — деди Музafferов эрта билан нонушта пайтида Гулгунни табриклаб,— мандат комиссияси масаланы ҳал қиласди. Сен бир фронтчининг ёлғиз қизисан, бунга ҳам қарашади.

Гулгун одатдагидек машҳур инженер Файзулла Аҳмедовичнинг меҳрибон ва олижаноблиги олдида таъзим қилди. Унга ҳурмати минг чандон ошди. Ўз отаси-дек сева бошлади. Баъзан боши ярим қуий, мамнун ўтиради. Бошқа қизларнинг ҳам кўзи Гулгунда, унинг ҳар бир ҳаракатини кузатишиб, жиндак рашк қилишган ҳоллари ҳам бўлган. Илгари на тушлик ва на нонуштада стол атрофида кўринмайдиган Хайрушка кейинги пайтларда жуда ҳам интизомли бўлиб, вақтида нонуштага келиб, отаси ёнида ўтиради. Шу йигитнинг мўйлови Гулгунга ҳеч ёқмас, унинг лаби сал қимирлади дегунча мўйлови ҳам ўйнаб, кулгили кўринарди. Хайрушка ўткир қарашлари билан Гулгунни тийр боррон қилиб ўтирад, у қийналар, аранг бир пиёла чой иcharди. Ўзининг чиройлилигидан хижолат бўлар, қошу кўзи, нафис лаблари жозибаси Хайрушкани сеҳрлаб қўйганини сезарди. Акасининг оғзидан суви келиб юрганини пайқаган Таманно ўз хоналарига унинг тақирлатмай киришини қатъий ман этиб, унга танбеҳ берди. Жириллаган Хайрушкани жеркиб: «Умуман бизнинг хонамизга кирма, дадамларга айтиб бераман!» — деди кескин қилиб.

Файзулла Аҳмедович шанба куни кечга яқин ошхонда супра ёзиб, тахта-ўқлоги устида унналиб, юпқа пишираётган жафокаш ва садоқатли хотинини кузатиб ўтиради. Баъзан гердайиб, шу содда Марҳаматхонга ўзини кафтида кири йўқ, «фаришта» қилиб кўрсатарди. Не-не ишлар бўлиб ўтди. Қирқ йил бирга умр кўришибди. Қўша қаридик, деб айтса ҳаққи бор. Юпқани шоша-пиша жўвалаётган хотинига тикилиб, хаёлга чўмди: бунчалик садоқатли, софдил хотини бўлмаганда, Музаффаров узоққа бормас эди. Эрни эр қиласидиган ҳам, ер қиласидиган ҳам хотин. Лекин у ўзини доимо юқори тутишини, аслида жуда ҳам фаришта кимса эмаслигини ҳам ёдидан ўтказди. Бундан йигирма йил муқаддам Файзулла Аҳмедович гўзал бир ёш жувон билан танишиб қолди. Бу танишув чинакамига ошиқ-маъшуқликка айланиб кетган эди. Файзулла ўша йиллари қирқ ёшлардан ошиб, ҳаётнинг аччиқ-чучугини татиган, бола-чақали бўлишига қарамай, ҳамма нарсанни унтиб, дарду фикри ўша жувонда бўлиб қолган эди. Марҳаматхон эрининг ўзгариб қолганини, ҳуши ўзида эмаслигини пайқаган. Файзулла Аҳмедович ҳозир ўша вақтни эсласа юраги шигиллаб кетарди; бир йилча ўша жувон билан ошиқ-маъшуқ бўлиб, бу ишнинг ҳидини чиқармади. Ўзининг «пухта» лигидан ўзи мамнун бўлди. Мана, йигирма йилдан кейин ўша дамларни эслаб, завқланар, бир неча бор қўлга тушиб қолишдан қутулгани, деразалардан сакраб қочгани беихтиёр кулги қўзғатарди. «Ҳа, сен, Музаффаров, жуда ҳам кўксингга уриб, ўзингни фаришта қиласерма! Сен қиласанг арзиди», — дегандек бўларди. Лекин, мана, орадан шунча йил ўтиб кетибди-ю, ҳамон ёшлик шўхликлари юрагида чўғдек ёниб ётарди. Ҳей, Файзулла Аҳмедович, кексайдинг, мана, оқсоқол номини ҳам олдинг. Баланд бўй, бақбақадор, кийимнинг ҳам энг каттасини киядиган бўлдинг. Шогирдларинг узундагузун исминингдаги «вич»ни қўшиб айтиб ўтирмай, «оқсоқол», деб қўя қолади. Амир Равнаққа ўхшаш қадрсонларинг сени «божа» дейди.

Файзулла Аҳмедович ҳалиплаган узун пальтоси

чўнтағида атай зарга ўралган турли конфетлар олиб юриб, невараларига, ўз кўчасидаги майда болаларга улашиб юришни ҳам ёқтиради. Ҳамманинг дилида бир даста гавҳар... Инсон кўзига ўз айби кўринмайди, ҳар қандай шароитда ҳам инсон ўзини ҳақ деб билади. Бу ҳолат ҳозир әмас, мажусийлар даврида ҳам, балки ундан илгарироқ ҳам пайдо бўлгандир. Ҳамма вақт одамларга яхши муомала қилса бўлмасмикан, дерди баъзан тажанглиги тутиб Музafferов. Бир мансаб эгаси ишдан кетиш олдидан жуда ширин сўз, «камтар» ва ҳатто ялинчоқ бўлиб қолди. Лекин, иттифоқо, уни ҳозирча жойидан силжитиш мақсадга мувофиқ деб то-пилмай, ўрнидан қўзғатишимагач, у яна илгариги аслига қайтди. Қўрс, тобе кишиларга бемурувват, димоғдорлиги давом этди. «Эй, хом сут эмган инсон! — деди яна тутақиб Музafferов,— сен ҳам бошқалар қатори нон еб, сув ичиб катта бўлгансан-ку?! Ёки сен, бурма шохли қўчқор бўлиб туғилганмисан? Сенинг лойинг бошқа жойдан олинганми?»

Музafferов тубсиз хаёллар ичида юриб асаби қақшаган, ҳар нарса тегиб кетиб, жизғинак бўлиб юрган кунлари машҳур академик, ёшликтан қадрдан ошнаси машинада хотини билан келиб тўйга айтиб кетди. Бу академикнинг қизлари билан Музafferовнинг қизлари дугона эди. Улар ҳам атай келиб дугоналарини таклиф этиб кетишли. Таманно билан Тасаннодан ташқари бу хонадонда юрган Гулгун ҳам четда қолмади.

Құн бўйи тараддуд кўриб, катта тошойна ёнидан кетмай, пардоз-андоз қилган опа-сингилларга баъзан Гулгун ҳайрон бўлиб қараб қўярди. Уларнинг сочини жингалак қиласидиган қайчиларини қиздириб берар, туфлиларини артиб, тор кўйлакларини кийишда қарашарди. Белларини сиқиб, қоринлари борлигини билдирамайдиган бандажлари, бюстгалтер боғичларини ҳам танғиб қўярди. Опа-сингиллар дам у кўйлак, дам бу кўйлакни кийиб кўриб, ўзларини ойнага солишар, орачора «қишлоқи»га мурожаат этиб: «Қалаі, кўринишими яхшими?» — деб сўрашарди. Гулгун: «Ярашди, ярашди», — деб кулимсиарди. Бунаقا чиройли ва қўша-қўша кўйлаклари у умрида кўрган әмасди.

Музafferовнинг катта қизи Тасанно баланд бўйли, бурундр, совуқ бўлиб, ўттиз беш ёшларда. Муросаси келишмай эри билан ажрашиб, боласи билан отасиникида ўтиради. У ҳам ёшлигига жуда эрката-тантиқ бўлганидан, овқат пиширишни, кир ювишни

бilmай ўсди. Музаффаровнинг ниҳоятда болажон бўлганлиги сабабли икки невара ва қизи унинг елкасида эди. Бу қиз боғчада мураббия бўлиб ишларди. Ўғли Хайрушкадан кейинги Таманно ҳали қиз, онасининг ёрдамчиси. Ҳа, бир олим айтгандек, улар «назарий жиҳатдан оналарига ёрдамчидир», аслини олганда, Марҳаматхон уларга хизматкор. Марҳаматхоннинг юрагидаги ният — Хайруллани яна уйлантириб, қизини тузук бир жойга узатиш. Шундан кейингина оёғини узатиб, эри билан бирга Кисловодскками, Сочи, Ялтагами бориб, бир ойгина дам олиб келиш. Ҳар йили курортга бораман деганда ё Таманнонинг, ёки Тасанионинг бир иши чиқиб қоларди. Болаларини тинчтиб олгач, ўзига ҳам қарашни кўнглидан ўtkазиб қўйди. Таманно юмaloқ, камгап, ўзини ақлли кўrsатадиган қиз. Дарҳақиқат, у ўнинчини ҳамма фандан аъло баҳо олиб, олтин медаль билан тамомлади. Лекин шунча донолиги билан кўздан узоқроқ, ёш йигитчалар суркалавермайдиган, «салобатли» қиз эди. «Таманно», «Тасанно» исемларини қофиядош қилиб шоир Амир Равнақ қўйган эди. Ўшанда Музаффаров хотинига ҳазил қилиб, яна ўғил туғсанг қофиядош от топилару, аммо қиз туғсанг қофиядош от топилмаса керак, деб кулган эди. Таманнони қўзивой тарвуз, Тасаннони босволди қовун, дейишарди. Бувилари бирини ҳусайнини, бирини даройи, карсиллайдиган шакарангур ҳам дердилар. Кичик Таманнога, ўзининг айтишича, гўё ҳамма кийим ярашар, у шартта сўз, баъзида опаси, акасини қамчилаб қоларди. Унинг ниҳоятда «келишганлиги» ва зеҳни ўтқирилги атрофидаги ҳамма одамлар томонидан эътироф этилиб, гўё «тан олинган». «Ёзилмаган муҳаббатномалар», ҳар хил баҳоналар билан дарвозага келган йигитчалар, кетма-кет телефон жиринглалари, овози дўриллаб, мўйлови сабз урган йигитчаларнинг ҳар оҳангга тушиб, Таманно ишқида оҳ уришлари Музаффаров хонадонида гўзал қиз борлигидан далолат берарди гўё... Нариги маҳаллалик бир йигит учун бу хонадонда «Лайлидан аъло, Шириндан ширин бир севикли кимса» борлиги, бу кимса учун жонини фидо қилишга тайёрлиги кимларгадир маълум. Ўша йигит ҳарбийга чақирилган, Владивосток томондан хат устига хат келиб ётарди...

Бу хонадонга Гулгуннинг келиши опа-сингиллар учун эътиборга арзимайдиган бир воқеа эди. Улар: «Отамизнинг фронтчи ошнасининг қизи, «қишлоқи»

дастёр бўлиб, онасига қарашиб юради, деб ўйлашди. Институтни тамомлагандан кейин қишлоғига кетади. Ёки шу ерда бирон йигит билан әлакиши, қолиб кетиши ҳам мумкин... деб қарашибди. Баъзан Таманно «Хонзодахон бўлиб», «Ҳой, Мастон, чилим бер!» — дегандек, «Ҳой, Гулгун, кўйлагимни дазмоллаб юбор!» — дерди. Гулгун бир зумда бу ишни бажаар, кўнглига олмасди. Қизининг Гулгунга ҳадеб иш буюраверишидан Марҳаматхон баъзида хижолат бўлиб, Гулгуннинг пешонасини силаб, юзидан ўпар, эркалар, қизларим одобсизлик қилса хафа бўлма, дерди. Гулгун аксинча, улар билан мулоқотда бўлиш, ҳамма ишларини жуда тез бажариб беришга тайёр эди. Марҳаматхон: «У ҳам бироннинг арзандаси, ўқиш баҳонаси билан бу ерларда юрибди, бўлмаса жаннатдек жойидан узоққа келармиди!» — дерди. Гулгун оддийроқ кийинар, шу оддий кийим ҳам ўзига ярашиб тушарди.

Кеч соат еттида Музаффаровнинг данғиллама уйларидан чиққан қизлар ҳовли ўртасида тўпланишиди. Ҳовлида тарқалган атир ҳидлари қўшниларникигача етиб чиқди. Қўшни қиз: «Ойи, қаёқдандир атир ҳиди келяпти», — деди. Бу ингичка, ўткир овозни Гулгун аниқ эшилди. Зина тепасида пайдо бўлган Файзулла Аҳмедович қизларига қараб:

— Хайруллахонга айтинглар, аввал сизларни ташлаб келсин, биз ойинглар билан кейин борамиз, — деди.

Қизлар хиром юриш билан дарвозадан кўчага чиқишиди. Дарвоза ёнида кутиб турган Хайрушка моторни гуриллатиб, жўнаб кетди. У опа-сингилларини орқага, Гулгунни ўз ёнига ўтқазди. Гулгун қип-қизариб кетди. Унча-мунча шикоят, қочирим гапларни ёқтиромовчи Хайрушка, агар жаҳлини чиқарса, йўлнинг ўртасига олиб бориб, барчасини машинадан тушириб юбориши ҳам мумкинлигини пайҳаган опа ва сингил то тўйхонага етиб боргунча миқ этишмади. Агар бегона машинада бўлганларида ҳозироқ ҳазил-мутойиба гаплар, нозу карашмалар бошланарди.

Ярим соатча йўл юришиди. Бу вақт ичиди Гулгун бир марта ҳам қайрилиб «шофёр»га қарамади. У қимири этмай ўтиради. Чунки орқасида уни кузатаётган «дарранда»лар сал ножӯя ҳаракат қилса еб қўйишига тайёр эди. Фақат машинадан тушишда Хайрушка Гулгунга қараб мурожаат этди: «Дадангизлар билан ойингизлардан хат келиби. Қутидан ҳозир ол-

дим...» — деб унга конверт узатди. Гулгун хатни оларкан, Хайрушкага чин юракдан ташаккур айтди. Хайрушка шу заҳотиёқ ота-онасини тўйга олиб келиш учун яна машинасини гуриллатиб орқасига қайтиб кетди.

Тўй базми.

Катта боғ. Ҳовуз бўйидаги узун зиёфат дастурхони атрофи меҳмонлар билан тўлган. Столлар обдан ясатилган. Хизмат қилиб юрган йигитлару қизларнинг ҳисоби йўқ. Бир томонда кабоб ҳиди, бир томонда катта қозонларда шўрваю ош... Ён томондаги сўрида со зандаю хонандалар. Базмга раислик қилувчи сўзни қисқа қилди; тўйни мажлисга айлантириб юбормайлик, кўпроқ санъатимизни кўрсатайлик, деди. Нутқ-бозлиқ бўлмасин, деб қулди. Қадаҳлар кўтарилиди. Шундан сўнг со зандалар тўй базмини обод қилиб юборишли. Энг яхшиси шу бўлдики, атай сўзга тайёрланиб келганлар, эски хизматларини мақтаниб, йигирма минутлаб шақилладиганларнинг нафаси ўчиб, тўй тўйга ўхшади. Кимdir кексалардан: «Микрофонни йўқотинг, шундоқ ҳам яхши эшитилади. Атрофда, қўни-қўшниларда кекса, бетоб одамлар бордир, ёш болалар ухлаши керак. Уларни шовқин билан безовта қилиш ярамайди», — деб таклиф қилди. Тўй раисининг айтганлари ижобатга ўтиб, базм жуда ҳам маданий ва кўнгилли ўта бошлади. Ўтирган меҳмонлар ичидан ёш жувонлар рақсга тушишли. Йигитлар ҳам... Хонандалар байлашиб пулга олиб келинмаган. Меҳмонларнинг ўзлари қўшиқ айтишли. Ўйинга тушмаган биронта қиз қолмади. Кимнингдир қисташи билан рақсга тушган Гулгун бир зумда барчанинг диққатини ўзига тортди. Унинг текис қирқилган тим қора соchlари елкасига тушиб, пешанаси устидан қошигача тўсиб турарди. Устида енгиз жужун кўйлак ва бир қадар калта юбка, белини қизил лента — камар билан боғлаган. Оёғида оқ туфли. Чизиб қўйилгандек нозик қошлари соч остида дам булат ичра яшириниб, дам кўриниб турган янги ойнинг ўроғига ўхшарди. Қўзлари шарқ миниатюраларида тасвирлангандек олма баргисимон йирик, бодом қовоқ, дудоқлари фақат бўса учун яратилгандек, бениҳоя ёқимли эди. Унинг кулгиси ҳам, шарму ҳаёдан баъзан андак қизариши ҳам, рақсга тушган чоғида гўё онаси кетидан эргашиб, иккни кифтини ўйнататётган палапон қушга ўхшаши кишилар диққатини дарҳол жалб этди. Ўнларча раққо-

салар ичидан одамлар фақат уни кузатишарди. Гулгуннинг қилиқлари, эркаланиб ўйнаши ва баъзан тасвирига қалам ожиз хатти-ҳаракатлари бу қизда туфма бир истеъдод борлигини кўрсатиб турарди. У, ҳар қалай, Тошкентдан эмаслигини сездирарди. Кимдир ёнида ўтирган шеригига, илгари ҳинд раққосала-рига маҳлиё бўлардик, мана, ўзимизда ҳам ҳақиқий раққосалар бор экан-ку, деди.

— Бу қиз Вайжантималадан зўр!

— Фикрингизга қўшиламан,— деди шеригининг кайфи ошиб,— ўзимизнинг шундоқ яхши санъаткор қизларимиз бор экану, биз бўлсак ҳиндларга оғзи-мизни очиб ўтирибмиз-а!

— Ўзимизники — ўзимизники, бегона — бегона,— деди қаҳ-қаҳ уриб ўрта яшар киши,— аммо косагул маладес, тўй базминики мажлисга айланиб кетишидан сақладими, бу ҳозир катта гап!

— Тўй базмини местком мажлисига айлантириб юборганларида, худо кўрсатмасин, бу ерда тоза гапирадиганлар бор эди. Ҳув, ана, иккитаси ўтирибди! Диққат қилиб қаранг, уларга гап тегмагани учун емайичмай хўмрайишиб ўтиришибди...

— Ха-ха-ха-ха!

Гулгунни иккинчи, учинчи бор рақсга тортишди. Ҳар сафар у ўйинга тушганида Таманнонинг ҳам, Тасаннонинг ҳам ранги ўчарди. Улар ўртага тушиб, тузукроқ кўринишолмади. Тақинчоқлари, заррин лиbosлари меъдага тегибдими, одамлар бу ойимтиллаларга эътибор бермади. Аммо ёшу кекса Гулгуннинг бетакрор рақсига суқ билан тикилишарди. Созандалар ҳам кўпчилик диққатини тортган бу қиз учун шўх ва ўйноқи оҳангни авж олдириб чалишарди. Тўрда ўтирган келин билан куёв ҳам Гулгундан кўз узишмасди. Келин ўз ёнида ўтирган дугонасига, бу қиз тошкентлик эмаслиги, Чимёнга яқин бир қишлоқдан келганини айтди. Гулгун боя иккинчи бор ўртага тушаётганида ёнида ўтирган Тасанно билан Таманно билин-ар-билинмас сонини чимчилашди: «Бас, энди чиқма!» Лекин тўй эгасининг тортқилаши, қаттиқ илтимоси билан у яна ўртага тушиб кетди. Юқоридаги кексалардан ташқари, бошқаларнинг ҳам Гулгун ҳақида гаплашишаётганлигини сезган опа-сингилларнинг кайфи учиб, Гулгунга ҳasad билан қараша бошлади. Бугунги базмда Музаффаровнинг қизлари «гўзаллик қироличаси» бўлиши керак эди, аммо пардоз-андоз

қилиб буни мўлжаллаб келганлар бир ёқда қолиб, «қишлоқи»нинг шуҳрат топиши Таманноларга кучли зарба бўлиб тушди.

— Бу «мажусий» кимнинг қизи? — сўради кекса академик-археолог, — жуда ҳам кўҳлик, иссиқ қиз экан. Тўмарис ёки Нефертитига ўхшайди. Эрамиздан аввалги одамлар ҳам гўзалликка, нафосатга катта эътибор берганлар. Бу қизнинг қилиқлари ўзига жуда ҳам ярашиб турибди. Музafferовнинг қизи эмасми?

— Музafferовнинг қизлари ана, — ёнидаги одам чап томонга ищора қилди, — сувга тушган бўлка нондай бўкиб ўтиришибди. Бу қиз — олов-ку! Кўзларининг катталигига қаранг!

— Ҳар қалай, шунаقا. Биринчи кўришим. Такрорлайман — мажусийларнинг ўзгинаси!

— Дидингиз чакки эмас, домлажон! — деди шира-кайф шериги кулимсираб, — ўзи ҳам оддийгина кийингану билиб кийинган. Оддийгина либос ичидан оташу аланга! Қилиқларига қаранг!

— Ҳой, одобдан четга чиқманг! — академик лабини тишлади.

Эътиборли кишилар Гулгундан кўз узмай, у ҳақда гаплашаётганини Таманно сезиб турарди. Бир лаҳзадан сўнг у онасига секин гап қотди:

— Ойи, «мажусий» дегани нима?

Марҳаматхон бу гапга тушунмай ёнидаги эрига мурожаат этди:

— Мажусий дегани нима?

— Бизнинг мелоддан илгари яшаган, ўтга, сувга сифинган одамлар.

Она бу гапни дарҳол қизига айтди. Таманно бу номни камситиш — ёввойи маъносида тушуниб, мийигида кулиб қўйди. Пастроқда ўтирган Гулгунга, «ана, мўътабар одамлар сени ёввойи деяпти», дегандек қилиб истеҳзо билан назар ташлади.

Гулгун унинг маккорона нигоҳ ташлашидан ҳеч нарсани фаҳмламади.

Аммо, қайтиб келишгач, базмдан кейин уйда Таманнонинг газабини сезди; туфлиси илгагини ечишга ҳам сабри чидамаган Таманно оёғини силкитиб, туфлини хонанинг тўрига отди. Туфли деворга тегиб, ундан Гулгуннинг каравотига тушди. Кўйлакларини ҳам наридан-бери ечди ва тошойнага ўзини согани ҳолда орқада, даҳлизда ечинишини ҳам, ечинмаслигини

ҳам билмай хомуш турган Гулгунга қарамай гап қотди:

— Сенинг отанг ёшлигида қўй боққанми? Нега фамилияларинг Қўйбоқаров?

— Билмайман,— деди Гулгун тўй базмида нима гуноҳ қилгани, нега Таманно дарғазаб бўлаётгани, кинояли гаплар сабабига тушунмай.— Бувамнинг оти Қўйбоқар бўлган, адамнинг номи — Милтиқбой...

— Асли келиб чиқишиларинг ким бўлган?! Деҳқон бўлиб деҳқонга ўхшамайсизлар! Тоғда мол боқиб юрганмисизлар?

— Шундай бўлса керак,— деди Гулгун. Таманно бу билан сенлар паст табақадансан. Биз, Музafferовлар оиласи юқори табақа... демоқчи бўларди. Кўкракларини очиб, ўзини ўзи ойнада томоша қилаётган Таманно қайрилиб Гулгунга:

— Мен қалайман?— у бошини кўтариб, кибор боқди.

— Қайси маънода?

— Қадди-қоматим?

— Бебаҳо...

— Сенга ҳам кийим ярашаркан... Ўзинг унча чиройли эмассану, лекин кийим ярашаркан. Шуни ўзинг биласанми?

Гулгун миқ этмади.

— Бир хил қизлар бўлади, кийим билан одам. Агар кийган кийимини ечиб қўйса, ўзи бир тийинга арзимайди!— деди Таманно атай Гулгуннинг ғашига тегиб.

Гулгун яна индамади.

— Қорабойми, Қоратойми... бир қишлоқи йигит билан юрасан, деб эшитдим. Шу ростми?

— Сиз ўзингиз Анвар деган йигит билан?..

— Йўқ, бу туҳмат! Сени ўша Қоратой билан бирга қочиб кетган, ота-оналаринг қидириб бориб, икковингни бир сабзи ўрадан топиб келишган, деб эшитган эдим...

— Энди чегарадан чиқиб кетяпсиз!— деди Гулгуннинг ғазаби қўзғаб.— Мен нима ишим билан сизни хафа қилганимни билмаётирман. Бу таънаю заҳарли киноялар нима учун?!

— О-о, ҳамма нарсани бирданига билиб олмоқчисан-а! Мен сен билан уришмайман, асабим ўзимга керак!— деди сал бўشاшиб Таманно,— қани айт-чи, мен чиройлими, сен чиройлими?

— Сен,— деди Гулгун стулга ўтириб,— сен жуда чиройлисан, буни ўзинг ҳам яхши биласан. Ҳамма билади. Мендан сўраб ўтиришнинг нима ҳожати бор!

— Унда, нега ҳамма сенга қарайверади?! Академик сени «мажусий» деди, эшиздингми?

— Йўқ.

— Қани айт-чи! Нега ҳамма сенга қарайверади?!

— Ўйнаганим учун қарашгандир. Нега сен тушмадинг? Тушиб керак әди! Сенга ҳам ҳамма қарарди.

— Мен ҳамма менга қарашини истамайман! Мен, ахлоқи пок қизман! Ўйнасам, сендан яхши ўйнайман!

— Яхши ўйнасанг, уни асраб нима қиласан!— деди Гулгун бўш келмай,— тўйда ўйнамасанг, қаерда ўйнайсан?

Таманно лом-мим деёлмай, бақрайиб қолди. Гулгун ҳам кўйлагини ечиб, бюстгалътери билан ойна ёнига келди. Икки ёшлиқ, икки ниҳол, икки тасвирлаб бўлмас беқиёс қомат ойна олдида туради. Таманно Гулгунни ғижимлаб ташлагиси келарди, аммо бунинг ҳеч иложи йўқ. Улар бир муддат ялангоч бир-бирлари га тикилганча қолишиди. Таманно дераза томонга ялт этиб қараб қўйди:

— Нима, бу ер ҳаммомми! Кий кўйлагингни!— деди Гулгунга дўқ уриб.

Ойна олдида турган икки гўзал бирдан хахолашиб ўзларини қаравотларига отиб, кўрпа ичига яширинишиди. Улар яна илгаригидай қадрдон бўлиб, тинмай кулишарди.

XVIII боб

ТАШНАЛИК

Гулгунни Тошкентга жўнатган Қоражон яна ўзининг беомадлигидан ранжиди. Ширин ўпич... «озгина сабр», «қирқ бирига» ҳам чидаш кераклигини таъкидлаб турганида бир нима деб бўлармиди! Ҳа, ўқишига тўсқинлик қилмоқлик, аввало, нодонлик, қолаверса бахилликдир! Қувнаб, яқинда тўйим бўлади, деб юрган Қоражоннинг тарвузи қўлтиғидан тушди. У эрта билан ишга келиб, хаёлот ичига Қўнғирбуқа тогига чиқиб кетибди. Тўғон устида ишлаётган ошналари ҳайрон:

«Чотқол йўлбарси»га бир нима бўлдими? Кимдир уни ранжитса — хафа бўлган кезларда ўндан бошини солиб, ўксиниб Қўнғирбуқага чиқиб кетарди. Ясси харсанг тош устида соатларча ўтиар, чекар, атроф ёқни кузатар, харсанглар орасидан ўсиб чиққан ўтни юлиб олиб, беихтиёр чайнар, хаёл сурарди.

Қоражон ўзининг рози бўлганига қарамай бағри ёниб, Гулгуннинг орқасидан Тошкентга ютурмоқчи, Музаффарову Марҳаматхонлардан уни ажратиб олиб келмоқчи бўлди. Лекин бу ишни қилиб бўлмайди. Улар нега келди экан бу томонга?!

Қоядан пастга тушган Қоражон тўғон устида айланиб юриб, ишни кўздан кечирди. Прораб Никаноренкога баъзи топшириқларни бериб, яна ўз машинасида Бошқарма томон жўнади. У Иван Иванович Шишкин билан бир нимани маслаҳатлашиб олмоқчи бўлди.

Ҳаво гоятда қизиб кетган. Йўл-йўлакай Хўжакентдаги минг ёшли чинорлар тагига келиб, бир оз нафасини ростлади. Тошкентдан чиққан баъзи магазинчи чапаниларнинг нописанд ўтириши Қоражоннинг энсасини қотирди. Пулнинг кучига ишонган бу олифта, савдогарнамо йигитчалар «чарчаганликлари» сабабли дам олишар, карта ўйнашарди. Қозонларда жиз-биз авж олиб, иштаҳани карнай қилувчи ҳид тарқаларди. Ташналиктан юраги куяётган Қоражон муздек булоқ сувидан бир коса ичди. Юрагидаги оташга сув сепилгандай бўлди. У бир оз нафасини ростлаб, иккинчи косани ҳам яримлатди. Яна ўша азим чинорлар тагида тужгон ўйнаётган такасалтангларга тикилди; тўғон тепасидан бульдозерни олиб келиб, юрга фойдасидан зарари кўп тегаётганларнинг барини суриб ташласамикан! Тоғ кесганлар, офтобда қовжираб ишлаганлар чарчаб келиб бу ерда ҳордиқ чиқаришлари керак эди. Афсуски, улар йўқ. Булоқ ёнидаги улкан бир тошга кимдир ўз исмини «абадийлаштирибди». Тажанг Қоражон тошни ҳам ҳаром қилибсан, дегандай «улфатлар»га тикилди. Шу савдогарбаччалар ичида ўша отпани «абадийлаштирган» кимса ҳам кўзларига кўриниб кетгандай бўлди. Шапкаси соябони билан қош-кўзичи бекитиб юрадиган Ишларбек Сапчабошев ҳам шу йигитлар орасида ўтиарди.

— Ҳа, ўртоқ Мингбоев, шу ердамисиз? — деди чангта беланган йўғон бир йигит қўлидаги кружкасини оқиб тушаётган булоқ сувига тутиб.

— Юрагим куйиб келувдим,— деди тепасида турган экскаваторчи йигитга боқиб,— шу булоқнинг суви жуда маза-да!

— Утирадиган жой йўқ, ўртоқ инженер, ҳамма ёқни шаҳарлик меҳмонлар эгаллашибди. Бир бўш табуреткага қўл узатсам, анави йигит, «банд», деб кўзини олайтириди.

— Иложимиз йўқ, дўстим, улар шаҳардан иссиқ-лаб чиқишган, дам олишсин.

— Биз-чи?

— Биз мана бу тошга ёзилган номни... ўқиб, яна қайтиб бориб тўғонда ишлайверамиз! Тушундингизми?! Тунука том бўядиган бўёқ билан тоғ тошига «латипча» деб ёзибди. Шунда ҳам иккита хато, «Л» катта ҳарф билан, ундан сўнг «п» ўрнига «ф» ёзилиши керак эди. Исмини ёзишни ҳам билмас экан, даюс!

Қоражон тажанг бўлиб турганини сезган экскаваторчи йигит тасалли берди:

— Ўртоқ Мингбоев, хафа бўлманг, улар асаб бузишингизга арзимайди. Отини ёзгани билан тезда ўчиб кетади.

Шундан сўнг улар булоқ бошидан қўзғалиб, бирлари тўғонга, бирлари парторг Иван Иванович Шишкин ёнига жўнашди.

Юраги тўлиб кетган Қоражон Гулгуннинг ўқишга боришига қаршилик кўрсатолмай, орадан бир кун ўтгач, мотамсаро бўлиб қолди. У нима қилишини билмасди; калаванинг учини йўқотиб диққат бўлар, ўйлар, уҳ тортарди. Полвон бир йигитнинг бўшашиб, шалвираб қолгани бошқаларга ҳам сезилди. У хаёлот наҳрида оқарди, эҳтимол Гулгуннинг муҳаббати шунчакидир... Эҳтимол, у ўз атрофида парвона бўлиб юрган соғдил бир йигитга яхши гапириб, илтифоту қавсизи кўргазиб, яхшиликка яхшилик билан жавоб қилаётгандир? Эҳтимол, ўпичлар, қучогидаги эркалашишлар, юзларини силаб, кўксига қулогини қўйиб, юрак тепишини эшитишлар, бари-бари ёлғондир. Эҳтимол, шундай қайноқ қилиқлари билан эркакларга ёкишни истар. Ахир у бир марта турмуш кўрган қиз... Эҳтимол, бошқа бир одам юрагида галаён қилдимикан? Эҳтимол, Қоражонни ҳусндан йироқ, чандиқ юзи уни қўрқитиб, ўзини секин четга олгандир? Мана бу гап ҳақиқатга яқинроқقا ўхшайди. Демак, у беҳусн, бедаводан йўлини қилиб қочган... Бу гумон ҳақиқатга

яқинроққа ўхшайды! Ундаи бўлса нега бу гўзал Гулгун унинг бағрига ўзини отди? «Гап ҳуснда эмас, Қоражон ака, сиз мингта ҳусндорлардан азизсиз. Хотинлар кўпроқ ҳусни борларга қарайди, деган гапни менга тақаманг, мен учун сиз дунёда энг азиз кишисин. Сизнинг қалбингиз гўзал», — деган эди-ку у! Гулгун иккюзламачими? Наҳотки, у иккি тиллик, иккি диллик бўлса! Наҳотки?! Бундоқ айб қўйишга Қоражоннинг ҳеч тили бормасди. Унинг бағри ёнарди. Бир нимасини йўқотган кишидек хаёлот ичиди эди. Шунча йилдан бери бирон қиз унинг қалбига олов сололмаган эди. Қишлоқ қизи Гулгунда бир сир, оҳанрабо бордек Қоражонни мафтун этиб ўзига тортган эди. Шу сеҳргарнинг кетиб қолиши Қоражоннинг қалб хонадонини бўй-бўй қилиб қўйди. Жангари, полвон, неча ўлимларни енгган фронтчи Қоражон Мингбоев ўзининг ожизлигини сезди. У Гулгунга жуда берилиб қолган эканми, хаёlinи умидсиз ўйлар қоплагач, ожиз бўлиб қолди.

* * *

Иван Шишкин билан унинг квартирасида учрашди. Уйда Галинанинг йўқлиги — сменада экани иккигитга ёқди. Холодильнидан олинган бир шиша муздек арақ уларнинг икковларини ҳам «ман сизга айтсан...» қилиб қўйди. Мингбоевнинг ҳасратидан чанг чиқавергач, Шишкин эътиroz билдириди. У дўстидан ҳеч нарсани яширмас эди.

— Хотинларга ўхшаб кўп обидийда қилаверма! Ўзимизнинг қурилишимизда хотин қуриб кетибдими! Эртанининг Галянинг синглиси Валя келиб қолади, гаплаш, ёқса олиб бераман. Тўй қиламиз!

Қоражон бирдан хаҳолаб кулиб юборди:

— Гуноҳларимиз кўп, дўстим. Лекин мен ўша қизни яхши кўриб қолганиман. Мен ҳам оила қуришим керак. Қачонгача кўринган бирорвга ошиқ бўлиб юраман! Бўйдоқ юришдан зерикдим! Мен уни жуда ҳам яхши кўраман! Агар шунаقا бўлаверса... жонимдан тўйдим!

— Э, қойил-э! Кайфинг бор. Шунаقا жигар-бағрингдан урган экан, нега бўлмаса уни жўнатиб юбординг?!

— Гап шунда-да! Нега мен унга жавоб бердим! Ака-

демик Музффаровлар олиб кетди. Музффаровни танийсан. Член корр.

— Э, анави домламизми?

— Ҳа.

— Ҳафа бўлма. Оғир бўл! Хотин топилади. Бошқалар жонидан тўйсин. Нега сен жонингдан тўясан? Сен бир неча марта ўлиб, тирилган, одамсан. Фирнгарлар ўзини ўлдирсин! Тушундингми? Агар ўша қиз чин инсон бўлса, сени алдамайди, хиёнат қилмайди, сотмайди! Агар сени сотса, ундаи одам нега керак! Всё!

— Унақа қиз эмас.

— Унда нега обидийда қиласан?!

Қоражон ошинасикидан чиққач, тўғри уйига йўл олди. Оралиқ яқин бўлганлиги, кайфи борлиги сабабли Шишким унга машинасига минишга рухсат бермади. Машина унинг уйи ёнида қолди. Кўпдан ўғлининг бундоқ масти бўлиб юрганини кўрмаган Қандил буви данг қотди.

— Ойижон, хафа бўлманг... Мен Шишкимларникида эдим...— деди водопровод кранини шариллатиб, бошини тутиб,— шундоқ бўлиб қолди...

— Вой, ўғлим-эй, машина билан жарликлардан ўтсан, сув ёқаларида юрасан, тоғларга чиқасан... Юрагим шигиллаб кетяпти. Бу иш яхши эмас!

— Шишким ўртогим билан бирга эдим...

— Шу ичкиликни ичиб ҳеч кимнинг шохи чиққан эмас!

— Бунга ўша сабаб!

— Ўша ким? Шишкимми?

— Йўқ.

— Бўлмаса ким?

— Ўша оламан деган қиз...

— Нега бундоқ бўлди?— Қандил буви ҳовлидаги табуреткага ўтириб, ўйланиб қолди. Крандан шариллаб тушаётган сувга бўйни, бошини тутиб, ўзини қўлга олмоқчи бўлаётган ўғлига тикилганича қотиб қолди. Демак, бу ичкиликда сабаб бор экан-да...

— Ўқирмиш...

Қоражон юз-қўлини артиб, гандираклаб уйга кирдида, диванга ўзини ташлади. Бир муддатдан сўнг ухлаб қолди.

Эрта билан ўзига келган Қоражон онасидан хижолат бўлди. Ҳамма гапни айтиб, онани юпатди. Албатта тўй бўлажагини айтди.

— Худо хоҳласа, дегин, болам,— деди Қандил буви,— ота-оналарининг гапи бошқача эди-ку? Нега энди ҳамма иш битганида ўқишига кирди?! Мен қариндош-уругларимга нима дейман? Сенларни бошингни қовуштириб, қишлоғимга кетмоқчи эдим. Иккиламчи, у унда, сен бунда бўлиб, қандай эр-хотин бўласизлар? Бу иш ҳеч ақлга сигмайди!

Онанинг боши қотиб қолди. У хаёлотга чўмиб, бўшашиб кетди. Ўғлининг омади келмаётгани бир дард бўлиб, бу дард уни харсанг тошдай эзарди.

— Ойи, қўяверинг, мени ўйламанг, бир гап бўлар...

— Нега ўйламас эканман! Ўйлайман! Одамларда лафз қолмабди! Дадаси бамаъни одам, урушда бўлган, девдинг-ку?!

— Ҳа, яхши одам.

— Бу яхши одамнинг қиласидиган ишими? Унашилган, энди тўй қиласиз, деб турган қизини жўнатиб юбориши тўғрими?!

— Қизнинг ўзи хоҳлади. Ўқишим керак, деди. Шаҳардан чиққан Музаффаров деган кишининг қизларига эргашиб кетди...

— Нега бундай қилди? Бирор айнитдимикан?

— Йўқ. Агар унинг сўзлари рост бўлса, ҳеч ким айнитолмайди. Мен Тошкентга тушиб чиқмоқчиман.

Қандил буви индамади.

Қоражон жуфтини йўқотган йўлбарсдек саросима ичida кўзга кўринган нарсага човут солишга тайёр эди. Юрагида шубҳаю ишончсизликлар пайдо бўла бошлади. У ўзига бўлган муносабатни ва умуман, аҳволни яхшироқ билмоқчи бўлиб, ўз машинасида тўппа-тўғри Милтиқбой акаларни кига, Сижжакка йўл олди. Хўжа-кентдан иккита катта қўзивой тарвуз сотиб олиб, машинага солди. Агарда Гулгуннинг айнагани рост бўлса, буни ота билан она билмаслиги мумкин эмас. Милтиқбой ака хонадонидаги ўзгаришни дарҳол сезиб олса бўлади.

Гуриллаб келган машина Милтиқбой ака Қўйбоқаров эшигида фийқ этиб тўхтаб, икки тарвузни кўтарниб олган Қоражон эшик тақиллатиб ўтирмай, ўз ҳовлиси-дек ичкарига бостириб кирди. Ҳовлида, ариқ бўйида идиш-товоқ юваётган Санобархон Қоражонга кўзи тушиб, ўрнидан турди.

— Бормисиз, ўғлим! Сиз ҳам жим бўлиб кетдингиз, Гулгун тушгур ҳам кетди-қолди. Болаларини олиб кетишган она мушукдек ёлғиз ўзим қолдим...

— Саломатлигингиз яхшими? Милтиқбой акамлар саломатмилар?

— Шукур, шукур. Зилдек тарвузни күтарибсиз, ерга қўйинг.

Қоражон тарвузларни ерга қўйгач, Санобархон унинг елкасига қоқиб, омонлашди.

— Ойингиз яхшимилар? Укаларингиз...

— Ҳаммалари сог-саломат. Сизга салом айтишди.

— Саломат бўлишсин! — деди босар-тусарини билмай Санобархон,— қани, юқорига, айвонга чиқинг!

Санобархон ошхонага югурди. Йўл-йўлакай нариги хона эшигини очиб, ўғлига югуриб бориб дадасини чақириб келишни буюрди. Йигитча бўлғувси поччасига салом бериб, Наволисойга — олмазор боққа югуриб кетди.

— Сизни кутиб ўтирган эдим. Гапим бор эди,— деди Санобархон бўлғуси куёвини ўз ўғлидек кўнглига яқин тортиб.

— Хўш?

— Дадаси келганда яна айтарман. Тошкентга тушиб, Гулгундан бир хабар олиб чиқсанглар яхши бўларди. Алағ-чалағ тушлар кўриб юрибман.

— Майли... — деди Қоражон. Унинг шубҳалари бекор чиқаётганга ўхшади. Қизнинг онаси унга нисбатан илгаридан ҳам ортиқ бино қўярди. Муносабатлари жуда ҳам илиқ эди.

Бир нафасдан кейин қўлтиқтаёқни тўқиллатиб мўйловдор Милтиқбой ака кириб келди. У ҳам ўз ўғли билан кўришгандай илиқ мулоқотда бўлди.

Дастурхон устида у ёқ-бу ёқдан, она-отаси ҳақида, қурилишдаги ишлардан гапириб берган Қоражон, «эрта-индин» эмас, машина тайёр, ҳозир йўлга чиқиш мумкинлигини айтиб, Санобархонга қаради. Бу гап Милтиқбой акага ҳам маъқул тушди.

— Хизрни йўқлаган эканман,— деди Санобархон Қоражонни навозиш этиб,— имтиҳонлардан ўтган бўлса бир-икки кун бу ёққа чиқсин, Гулгунга тайинлаб айтинг!

— Хўп,— деди Қоражон фахр билан. Бу хонадонга фарзанд бўлаётганидан унинг қалбини ўзида йўқ қуонч қўучган эди.

Милтиқбой ака билан Қоражон икки яшик олма, ўн килограммли бидонда май асали, битта яшикда чиллаки олиб, «ТТ»да Тошкентга, Музafferовлар ҳовлисига жўнашди.

Тошкент саратон қучогида ёнарди. Бундай иссиқ ҳар ўттиз икки йилда бир бўлишини ўйлда айтиб келган Милтиқбой ака Файзулла Аҳмедович билан унинг улкан дарвозаси ёнида учрашиб, ҳол-аҳвол сўрашаркан, у ҳам гап ичидан иссиқдан шикоят қилиб, бундай иссиқ ҳар ўттиз икки йилда такрорланишини айтди. Милтиқбой ака билан Қоражон кулиб юборишиди. Кейин бу гапга изоҳ бериб, Файзулла Аҳмедовични ҳам кулдиришиди.

— Ҳа, ишқилиб, саломат бўлайлик,— деди Милтиқбой ака,— ёзда иссиқдан, қишида совуқдан шикоят қиласиз. Инсон шунақа... Иссиқ ҳам ғанимат. Ўтган куни тупроққа тушдим, оҳ-оҳ, бутун оғриқларимни танимдан сугуриб олди. Сизнинг ҳам бодингиз бор, деб эшитган эдим, Файзулла Аҳмедович?

— Бор бўлганда қандоқ, асти сўраманг! Дунёдаги ҳамма бод менинг белимда...

— Э, боднинг жазоси тупроқ! Баъзилар айиқ ёғи, бўрсиқ ёғи, от ёғи дейдилар. Баъзилар, хумдонга тушиш керак, дейдилар. Қизиган тупроқнинг олдида уларнинг барчаси бир пул! Тупроққа тушинг, азизим!

— Ҳозир унақа тупроқни қаёқдан топасиз. Ҳамма ёқ асфальт бўлиб кетган. Асфальт деган нарса боднинг уяси. Билқиллаган тупроқни энди жаннатда кўрсак керак... Раисполком раисига, ҳой укажон, ҳамма ёқни бузиб ташлайпсизлар, яхши ҳовли, яхши маҳаллалардан намуна учун биронтасини олиб қолинглар, дедим. Қулади. Мен унинг кўзига эскилик тарафдори бўлиб кўриндим. Бир куни келиб афсусланишади. Ана ундан кейин фойдаси йўқ.

— Қоражон — менинг ўғлим, куёвим,— деди Милтиқбой ака машинадан чиқиб, икки кекса гапига қулоқ солиб, ерга қараб турган Қоражонни кўрсатиб,— ўзи фронтовик, Белоруссия фронтида жанг қилган. Ҳозир Чорвоқ қурилишида инженер.

— Бу йигит билан ўшандада сизнинг ҳовлингизда танишган эдик,— деди Файзулла Аҳмедович Қоражонга қўл бериб,— ёшсиз-ку, фронтда ҳам бўлганмисиз?

— Ҳа,— кулди Қоражон, — қирқ иккинчи йилнинг охири эди. Үнинчини тугатгач, чақирилдим. Пензада, танк училишисига юборилдим. Кейин фронт...

Файзулла Аҳмедович «танк» сўзини эшитибоқ, бу йигитнинг юзи ва бўйнидаги чандиқларнинг сабабини

тушунди. Шу лаҳза дарвоза олдила чақмок мўйловли келишган йигит пайдо бўлди. У Қоражон назарида ўтиз беш-ўттиз олти ёшларда бўлиб, хатти-ҳаракатларидан кибор ва димоғдорлиги сезилиб турарди.

— Бу менинг ўғлим Хайруллахон,— деди Файзула Аҳмедович уни меҳмонларга танишитириб. Йигит берайми, бермайми, деб аранг қўл узатди. Икки «қишлоқи»ни менсимай, яна орқасига тисарилиб ғўдайиб турди, — қани, ичкарига кирайлик, марҳамат! Дўстим, боддан гап чиқиб, дарвоза олдида туриб қолдик.

Шу лаҳза деразадан отасига кўзи тушган Гулгун шиппагини пойма-пой кийиб, юрганича келди. Ёш қизалоқлардек отасини қучди. Ота унинг пешанасидан ўпди. Онасининг саломини етказди. Гулгун Қоражонга қўл узатиб, у билан ҳам илиқ кўришди:

— Қалай, яхшимисизлар?

— Имтиҳонлардан ўтганингиз билан табриклайман! — деди қизариб Қоражон.

— Раҳмат! — бу гап Гулгунга жуда ҳам ёқиб кетди. У шу кунлари отаси, онаси ва бу севикли кишисининг келишини, унинг муваффақиятидан хабардор бўлишини жуда ҳам истарди. — Ойим яхшимилар? — Гулгун Файзула Аҳмедовичдан ҳам, Хайрушкадан ҳам тортинмай, отаси ва бўлгуси куёв билан эркин гаплашарди. Шаддод қизнинг хатти-ҳаракатларига тушуниб қолган Файзула Аҳмедович ажабланмади. Баъзида қузатиб туриб, бу «тоғ кабутари»нинг эркинроқ, шаддодроқ ўсганини Марҳаматхонга бир неча бор айтган эди.

— Ойинг сенга салом айтди, — деди такрорлаб Милтиқбой ака қизига.

— Сизнинг ойингиз яхшиларми?

— Раҳмат. У киши ҳам сизга салом айтди.

— Вой, қандай яхши келганинглар. Мен жуда соғинган эдим.

— Қани, ичкарига кирайлик, — деди яна Файзула Аҳмедович, — ичкарида гаплашамиз.

Қоражон машинадаги бир яшик чиллакини ўзи кўтариб ҳовлига олиб кирди. Қолган яшикларни ҳам ташиётган эди, Файзула Аҳмедович ўғлига «қарааш» дегандай имо қилди. Хайрушка машинадаги асал тўлдирилган бидонни кўтарди. Ҳовлига кирган меҳмонлар сўри тагидаги каттакон чорси каравотга чиқиб, бир муддат нафасларини ростлашди. Файзула Аҳмедовичнинг қатор ва кўркам солинган уйларига, пешайвону ҳовли ўртасидаги ҳовузга, гулларга тикилишиди. Хона

и чидан Марҳаматхон ҳам чиқиб келиб, меҳмонлар билан саломлашди, ҳол-аҳвол сўрашди. Санобархонни қайта-қайта сўради. Олиб келишмаганига ачинди. Таманно билан Тасанно ҳам ичкаридан чиқиб, меҳмонларга салом беришди. Улар айниқса чандиқ Қоражонга тикилиб, бир-бирларига қараб қош қоқиб, кулишди.

— Күёвнинг аҳволига бир қара...— деди қайтиб ичкарига кирган Таманно опасига секин,— башарасига қараб қўрқиб кетдим. Наҳотки, Гулгун ўшанга тегса?

— Подшонинг ишқи қурбақага тушган экан,— деди писмиқ Тасанно.— Вой, қандай қилиб бу тасқара билан яшайди? Мендек одам ўлиб қолардим...

— Бу кишини ўшанда Гулгунларникида кўрган эдим. Уларнинг хизматкорими, деб ўйлаган эдим. Унинг таъвиялигини қара, одам ҳам шунаقا хунук бўладими? Ён томондан қарасанг зоопаркдаги йўлбарсга ўхшайди.

— Ха-ха-ха-ха,— Тасанно ўзини тутолмай кулиб юборди...

Марҳаматхон дарҳол ошга ҳаракат қилиб юборди. Хонтахта устига дастурхон ёзилиб, нозу неъматлар олиб чиқилди. Таманно онасига қарашиб, чой қўйди. Гулгун ҳам босар-тусарини билмай, дугоналарига кўмаклашарди. Бу хонадонда у билан Файзулла Аҳмедович ниҳоятда хурсанд эди. Файзулла Аҳмедович чой келгунча меҳмонларга қадимги ўзбек услубида қурдирган шифти тоқилик, икки тахмон ва равоқ шаклидаги кичик токчалар ўйилган хонасини кўрсатди. Бу хонага ўзининг ота ҳовлисидан олиб келган кўҳна ўймакор эшик ўрнатилган эди. Деразаси ёнига қурилган сандал қишида очилажагини ҳам айтди. Бозиллаган сандал ҳам боднинг давоси, деди у яна.

— Бизнинг қишлоғимизда ҳам сандални, исириқни жаҳолат деб юрганларга яна ақл кирди,— деди мўйловини бураб Милтиқбой ака,— бир нарсага ўйламайнетмай, хата-тат-надирмат қилиб, ўпкаси йўқлик қилиш яхши эмас. Лекин мана бу хонани боплабсиз! Қариганда сандалга оёқни тиқиб, ҳовлини томоша қили-иб ётарсиз.

— Ҳозир ёшмидик, дўстим!

— Ҳали озроқ бор,— деди ҳаҳолаб Милтиқбой ака,— одамлар кексаликни саксондан кейин дейишиади! Ҳали биз тирикчилик қилиб турибмиз...

— Отангизга раҳмат!— деди Файзулла Аҳмедович ялт этиб Қоражонга қараб қўйиб. У бир нима деб ҳа-

виллашмоқчи эди. Айтолмади.— Шу уйда ётасизлар. Мана бу ёғида ўғлим Ҳайрулла туради. Бу ёғдаги уйларда биз Марҳаматхон билан, наригисида қизлар...

Меҳмонлар хонадан қайтиб чиқиб, ҳовлидаги жўмракда қўл ювишаётганда атай кузатиб ошхонадан чиқсан Гулгун Қоражонга яқин келиб мурожаат этди:

— Юринг, мен турган хонани ҳам кўрсатаман. Бу хонада ойнали шкафда Файзулла Аҳмедовичга берилган туҳфалар, Ҳиндистон ва Франциядан олиб келинган сувенирлар бор...

Гулгун олдинда, ундан кейин Қоражон кулимсираб, ўнг томондаги пешайвон зинасидан кўтарилиб каттакон хонага киришди. Хона шифтида еллиғич паррак секин айланаб турарди. Хонага кириш билан Қоражон шими чўнтағидан кичкина қутича олиб, юпқа қоғозга ўргалиқ тилла узукни Гулгуннинг қўлига тақди.

— Сенга,— деди Қоражон ўз кўзларига тикилиб турган Гулгун олдида юраги дук-дук уриб.

Гулгун Қоражон бўйнидан қучди. Қоражон уни маҳкам қучоқлаб, лабларидан ўпди. Бир лаҳза улар бир-бирларини бўшатмай туришди. Икковларининг ҳам ранглари ўчиб, юраклари гурс-гурс уриб кетган эди. Беҳаловат Таманнонинг лоп этиб кириб қолишидан қўрқсан Гулгун Қоражон бўйнидан қўлларини олди. Қоражон ҳам уни бағридан бўшатди.

— Иккита ёқут кўзи бор экан. Бири — мен, бири — сиз,— деди бармоғидаги чиройли узукка тикилиб Гулгун. Узоқ сафардан қайтиб келган ўз эри билан учрашгандек, Гулгун Қоражонга эркаланиб, тортинмай гап қотарди. Қоражон унга еб қўйгудек тикиларди.

— Бағрим ёнади, ташнаман. Ёнингдан ҳеч қаёққа кетгим келмаяпти. Васлингга тўярмиканман?

— Сабр қилинг, Қоражон ака, сабр...

У энди шундоқ севикли кишисини қандай ташлаб кетади. У энди қурилишда ишлолмаса ҳам керак. Ўнинг Қўнғирбуқа тоғига чиқиб, нола қилиб ўтиришдан бошқа иложи қолмайди. Гулгун Қоражон ёнида өркаланаар, қўлларини қўйиб юбормай, кўзларига тикиларди.

— Ишлар қалай, ўртоқ инженер?

— Яхши.

— Тўғон битай деб қолдими?

— Ҳа, сен боришингга, 1975 йилга битади.

— Ўҳ-ҳў... 1975! Ҳали саккиз йил борми?

— Ҳа.

- Шунақа секин бўладими?
- Йўқ, жуда тез бўляпти. Бир кунда ўн минг тоннадан ортиқ масса тўкиляпти... Ўқишинг бошлангандан кейин, бир ҳафтага жавоб оласан. Тўйни қиламиз. Бизнилар отанглар билан гаплашишган...
- Мунча шошасиз?
- Сенсиз ўлиб қолай деяпман...
- Агар мени яхши кўрсангиз, тез-тез келиб туриңг. Мен сизни бир қийнаб сарсон қилмоқчиман...
- Майли. Лекин тўйни қилиб олайлик...
- Майли, қилайлик,— Гулгун хандон ташлаб кулиб юборди,— юринг, энди ташқарига чиқайлик. Файзулла Аҳмедович жуда салобатли, фариштали одам. Бизни енгилтак, деб ёмон фикрга бормасинлар.

Улар олдинма-кейин юриб, хоналарни мақтагандай бўлиб, ичкаридан чиқишидди. Ҳовлида турган Хайрушка икки севишганларнинг деярли ҳамма хатти-ҳаракатларини сезиб, зимдан кузатарди. У Қоражонга ҳасад билан қаарарди. Гулгунни қучиб, ўпганини гира-шира нариги хонадаги тошойнадан кўриб қолган эди.

XIX боб

ҚАТЛАМДАГИ ОЛТИН ХУМЧА

Ҳаёт ҳаракатни талаб қилади.
Арасту

Файзулла Аҳмедович бу ўтиришга Амир Равнақни ҳам чақиририб келди. Хизмат қилиб, баъзан-баъзан чорси каравот четига енгилгина ўтириб суҳбатга қулоқ солаётган Хайрушкани ҳисобга олмагандা, улар — «улфати чор — анда маза бор» эдилар...

Хушчақчақ Амир Равнақ Чорвоқдан келган мөҳ-монларни тоза кулдириди. Бу дафъатанги асқияга Хайрушкадан ташқари, ичкари хона деразасидан чиройли кўзларини қадаб турган Таманною Тасанно, сілхона томондан Гулгуну Марҳаматхонлар ҳам қулоқ тутиб, илжайиб қўйишарди. Марҳаматхон асқия бўлаётганини сезиб турарди-ю, аммо бу кулги мазмунидан бехабар эди.

Сергайрат, озгина тортгандан кейин сергап бўлиб кетадиган шоир Амир Равнақ бу кун тўпланган ан-

жуманга ҳаяжон билан шеър ўқиб, ақлли сўзлар айтарди. Ўнг томонда ўтирган ошнаси Файзулла Аҳмедовичга ҳар замон-ҳар замонда кўз қирини ташлаб қўярди. Унинг берилиб, астойдил гапираётгани, ўз қасбига муҳаббати Музаффаровга жуда ёқарди.

Амир Равнақ бир-икки қадаҳ конъяк ичгандан сўнг жиндак ошибб, ўзининг бир шеърини ёдан ўқиб берди. Файзулла Аҳмедович «шоирнинг хотираси ўткир, ҳофизаси ширин» лигини кўргач, «инсон тафаккури», «мия фаолияти» ҳақида андак фалсафа қилди. Кейин, астрономия — юлдузлар олами, «уч юз минг нур иили наридаги бир юлдуздан ультра бинафша нурлари келиб тургани», «учиб келаётган Икар кометасининг ерга урилиши ҳақида Америка матбуоти хабарлар тарқатаётгани» ҳақида гапирди.

— Инсон тафаккури чегара билмайди,— деди Амир Равнақ Файзулла Аҳмедовичга қараб. Лекин бу гапларни аслида у кўп эшигтган, бу гаплар кўпроқ Милтиқбой ака Қўйбоқаров билан Қоражон Мингбоевга қаратилган эди,— Берунию Сино даврида ҳам инсон мияси фаолиятини ўрганилган. Мия фаолиятининг ҳали бизга номаълум бўлган томонлари кўп. Инсон миясининг жуғрофий кенглигини бирон океан билан тенгласа бўлади. У ниҳоятда беҳудуд... Унинг фаолиятига мингларча электрон ҳисоблаш аппаратлари тенглаша олмайди.

— Анави... овсарнинг мияси бу ҳисобга...

— Кирмайди, албатта!— деди дарҳол шоир қилифи совуқ, думбул ошналарини эслаб,— бу борлиқда бизга номаълум жуда кўп сирлар бор. Иккиласми, инсонни, таъқиб этувчи ва бунинг акси — инсонни муҳофаза этувчи кўринмас кучлар ҳам бор. Бениҳоя кўп ҳодисалар, ҳаётимиздаги воқеалар буни исботлайди. У куч руҳми, арвоҳми... у билан ҳеч вақт қамтима-қамти учрашилмаган, аммо у куч ўзининг мавжудлигини билдириб туради. Эҳтимол, у тирик инсонни кузатар, у инсон мияси билан боғланишар, лекин ҳеч жавоб қилмас...

— Сиз идеалист бўлиб қолибсиз,— деди Файзулла Аҳмедович.

— Йўқ, мен идеалист эмасман, азизим. Мен сиздан кўра ҳам илфорроқ кишиман. Мен материалистман. Моддага ишонаман. Қотиб қолган, фақат назарияга суюнадиган материалист эмасман, қидираман, излайман, кузатаман... Дунёда ҳали бизларга сир бўлиб қолаётган жуда кўп нарсалар бор...

— Кексайганда айниятпиз, шоир!

— Худди шу гапни айтасиз, дэб турган эдим,—
кулимсиради Амир Равнақ.

Бир муддатдан кейин яна суҳбат мавзуи ўзгар-
ди. Амир Равнақ сўзамолликни асло қўлдан бер-
масди:

— Баъзи кексалар ўлимига беш-олти йил қолгани-
да ҳамманинг жонига тегади. Ўлгудай обрўталаб, беш
қўлини оғзига баробар тиқадиган, кичикларга ҳасад-
гўй дилозор бўлади... Бир сўз билан айтганда, ёмон
қариётган бўлади. Мана, мен ҳам кексайдим. Мен
қайси тоифага киришимни ўйлаб, юрагим шигиллайди.
Киши ўзининг нуқсонларини ўзи кўролмайди. Ҳеч
ким ўзини-ўзи ёмон демайди.

— Жуда тўғри,— деди Милтиқбой ака.

— Бу гап жуда тўғри,— деди Қоражон,— сиз шу
мулоҳазага бориб, ўзингизга ўзингиз қарай олибсиз-
ми, демак, мулоҳаза қилибсиз. Бу ноёб хислат...
Шундан ҳамма гап маълум, сиз қариятпиз.

— Сиз, шоирлар, ичингиизда анча йиллардан буён
бир енгилтак кимса юради,— деди Файзулла Аҳмедо-
вич.— Бизнинг соҳада ҳам отнинг қашқасидек таниқ-
лиги бор. Ҳамма соҳада ҳам шунақалардан бир-бир
бўлиб турар экан, худо бизларни ҳам шу масалада
қисмаган. Иложимиз қанчада! У ёлғон гапириб, одамни
алдаса кошки эди, унинг жуда ҳам мараз ишлари бор.
Келинглар, яхши нарсалардан гаплашайлик,— деди
яна мезбон азиз меҳмонлар олдида ҳадеб ёмон нарса-
лардан гаплашаётганидан хижолат бўлиб.— Май ойи
асали бебаҳо, оҳ-оҳ, ҳидини қаранг, қандай яхши!—
Биллур қанддонга тўлдирилган Милтиқбой ака олиб
келган асалга нон ботириб еб,— дунёда шундоқ ширин
нарсалар бор-ку, биз заҳри олудлардан гаплашиб
ўтирибмиз.

— Гап «божадан» бошланди-да,— деди кулиб
Милтиқбой ака,— асал ейман десангиз тоқقا чиқинг,
биз томонларга келинг!

— Боргим келади. Пенсионерлик ҳам жонга тегди!
Доим меҳнат қилиб юрган одамларнинг пенсияга
чиққани унча бўлмас экан. Умр бўйи юриб ўтган
почтальонлар пенсияга чиқиб, икки йилга етмай ўлиб
қоляпти. Гидростанция қуриб юрган бизга ўхшаганлар
уйда қолиб майдагап бўлиб қолдик. Фақат қорани
қўрамиз, тажант бўламиз. Нурли нарсаларни кўрмай-
миз. Баъзиларимиз очиқдан-очиқ шикоятбозга ўхшаб

қолдик. Дам у ташкилотга, дам бу ташкилотга арива ёзамиз. Ешларга ишончсизлик ва ёмон назар билан қараймиз, гүё улар бошқачароқ бўлиб кетаётгандек. Бундоқ эмас! Ҳамма нарса жойида, еганим олдимда, емаганим кейинда, бола-чақадан тиндим, обрўйим баланд... Аммо нимадир етишмайди. Дунёнинг иши доимо бир кам, деб ўзимга-ўзим далда бераман. Лекин ётиб-ётиб, яна юрагим шопириб кетади. Нимадир етишмайди, ҳаётимнинг бир ери кемтиқдек...

— Бир ойгина Сижжакка чиқиб ётинг,— деди Милтиқбой ака,— ўзим даволайман. Икки фронтовой бир отамлашиб ётсак ҳаққимиз йўқми?! Мусаллас солганман. Каклик палов қилиб бераман...

— Буларнинг фойдаси йўқ,— деди тўсатдан Қоражон. Утирганлар бу кутилмаган, кескин гапдан ҳайратланиб, Қоражонга ялт этиб қарашибди,— «мусалласу какликлар»... йиқилиб йиғлаётган болани обаки билан овутишга ўхшайди. Файзулла Аҳмедович йиқилганлари йўқ, аммо ҳар қалай юракларида дард бор. Буни мен пайқаётируман.

— Хўш?— деди Файзулла Аҳмедович унга жон қулогини тутиб.

— Қандай дард?— Амир Равнақ ҳам Қоражонга нигоҳини қадади.

— Файзулла Аҳмедович Чорвоқ қурилишига бориши керак! Умр бўйи ишлаб келган одам ишламай туролмайди!

— Файзулла Аҳмедовичда Шўро ҳукуматининг ҳақи қолгани йўқ,— деди Амир Равнақ қаҳ-қаҳ уриб,— кўкраги орденга тўлиб кетган. Агар тақиб чиқса, бир генералдан қолишмайди.

— Дарҳақиқат, у киши генерал.

— Ўлгунча ишлатасизларми?!

— Ишлатиш эмас, фикримни қандай тушунтирасам экан... Бу одам ўз тажрибаси билан, ишлари билан олтин. Яъни, бир хумча олтин тупроқ орасида қолмаслиги керак. Бизга ўшаганлар бу тажрибадан ўрганайлик. Халқа, давлатга ҳам манфаати тегсин. Менимча, юракдаги дард шу. Агар Файзулла Аҳмедович қурилишига бошлиқ бўлмаганларида ҳам, бирон консультант ёки бирон участка раҳбарлигига ишлай өладилар-ку. У кишида мадор оз, тажриба кўп. Сарташлар обдан уста бўлганида қўли қалтироқ бўлиб қолади, дейдилар. Файзулла Аҳмедовични эшитганмиз. У киши республикамиздаги энг йирик сув иншооти

инженерларидан. Оз бўлса ҳам бизларга дарс берган. Мен у кишини ўз қурилишимизга таклиф қилмоқчиман. Милтиқбой ака баҳона, қурилишга келсин, Георгий Исаевич Садовников билан эски ошна, мен дўстим Иван Шишкин билан ҳам танишириб қўяман. Сижжакка бориб, Милтиқбой аканинг май асалини ҳам емоқ мумкин, менинг қишлоғим — Ёнқўргонга бориб, қимизу барра кабоблар емоқ ҳам мумкин... Ҳафтанинг келаси шу кунига мен сизни, шоир акамизни таклиф этаман. Шу баҳона билан Чорвоқни ҳам кўрсатаман.

— Ташаккур! — деди Амир Равнақ, — бу идеяни гиз жуда нурли. Таҳсинга сазовор! Аммо бир нарсани унутмаслик керакки, кекса одамни ишла деб зўрламанглар! Бу нақ Ҳайитбой оқсоқолнинг отидек гап! Ҳайитбой оқсоқолнинг отини эшитган бўлсангиз керак! Бу отга бир умр қамчи теккан эмас. Салор кўпригидан ўта туриб, «ҳа-чу!» деб биқинига туртишганида ўзини беш метр баланддан сувга ташлаган... Файзулла Аҳмедович ҳам шунаقا серзарда от. Сал биқинига туртсангиз борми, вассалом, сувга ташлайди, ўтга ҳам... Бечорани тинч қўйинглар! Май асал, қимизу барра кабобларга биз бормиз! Келаси ҳафта Чорвоқча чиқайлик!

— Яхши бўларди. Сиз билан бизнинг қимиз ичиб, барра кабоб ейишдан бошқа ишимиш қолмади.

— Бизлар водопровод денг... — Амир Равнақ қаҳқаҳ уриб кулди.

— Борамиз десангиз борамиз, шоир, — деди Файзулла Аҳмедович, — лекин мундоқ танамга ўйлаб қарасам, бу укамнинг гапида жон бор. Сал-пал ишлаб туриш керакмикан-ов... «Ҳунарни асрарон неткумдир охир».

— Оҳ-оҳ-оҳ, — деди Амир Равнақ, — Амир Алишер Навоий хўп айтганлар. Бу байтни фақат у ҳазрат айтишлари мумкин эди!

У аруз оҳанги «фаалан-фаалан» билан уни такрорлайди:

Ҳу-нар-ний ас-ра-бон нет-кум-дур о-хур,
О-лий-б туф-роқ-қаму кет-кум-дур о-хур?!

Қоражон ҳар қандай пайтда ҳам суҳбатдошининг гапини диққат билан охиригача эшитиш, яхши англаб

жавоб қилиш одати борлигини Милтиқбой ака кўпдан бери пайқаб юарди. Унинг бу фазилати ҳам Милтиқбой ака юрагида ҳурмат уйғотган эди. Бугунги Амир Равнақнинг узоқ ва эзмаланиб гапиришларига ҳам сабр-тоқат билан қулоқ солиб, уни ярим йўлда кесиб қўймай, охиригача эшитиши қуёванинг етуклигидан далолат бериб турарди.

— Алишер Навоий биз, Чорвоқ қурувчилари фойдасига зўр шеър ёзган экан,— деди Қоражон,— эҳтимол, сиз ҳам бир сўз айтарсиз. Бунинг учун бориб кўриш керак. Юз марта эшитгандан, бир марта кўрган яхши!

— Айни муддао! Яхши гап айтдингиз, иним. Сиз қисман ташвиқот қилиб, биз кексаларни ўтирган жойимиздан қўзғатмоқчисиз. Азизим Милтиқбойнинг май асалини бекорга едирмайдиганга ўхшайсиз?

— Ха-ха-ха-ха,— Милтиқбой ака оғзини катта очиб кулди. Унинг кўзи ёшланди. Мўйловини ҳам бураб қўйди.

— Сиз азизим Файзуллахон Аҳмад ўғлини, «тилла хумча», деб атадингиз. Бизни нима деб аташингиз мумкин?

— Сизни ҳам «тилла тўла хумча» деб атаса бўлади. Ҳаётий тажрибангиз мислсиз. Лекин сизнинг тиллала-рингиз халқ қўлига тегяпти. Сиз қатламда эмассиз, одамлар шеъру қўшиқларингиздан баҳра оляпти. «Дилимда суратинг» қўшиғингиз Ҳазинийнинг «Фаргона тонг отгунча» сидан кам эмас...

— Офарин! Инженер йигитларимиз ҳам адабиётни шунчалик севсалар, энди менга ўлим йўқ экан... Офарин! Сиз мени асиrbанд этдингиз. Чорвоқ эмас, Ҳиротга десангиз ҳам кетавераман!

— Қойил-э!— деди Милтиқбой ака.

— Сўзларингизни юракдан деб тушунаман. Бу сўзлар устимдан кулиш эмас, самими. Юзта танқидчининг сўзидан кўра сизнинг сўзларингизни қадрлайман. Оноре де Бальзак умуман адабий танқидчиларни ёмон кўрган. Ойбек бўлса фақат битта танқидчини тан оларди. Уларнинг жуда ҳам уруғи кўпаймагани маъқул. Азизим, халқ фикридан мўътабар фикр борми дунёда!

— Шоир танқидни эмас, танқидчини ёмон кўради,— деди Файзулла Аҳмедович.— Дарҳақиқат, ёмон танқидчи жонга азоб.

«Хушовоз хонанданинг куйлари жонга роҳат,
Сен қандай хонандасан, жим турсанг, жонга роҳат!» —

деган Шайх Саъдий.

— Ўшани менга кўрсатинг, устидан «БелАЗ» солиб юбораман! — деди Қоражон, — атрофимизда ҳали галамислар кўп... хафа бўлманг! Бўлмаса мана шу пашшанинг нима кераги бор! Тилла пашша ҳам учib юрибди-ку! Шуларнинг бўлгани ҳам маъқулмикан, дейман ўзимга-ўзим. Кишини доимо ҳушёр тутиб турармикан. Жуда бўлмаганда елпиб, ўзингизни пашшадан қўрий-сиз-ку! Шу томондан фойдали бўлса кераг-ов!

— Одам балоси ичида. Кўзга қараб юриш керак, — деди Милтиқбой ака, — бедазорда юрганимда оёғимга ўткир чўкиртак кириб кетди. Ҳамма ёқни кўм-кўк майса, гулзор деб ўйлаган эдим. Юмшоқ барра ўтлар орасида шундоқ чўкиртаклар борки, оёқни тешиб юборади. Оёқ деган нарса ҳам мен шўрликда битта эканини, шу битта оёғим ҳам ишдан чиқса тамоман ўтириб қолишимни у чўкиртак ўйлагани йўқ... Порт этиб кириб, қонга белади. Вой-войлаганимча қолдим. Бу фронтовик Милтиқбой оёқсиз қолади, битта оёғини бериб келган, демади-я! Вой, хунаса! Бир ой касалхонада ётсам бўладими!

— Лекин дунёда икки жарроҳ воқеасига ўхшаган гаплар ҳам бор, — деди Қоражон.

Файзулла Аҳмедович, Амир Равнақ, Милтиқбой ака «Нима воқеа?» дегандек Қоражон оғзига тикилишди. Ҳикояни тезроқ айта қолсин дегандек, шоир ҳам ҳаяжон билан Қоражонга тикилиб турарди.

— Тошкент медицина институтининг жарроҳлик клиникасида ишлайдиган икки жарроҳнинг ораларидан кўпдан оламушук ўтиб, ҳасад уларни зимдан бир-бирларига рақиб қилиб қўйган экан. Улар аслида бирга ўқиб, урушдан кейин шу клиникада жарроҳ бўлиб ишлар эканлар. Бири профессор, клиника мудири, иккинчиси ҳам профессор. Клиника мудири мансабини әгаллаш икки ўртоқни зимдан душман қилиб қўйган экан. Уларнинг ораларидағи нодўстлик институт мажлисида муҳокама қилинган. Уларнинг гаплари бири бирига қовушмаслигини медицина оламида кўплар биларди. Иттифоқо клиника бошлиғи — профессор бетоб бўлиб қолади. Унинг кўричак бўлгани, тезда операция қилиниши лозимлиги маълум бўлади. Анализларни кўрган профессор ўзини операция қилишни

«дўсти»дан илтимос қиласди. Клиникада ҳамма таажжубланади. «Профессор «К.» ўзини операция қилишини професор «Л.»дан илтимос қилибди...» Бу нима? Ўзини ўлимга тикишми? Жасурликми? Ҳатто унинг хотини дарҳол бу гапни бекор қилишга уриниб, «Л.» умр бўйи эримнинг душмани бўлиб келган, бу очиқдан очиқ ақлсизлик, дебди. Унинг беш боласи борлигини, эрини операция қилишни «Л.»га топшириб бўлмаслигини айтган. Лекин «К.» «ошибаси»га мурожаат этиб, кўричак бўйича ундан моҳир жарроҳ йўқлигини айтиб, операция қилишни ўзидан илтимос этган. «Сиз мени ноқулай аҳволга соляпсиз, мени қўйинг», — деган «Л.» «Биз биринчи галда жарроҳлармиз, инсон ҳаёти учун жанг қилаётганимизда «баъзи гаплар» қулоғимизга кирмайди. Мен сизга ишонаман», — деган «К.». Операция жуда яхши ўтиб, «К.» бирон ҳафталардан кейин ўрнидан туриб кетган. Жарроҳ «Л.» «ўртоғи»нинг матонатига қойил қолган, ўртадаги рутубат кўтарилиб, ҳозир жуда аҳил бўлиб ишлашаётган әмиш...

— Бу бир достонга мавзу бўладиган гап экан,— деди ҳаяжонини босолмай Амир Равнақ,— бўлган воқеами?

— Ҳа.

— Офарин!

— Зўр гап бўлибди,—деди мўйловини ўйнаб Милтиқбой ака.

— Инженер укам,— деди шоир,— сиз менинг кўзими очяпсиз. Дафтарчамга қайд этиб қўядиган кўп нарсалар айтяпсиз. Офарин!

— Агар сиз Чорвоқча келсангиз, дафтарчангизга жуда кўп нарсаларни қайд этишингизга ишончим комил.

— Биз сизнинг ихтиёргиздамиз.

Суҳбат ниҳоятда ширин бўлди. Ярим кечада Хайрушка Амир Равнақни уйига кузатиб қўйди. Катта хонага Милтиқбой ака билан Қоражонга ўрин солиб, илтимосига кўра Милтиқбой аканинг бошига бир чойнак чой қўйишди.

Файзулла Аҳмедовичнинг данғиллама кенг хонасида чорвоқликлар ором олиб ухлашарди...

Эрта билан Қоражон ҳовлига, водопровод кранни майкада чиқди. Бурнига шама тиқилган чойнакдек жилдираб сув тушадиган умивальник ёқмай, кран жўмрагини шариллатди. Унинг тирсакдан юқори пайлари сапчадек бўртган, жундор кўкси кенг, елкала-

ри тепадек, суюклари бузуқ эди. Лаблари қалин бўлса ҳам ўзига ярашган, қошлари узун, мош-гуруч соchlари тўлқинланиб турарди. Шундоқ қаралганда, бўйни, юзидаги чандиқни ҳисобга олмаганда, бу барваста йигит ёш жувонлар диққатини тортмай қўймасди. Ичкари уйда турган Таманно, Тасанно ўз жисмини томоша қилаётганини Қоражон пайқамасди. «Пистай бемагз агар лаб во кунед расво шавад...»¹ бўлмаслиги, то унинг оғзидан гапи чиқмагунча келишган қоматига маҳлиё бўлиб турганлар Қоражон билан сұхбатдан кейин ўзларини босиб олишиди. Хўрсинишиди. У баъзилардек ўзининг кучли гавдаси билан масрур эмас экани, гаплари жойида, ўпкасини босиб олган йигит эканлиги маълум бўлди. Ақлу гавданинг мутаносиблиги атрофини ўраган қиз-жувонларда унга нисбатан ҳавас уйғотарди. Гулгуннинг рашки келиб, ўз севгилисini тезда хона ичига киришини бетоқат кутарди. Қоражон ҳеч нарсани пайқамай, тезда ичкарига кириб кетди. Бу ҳолатни Хайрушка ҳам кузатиб турарди. Барча кийиниб, ҳовлига нонуштага тўпланишаётганда Гулгун адасига, Қоражонга салом бериб, пешайвонда улар билан ўз аҳволи ҳақида гаплашиди. Гап ўзи, онаси ва отасига доир бўлса ҳам Қоражон ўзини четроққа олди. Милтиқбой ака бирон нима керак бўлиб қолар, деб ҳеч кимга сездирмай қизига йигирма беш сўмликни бувлаб берди. Қизининг ишлари кўнгилдагидек, яхши эканини, Файзулла Аҳмедовичдан тортиб, бу хонадондаги барча кишилар унга меҳрибонлик кўрсатаётганини билиб, ота жуда мамнун бўлди. Нонуштадан кейин худди шундай учрашув Қоражон билан бўлиб, улар икков ҳовлида, ҳамманинг кўзи олдида тик туриб бир лаҳза гаплашишиди. Ошхонадан қараб турган Марҳаматхон уларнинг эру хотиндек меҳр билан, ҳаяжону шарм билан гаплашаётганини кўрди. Шу «бадбашара» йигитга Гулгуннинг унаштириб қўйилгани, яқин орада тўйлари ҳам бўлиши... уни таажжубга солди. «Бири — ҳурилиқо, ажаб келишган, бир қошиқ сув билан ютиб юборса бўладиган Гулгун, иккинчиси — барзанги... Бир яхши томони бордирки, улар эру хотин бўлмоқчи», Гулгуннинг эрга тегиб чиққанини ҳам эшитган эди. Хонтахта атрофида ўтирган Хайрушканинг Гулгун билан Қоражон иккиси тик туриб шивирлашаётганидан гаши келарди.

¹ Бемагиз писта лаб очса расво бўлади... (*Саъдий*).

— Эрта билан соат тўққиздан то уч, тўртгача институтда бўламан,— деди шивирлаб Гулгун,— кейин уйга келаман. Кутубхонада ҳам бўламан...

— Бу ерга телефон қилсам бўладими?

— Албатта. Таманноларнинг телефони 41... Эсин-гизда қоладими?

— Ҳамма телефонлар ёдда қолмаса ҳам, бу қолади.

Гулгун ерга қараб кулди.

— Ҳар куни тушимга кирасан... Мен омади юришмаган бир одам эканман. Етдим деганда, мана бунақа ишлар...

— Қоражон ака!

— Тушунарли... Одамлар менинг ёшимда болачали бўлиб, тинч яшаса-ю... Мен етим бўтадек бўзлаб юрсам. Мен худога нима ёмонлик қилган эканман!

— Озгина сабр қилинг. Гулгун сизники. Фақат сизники!— деди жуда секин ва Қоражоннинг кўзлари га тикилди. Йигитнинг ёниб, ўпкаси тўлиб турганини, эҳтиросу ҳислар туғёнини шундоқ сезиб турарди.

— Тез-тез келиб турсам буларнинг кўнглига келмасми кан?

— Телефон қилинг ё институтда учрашайлик.

— Тўғри юрасанми?

— Мана шундоқ!— Гулгун табассум қилиб, туфлиси уни билан ерга тўғри чизиқ чизди. Кейин чақнаб Қоражонга тикилди. Ўзига тикилган одамни хуш кўрмайдиган Қоражон Гулгун боқишиларидан тўлқинланиб кетди. Чиройли кўзларию жавдираб тикилиши ёқарди унга.— Агар сиз яна бундақа савол берсангиз, жавоб қайтармайман.

— Узр,— деди Қоражон. У ҳам ботинкасининг уни билан ерга тўғри чизиқ чизди.— Вот такой-да!

— Ҳа, «вот такой».— Қаҳ-қаҳ уриб кулиб юборишиди. Гулгун ҳеч ўзини кулгидан тўхтатолмасди.

— Келиб, сени тоққа опқочиб кетаман! Ундан сўнг тинчийман!

— Опқочиб кетмангу бир вертолёт топинг. Ҳар куни Чорвоқдан униб, Тошкентнинг томига қўнсин. Мени соат тўққизга етказса олам гулистон! Бунга чоғингиз келадими?

— Ўйлаб кўрамиз.

— Ўйлаб кўринг!

— Озгина пул ташлаб кетаман, майлимни? Майдачуда харажатларинг учун...

— Қанча ташлаб кетасиз? — Гулгун Қоражонга тикилди.

— Икки юз сўм.

— Оҳ-ҳў-ӯ, жаноб олийлари! — Гулгун яна кулди, — менга ҳозир адамлар йигирма беш сўм бердилар. Шу етади. Биз, бир Ватан уруши инвалидининг оиласида тарбия кўрган, унақа катта пулга ўрганмаганмиз. Мен хали юз сўмлик пулнинг қанақалигини билмайман. Кўрмаганман.

— Бўлмаса ўшанчани ол! Одамларнинг кўзи олдида қандай беришни билмаяпман.

— Янаги келганингизда. Дарҳақиқат, одамлар кўз олдида узоқ гаплашиб қолдик, бу одобдан эмас! Ойингизга, ҳаммага салом айтинг!

— Айтаман! Раҳмат!

Гулгун ичкарига, қизлар ёнига, Қоражон бўлса ҳовли ўртасидаги катта чорси каравотда ўтирган Милтиқбой ака томон юрди.

Нонуштадан сўнг улар йўлга тушишди. Нонуштага кечиккан бўлса ҳам, Амир Равнақ ҳалпиллаб, кузатишга етиб келди.

— Кейинги ҳафтага биз божам билан ҳузурингизга борамиз. Биз боргунча тўғон ишларини битириб қўймайсизларми? Иш процессини, яъни ўз она тилимда айтганимда, иш жараёнини кўришим керак. Қаранг, азизим, «жараён» сўзи қандай сержаранг. Шеърга яхши тушади. «Процесс», «мотоцикл» сўзларини шеърга тушираман деб бир шоирнинг эси кетган.

— Келинг, домла. Иш ҳали кўп!

— Ҳей, почча, менга қаранг, — деди Файзулла Аҳмедович жилмайиб, — шу ерда юриш жонимга тегиб турибди, агар божангиз ишга тушса борми, Чорвоқ томонга бедана юриш қилиб қоларсиз.

— Ишқилиб, айтганингиз келсин, фаришталар омин деб юборишин! Бўлмаса, сиз азизимни подъёминий кран билан ҳам қўзгатиб бўлмай қолди. Сиздақа одам пенсияга чиқсин экану! Мана, биз бир умр пенсиядамиз. Бир минг тўққиз юз ўттиз олтинчи йили икки ой, қирқ биринчи йили бир ой, жами уч ой «Янги ҳаёт» газетасида ишлаганман. Кейинги бир ойим оғир келди — газета ёпилиб, мана, ҳозир ўттиз беш йил бўлибдики, очилмайди. Уша ёпилганча ёпилди.

— Ундақа бўлса Чорвоқча бормайлик. Яна...

— Бораверамиз! Ишга мен эмас, сиз борасиз-ку!

Машина ёнида турганлар баробар кулишиб юборди.

Дарвоза ёнида турган Марҳаматхон, қизлари, отаси ёнида туриб дам Қоражонга, дам Гулгунга қараб турган Хайрушка ҳам ҳахолаб кулди.

Милтиқбой ака билан Қоражон ҳамма билан қўй олишиб, хайрлашиб, курсанд жўнаб кетишид.

XX боб

ҚАТЪИЯТ

Сешанба қуни эрта билан Файзулла Аҳмедович «коллегияга борадиган...»дек соқолларини қириб, яхши кийиниб кўчага чиқди. Унинг кайфи чоғ, серҳаракат ва сергал эди. У икки масалани бир йўла ҳал қилгани Ўзбекэнергострой трестига — Навоий кўчаси томон юрди. Марҳаматхон эрини дарвозагача кузатаркан, костюм-шимлари эзилмагани, ўзи эса «қоғозга ўроғлиқ қанддай» эканини айтиб, ҳазил қилди.

— Нима бўпти? — деди Файзулла Аҳмедович, — бир йигитдан қатимиз кам? Улар шафтолини икки ёриб лиққа ютади. Биз обдан чайнаб, мазасини кўриб ютамиз. Кексани камситманг, емга ўрганган от хуржун тешади...

— Об-бо-о! Яна балога қолдим, дейман... Емни сиз биласиз...

— Онаси, мен Трестга кетяпман. Инженер Мингбоевнинг гапи ўйлатиб қўйди. Менимча, бу ҳозир катта проблема. Бу йигитнинг гапида чуқур фалсафа бор; мутахассислар пенсияга чиқиб, уйда ётиб, Чифатойга равона бўлиши керакми?! Ёки хоҳласа ишлаши керакми? Мутахассислар биринчи галда! Трест бошлиги ўзимнинг шогирдим бўлса. Шогирд бўлганда ҳам энг яхшиси... Мен уни анчадан бери кўрганим йўқ, шу баҳона кўриб ҳам келаман. Иккиласми, Чорвоқ унинг қўлида. Бирон ишга юборишини сўрайман.

— Тушликка келарсиз? Нима қилиб қўяй?

— Пенсионер — камбағал одамга бир сиқимгина паловхонтўра-да! Шўрва-шўлтангга тоқатим йўқ, қорнимни оғритади.

— Бўпти!

Файзулла Аҳмедович Навоий кўчасидаги пештоқига «Чирчиқстрой» деб қабартма ҳарфлар билан ёзиб қўйилган, архитектура жиҳатидан жуда чиройли бинонинг мармар зинапояларидан кўтарилиб, иккинчи қаватга чиқди. Шу катта бинода Трест жойлашган. У

узун коридордан ўтиб, Трест бошлиғи қабулхонасига кирди. Бу ерда бежирим секретарь хотиндан бўлак ҳеч ким йўқ эди. Зарур иши борлигини, фамилиясини айтиб, секретарь хотинни ичкарига киритиб юборди. Бир лаҳзадан сўнг, Трест бошлиғи — қирқ ёшлардаги бир йигит секретарь билан бирга қабулхонага чиқиб, Файзулла Аҳмедович билан қуюқ омонлашиб, ичкарига олиб кирди. Домласини креслога ўтқазиб, ўзи унинг рўпарасига ўтирди. Файзулла Аҳмедович телефонлар тез-тез жиринглаб турганидан шогирдининг вақтини олиб ўтирмаслик учун ниятини лўнда қилиб айта қолди.

— Шу қатъийми? — Трест бошлиғи кулимсиради.

— Жуда қатъий! Менга қанақа ишни лозим кўрсанглар ҳам розиман. Уйда ётгим келмаяпти. Чорвоқда, қурилиш қайнаган жойда бўлсам. Пули ҳам мени қизиқтирмайди, академиядан уч юз, пенсия бир юз йигирма... Етарли!

Трест бошлиғи ўрнидан туриб бориб, телефон трубкасини кўтарди.

— Чорвоқ, ўртоқ Садовниковни улаб қўйинг! — деди у телефонисткага мурожаат этиб, — Файзулла Аҳмедович, сиз бу кишини танийсизми, илгари Узводстрой министрининг муовини эди. Жуда тажрибали инженер. Ҳозир Чорвоқда... — яна бир лаҳзадан сўнг Трест бошлиғи қўлидаги телефон трубкасига баландроқ овоз билан гапира бошлади: — Георгий Исаевич, салом! Ҳа, бу мен, ишлар яхшими? Доимо аъло бўлсин! Георгий Исаевич, бир илтимос бор эди. Инженер Файзулла Аҳмедович Музаффаровни танийсизми? Ҳа, жуда тўғри. У киши бизнинг домламиз. У кишидан ҳам салом. Жуда тўғри. Файзулла Аҳмедович, Чорвоқда ишлайман, деяптилар. Инженерларингиздан бири у кишининг юрагига катта тўлқин солибди... Бир ҳисобда, шундоқ ишбилармон одамлар уйда ётиб нима қиласди! Домламиз саломат бўлсинлар, доимо ишлаб юрган одам уйда ётолмайди. Иккиласми, юрга нафим тегсин, деяптилар. Бу партиявий гап! Ихтиёрингизга борсалар нима дейсиз? Яшанг! Домлани эҳтиёт қиласизлар-да! Раҳмат! Хайр, саломат бўлинг, Георгий Исаевич, — деди Трест бошлиғи.

Файзулла Аҳмедович Ўзбекэнергострой трестидаи жуда хурсанд чиқди. Эртасига ёқ Амир Равнақни олиб Чорвоқга югурди. Садовников ҳам уни эски ошнасиdek илиқ қарши олди. Шу куни ёқ Музаффаровни кадрлар

бўлимининг вақтинча мудири қилиб, буйруқ берди. Бу вазифани вақтингчалик бажарип турган забардаст йигитни СУ-5 участкасига бошлиқ қилиб тайинлади. «Бошқармада ёнма-ён ўтирамиз, бамаслаҳат ишлаймиз», — деди Георгий Исаевич Файзулла Аҳмедовичга.

Орадан икки ой ўтгач, партия ҳисобот мажлиси бўлди. Вақтинча кадрлар бўлимининг мудири, консультант, кекса инженер Файзулла Аҳмедович Музффаров Чорвоқ қурилиши партия ташкилотининг бюро аъзолигига ҳам сайланди.

XXI боб

БИРИНЧИ ТҮҚНАШУВ

Жаҳти инсон бар ин наёмад, варна,
Гардуниро низ бар замин меовард¹...
Бедил

Тошкентга тушиб, Гулгунни кўриб келган Қоражоннинг кўнгли анча таскин топди. Севиклиси инсофли кишилар қуршовида, маданий бир хонадонда турганию Музффаровдай бир валламат кўзи олдида экани наинки кўнглига таскин берсин, аксинча, уни гоятда қувонтириди. Файзулла Аҳмедович ҳомийлигида институтни тугатиб олса, бу қандай яхши! Шу баҳона бўлиб, Амир Равнақ билан танишиб олди. Музффаровнинг ўғли Хайрулла, қизлари Таманно ва Тасаннолар унда яхши таассурот қолдирди — улар маданий, ўйлаб гапирадиган, дид ва идрокли фарзандларга ўхшарди. Лекин Тошкентдаги баъзи машҳур кишиларнинг фарзандлари жуда ҳам талтайиб, отасининг академиклиги — унинг академиклигидек, отасининг министрлиги — унинг мансабдорлигидек бўлиб кўриниб, димоги кўтарилиб кетганини биларди. Узгаларни менсимай қўйган, яхши еб, яхши кийиниб, меҳнатдан қочадиган бўлиб қолган баъзи йигитчалар Қоражонга маълум. Ҳа, пўконидан ел ўтмаганлар, дерди у. Тошкентда ўқиб юрган кезларида, хом семиз, калондимоғ бир йигитчани полга яланғоч ётқизиб, белидаги энли солдат камари билан саваламоқчи бўлган эди. Кейинги йилларда бир ёмон

¹ Инсон агар жаҳд қиласа,
Осмонни ҳам ерга олиб тушади.

нарса — баъзи ёшлар ўртасидаги Ғарбга эргашиш, беибо қилиқлар қилиш бўлди. Лекин, кўплар танийдиган Музаффаров болалари бундай «дард»дан холи эканлигини сезгандек бўлган Қоражоннинг дили равшан торти — Улуғ Батан уруши қатнашчиси, фронтчи Музаффаров ўз болаларини яхши тарбиялаган экан, деган гапни дилидан ўтказиб қўйди.

Эрта билан, нонуштадан кейин Қоражон Милтиқбой акани олиб, ўзининг «тоғ такаси»да, Чорвоқ қайдасан, деб йўлга чиқди. Машина тасмадек асфальт йўлда гизиллаб учиб бораради. Икки соатлар чамаси йўл босиб, Хўжакентга етишди. Кўприкдан ўтиб тоқقا кўтарилишди. Милтиқбой акани Сижжакка элтиб, Санобархон опа қўлига омон-эсон топширгач, яна орқасига қайтиб, Чорвоқча келди.

Кўнгли таскин топган Қоражон эртасига эрта билан тиниқиб турди, руҳи тетик тортиб, кучли билакларини шимарди. У тўппа-тўғри тўғон қурилишига келди. Кайфи чоғ, гўшангадан чиққан куёв боладек мамнун, дунёда ундан баҳтиёр кимса йўқ эди. Унинг Гулгунни бор, Гулгун дунёдаги энг гўзал қизларнинг бири. Ҳуснисиз бир кимсани севган қиз ноёб қиздир. Қоражон шу олижаноб қизга бутун умрини багишлаб, уни баҳтли қилиб, кафтида кўтариб юрмоқчи бўлди. Бу унинг дилидаги эзгу нияти. Нигоралар ҳаётда нигорон бўлган, Раънолар сўлган, Фарҳоду Шириналар бир-бирига етолмаган.... Лекин Гулгуну Қоражонлар бир-бирига етади, баҳт топади! Чунки у замон бошқа, бу замон бошқа. «Юзи тиниқ, чиройли қизларнинг кўплигининг боиси шуки,— деган эди Амир Равнақ,— сариёғ, тухуму қаймоқнинг, оқ нону шириналарнинг кўплиги. Бўлмаса бизнинг хотинларимиз баъзиларга ўхшаб заъферон бўлиб кетарди...»

Ёнқўргонда Қандил буви ўз болалари орасидаги ночорроғи ёнида кўпроқ бўлиб ёрдам бериб, ёнини олиши уруғларига маълум эди. Негадир бугун эрта билан кайфи чоғ Қоражон хаёлига она лоп-лоп туша бошлади. Ишлари яхши, курсанд пайтларида у онани, кичкина жиянларини кўп эсларди.

Қоражон тўғон қурилиши штаби олдида машинани қолдириб, одатдагидек даставвал бош диспетчер хонасига кирди. Аппаратлар ёнида тинмай телефонбозлик қилиб ўтирган Исаак Ратман Қоражонга кўзи тушиши биланоқ «тўхтанг, чиқиб кетманг!» ишорасини қилиб, яна кимлар биландир гаплашаверди. Бир

лаҳзадан сўнг у қўлидаги трубкани қўйиб, яна бошқа трубкани Қоражонга тутқазди. Қурилиш бошлиги билан улаб қўйди.

— Эшитаман, ўртоқ Мингбоев? — қурилиш бошлигининг ўткир овози бутун хонага эшитилди.

— Сўраган экансиз, Георгий Исаевич?

— Қаёқда юрибсиз? КИА¹ ни текширганмидингиз? Икки трубали пъезометр сув сирқиётганини кўрсатяпти. Олтинчи стборда.

— Мен ҳозир тўғонга кўтарилеман. Шахтага гушиб приборларни кўраман.

— Кўриб бўлгач, тезда Бошқармага келинг!

— Хўп,— Қоражон трубкани Исаак Ратманга бергач, хона деворидаги тепасига «КИА и контроль состояния Плотины Чарвакской ГЭС» деб ёзилган каттагина схемага кўз ташлади.

— Мана шу ерда! — деди Исаак Ратман қулогида трубка, қўли билан схема-чертёжга ишора қилиб,— бу кеча сезилган. Сизни тоза қидиришди. Қоражон Мингбоевич, қаёқда эдингиз?

— Тошкентга кетган эдим.

— Э, аттанг! Қурилиш бошлиги ҳам, бош инженер ҳам анча диққат бўлишди. Улар ёнида бошқалар ҳам бор эди.

Девордаги КИА схемасига тикилиб турган Мингбоев тезда диспетчер хонасидан чиқиб, машинасига ўтириди. Шу лаҳзанинг ўзидаёқ айланма йўллар билан ғизиллаганча юқорига кўтарилиб, тўғон устига чиқди. Бу йўллардан вағиллаб харсанг тош ташиётган улкан «БелАЗ»лар, «МАЗ»лар ўз ёнларидан тог такасидай эпчиллик билан ўтиб кетган машинага боқиб, кеча кўринмай қолган участка бошлиғига кўз ташлашди.

«Ҳари қиз овга чиқди, кетидан ғовға чиқди... — деди ўзига-ўзи Қоражон Мингбоев.— Яна беҳи новдаси билан саваланадиганга ўхшайман! Баъзиларга ҳам гап топилиб қолди. Пурвиқор Ҳазратов энди бошлиқлар олдида тумшуғи билан патини тараб, томошибин бўлади, менинг кўнглимни юпатиб, «ҳамдард» ҳам бўлса керак... Унинг товланишига, риёкорлигига ҳеч чидаб бўлмайди. Орқадан, одамлар орасидан бурнини жийириб кулади. Ҳа, майли».

Мингбоев прораб билан, «БелАЗ»да харсанг таши-

¹ КИА — контроль-ўлчов аппаратлари.

ётган шоффёр ошиналари билан бир муддат ҳол-аҳвол сўрашиб олгач, «ЧИ» ҳақида улардан гап сўради. Кеёнин шошмасдан, олтинчи стборга — шахтага тушиб кетди.

— Йигирма минутдан ортиқ турманг! — деди прораб Никаноренко, — ҳавоси ёмон. Вентиляцияни ишга солинг. Датчиклар ёнида эҳтиёт қўшимча батарея бор...

— Хўп, — деди инженер Мингбоев темир нарвон билан пастга тушиб кета туриб. Этда-бетда чироқ ёниб тургани билан шахта таги кўринимас, қоронги ва жаҳаннам эди. У ўн беш метрча пастга тушгач, бу ердаги бетон хонада андак тўхтади. Бу ерга ўрнатилган бетон қувурлар, ингичка-йўғон трубалар ҳамда барометрга ўхшаш, доира шаклидаги пъезометрга кўз ташлади. Унинг остидаги оқ, қизил, кўк рангга бўялган трубалар ичак-човоқларга ўхшарди. Пъезометрларнинг салпал ликиллаб тургани, чап томондаги миллар тўртинчи стбор яқинида, тўғоннинг сув қопланган еридан бир-икки метр пастда озгина сизот қатламга ўтаётганини кўрсатиб турарди. Қоражон Мингбоев қўлидаги ўткир батарея нурини юқоридаги датчикларга, динамометрларга ҳам тушириб, уларни ҳам кўрди. Шахтанинг ҳамма томонини кузатди, бир лаҳза қулоқ осди. Пъезометр трубаларига қулоғини қўйиб кўрди — юқорида гумбурлаб тупроғу харсанг тўкаётган машиналарнинг юриши, тарақ-туруқлар шахта ичидаги шундоқ эшитилиб турарди. Лекин ер қаърининг ваҳимаси кишини қўрқувга солар — агар бирон қатлам кўчиб озгина сурисса бас, бу ердан асло чиқиб кетиш мумкин эмас. Қандайдир бир гувиллаш ярим қоронги шахта қудуғи ичидаги ҳоким. Қоражон Мингбоев яна ҳам пастга тушиб, бошқа аппаратларни ҳам кўздан кечирди. Йигирма минутдан ошиб кетгач, юқорида люк-чўян қопқоқ ёнида ўтирган прораб Никаноренко жаҳаннам ўрага оғзини тўғрилади:

- Минг-бо-ев! Эшиятпизми? Ўртоқ Минг-бо-ев!
- Ҳа-а-а!
- Чиқиши керак! Йигирма минутдан ошди!
- Ҳо-зир.

Ярим соатлардан сўнг Қоражон Мингбоев пъезометр берган маълумотни дафтарчасига ёзиб олиб, юқорига кўтарила бошлади. Йўл-йўлакай сейсмоаппаратларни ҳам кўздан кечирди. Барчаси нормал ишлаб турибди. Сейсмик жиҳатдан актив зоналарда бундай

ўта баланд тўғонлар қуриш ва бу тўғоннинг мустаҳкамлиги, боқийлиги, арzonга тушуви жуда муҳим, деган эди Садовников ҳам, Музafferov ҳам. Контроль-ўлчов аппаратларининг тўппа-тўғри, аниқ маълумот бераб туриши маҳаллий материаллардан қурилган ўта улкан тўғоннинг хавфсизлигини таъминлайди. Бу тўғон Совет Иттифоқида ягонадир... Бу гаплар Қоражон Мингбоев хаёлидан ўтди. У юқорига чиқиб, очиқ ҳаводан ўпкасини тўлдириб бир-икки нафас олди. Шундоқ-қина ерга ўтириб, у ёқ-бу ёққа аланглади.

— Тинчликми, Мингбоевич? — сўради прораб.

— Тинчлик. Ҳовлиқадиган ҳеч гап йўқ! Пъезометр тўртинчи стборга яқин ерда озгина сув сирқиётганини кўрсатяпти. Вақтида сезганимиз ҳар қандай хавфнинг олдини олади. Бўлмаса, ёмон албатта... Аппаратларни биз нима учун қўйдик? Фасонга қўйганимиз йўқ! — Қоражон Мингбоев ўрнидан туриб, қоқинди. Кейин машинаси томон юра туриб, прорабга қаради.— Азизим, мени қурилиш бошлиғи чақиряпти. Шу масалада. Ҳеч кимга жавоб берманг, ҳамма ўз жойида бўлсин. Эҳтимол, тўртинчи стбор яқинидан бир-икки метр ерни ковлаб очишга тўғри келар. «МАЗ—525» — шиббалаш машинаси ҳам тайёр турсин! У ҳам зарур!

— Тушунарли.

Қоражон Мингбоев машинасини ҳайдаб, тўғон тепасидан пастга тушди. Тўғон устида ишлаётган кишилар унинг шитоб билан Бошқарма томон кетаётганини кўриб туришарди.

Бир муддатдан сўнг у Бошқармага етиб бориб, юргурганича иккинчи қаватга чиқди. Садовниковнинг қаёққадир чиққанини, қабулхона секретари негадигу унга ҳайратомуз боққанини сезди. Бир лаҳза коридорда турди. Ундан сўнг парторг кабинети томон юрди, аксига, Шишкин ҳам кабинетда йўқ эди. У коридорда бир муддат ғўдайганча туриб, девордаги ГЭС, тўғонда ишлаётганлар фотосуратларига тикилди.

«Бир кун йўқ бўлганига шунча гап. Қабулхона секретарининг ҳам қовоғидан қор ёғмоқда. Бошқалар сал аксирса ҳам, шамолладим, деб ҳафталаб ётиб олишади. Эчкинику ҳар куни очиқ, айби йўқ, аммо қўйники бир куни очилса дув-дув гап...» Бу маҳол Қоражон Мингбоев дилидан ўтди.

Бир муддатдан кейин қурилиш бошлиғи қабулхонасининг секретари, бояги юзи чўзиқ, қиргий бурун хотин коридорга чиқиб, инженер Мингбоевни теле-

фонга чақирди. Югуриб, бошлиқ кабинетига кирган Қоражон стол устидаги трубкани олди.

— Лаббай?

— Мен, Садовниковман.

— Эшитаман, Георгий Исаевич.

— Биз ҳаммамиз түғон устида түпландик. Мен диспетчер хонасидан телефон қоқяпман. Сизни овора қилганим учун узр. Иш шундоқ бўлиб қолди. Тўғри түғон устига келаверинг.

— Хўп бўлади.

Қоражон Мингбоев кабинетдан чиқибоқ, яна «ТТ»-да изига қайтди. Садовников ҳеч қачон бақирмас, дўқ ҳам қилмасди. У жуда вазмин киши, аммо ҳақини бирорда қолдирмасди ҳам, юмшоқ супурги бўлиб кўринса-да, беҳи новдаси билан яхшилаб савалайдиган одам эди. Инженер Мингбоевнинг сўрамай ишни ташлаб кетиши, кутилмагандаги «ЧП» ва яна «унинг ахлоқига тааллуқли баъзи гаплар» тарқалгани саваласа арзийдиган сабаб эди. «Иринанинг ўйнаши», деган гап ҳам Иван Иванович Шишкин қулогига етди. У бу гапни ифво деб ҳисоблади, чунки магазинда ишлайдиган Ирина анча шўх аёл эди. Бу гаплардан Мингбоевнинг мутлақо хабари йўқ. Садовников секретари, қиргий бурун хотин «барометр» эди, Бошқармада ва умуман инженер-техник ходимлар, раҳбарлар ўртасидаги ҳамма гапдан воқиф, қингир гапларни тиллага сотиб оларди. Ўзи эр кўрмай, шундоқ ўтиб кетаётгани сабаблими, «ўйнаш», «юармиш»... деган гапларга жон қулогини тутар ва тезда эл ичига тарқатиб юборишда жонбозлик кўрсатарди. Бир неча инженер йигитлар Георгий Исаевичга, шу хотинни ўқотинг, деб астойдил илтимос қилишди. Аммо бунинг иложи бўлмади, у ўз ишига пишиклиги, ғазифасини яхши бажараётганилиги сабабли уни четлатиб бўлмасди. «Бу хотиндан қўрқсаларинг, тўғри юринглар! Тўғри юрсанг, ҳеч ким гиринг деёлмайди. Бир ишларинг борки, оёқларинг қалтирайди», -- деган эди бир куни Георгий Исаевич Садовников. Инженер Ҳазратов мана шу хотинни ҳам қўлга олган эди.

Инженер Мингбоев түғонга етиб борганида, бу ёрга қурилиш бошлиғи Садовников, парторг Шишкин, бош инженер муовинлари, консультант Музаффаров, гидропроектдан келган Леднев, инженер Ҳазратов, прораб Никаноренко, «БелАЗ» ва шиббаловчи «МАЗ — 525» машиналарининг ҳайдовчилари тўпла-

нишган эди. Лабораториядан Галина Сергеевна Шишкина ҳам келган. Қоражон Мингбоев яқинлашиши билан Садовников қўл беришиб кўришди-да, шу лаҳза сўради:

- Ўртоқ Мингбоев, шахтага тушиб чиқдингизми?
- Ҳа.

Садовниковнинг ўшқириб дўқ уриб: «Қаёқда юрибсиз? Ишлар расво-ку!» — демай, жуда босиқлиқ билан инженер Мингбоевни қарши олганидан бу ерда, одамлар ичидаги турган баъзи бирорлар ҳайрон қолди. Улар ҳозир жанг бўлишини кутиб туришган эди. Аксинча, Садовников у билан қўл бериб кўришди.

- Фикрингиз қандай?

— Пъезометр тўртинчи стбор яқинидан озгина сув сирқиётганини кўрсатяпти.

— Нега бундай бўлди экан? Ўртоқ Шишкина, сиз айтинг-чи, тўртинчи стбор яқинидаги зичлик анализларини ўзингиз кўрганимидингиз?

— Ҳа,— деди Галина Шишкина қизариб. У одамлар ўртасида жуда қийналиб гапиради.

— Ўн тўртинчи стбор, ўн учинчи стборлар яқинида ҳам сув сирқиган. Бошқатдан шиббалаганмиз,— деди инженер Мингбоев гапни бўлиб,— бунинг ҳеч хавфли томони йўқ.

— Мен сизнинг бу фикрингизга қўшилмайман! — деди тўсатдан инженер Қиёмхўжа Миёнхўжаевич Ҳазратов ранги оқариб,— кичик дарз катта кемани чўктиради. Сирқиган сув катта ўпирилишлар пайдо қиласди.

Қоражон Мингбоев ўз курсдоши, ўртоғи Ҳазратовнинг ранги оқариб, титраб гапирганидан, унинг юрагида қандайдир бир ўч дарди ётганини пайқади. Нега бундай бўляпти? Нега унинг оғзидан сафродек бу гап отилиб чиқди? Қоражон бир лаҳза қотиб қолди. Ўз дўстининг бу даражада ёмон кўз билан қараётганига ҳайрон бўлди. Еки ўртага бирон ифво тушдимикан?.. Қоражон оғирлик қилиб, норасо гап гапириб юборишидан ўзини сақлади. Кулди. Совуқлонлик билан шундай деди:

— Назарий жиҳатдан бу тўғри. Лекин биз бунгача қўймаймиз.

— Даҳшат! Бунга кулиш эмас, йиглаш керак! Агар биз бепарво бўлганимизда тўғон барбод бўларди. Республика пойтахти Тошкент хавф остида қоларди...

— Кўп ваҳима қиласкерманг! — деди бир зумдан сўнг Қоражон Мингбоевнинг жаҳли қўзғаб.

— Ўртоқлар, ҳиссиятга берилмай гаплашайлик,— деди вазминлик билан Садовников,— ўртоқ Музafferов, сиз нима дейсиз?

— Фарҳод ГЭСнинг бош тўғони темир-бетондан. Унинг ҳар бир сантиметри менга маълум,— деди вақтинча кадрлар бўлимининг мудири, консультант-инженер Файзулла Аҳмедович Георгий Исаевичга қараб,— тўғон битгунча, ҳатто эксплуатацияга топширилганигача икки бор жиддий дарз аниқланган. Бетонда-я! Азаматлар бир кундаёқ тузатишган эди. Инсон ўз қўли билан яратган нарсасини ўзи тузата олади. СУ-2 участкасининг бошлиғи инженер Мингбоевнинг ўзига бу иш топширилсин, у тезда тузатиб, бизга хабар қиласди. Пашибадан фил ясаш керак эмас. Иш бор ерда нуқсон бўлади.

— Ҳурматли Файзулла Аҳмедович, сиз жуда тажрибали одамсиз, академияга муҳбир аъзосиз. Лекин бу катта нуқсонни хаспўшламаслигингизни сўпардик,— деди Ҳазратов прокурорга ўхшаб,— сизнинг ҳурматингиз бор, ёшингиз катта, устозсиз, аммо...

— «Аммо», деганингиз нима? Мен тўғрисини айтдим. Бўэчи билганини тўқыйди. Бу, шов-шув кўтариб, ур-сур қиласидан гап эмас! Одатдаги иш, одатдаги камчилик, холос.

— Сиз нима дейсиз? — Садовников Ледневга қаради.

— Инженер Музafferов лўнда қилиб айтди.

— Тузатсин, мен ҳам шуни айтипман, Георгий Исаевич,— деди бир оз ўпкасини босиб Ҳазратов,— лекин тезда тузатсин! Бўлмаса хавфли! Оғзингизга толқон солғанмисиз, ўртоқ Шишгин? Нега бир нима демайсиз?

— Масала равшан. Тузатиш керак! Мен нима дердим.

— Кейин бу ишни партия мажлисида кўришимиз керак! — деб қўшиб қўйди Ҳазратов.

— Мумкин. Гаплашадиган бошқа гапларимиз ҳам бор,— жавоб қиласди Иван Иванович Шишгин.

— Ўртоқ Мингбоев, ўртоқ Никаноренко,— мурожаат қиласди Садовников,— амалий ишга ўтайлик, нима қиласизлар?

— Эксаваторни карьердан олиб келдик, ана, шай турибди,— деди Мингбоев,— мана шу ерни уч метрча

очиб қайтадан шиббалаймиз. Вассалом! Нима дейсан, Никаноренко?

— Гап шу-да! Қўрқманглар. Ваҳимага асос йўқ! Инженер Мингбоевнинг айтганлари тўғри, Георгий Исаевич! — деди Никаноренко, — бошим билан жавоб бераман! Инженер Мингбоев ишига пишиқ, қўриқ манглар.

— Бошга эҳтиёт бўл,— деди ҳазиллашиб Садовников,— бу бошни бир марта жўва билан уриб фурра қилишганини биламиз. Лекин бизга панд берсанг, лўм билан уриб, пачоқлаб қўя қоламиз-а, шуни биласанми?

— Об-бо, Георгий Исаевич-е, ўша воқеа ҳали ҳам ёдингизда бор экан-да,— хаҳолаб кулди Никаноренко,— хотинимнинг калтаги-ку өсимдан чиқиб кетди, лекин ўша жонон ҳамон ёдимда...

— Бу прораб — шоир! Бунинг тарихини сизга кейин гапириб бераман, Файзулла Аҳмедович, бу жуда қизиқ йигит,— деди Георгий Исаевич Музafferov қулогига шивирлаб, кейин кўз қисиб,— хотини бунинг бошига жўва билан урган. Узининг хотини паризод, кўрсангиз оғзингиз очилиб қолади. Анови Галинадан ҳам дўндиқ. Ақлли, чаққон. Бу нодон бир ойимтилла-га ошиқ бўлиб қолган. У «жонон» бир пақирга арзимайди! Бизни анча қийнади бу хумпар. Арзабозлик, шикоят, муҳокама...

— Сиз билан биз эҳтиёткорроқ әдик, азизим. Булар бугун ошиқ бўлиб, әртага хайр дейишади. Бизлар бурунгининг одамларимиз-да, Георгий Исаевич.

— Никаноренко! Мана, участка бошлиғи Мингбоев, сен прораб сифатида асосий кучларни ишга солиб, сирқиётган сувни йўқотинглар! Мингбоев таклифи асосан тўғри. Шиббалаш, шиббалаш ва яна шиббалаш! Агар яна бирон ердан сув сирқиса, кўрасизлар! Галечка, сиз ҳам лабораторияда яхшироқ текширинг.

— Хўп бўлади, Георгий Исаевич.

— Кечқурун менга хабар қилинглар. Келиб кўраман! Ҳар куни шахталарга тушиб, контролъ-ўлчов аппаратларини ўз кўзингиз билан кўриб, менга айтиб турасиз!

— Хўп бўлади!

Бошлиқлар машиналарга ўтириб жўнашди. Ҳазратовнинг тарвузи қўлтиғидан тушиб, кекирған сигирдек бўлиб, бўшашиб жўнади.

АЛП ВА ИБЛИС

Ҳазратовни «оғзи айғоқ», тили тойғоқ» дейишарди. Үшанда Қоражон ўз ошинасининг ёчини олиб, «қишлоқи» дўстларини сўккан эди. Орадан қанча йиллар ўтди, тошкентлик курсдошини доимо иззат-икром қилиб юрарди. Бугунги муомала уни жуда ўйлатиб қўйди. Бирга ишлашиб синамагунча инсонни билиб бўлмас экан. Уни сиртини силаб, ўзини ўйладиган бир йигит эканини сезарди-ю, аммо қулай фурсат етганда арзимаган бир шуҳрат учун ўз дўстини жарга тепиб юборищдан қайтмайдиган номард эканлигини мутлақо билмасди.

Тўғонда қолган инженер Мингбоев билан прораб Никаноренко шу лаҳзанинг ўзидаёқ экскаваторни ишга солиб, шиббаланган ўн метр атрофидаги ерни бошқатдан ковлай бошлади. Иван Иванович Шишкин билан Галина ҳам шу ерда — иш тепасида қолишиди. Қоражон Мингбоев хомуш, экскаватор ковлаётган ердан жилмасди. Қорасовуқ юзга уриларди. У Галинадан уялар, ўзини сал четроққа олиб, ковланётган ерга тикиларди. Бу нуқсон унинг нуқсонидек, изтироб чекарди. Энг оғир пайтларда ҳам ўзига йўл топа олиш мард кишининг иши. Хато ёки муваффақиятсизлик олдида ўзини йўқотиб, парокандаликка тушиш яхши эмас, деган эди бир куни партбюорода Музafferов. Лекин ўзига йўл топиш, қийин аҳволдан чиқиш фиригарлик йўли билан бўлмаслиги керак! Қийин аҳволга тушиб қолганда чидамли бўлиш, сукут сақлаб пайт пойлаш керак. Рақибга панд бериш йўлларини ҳам яхши билиш керак. Гарчи, гуноҳи йўқ, ҳақ бўлганида ҳам Ҳазратовнинг бетига чопмагани яхши бўлди. Бундан фойда йўқ. Бу сафар у очиқдан-очиқ сурбетлик қилди. Георгий Исаевич Садовниковнинг вазминлиги унга жуда ёқарди. Бу жуда ажойиб, ишбильармон раҳбар. Унинг ўзи ва отаси ҳам Тошкентда туғилган. Ўзбек тилини яхши билади. Баъзан қочиримлар ҳам қилиб қўярди. Унинг бир ўтиришда айтишича, бундан сал илгарироқ қариб қолган отаси яқинда, Россияга бориб келай, деб, Рязань обlastидаги Чистие Пруди деган қишлоққа жўнабди. Бу ерда унинг қариндош-уруғлари яшар экан. Бобоси ўтган асрнинг бошларида Ўрта Осиёга келиб қолган. У Рязандаги

қишлоғида уч кундан ортиқ туролмабди. Жуда зерикебди — Ўзбекистон уни оҳанрабодек тортар экан. Бу ерда унинг неваралари, уй-жойи, дўстлари бор... Чистие Пруди қишлоғида бобосининг уруғларидан биринки кишини топибди. Улар ҳам жуда ётлашиб кетган, асли ўзининг уруги эканига ҳам шубҳа қилишарди. Садовников у қишлоқда туролмабди. Илдизу томири Ўзбекистонда, у поезд билан қанча манзилу марохилни тай этиб, яна Тошкент тупроғига қайтиб келибди. Бунда бола-чақалари, уруғ-аймоғини кўриб, улар бағрида кўнгли таскин топибди. Сафардан қайтиб келган куниёқ Файзулла Аҳмедович Музafferов чолни зиёрат қилиб чиқди. Қўшнисини кўриши била-ноқ кўнгли тоғ бўлди. Нарироқда яшовчи Амир Равнақ ҳам кечга яқин Садовниковлар ҳовлисига кириб, сафардан қайтиб келган бобойни қутлаб чиқди. Бошқа қўшнилари ҳам кириб чиқди. У шу атрофдаги ўзбек қўшниларисиз туролмаслигини, уларни соғининини пайқади. Бу гап ҳам Қоражон Мингбоев кўнглидан ўтиб, бошлиқнинг ҳовлиқмаслиги, бу ҳам бир ноёб талант эканини сезди.

Тўғон устида кун бўйи қизғин иш кетди. Сизилиб ўтётган игнадек сув йўлини ҳам топишиди. Бошқатдан шиббалаб, метин қилиб юборишиди. Қоражон яна икки бор шахта ичига тушиб чиқди. Шиббаланган ердан намуна олган Галина Шишқина лабораторияга олиб бориб, жуда пухта анализ қилди. Оғзи куйган қатиқни ҳам пуфлаб ичганидек, ҳаммалари обдан текширишар, ўз-ўзларига ишонмай, бошқалардан ҳам текшириб кўришни сўрашарди.

Кечга яқин участка бошлиғи билан прораб «ТТ»да физиллаганча қурилиш бошқармасига бориб, Садовниковга иш бажарилганлиги, пъезометрлар ва бошқа аппаратлар нормал ишлаб тургани ҳақида доклад қилишди. Бу ерда Ҳазратов ва Шишқин ҳам ўтирган экан. Бошлиқ ёнидан чиқиб, ўз уйларига жўнашди.

— Камтарлик ҳам жонимга тегиб кетди! — деди у йўлда Никаноренкога қараб, — катта-кичикка хушмуомала бўлиб, қўл беришиб кўришавераман. Ичимдан қиринди ўтиб, хафа бўлиб турганимда ҳам буни бошқага билдирмай, илжайиб омонлашаман. Ошналаримдан биронтаси бетоб бўлиб қолса, ўпкамни қўлтиқлаб дам касалхонага, дам уйга югураман. Аммо баъзилар бу ишларимни бошқача тушуняпти. Мени менсиш у ёқда турсин, бу жуда бачканা, жўн одам экан, деб

ҳисоблаяптилар. Менга юқоридан қараб, кўришгилари ҳам келмайди. Мен турган бўлсам, бир «адам ҳам мен томонга силжишмайди, мен бориб ўша хумпар Ҳазратов билан кўришишим керак. Нега мен бу хумпарга қуллуқ қилишим керак? Камтарлик деган нарса ҳам жонимга тегди. Кимга камтарлик қилишни, кимга димоғдор бўлишликни билиш керак экан, ошна! Илон заҳрининг фойдали томони бўлганидек, баъзан димоғдор бўлишлик ҳам керакка ўхшайди. Итга ҳам, битга ҳам камтар, одамохун бўлаверсанг, ўзингни ўзинг ҳақорат қилаётган бўларкансан. Уша ифлос сени керилиб кетган, димоғдор деб орқангдан сўкса, бу яхси! Ўшаларнинг сўkkани — мақталганинг. Сўкса — сўксин, майли, гуноҳинг тўкилади!

Қоражон Мингбоев кўз олдида ўша шахс ғўдайиб турарди. Асабдан тишини тишига қўйиб, бошлиқлардан бирига яқин бориб, қўл бериб кўришгани, Ҳазратовнинг киборлик билан қўл узатганидан ранжиди. Нега мен у билан кўришдим? Мен нодонга шу иш керакмиди?

Уйга келгач, асаби бузилган Қоражоннинг уйқуси қочди. У анча вақтгача ухлолмай, у ёқдан-бу ёққа ағанаб ётди. Аллавақтдан сўнг валидол шимиб, қотиб ухлаб қолди. Эрта билан асаби анча пасайиб, яна одатдагидек қурилишга, тўғонга келди. Ҳазратовнинг кечаги қилиғини эслаб, Қоражоннинг сочи тикка бўларди. У Қоражон билан ёлғиз учрашганида яхши гаплашар, хушомад ҳам қиласар, аммо кўпчилик ўртасида уни танимагандек миқ этмасди. Ҳатто у билан қуюқроқ мулоқотда ҳам бўлмасди. «Хей, хумпар, менга сенинг обрўйинг керак эмас, муҳтожлик еrim йўқ. Гаплашадиган бўлсанг, одамга ўхшаб ҳамма вақт бир хил гаплаш-да! Сенинг обрўйингга мен зор эмасман, сен ҳар қанча ариллаб-дариллаб юрганин, барибир майда одамсан!.. Савлатга эмас, меҳнатга қараб баҳоланади. Сунъий обрў, маккорлик билан ўзига-ўзи таққан тақинчоқлар вафо қиласади. Ўшанда арзимас кимса эканинг маълум бўлиб қолади. Сен топган шуҳрат тарих ғуборлари остида қолиб кетади. Фирибгар ҳар қанча ўзини фил қилиб кўрсатмасин, келгусида бу «фил» сичқонга айланиб, қайси бир ковақда йўқ бўлиб кетади. Дунёда турли хил одамлар бор: бирини кўриб фикр қиласан, бирини кўриб шукур қиласан», — деди ўзига-ўзи Қоражон Мингбоев. Аммо Ёнқўргонга Сораркан, кўр бувиси унинг эшикдан кириб келаётга-

нини биларди. Қоражоннинг қадам ташлаши, нафас олиши ва умуман ҳовлига кириши биланоқ бу невараси Қоражон эканини, у келганини ҳаммадан аввал биларди. Лекин баъзи кўзи очиқлар шундоқ ёнида турсанг ҳам сени кўрмайди, балки кўришни истамайди.

Орадан учтўрт кун ўтгач, Тошкентда «Чорвоқ тўғони ўпирилиб кетибди, сув шаҳарга томон келяпти...» деган ваҳимали гап тарқалди. 1966 йилдаги зилзила ва томларини учирив, дараҳтларни синдирган 1967 йилдаги кучли бўрон каби табиий оғатлар Тошкент аҳлини чўчитиб қўйгани сабаблими, «Чорвоқ тўғони ўпирилиб, сув уриб кетибди», деган ваҳима хабар шаҳарликларни таҳликага солди. Бундай бўлиши асло мумкин эмаслигини билувчи кишилар ҳам, бу гапни эшитган баъзи раҳбар шахслар ҳам у ёқ-бу ёққа қараб қолишиди. Шу масалада бир неча телефонбозликлар ҳам бўлди. Бирорта раҳбарнинг телевизор орқали сўз айтишини ҳам кутишиди. Бу гап Олой бозоридан бошланиб, бир неча кун ичida ҳамма ёққа тарқалди. «Чотқол ва Чимён тоғлари оралиғидаги ҳавзада, денгиз сатҳидан икки минг метр баландликдаги бир миллиард кубометр сув Чирчиқ воҳаси орқали Сирдарёга қараб югурса Тошкент қоладими! Ювиб, теп-текис қилиб кетиши ҳеч гап эмас!» — деди баъзи «зиёли» ваҳимачилар. «Қандайдир бир чет эл жосуси Чорвоқ қурилишига ишга жойлашиб олиб, тўғоннинг баъзи ерларини сифатсиз қилиб, динамит билан портлатиб юборибди. У қўлга тушибди...» — деб гап тарқатди олди-қочдини севадиган, жосуслар ҳақидаги киноларни кўраверив, жуда ҳам «ҳушёр» тортиб кетган баъзи кимсалар, «1941 йилда Самарқандда Амир Темур сағанаси очилиб, унинг жасади кўтарилиди. Шу йили уруш бошланди. Богистон қишлоғидаги Шайх Умар вале мақбаси, Хўжакентдаги азиз-авлиёлар жойи оёқ ости бўлди... Шу сабабли тўғон бузилиб, сув босиб кетибди...» — деди баъзи мутаассиб жоҳил кишилар...

Бу гапларни эшитган Амир Равнақ эрта билан юрганича Файзулла Аҳмедовичнинг уйига келди. Дўстининг қизларидан оталари бу яқин кунларда келмаганини, Чорвоқда эканини эшитиб, шу лаҳза машинада Чорвоқга жўнади. Йўлда икки кўзи Чирчиқ дарёсида бўлди. Дарё жуда хотиржам оқарди. Бирон ерда сув тошганини кўрмади. Гизиллаганча икки соат йўл босиб, Хўжакентга етди. Бунда тўда

чинорлар остидаги тепаликдан икки төг оралығыда қурилаётган түғонга тикилди. Түғон салобат билан қад күтариб турибди. Унинг бирон ерида ўпирилган жойи қўринмайди. Бирон еридан сув тошиб тушаётгани ҳам йўқ. Улкан түғон тепасида юқ машиналари чумолидек ўрмалаб юрибди. Шоир кўзойнагини галстуғи учи билан артиб, яна тикилди. Ҳамма ёқ жимжитлик. Чинор тагида дам олиб ўтирган шофёр йигитларга қаради. Осойишталик. Чой ичиб ўтирган икки норғул йигит ёнига бориб нафасини ростлаётган эди, улар чой узатишди. Амир Равнақ пиёлани олатуриб, улардан: «Тинчликми?» — деб сўради.

— Ҳа, тинчлик. Сиз ким бўласиз, муллака?

— Мен — мухбир, газета ходимиман. Тошкентда, түғон ўпирилиб, сув тошиб кетибди, деган гап тарқалди. Шу ростми?

— Ана, түғон турибди,— йигитлар кулишди,— тошкентликлар тоза ваҳима бўларкан-да, муллака...

— Э, азизларим, юрак олдириб қўйғанмиз.

— Юзта бомба ташласа ҳам кор қилмайди! Бу түғон эмас, төғ! Бу түғон мутлақо бехавфу хатар!

Амири Равнақ анграйиб қолди. Сўнгра улар билан хайр-хўшлашиб, ўрнидан туриб машинасига ўтирида, қурувчилар шаҳарчасига кириб келди. У тўппат тўғри қурилиш бошқармасига бориб, иккинчи қаватга кўтарилиди. Кадрлар бўлимининг мудири ўз кабинетида ниманидир ёзиб ўтирганига кўзи тушди:

— Ассалому алайкум!

— Э, келсинлар, келсинлар! — Файзулла Аҳмедович дарҳол ўрнидан турди. Улар қучоқлашиб омонлашишди,— қайси шамол учирди? Қадамларига ҳасанот!

— Кўргим келди, азизим. Жим бўлиб кетдингиз? Бу ҳафта тушмадингиз чоғи? Тинчликми?

— Иш кўп бўлди.

— Ваҳима гаплар бор..,— Амир Равнақ бир йўла Тошкентда тарқалган ҳамма гапни тўкиб-солди.

— Турган-битгани ёлғон! Булар уйдирма гаплар,— деди у кулиб. Лекин кўнглидан бундан бир ҳафта илгари тўртинчи стбор яқинида жиндак сув сирқигани, икки трубали пъезометр аппарати буни кўрсатганини, дарҳол бу иш тузатилганини эслади,— тавба! Бу арзимаган иш ҳам Тошкентга етиб борибди-да. Тўғонда бир озгина сув сирқиган эди. Е, тавба! Шунча ваҳима бўлибди-да!

— Ҳа, азизим, демак, бу ваҳиманинг тагида гап бор эканда?! Демак, озгина бўлса ҳам тўғонда дарз бўлганми, бўлган. Тўғондан сирқиган икки томчи сув думалаб-думалаб Тошкентга дарё бўлиб етган. Тагида гап бор экан, дўстим. Халқ бир нарсани бекорга гапирмайди. Шамол бўлмаса теракнинг учи қимирамайди.

— Гапиришга арзимайдиган нарса. Бундақа ишлар кўп бўлиб туради.

— Катта жойдаги игнанинг учидек хато — эл ичига филдек бўлиб етади. Эҳтиёт бўлиш керак. Катта жойдаги хатонинг оқибати ёмон бўлади.

— Кўп ваҳима қиласкерманг, дўстим! Ўзингиз ҳам тоза ваҳимачи бўлиб қолибсиз.

Бир муддатлик мулоқотдан кейин Музффаров дўстини машинага ўтқазиб, тўғонга олиб келди. Бу ерда терлаб, тупроққа қоришиб ишлаётганларни кўришиди. Шоир инженернинг «зиёли»дан кўра ҳам қора «ишчи»га яқинлашиб кетганини кўриб таажжубланди. «Ҳар қалай, инженер номингиз бор, галстук тақиши керак», деган сўзни ҳам айтмоқчи бўлди, аммо тилига чиқаролмади. Амир Равнақ билан Музффаров шаҳардаги ваҳимали гапларни Қоражонга ҳам гапириб беришган эди, у тиззасига уриб, хаҳолаб кулди.

— Ер шарини Қуёш тортиб туради,— деди инженер Мингбоев кулгидан ўзини андак тийиб.— Шуростми? Рост. Агар Ер бу тортиш қувватидан чиқиб кетса нима бўлади? Тамом! Тўғон ҳам шунаقا! Ер ўз ўқидан чиқиб кетса, ўшандагина бу тўғон ёрилиб, сув тошиб кетади...

— Азизлар!— деди Музффаров,— кечагина аллақандай комета Ерга қараб учиб келаётгани, агар у Тинч океанига тушса, ҳамма ёқни сув босиши, қиёматқойим бўлишини ваҳима қилишган эди. Америкада бу жуда ваҳима бўлган. Бу ваҳимадан кўп пул ишлаб олишган. Газеталарда ёзилган. Уша комета Ер тугул Ою Марсдан ҳам наридан ўтиб кетди.

— Ҳа, ишқилиб, ҳар қандай фалокат Еримизга яқинлашмай, Ой ва Марсдан ҳам нарироқдан ўтиб кетаверсин! Халқларимиз саломат бўлсин! Менга ўшаган шоирларнинг китобхонлари кўпаяверсин!

— Бу янгича дуо,— деди Музффаров Мингбоевга қараб,— дўстим олтмишдан ошганларидан кейин дуогўй бўлиб қолганлар.

Тўғон устида чақчақлашиб турган уч ошна ёнига прораб ҳам келиб қўшилди. Тошкентдаги ваҳима гапларни унга ҳам айтиб беришди. Аввал оғзини очиб, анграйиб қараб турган Никаноренко кейин кулди:

— Кўрдингизми, Мингбоев, бир кичик дарз шовқини гумбурлаб акси садо бериб, ўзимизга эшитилди. Бу гап Тошкентга қандай етиб борди экан-а?

— Ким тарқатди экан? — Мингбоев таажжубланди.

— Ўзингга эҳтиёт бўл, қўшнингни ўғри тутма, — деди Амир Равнақ.

— Э, бунақа гапларни ташийдиган кимсалар бор. Бир мансабдор ўзининг ишдан олиш-олинмаслигини билиш учун хотинини бозорга юборган экан, — деди Музаффаров, — фақат эҳтиёт бўлишимиз керак. Тарбияга муҳтоҷ одамлар орамизда анча-мунча.

Қоражон Музаффаров билан Амир Равнақни машинага ўтказиб кузатгач, яна «БелАЗ»га ўтириб, карьерга кетди. Бу ерда бораётган ишни кўздан кечиргач, тўққизинчи стбор шахтага тушиб кетди. Барча аппаратлар нормал ишлаб турганини кўриб кўнгли тинчиди. Лекин орадан яна бирон соат ўтгач, диспетчерликдан тўғон устига чиққан Исаак Ратман Қоражоннинг қўли бўшагач, қурилиш бошлигига телефон қоқишини сўради.

— Тинчликми? — сўради Қоражон хушфеъл Исаак Ратмандан.

— Безовта бўлманг. Фақат қўли бўшаганда телефон қилсин, дедилар. Назаримда, бирон хушхабар айтилсалар керак.

Пастдан чиққан «БелАЗ» тошини тўкиб, қайтиб кетаётганда Исаак Ратман ҳам у билан пастга тушиб кетди. Қўли бўшагач, Садовниковга телефон қоқди.

— Ишлар қалай, ўртоқ Мингбоев?

— Яхши, Георгий Исаевич!

— Янги гапдан хабарингиз борми?

— Қандай гап? Ҳеч нарсадан хабарим йўқ.

— Тошкентни сув босибди....

— Лаббай?

— Сиз қураётган тўғон бузилиб, бир миллиард кумбометр сув Тошкентга югурибди. Мислсиз сел...

— Ваҳима қилманг, Георгий Исаевич!

— Менга Тошкентдан телефон қилишди. Мен тўғон устида ўтириб, буни кўрмай, сизлар қаёқдан билдинглар, дедим. Оғзига кучи етмаганларга ишонавёрасизларми, дедим! Буни қаранг!

— Ким телефон қилди?

— Ҳурматли ўртоқлардан бири...

— Георгий Исаевич, анави кунги «ЧП» бир-икки юмаланиб, пашшадан фил ясалган. Мен илгари иблису арвоҳлар йўқ нарса, бу жаҳолатнинг кашфиёти, дердим. Мен материалистман, моддага ишонаман. Лекин иблис бор нарса эканини ҳаёт кўрсатяпти. Иблис бор, шу иблис бу ваҳимали гапни пойтахтга етказган. Иблис, эҳтимол, бизнинг орамизда юрибди. Биз уни кўролмаяпмиз,— у жўрттага «иблис» сўзини беш бор тақрорлади. Ҳазратов доимо «ишлар беш» деган сўзи кўп тақрорларди.

— Ҳиссиётга берилманг, Қоражон Мингбоевич! Оғир бўлинг. Жаҳлингиз чиққанда анави «БелАЗ» ҳайдайдиган азаматларга ўхшаб, «ҳе, онангни!» деб сўкингу бунақа қаттиқ гапирманг. Орамизда иблис йўқ! Ахир, сиз билан биз фронтни кўрганмиз, ҳалигидақанги сўкишларни ҳам эшигандиканмиз. Лекин иблис деманг, бундай кимса орамизда бўлишига ишонмайман!

— Жаҳлим чиқди-да! Ўша куни ҳам айтаётган гапларига эътибор бердингизми?

— Ҳа.

— Ҳар қандай одамнинг ҳам жаҳли чиқадида! Ахир, биз темирдан эмасмиз-ку, Георгий Исаевич!

— Тушунаман! Мингбоев, оғир бўлинг!

Қоражон Садовниковга ишларнинг бориши ҳақида, автогараждан беш киши ишга чиқмагани, бугун тўғонда атиги ўттиз бир машина ишлаётганини айтиб, гараж бошлигини огоҳлантириб қўйишини илтимос қилди. Ошхонада овқатларнинг сифати пасайгани, бундан қуруувчилар норозилигини ҳам қўшиб қўйди.

Қош қорайишига яқин чарчаб, уйга қайтаётган Қоражон Мингбоев шаҳарча кўчасида магазинчи Ирина билан учрашиб, жиндак шакаргуфтторлик қилишди. Машинани тўхтатди. «ТТ» рулини ушлаб ўтирган Қоражоннинг лаблари ёрилиб, қошлари қурум босган, эгни-боши тупроқ, ниҳоятда чарчаган эди. Чандиқ юзида ҳам қандайдир паришонлик аломатлари зоҳир эди. Бошқалардек текис, чиройли бўлмаган, рўпарадан қараганда юзи йўлбарсларга ўхшаб кетадиган бу йигит қурилишдаги кўпчилик аёлларга унчалик хунук кўринмасди. Унинг ўз сўзлиги, мардлиги уларга ёқарди.

XXIII боб

РАШК АЛАНГАСИДА...

Ишдан чарчаб келиб, ёлғиз, каравотда чалқанча ётган Қоражон кўз олдида қора булутлар пайдо бўлди. Икки сўлақмон кафтини боши орқасига қўйиб, хаёлот дарёсига шўнгиди; шу ҳам ҳаёт бўлдими-ю? Урушдан қайтиб келгач, юзимнинг чандиқлиги сабаб бўлиб, Холида менга тегмади. Уни бошқага узатиб юбориши. Наима масаласида янглишдим. Қирқдан ошиб, энди етдим, деганда Гулгуннинг ўқишига кетиши — омадсизлигимдан нишон! Мен истамаганим ҳолда ҳамон бўйдоқ, ҳамон яккаликда! Уруш менинг ҳуснини эмас, омадимни ҳам юлиб олганга ўхшайди! Гап ҳуснда эмас, дейдилар. Ундоқ бўлса нега одамлар мендан қочади?! Ҳаммани тушунмаган, онгсиз, деб бўладими?! Гулгун Тошкентга қочди. Ҳа, худди шундай, қочди! У мендан ўзини четга тортяпти. Бунга ҳам «ҳуснин» сабаб. Юрагидаги гапни менга сездириб қўймаслик учун жўнади. Бўлмаса ҳали бир-бирилизнинг васлимизга тўймасдан ўқишида юармиди? Тошкентда, Медицина институтида чиройли йигитлар кўп, дейишади, биронтаси илакишган бўлса-я!.. Биронтаси бу «кўзга яқин» жувоннинг бош-кўзини айлантирган бўлса нима бўлади?! Гулгуннинг соддадиллиги, ширин гап, хушомадга берилишдек ожиз томонини биламан. Қайси жувон хушомадни ёмон кўради?! Хотин зоти борки, бари ширин гап, эркалашни ёқтиради. Баъзи хотинлар мушук табиат — ширин сўз билан терисини силасангиз хуррак тортади...

Қоражон бирдан ёстиқдан бошини кўтарди. Ҳамон қора булутлар боши атрофида айланарди. Гўё Гулгун институт бояида қандайдир бир сўзамол, силлиқ йигит ғилан гаплашиб, чақчақлашиб кетаётгани кўзларига кўрингандай бўлди. Бундан бир неча йил аввал ҳомиладор бўлиб қолган студент қиз ўзини поезд тагига ташлаганин, ҳиқилдоғидан бўғиб олиб кетилган бир шилдир «домла» суд бўлгани хаёлидан ўтди. Наҳотки, соддадил тог қизи Гулгун шундай ярамасларнинг қўлига тушиб кетса! Ўша куни уни кўргани борганида аллақандай сахт-сумбати келишган силлиқ йигит дарахт соясида кузатиб тургандай бўлган эди... Қоражон юрагига шайтон васваса солиб, шубҳалари авж ола

Бошлади. У турган ерида қора терга ботиб кетди. Бир дақиқадан кейин юрагини ўқинч музлатиб, севикли кишисидан ранжигандек бўлди.

Асаблари қақшаган Қоражон кейинги пайтларда арзимаган нарсадан ранжиб, кишиларга бақириб юборади. Бу ҳолатни прораб Никаноренко сезиб, асабни эҳтиёт қилиш, майдо-чуйдаларга хафа бўлмаслик кераклигини таъкидларди. Қурилишга Ҳазратов келгандан бошлаб Қоражоннинг бақириқ-чақириқлари кучайди. Аслида у жуда вазмин, унча-мунчага тажанг бўлмайдиган кимса эди. Ҳатто уни тепса-тебранмас дейишарди. Кейинги пайтларда «тепса-тебранмас»дан асар ҳам қолмади. Баъзилар, инженер Мингбоевнинг асабий бўлиб кетиши — фронтдаги оғир жангу ярадорлик оқибати, дейишарди. Илгарилари кўп ичиб юрган Мингбоев ўзини қўлга олди, иродасининг бақувватлигидан ичишни ташлади, десалар, баъзилар, уйланиб, бахтли бўлганидан, хотинининг яхшилигидан, дерди.

Бедаво дардга учраб, узоқ ётган bemор ўлимни кутади, бир неча тўлғанув — азобдан кейин у иш ҳал бўлишини билади. Ўлим унинг наздида унча машақ-қатга ҳам ўхшамайди. Лекин, соғ-саломат, кучли, қувнаб юрган кимса учун ўлим ниҳоятда даҳшат. Кўзи кўриб турган бу ёруғ дунёдаги ҳамма нарса қадрли, улардан кечолмайди, барча мавжудот унинг учун абадул-абад, бу дунёда доимо чопқиллаб юрадигандек бўлади. Ҳа, ўлим соғларга даҳшатли... Мен омадсизлик касали билан ётган одамга ўхшайман, демак, мен кўнишиш керак, қисматим шуми?! Мен қолгай умримни ҳам яккаликда ўтказишим керакми?! Тупроқда якка ётадиган вақтлар ҳам келиб қолар! Ёки, Гулгун менинг олдимга бир боғ хашак ташлаб кетдими? Наҳотки, у шундай қилса?

Жасур эмас, қўрқоқ аввал ўлади! Бу гапни у фронтда ўз командирлари тилидан кўп бор эшитган эди. Каравотдан сапчиб турган Қоражон кийимици тўғрилаб, куннинг кеч бўлиб қолганига қарамай, ҳовлида турган машинасини гуриллатиб Тошкентга жўнаб қолди. Агар у бирор кимса билан дон олишганини ёки шунга яқинлашганини билса, тилка-пора қилиб ташламоқчи бўлди. Брезент этиги қўнжида ўтқир чуст пичоги борлигини ҳам ўйлаб қўйди. Э, худо, шарманда қилма! Агар у Гулгунни ўлдирадиган бўлса, ўша лаҳза ўзининг ҳам юрагига шу пичоқни санчади!

Шайтон васваса қиляпти, дерди у ўзига-ўзи тасалли бериб.

Машина тасмадек йўлда ғизиллаганча чопиб борарди. Соат саккизлардан ошиб, қош қорая бошлаган, Икки кўзи ёниб, рўпарадан келаётган машиналар ёнидан ғизиллаб, эпчиллик билан ўтиб кетарди. У бальзан тўғри йўлга чиққанида машина тезлигини тўқсон, юзга кўтарарди.

Шаҳарга етиб келганида соат ўнлардан ошган. Тезликни олтмишга олиб тушиб, бир неча светофорлар амрига итоат этиб, Музаффаровлар кўчасига кириб келди. Негадир унинг юраги бесаранжом, негадир бир шубҳаю васваса уни нотинч қилиб қийнарди. Машинани Музаффаровлар дарвозасидан анча нарида, қатор тераклар ёнида тўхтатиб, ўзи машинадан чиқдида, кўчанинг нариги томонидаги йўлкадан Файзулла Аҳмедович уйи томон юрди. Кўча томонга қараган деразалар чарогон, Қоражон кўчанинг нариги томонида қоронгидаги туриб, ёруғ деразаларга тикилди. Бу деразаларнинг иккитаси қизлар хонаси бўлиб, шу хонадонда унинг севгилиси Музаффаров қизлари билан бирга туроди. Кўча жимжит. Узоқдан келаётган икки одам ўтиб кетгач, Қоражон кўчани кесиб ўтиб, дераза ёнига келди. Бир муддат у ёқ-бу ёққа аланглагач, бино пойдевори қиррасига оёғини қўйиб кўтарилидида, хонага қаради. Хона ичида Таманно ўз каравотида китоб ўқиб ётарди. Гулгун қани? Юраги яна дукдук уриб кетди. Қани у? Қоражон пойдевор қиррасидан ерга тушиб, яна у ёқ-бу ёққа аланглади. Ичкарига кирсамикан? Йўқ! Нима деб киради? Сендан шубҳаланиб, хавотир олиб келдим, дейдими! Тунда Чирчиқдан ҳовлиқиб келиш --- Файзулла Аҳмедович оиласида ёмон таассурот қолдирмайдими?! Кириш мумкин эмас! Бир лаҳзадан сўнг Қоражон ўша пойдевор қиррасига яна оёғини қўйиб, кўтарилиб, хонага мўралади. Хонада Гулгун пайдо бўлди. Унинг дугонасига чой қўйиб узатаётганига кўзи тушди. Хайрият, у уйда экан. Қоражон бир муддат Гулгунга маҳлиё бўлиб тикилди — у атлас кўйлакда, оппоқ қўксига ярим очиқ, чой ҳўпларди. Қоражон ўзига-ўзи таскин берди. Кўриб қолмасликлари учун секин, эҳтиёткорлик билан пастга тушди. Нарироқда қандайдир бир кампир тикилиб турганини сезиб, ўзини дераза ёнидан нарироқ-қа олди. Ёнидан сигарета чиқариб чекди. Шундан сўнг, бу ерда узоқ турмай, машинаси томон юрди,

Етиб бориб, кабинага кирганида бояги эшикдан чиқиб, шубҳали тикилган кампир ўғли ва яна бир йигит билан кўчага чиқиб, Музаффаровлар деразаси ёнига келиб, бир нимани тушунтириди. Бу йигитлардан бири Хайрушкага ўхшашиб кетарди. Улар ўғри келди хаёл қилиб, у ёқ-бу ёққа қарашаётганда, яна бир кори ҳол юз бермасин, дёб Қоражон машинасини гуриллатиб юргизиб нариги кўчага кириб кетди. Озгина юриб, шоир Амир Равнақ дарвозаси олдида машинани тўхтатди-да, чиқа солиб қўнгироқни босди. Дарвоза қорнидаги эшикни очган шоир рўпарасида Қоражонни кўриб, ҳайрон бўлиб қолди.

— Э, келсинлар!

— Ассалому алайкум!

— Ваалейкум ассалом! Келсинлар! Қайси шамол учирди? — Амир Равнақ Қоражон билан эшик олдида омонлашди. У Ромен Ролланга ўхшаб бошига беретка кийиб олган эди, — ичкарига марҳамат, укажон!

— Мир ака, бугун сизницида қоламан.

— Албатта! Шу маҳалда Чирчиққа кетишингизга рухсат берармидим!

— Машинани ҳовлига олиб кириб қўяман.

— Марҳамат.

— Трестда мажлис бўлган эди, мажлис чўзилиб кетди. Ноинсофлар жуда узун гапиришади. Мажлис тугагач, тўппа-тўғри сизницига келавердим. Азизингизнинг аҳволлари яхши. Георгий Исаевич билан бирга кеча тўғонда бўлган эдилар. Анча гаплашдик. Сизни эсладик.

Шоир хурсанд бўлиб, дарвоза илгакларини очди. Қоражон машинасини ҳовлига киритиб қўйиб, Амир Равнақ билан бирга ичкари хонага кирди. Зероки, ошналарига муштоқ ўтирган шоирнинг кайфи чоғ бўлиб кетди.

— Бу — савқи табиий. Шу бугун хаёлимга божам билан сиз келувдингиз, буни қаранг, сизни кўтар эканман! Мажлисларингнинг чўзилиши бизга фойда бўлибди. Божамникига, келин ёнига кириб чиқдингизми?

— Йўқ.

— Эрта билан киарсиз, майли.

Қоражон билан Амир Равнақ ярим тунгача суҳбатлашиб ўтиришди. Дастурхон ёзилди. Шоир унга янги ёзган шеърларидан ўқиб берди.

Эрта билан соат саккизда Қоражон отланиб, наридан-бери нонушта қилиб, кўчага чиқди. Ўзининг андак бетоқат, беҳаловат бўлаётганини шоирга сездирмасликка ҳаракат қиласарди. Лекин Амир Равнақ инженернинг хаёли ўзида эмаслигини сезиб турарди. Келин билан ўрталарида гап ўтганмикан, деб ўйларди. Эрта билан Қоражоннинг соатига қараб, шошиб кўчага чиқсанига ҳам таажжубланмади. Шоирнинг болалари отанинг имоси билан барвақт чой тайёрлаб беришди. Қоражон Амир Равнақ билан хайрлашиб, машинага ўтириди. Нариги кўчага ўтиб, Музafferовлар дарвозасидан Гулгуннинг папка кўтариб чиқиб келишини бир муддат кутди. Лекин шўх Гулгундан дарак бўлмади. Ичкарига киришни негадир ўзига эп кўрмади. Ярим соатларча кутгандан сўнг, машинани гуриллатиб институтга жўнади. Ахир ёш йигитча ёки бўйдоқ бўлмаса-ю, ўз хотини билан «бекинмачоқ» ўйнаб юргани ўзига таъсир қилди. Ҳам кулди, ҳам ранжиди. Тавба, шу ҳам турмуш бўлдими-ю!

Ҳамма студентлар дарсга кириб кетганида Қоражон машинани кўчага қўйиб, институт ҳовлисига кирди. Аввал Гулгунга ўзини бу ерда изғиб юрганини сездирмай, уни кузатадиган бўлиб келган Қоражон негадир ҳозир уни кўргиси келиб қолди. Таъқиб йўқолиб, висол иштиёқи пайдо бўлди. У институт боғида, бир чеккада яшириниб туриб, кечиккан Гулгуннинг ҳовлиқиб ҳали замон келиб қолишини кутди. Йўқ, ундан дарак бўлмади. Қоражон секин-аста юриб, у ёқ-бу ёқларга кўз ташлади. Шундан сўнг, яна икки соат — катта танаффусгача кутишни дилидан ўтказди. Баъзан шундай кечикканіда дўсти Никаноренко унинг йўқлигини асло билдирамасди. Кўнгли кенг, оқибатли Никаноренкога суюнади. Яна кўз олдига Гулгун келди, қандайдир шубҳаю васвасалар, қора булатлар дарду дунёсини қоплай бошлади. Гулгун илгаригидан ҳам чиройлироқ кийиниб, ясанадиган, ўзига қарайдиган бўлиб қолган. Хона ичидаги оппоқ кўксини очиб юриши, бу хонадонга ўрганиб қолаётгани ҳам юрагига шубҳа солди. У институт боғида, дарахтлар соясида унга ўзини кўрсатмай айланиб юрди. Катта танаффусга яқин четроқдаги бир дарахт остидаги скамейкада ҳозиргина киоскадан сотиб олган газеталарни ўқиб ўтириди. Танаффус қўнғироғи чалиниб, каттагина корпусдаги студентлар ҳовлига чиқиша бошлади. Катта боғ йўллари, майдончалар қиз-

Йигитларга тўлди. Лекин Гулгун кўринмайди. Орадан бир муддат ўтгач, эшикдан отилиб чиқсан Гулгун юзини газета билан бекитиб ўтирган Қоражон ёнига келиб, юзига тутиб турган газетасини тортиб олди.

— Салом, жаноб! Хуш келибсиз! Ҳозир келдингизми?

— Ҳа. Мени қаёдан кўрдингиз?

— Ҳозир бир дугонам кириб айтди. Югурдим. Мен аудиторияда ўтирган эдим. Ўртоғингиз келиб кутиб ўтирибди, нега чиқмаяпсиз, деди.

— Мен сизни катта танаффусда учратиб, кўриб кетай, дедим. Трестда мажлис бор эди...

— Соат нечада?

— Ҳозир бораман. Ўн иккода... — бу ёлғон гапни Қоражон бўшашиб гапирди. Гулгун бу гапга ишонди, лекин бўшашиброқ гапиргани, умуман, телефон қилмай келгани ва бунинг устига келиб скамейкада яшириниб ўтиргани уни ўйлатиб қўйди. У эркаланиб, эри қўлидан тортиб, ўрнидан турғазди.

— Тинчликми? Ҳамма тинчми? Ҳеч ким касал эмасми? Ўзингиз қалайсиз? Шанба куни ёнингизга бормоқчи эдим. Қишлоқча бориб, опамларни, адамларни ҳам кўриб келмоқчи эдим... Ишлар қалай?

— Яхши.

— Кенгроқ гапириб беринг! Битта «яхши» дегандан ҳеч нарса тушунмаяпман! Нега гапиргингиз келмаяпти?

— Ҳозир қўнгироқ чалинади. Узоқ гапиришга имконият йўқ.

— Кейинги икки соатга кирмайман! Лотин тили... Жуда зерикарли дарс. Ўлиб кетган бир тилни ўргатади.

— Сиз бошқа вақтда ҳам дарслардан қочиб юрасизми?

Гулгун бу кинояли гапни эшитиб, юриб кетаётган жойида тўхтаб, Қоражонга ялт этиб қаради. Унинг қўлларидан ушлаб, елкасига бошини қўйди.

— Акажон, нима гап?

— Ҳеч гап. Ҳазил...

— Мен бу ерда ўқигим келмаяпти! Қишлоқча кетаман! Музофаровларнинг уйи ҳам ёқмаяпти! Таманно турткилаяпти! Жуда қийналиб кетдим! Менга ўхшаганлар учун Тошкентга келиб ўқиш қийин экан! Пайқамаган эканман. Бўлди, мен кетаман!

— Чидаш керак, қийинчиликлар бўлади, деб айтган эдик-ку.

Ўзининг очилиб-сочилиб гапирмаётганидан, қан-дайдир дилхўрлик бўлаётганидан Қоражон хижолат бўлди. Рашику шубҳалар эҳтимол бекордир. Тўнглик қилиб гапирмаётганим, балки зулмдир. Бесабаб киши дилига озор бериш яхши эмас, деди у ўзига-ўзи. Гулгунни кўриши билан кечадан бери дарду фикрини қоплаган қора булатлар тарқаб кета бошлади. Эрта билан Гулгуннинг шошиб, нонушта қилмаслигини билиб институтга яқин, кўча юзидаги миллий ошхонага олиб кирди. Хотини яхши кўрадиган уйғурча чўзма лағмон буюрди. Овқат тепасида уни эркалади, жуда ҳам соғинганидан бу ерларда изғиб юргани ва ҳатто кеча тунда келиб, деразага чиқиб, унинг чой дамлаб келганини кўргани, шоир аканикida тунаганингача — барини гапириб берди. Бу гапларни эшитган Гулгун ҳангуманг бўлиб қолди. Эрининг ғоятда яхши кўриб, негадир қизганиб, тунлари бу ерларда изғиб юрганига ҳайрон бўлди. Гулгуннинг кўзларига Қоражон яна юз чандон бебаҳо кўриниб кетди.

— Жиннисиз! Сиз мени билмайсиз?!

— Биламиз.

— Билсангиз?

— Биламиз, лекин текширамиз, яхши кўрамиз...

Гулгун бирдан қаҳ-қаҳ уриб кулиб юборди. Қоражоннинг бир кичик болага ўхшаб югуриб, пойинтар сойинтар гаплар гапириши унга жуда ёқиб, нашъа қиласарди. У эрига меҳр билан тикилиб, қоши устига қўнганди қурумни нозик қўллари билан артиб қўйди. Ёқаларини тўғрилади. Кўйлаги кир бўлиб кетганини ҳам фаҳмлади. Шанба куни эрта билан автобусга чиқишини, соат ўн-ўн бирларга Чорвоқча етиб боришини, йиғилиб қолган кирларининг ҳаммасини ювиб, тартибга солиб келишини айтди. Уч кун кўрмай қолса мана шунаقا хархаша қила бошлашини ўйлаб, ичдан кулди. Ҳа, худди шундай эди — айниқса, кейинги пайтларда Қоражон рашикнинг ёнар тоғлари, ўқинчнинг муз қатламлари орасига тушиб қолгандек, дам қовурилар, дам музлар, қалби васвасага тушарди. Гулгунни ниҳоятда қизганарди...

УЧИНЧИ ҚИСМ

XXIV боб

ИЎЛБАРСДА ҚИРҚ ИЙГИТ ЮРАГИ БОР...

Январь ойи бошларида озгина қор ёғди. Ундан кейин ёғин-сочин бўлмай, қорасовуқ маҳкам ушлаб турди. Изгирин юзга урилиб ачишириар, қулоқларни тишлар, бир лаҳза туриб қолсангиз, оёқлардан зах ўтиб кетарди. Синоптикларнинг хабар беришича, Шимолий Қутбдан келаётган совуқ оқим Урал тоғларининг шарқи, Олтой ва Қозогистон ерлари оша Ўрта Осиё устидан ўтар эмиш. Тўғон тепасида турган одам Чотқол дарасидан чиқаётган кучли шамолга бардош бериши анча маҳол эди. Лекин Қоражон, Никаноренко, Абдуманнону Ивановлар бунга ўрганиб кетишган. Бошларидаги қулоқчинни ҳам келишириб боғлаб олишмаган, икки ёни қуённинг қулоқларига ўхшаб икки томонга қийшайиб, очилиб ётарди. Баландликдан қараган киши узоқда, қурувчилар шаҳарчасидаги мўрилардан чиқаётган оппоқ буг ҳавога сингишишмай, қотиб қолгандай осилиб турганини кўради. Пастда, гараж ҳовлисида эски резинка гилдирак ёқишар, унинг қорамтири дуди ҳам осмонда қимириламай муаллақ турарди. Ҳавонинг қаттиқ совуқлигига қарамай, тўғон устида ҳам, пастдаги ГЭС қурилишида, цемент-бетон заводида — ҳамма ерда қизгин иш кетарди. Баъзи участкалар суткасига доимий, уч смена ишларди. Машинада ишлайдиганлар айниқса оёқларини иссиқ тутишади, тепада — тўғон устида ишлаётганлар гизги зонга бардош бермоқ учун иссиқ қулоқчин кийиб, жун шарф билан бўйинларини ўраб олишарди. Ишнинг оғирлиги, қорасовуқ кишиларни асло чўчитмайди. Улар иссиқ уйда чўт қоқиб ўтириш ёки эрта билан бемалол соқол қириб, илиқ хвой ваннага тушиб, сўнг енгил машинада ишга келиб, озода кабинетда одамлар билан баҳс қилиш, гапдан қўли бўшагач, суратли журнallарни варақлаб ўтиришни кўзлашган эмас. Бу ер-

да тупроққа беланиб, моторлар гуриллаши ичида, баъзан лойга ботиб, баъзан совқотиб, устма-уст сигарета чекиб, терлаб ишлашни олдиндан билиб келишган. Техника ҳар қанча ўсса ҳам, ҳатто катта заводларда, қуюв цехларида ҳамма иш автоматлар билан бажарилганда ҳам барибир ишчи ёки қурувчи терлаши, юз-қўллари мой бўлиши аниқ. «Буни ҳаёт қўрсатяпти,— дерди баъзида оёғига кирза этик кийиб олиб, тўғон тепасида юрган академиянинг муҳбир аъзоси, инженер Файзулла Аҳмедович Музafferов.— Тўғри, электростанция фойдаланишга топширилгач, бошқариш пультидаги ўртоқ галстук тақиб, оқ қўйлакда озода бўлиб ўтириши мумкин. Агар киши танига чангчунг, лой ва қорамой тегмаса, мазут ёки бензин дудчини ютмаса, кўз ўта ёруғликни ҳам, қоронгиликни ҳам кўрмаса, қорни доимо сариёгу ширишлиқдан бўшамаса, лойни қўлқоп билан ушласа, бундай одамлар ё фариштага айланади, ёки рак бўлади! Бундай одамлардан фақат қўланса ҳид келади.

Ишлайдиган одамдан ўзи бажарадиган ишининг ҳиди келгани маъқул. Бўёқчидан бўёқ, новвойдан ун, тракторчидан қорамой, дехқондан тупроқ ҳиди келади». Унинг ўзи қавима иссиқ фуфайка, бошига барра қалпоғини кийиб, ёши кетиб қолганига қарамай, тўғон тепасига пиёда чиқарди. Врачлар унга иложи бўлса доимо пиёда юринг, деб маслаҳат беришганди. Доимо қурилишларда юрган, иши ҳаракат талаб қилган Файзулла Аҳмедовичнинг ўз таъбирича, «пенсия қатламида» ётмай, инженер Мингбоевнинг доно таклифи билан Чорвоққа келиши унинг ҳаётини қайтариб бергандек бўлибди. Кипригига дала қуруми қўйниб ёки мойга беланиб ишлаш, кейин яхшилаб душ олиш, ундан кейин чарчаб, иштаҳа билан овқат ейиш... булар кекса инженерга жуда ёқарди. Унинг мижози шуни талаб қилгани учун ҳам у Бошқармада, иссиқ кабинетда кўп ўтиравермай, иш қизиган жойга кетарди. Садовников ҳам, бошқалар ҳам кадрлар бўлими мудири вазифасида ишлаётган кекса инженерни Бошқармада қадалиб ўтиришга мажбур қилишмасди. Иван Иванович Шишкинни ҳам кўп вақт кабинетдан топишолмасди. Қорасовуқда тўғон тепасида юриб, тупроқ зичлиги — шиббаланишнинг лаборатория анализини кўздан кечираётган Музafferов кўзи массанинг зичлигига эди-ю, ёнида чўққайиб ўтирган Қоражон билан Никаноренкога ўзининг икки юзи қи-

зараётгани, кеча ойнага қараб, анча ранги кириб қолганини пайқаганини гапирарди. Анчадан кейин сухбат мавзуи бевосита ишга ўтди.

Баъзи кунлари эрта билан туман тушарди; пастдан майда шагал-қум, ундан наридан — харсанг тош карьерларидан юк ортилган оғир машиналар тоғ йўлидан илон изи қўтарилиб, ундан тўғоннинг бел қисмига ўтарди. Бир юз олтмиш метрча қўтарилиган тўғон белидаги машина йўли ҳам уч буралиб, кейин тепага чиқарди. Бу йўлларнинг бурилишидаги ваҳимали қияликдан қатнайвериб ўрганиб қолган шофёрларга билинмас, янги келганларнинг юраги дирилларди. Йўл яхмалак бўлиб қолган, бунинг устига эрталабки туман ишга халақит берарди. Йўлларга қум сепилган, ҳар юз метрга ёқиб қўйилган чироқлар юлдузга ўхшаб милтираб турарди. Лекин, ҳар қалай, бу йўлдан баланд тўғон тепасига қўтарилиш тажрибали кишилар учун ҳам анча ваҳимали эди. Бундан бошқа йўл йўқ, илож ҳам йўқ. Нариги томонда буюк Чотқол косасида зилол сув лимиллаб турарди. Бу косанинг бир томонини инсон ўз қўли билан қўтарарди. Бу улкан тўғонни қурувчилар жуда оддийгина, «СУ-2» деб қўя қолишарди.

Тўққизинчи январь куни майда харсанг тош ортиб, тўғон устига қўтарилаётган «БелАЗ» машинасининг тормози ушламадими, қия, тор йўлда тойиб, юз қирқ метрча баландликдан коптоқдек думалаб кетди. «БелАЗ» пастдаги диспетчерлар ва ГЭС ишчилари, арматурачилар кўзи олдида пастга тушгунга қадар маҷақланиб, гилдираклари сочилиб, парча-парча бўлиб кетди. Лабораторияда деразадан қараб турган Галина қўллари билан кўзини бекитди. Унинг ранги ўчиб, юраги ёмон бўлиб, ўтириб қолди. Юмалаб кетаётган машинани ҳеч ким тўхтатиб қололмасди. Диспетчерлик олдида лойиҳани кўриб турган Қоражон Мингбоеv билан Никаноренко ҳам турган жойларида қотиб қолишибди. Кутимаган фожиа баданини жимиirlаштириб юборди; яқинда ишга келган шофёрлардан иккитасига «БелАЗ» берилган эди. Бу қулаган шуларнинг бири. Қоражон билан Никаноренко ўша томонга югуришибди. Ёшгина шофёр йигит кабинада қонига бўялиб ётарди... Йигитчанинг фамилияси Раҳимжонов бўлиб, исмини ҳали яхши билишмасди.

Бундан илгари карьердаги портлатишда ҳам бир киши фожиали ўлган эди. Кузда туннель қазиётган-

лар ичидә ҳам шундай фалокат юз берди, эҳтиётсизлик натижасида газ чиқиб кетиб, икки киши туннель ичидә димиқиб ўлиб қолган эди... Юқорида ишлаётгап «ЭГК — 3696» экскаватори машинистлари Карнаухов, Колбасин, бульдозерчи Половцев, Сладков, Мансуровлар ҳам машинани қўйиб, пастга югуришди. Бундай воқеалар кейинги пайтда деярли йўқ бўлиб кетган эди-ку! Нима бўлди? Садовников ҳам, Шишкин ҳам юргурганча Бошқармадан чиқиб, тўғри келган машинага ўтириб, тўғонга келишди. Тез ёрдам машинасининг ҳам кераги бўлмади. Фожиани эшитиб, бу ерда пайдо бўлган Ҳазратов негадир участка бошлиғи билан саломлашмай, катталар атрофида ўралашарди. Ачиниб, СУ-2 да шундай фожиали ҳодисалар кўп бўлаётганидан ранжигандек бўлиб, бурнини жийирарди. Чорвоқда иш охирлашиб қолгани, навбатдаги Хўжакент ГЭС қурилиши бошланишидан аввал қурувчиларниң катта бир гуруҳи орден ва медаллар билан мукофотланармиш деган гап Ҳазратовга тинчлик бермасди. У «ош дамланганда» ҳозир бўлишни яхши кўрарди. Намангандаги облводстрой системасида ишлаб юрган кезларида кимнингдир қўллаб-қувватлаши орқасида Чортой сув омбори қурилишига бошлиқ бўлиб борди. Бўйи паст бўлса ҳам эни узун тўғонни «ҳа бўл, ҳа бўл» билан тез муддатда тугаллашга муваффақ бўлди. Республика сув хўжалиги ходимларини мукофотлашда яна кимнингдир қўллаб-қувватлаши орқасида у орден олди. Оғзи чучиб, мазахўракка ўрганган Қиёмхўжа Миёнхўжаевич Ҳазратов бу ерда Қоражон Мингбоев бажараётган вазифага зимдан кўз олайтира бошлади. Чунки СУ-2, яъни тўғон катта қурилиш комплексининг асосий учаткаларидан бири эди. Бу участка бошлиғи мукофот рўйхатларидан четда қолмаслиги «аксиома» эканини биларди. У машинаада тўғонга кетаётганида, тўғон эмас, унинг кўзларига Меҳнат Қизил Байроқ ордени ярқираб кўриниб туради. Нега энди шу орденни бир қишлоқи олиб кетсин! Агар бу мукофотни ҳам ўзи қоқиб олса, кўксида битта эмас, иккита орден ярқирайди. Шу сабабли у кейинги пайларда Ишларбекка ўшаган ўз гумашталарига, конъякка зўр бер, ичкиликка ружу қиласидиган бошлиқлардан арақни аямай, қуявер, деб тайинлади.

Инженер Ҳазратов фожиа содир бўлган жойда, шоғёр йўғит жасади тепасида бошини сарак-сарак қиларди. Садовниковнинг қулогига яқин бориб: «Участка

бошлиги одамларни аямаяпти, бу ҳолда бизга юқори партия ташкилотларидан гап тегиб қолади...» — деди.

Раҳимжонов хумсоңлик йигит әкан, ҳабар топган ота-она, оға-инилари оҳ-воҳ қилишиб, жасадни қишлоққа олиб кетишди. Эртасига эрта билан марҳумни ҳамқишлоқлари елкада кўтариб, Угом дарёси бўйидаги Севар ота қабристонига қўйишиди. Жанозада қурилишдан келган Қоражон Мингбоев, Никаноренко, Шишгин, Абдуманноплар ҳам қатнашишиди.

Эртасига эрта билан Чорвоққа яна қуюқ туман тушди. Совуқ унча қаттиқ бўлмагани билан ер тайғончоқ эди. Тўғонга кўтариладиган йўлларга яна қум сепишиди, яна электр чироқлар туман ичидаги йилтиради. Кечаги фожия «БелАЗ» ҳайдовчиларини чўчитиб қўйди. Айланма йўлда биронта ҳам машина кўринмасди. Баъзилар куннинг ўрталаригача ишни тўхтатиб туришни маслаҳат беришди. Ҳазратов ҳам шуни таклиф этди. Бу қиши ойларида об-ҳаво шароитига қараб бир сменада ишлаш деган сўз эди. Бу аҳволда тўғон қурилишида иш графиги бузилади. Белгиланган план бажарилмай қолади. Парторг ва прораб билан маслаҳатлашган Қоражон бунга асло йўл қўйиб бўлмаслигини, фожия фақат уқувсизлик, эҳтиётсизлик орқасида юз берганини эрталаб тўғон устида тўпланган қурувчиларга гапирди. Тўхтаб ётган «МАЗ» ва бульдозерлар ёнида чўнқайиб ўтирганлар ва машинасини пастга — каръерда қолдирган шофёрлар сигарета чекишарди. Уларнинг кўпчилиги Ҳазратов айтгандек, куннинг иккинчи ярмида ишлашга мойил эди. Негадир баъзи кишилар баландга айланма йўл орқали кўтарилишдан қўрқиб қолишганди.

— Биз ишни вақтинчалик бўлса ҳам тўхтатолмаймиз! — деди участка бошлиги Мингбоев, — бу ерда ҳеч қандай қўрқинчли нарса йўқ!

Ўтирганлардан кимдир кулди-да, шеригига имо қилиб: «Анавининг гапига қаранглар... биз бола-чақали одаммиз...» — деб пичирлаб қўйди.

Мингбоев йигитлардан бирини имлаб, у билан пастга тушиб кетди. Ўтирган одамлар уларга қараб қолишиди. Смирнов деган бу йигит Мингбоев билан бошқаларга қараганда қадрдонроқ эди: унинг партия номзодлигига ўтишига Қоражон кафолат берган эди. Улар пастга тушгач, Смирнов ҳайдайдиган «БелАЗ»га экскаватор майда харсанг тўлдирди, кабинага Қоражони

чиқди. У атай Смирновни шу ерда қолдирди. Телала ўтирганлар ўрниларидан туриб, тўғон ёқасига келишиди. Пастда «БелАЗ» мотори гуриллаб, олдинги икки чироги ёниб, йўлга тушди. Улар машина тор йўлда келаётганини гира-шира кўриб туришарди. Ҳамма, Мингбоев Смирновни мажбур қилиб ишга солди, деган хаёлда эди. «БелАЗ» вағиллаб кучанганича шиддат билан кўтарилиб, фожиа юз берган жойдан ҳам эсон-омон ўтиб, юқорига чиқиб келди. Ўша «ажал нуқтаси»дан ўтаётгандан баъзиларнинг юраги шигиллади. Лекин машина илгаригидай салобат билан ўтиб, тўғон устига чиқди, бульдозерлар ёнига келиб, устидаги қум, майдада харсангларни тўқди. «Молодец Смирнов!» — деб машина ёнига борганлар кабинада, рулда участка бошлиги инженер Мингбоев ўтирганини кўришиб, индамай қолишиди. Қоражон Мингбоев Никаноренкодан бир дона сигарета сўраб олди-да, уни тутатиб, индамай яна пастга тушиб кетди. У иккинчи бор ҳам жуда босиқлик билан машинани тўғон тепасига олиб чиқиб харсангни тўқди. «БелАЗ» учинчи бор вағиллаб чиқиб келгач, энди бу сафар Смирновнинг ўзи ўтирибди, дейишган эди, бу сафар ҳам рулда Мингбоев экан. Шунда «БелАЗ» ҳайдайдиганлардан бири лабидаги сигаретасини ташлаб, Мингбоевга гап қотди: «Бўлди, бас! Уртоқ Мингбоев, тушунарли!» — деди-да, пастга тушиб кетди. Орадан ўн беш минутча ўтгач, у ҳам машинасини вағиллатиб олиб тепага чиқди. Лекин у жуда эҳтиёткорлик билан секин-аста моторга куч бериб келаётгани сезилиб турарди. Ундан кейин Смирнов ҳам Мингбоевдан рулни олиб, машинасини ҳайдай бошлади. Бошқалар ҳам пастга тушиб, ўз машиналари ўтиришди. Уларнинг машиналари ҳам илон изи йўлда ўрмалай бошлади. Ўша «ажал нуқтаси»га келгандан ҳамманинг юраги дук-дук уради. «Юришни билмаган киши учун ҳамма ер хавфли, ҳам эҳтиёт, ҳам дадил бўлиш керак», — деди Қоражон. «Шерда қирқ йигит қуввати бўлармиш, йўлбарсда қирқ йигит юраги бўлармиш», — деди Файзулла Аҳмедович шу куни Иван Шишкин билан тўғонга кўтариладиган айланма йўлдан пиёда юриб. Улар юқорига кўтарилишгач, ўша фалокат юз берган жойни обдан кўздан кечиришиди. Бошқа ерларни ҳам кўриб, фожиага сабаб топиша олмади. «Фалокат баъзан оёқ осиди бўлади», — дейишиди улар бош қимирлатиб, ачи-ниб,

ТАБИАТ ТАСВИРИ

Куз.

Чимёндан то Нанайгача икки дарё ва етти довон ошасиз. Бу йўлларда юрмабсиз, дунёга келмабсиз! Майса-гиёҳлар, ясси қирлардаги пичанзорлар ҳиди димогингизга урилади, қора чигирткалар хониши жонга ором бағишлиайди. Адир гиёҳлари қуёшдан тушаётган нур қуюнида барқ уриб сизга юз тутади. Бир томонда баҳайбат тоғ чўққилари; филсимон қора ва қўнғир харсанг тошлар табиат қиличи-ла кесилган қатламлар аро асрий уйқуда — шу улкан тошлар орасидан шилдираб булоқ сувлари оқиб ётибди. Улар пастликда тошларни тошларга уриб, айқириб оқаётган асов дарё — Чотқолга томон югуришади. Шу кичик, аммо шўх мингларча ирмоқларнинг феълу ғайрати сабабмикан, узоқ Бештар томонлардан дам у қояга, дам бу қояга ўзини уриб, тоғларни қулатиб, тошларни юмалатиб келаётган Чотқол то бунга етиб келгунча тоза ҳунар кўрсатади. Пишиб, тобланиб, маъдан-тузлардан таъм олиб етилган бу сувдан бир пиёла ичиш магиз-магизингизга ҳузур бағишлиайди. Бир пиёла қимизу бир пиёла Чотқол сувини туting, қани, қайси бирини ичасиз? Шу қимизнинг ҳам, шу гиёҳу меваларнинг ҳам онаси Чотқол сувидир... Бир муддатдан сўнг сиз баландликка кўтариласиз — чап томонда, каттакон бир чинни косада зилол кўл кўзга ташланади. Бу ойнадек тиниқ, шаффоф кўлни кафтингизда тутиб, симиргингиз келади. Ўнг томон яна ҳам баланд тоғлар — тошкентликлар узоқдан Бешиктоғ деб атаса бу ерликлар Обиқашқа деб атайдиган, баланд елкасида фақат кийиклару қоплонларгина юра оладиган бу тоғ чўққилари осмон гумбазига бигиздек кириб кетган. Юқориликка кўтарилишингиз билан ер куррасининг энг баланд нуқтасида тургандай бўласиз, пастда тоғу тош, дарёю денгиз, ям-яшил қирлар, ер юзининг ҳамма ёғи кўрингандай бўлади. Пастда, водий ичиди учид юрган қушларга кўзингиз тушади. Ернинг айланётганини ҳам, бу буюк курра қачонлардир қуёшдан узилиб тушганини, фалак жисмлари ичиди энг гўзали ер эканини ҳам кўргандек бўласиз. Сиз бу баландликда тунда бўлинг; шундоқ қўл узатиб юлдузларни узиб олгандек бўласиз. Ўн беш кунлик ойга бир сакраб чи-

қиб олиш бу ердан ҳеч гап әмас. Коинот — буюк бўшилик ичидагавҳартошлар сочилиб ётибди. Шундоқ бир ажойибот, коинот гўзаллигини томоша қилиш учун кўзлар яратилганидан хурсанд бўласиз, агар инсон бўлмаганида, жониворлар бўлмаганида уларни ким кўрарди. Бебаҳо кўз қорачигини мана шундоқ гўзаликни кўрмоқ учун яратилганлигига шак келтирмайсиз. Бутун бир коинот шу кўз қорачигига жо бўлади. Бу ерларнинг бир соати бир кунга, бир куни бир йилга тенг — бир ҳафта ҳузур қилиб юрган кимса етти ёш яшаради...

Бу бобнинг романга ҳеч дахли йўқ, дейди албатта бир адабий таңқидчи, мутлақо қисқартириб ташлаш керак! Йўқ! Сизга қолса тошдан тошга урилиб, буралиб оқаётган сойларнинг ҳам четини суваб, «коидангиз»га тўғрилайсиз. Серқирра чўққиларни, тепаликларни рандалайсиз. Богистон, Хумсону Сижжак каби қишлоқларни қисқартириб ташлайсиз. Биргина Наволисой тасвирига умр бағишиласа арзийди. Ҳўжакентдаги минг ёшли чинорларни олинг, сиз чинору сойлар, табиатимиз гўзаллигини сеза олмасангиз, бундай завқу муҳаббатдан маҳрум бўлсангиз, мен нима қилай! Бу манзаралар одамлар учун жуда керак!

Куз бунда баҳордан аъло. Тўғри, бошқа жойлардан кўра бу ерда эртароқ совуқ тушади. Мевалар бешён кун кейинроқ етилади. Еттинчи ноябрга қолмай узум, нок шундоқ шира тортадики, асал билан ҳусайнини бир-биридан ажратса олмайсиз. Эрта билан мактабга кетаётган болалар папкасига дўйпайтириб бир дона чойдиш ноку бир бурда нон солиб олади ва «озуқли от ҳоримас» бўлади-қўяди. Ёз бўйи кўм-кўк бўлиб турган ўрик барглари куз кириши билан ҳаммадан аввал қизарип, ўрикзорлар камалакдай товланиди. Куз — қушларнинг тўдаланиш, гала-гала бўлиб учиш пайти, ҳамма қушлар бу йил очган жўжалари билан галага қўшиладилар... Гуриллаб учиш, донлаш, водий узра чарх уриш, булар куз базмидир. Чотқол тизма тогларида ҳали унча ўрганилмаган, дунёning бошқа ҳеч ерида учрамайдиган суғур¹ деган жонивор

¹ Суғур (сурок мензбира) — ноёб жонивор. Бизнинг ердан бошқа ҳеч ерда йўқ. У Фарбий Тянь-Шань, Олатовнинг Талас томони, Чотқол, Қурама, Писком, Угом ва Бойсун тогларида учрайди.

ҳам яшайди, буни айтишдан мурод, Чотқол тоғлари бағрида оҳудан йўлбарсгача, читтакдан бургутгача — барি бор...

Келаси ҳафта шанба куни телефонда ваъдалашгандарига кўра Қоражон ўз машинасида шаҳарга тушиб, тўғри институтга борди. Гулгуннинг ўқишидан чиқишини пойлаб, кўча четида, машинасида газета ўқиб ўтириди.

Бундан бир ҳафта илгари уларнинг тўйлари бўлиб ўтди. Тўй икки ерда — аввал Сижжакда, кейин Ёнқўргонда бўлди. Милтиқбой aka әрта билан элга ош берди, кечқурун базм бўлди. Эртасига Қоражонлар ҳовлисида тўй давом этди. Бир ҳафтагача ўқишидан рухсат олган Гулгун, тўйлар ўтиб кетгач, яна Тошкентга келиб, ўқиш билан банд бўлиб кетди. Қоражон ҳам, Тошкентга кўпроқ қатнасам қатнарман, ишқилиб, институтни тугатиб олсин, дерди...

Бирон соатлардан кейин институт боғи студентларга тўлиб кетганини, аудиториялардан чиққан йигит-қизлар дарвоза томон оқиб келаётганини кўрди. Бир тўда замонавий кийинган, гўзал қизлар тўпи ичиди Гулгун ҳам келарди. Унга кўзи тушиши билан Қоражоннинг юраги беихтиёр орзиқиб, гурс-гурс ура бошлади. Гулгун тамоман ўзгарган, сочини қоши устигача тушириб қирқиб, орқага битта қилиб ташлаб олган. Бу Таманнонинг таъсири, деди у. Кўзиди офтобдан сақланиш учун доира шаклидаги сурма ранг кўзойнак, устида енгиз, қўнғир кофта ва тиззаси кўзига етадиган юбка... у биноидек «модница» бўлиб олибди. Атрофидаги дугоналари ҳам ундан қолицмас, ёш, гўзал қизлар чуғурлашиб келиб мороженое олишди. Уларнинг атрофида сояди ўсган пиёздек новча, овозлари дўриллаган йигитчалар ҳам ўралашиб, қовушмаган саволлар бериб гап ташлашар, ёқимсиз хушомад кўрсатишарди. Қоражон машинада уларни кузатиб ўтириди. Елкасига сумкасини осиб олган Гулгун қўлидаги мороженоени ялар эди-ю, кўзи олмакесак терарди. У шу атрофда «инженер» машинада кутиб турганини билар, лекин уни тополмай атрофга олазарак бўларди. Чуғурлашиб мороженое ялаётгани студент қизлар бир муддат институт боғида тарқалишмай туришди. Гулгун улардан ажралмади. Аллақандай бир «муҳим» гапни муҳокама қилишарди. Орачора Гулгун орқасига қайрилиб қараб қўярди.

Ниҳоятда чиройли бўлиб, очилиб кетган шу гўзал қиз ўзининг хотини әканлигидан Қоражон завқланарди. Қизлар тўдасига суқилиб кирмоқчи бўлаётган студент йигитлардан қизганарди ҳам. Студент ёшда қайси қиз хунук? Студентлик — олтин давр, бу ёшда қизларнинг бари гўзал ва доно, жамиятнинг «илгор» ва «идрокли» кишиларидир. Студентларни янги маънодаги валиаҳд деса ҳам жоиз, чунки мамлакатнинг келгуси алломалари, келгуси президенти ҳам эҳтимол шулар ичиададир...

Гулгун қизлар тўпи ичидаги атрофга олазарак бўла-вергач, Қоражон машинасини дарвозага яқинроқ, қизлар тўпи рўпарасига олиб келди. «ТТ»га кўзи тушган Гулгун дарҳол дугоналарига қўли билан «хайр!» ишорасини қилиб, машина томон югурди. Қизлар бе-иҳтиёр унинг орқасидан тикилиб қараб қолишли. Машинага чиқиб олган Гулгун яна ўз дугоналарига узоқдан қўл қимирлатиб, «хайр!» ишорасини қилди. У қизларнинг ҳаваси келганини яхши пайқаб турарди. Аммо бу машинада уни кутиб ўтирган одам ўзини қизларга кўрсатишни мутлақо истамасди. Гулгуннинг илиқ саломи машинада қамалиб ўтирган Қоражон дарду дунёсини гулистон қилиб юборди.

— Бизлар бир-биримизни кутиб қолмадикми? — Гулгун эркаланиб сўради эридан.

— Йўқ, ҳаммаси жойида. Мен сал илгарироқ келиб нарида турган эдим.

— Мен сизни куттириб қўйганга ўхшайман?

— Йўқ. Мен сизнинг соат нечада ўқишдан чиқишингизни яхши биламан. Мўлжаллаб келдим. Қизлар тўпи ичидаги гаплашиб турганингизни томоша қилдим. Менинг Гулгуним ҳаммадан гўзал, ҳаммадан доно, ҳаммадан сўзамол, ҳаммадан...

— Ҳаммадан маҳмадона, деяверинг! Эҳ, бизларнинг нима ҳақда гаплашганимизни билсангиз қотиб-қотиб кулардингиз. Мутлақо медицинага алоқаси йўқ гаплар. Билмадим бизлардан врач чиқармикан! Кампирнинг дарди гўзада — бизларнинг ҳаммамизнинг хаёлимиз мода, латта-путтада...

Қоражон илжайди.

— Бир дугонамнинг яқинда тўйи бўлиши керак эди. Йигитнинг қулоги жуда катта, шапкасидан чиқиб турар экан, деб қиз айнабди.

— Ха-ха-ха-ха,— Қоражон беихтиёр кулди. Кейин жим бўлиб қолди.

Машина Пушкин кўчаси томон бурилиб, чорраҳадан ўтгач, Гулгун Қоражонга қаради.

— Тўғри кетдикми?

— Ҳа. Ёки ишингиз борми?

— Ишим йўқ. Марҳаматхон опамга ҳам, Таманнога ҳам, дарсим тугагач, ўшанақаси қишлоққа кетаман, душанбада учрашамиз, деганман. Сиз жанобнинг бу ёққа келишингизни ҳам билишади.

— Билишади... Ошимиз ҳалол, демочқимисиз?

— Ҳа! Албатта! Мен ҳеч қачон ёлғон гапирмайман! Ҳеч ким шубҳа қилмагандан ҳам барибир ёлғон гапириш гуноҳ!

Қоражон ғизиллаб кетаётган машинани секинлабтиб, йўл четида, баланд тераклар соясида тўхтатди. Бунга Гулгун ҳайрон бўлиб, гапим ёқмадими, деган хаёлда сукут сақлади.

— Шу доно гапларингиз учун бир ўпай.

— Қўйинг! Уят бўлади! Шунинг учун машинани тўхтатдингизми?

— Ҳа.

— Қизиқ экансиз-ку!

— Ошинг ҳалол бўлса...— Қоражон кабинада ўтирган жойида ёнидаги Гулгуннинг белидан қўлини ўtkазиб, қучоқлаб, лабларидан ўпди. Улар бу дунё ташвишларини бир лаҳза тамоман унтиб, муҳаббатнинг қайноқ оғушида бир жону бир танга айланиб кетишган әди. Бир лаҳзадан сўнг Қоражон Гулгунни ўз бағридан бўшатди. Улар ҳислар түфёнида титраршарди. Гулгун уялиб ерга қаради. Гулгуннинг эҳтирослари ниҳоятда ўткир, ниҳоятда таъсирчан эканини Қоражон пайқаб, завқланарди. Шоир ёзгандай: «Оҳи оламни ёндиражак, кулгиси жон олғувчи...» мана шу эканини билиб олганди. Кимdir узоқдан уларни кузатаётганини кўрган Гулгун, тезда отни қамчиланг, кетайлик, испорасини қилди. Машина вағиллаганча яна асфальт йўлда югуриб кетди.

— Ёнқўргонга тушиб ўтамиш-да, Гулгуной? — деди Қоражон.

— Тўғри Сижжакка бормаймизми?

— Бирпас тушиб ўтайлик.

— Опам хавотир олмасмикан? Бугун келишимни билади.

— Хавотир олмайди. Ойимга мен бу ёққа келишимда айтиб келгачман.

— Анави шоир нима деган әди? — Гулгун кулди яна.

— Амир Равнақми? Файзулла Аҳмедовичнинг ошнасими?

— Ха.

— Қичиийдиган жойимни олдиндан қашлаб қўяман... Ха-ха-ха-ха-а!

— Ҳи-ҳи-ҳи-ҳи, — Гулгун ўзини тутолмай кулиб, оғзини қўли билан беркитди. Ёшланиб кётган кўзларини артиб, Қоражонга қаради, елкасига чиройли бошини қўйиб, гап қотди: — Сиз ҳам...

— Ҳа, бўлмасам-чи, — деди рулда кетаётган Қоражон йўлдан кўзини узмай. У елкасига бош қўйиб келаётган севиклисини тепадаги ойнадан bemalol кўриб турарди.

— Нечта амакингиз бор? — сўради Гулгун гапни бошқа томонга буриб. Илгари ҳам шундай бир нозик гап қочганида Гулгун Қоражонга эркаланиб, кейин гапни бошқа томонга буриб юборган әди. — Мен буна-қа кийингиз бўлсан ҳам сизни қариндошларингиз ёнида уялтирумайман.

— Сизнинг ҳамма ишларингиз менга ёқади. Агар хоҳласангиз, мен уларга, «синглим билан келдим, хотиним қишлоқда қолди», дейман. Агарда уларга сездирмаслик керак бўлса, айтганингизни қиласман.

— Йўқ! — деди қатъий эътиroz билдириб Гулгун ва шу заҳоти Қоражон елкасидан бошини кўтарди, — мен уларнинг келини эканлигимни билишлари керак! Ҳеч ёлғон гапирманг, акажон!

— Хўп! — деди Қоражон. Кейин Гулгуннинг сочларидан секин ўпиб қўйди. — Ойим ҳам кеча Чорвоқдан қишлоққа келган.

Ёнқўргонликларга шаддод Гулгун ёқиб қолди. У отасининг кечмиш-кечирмишлари, фронтдаги жанглари тўғрисида гапириб берди. Очиқ, шаддод, ҳозиржавоб Гулгун ҳамманинг диққатини ўзига тортди; бу ердаги қизлар билан иноқлашиб кетди. Зиёфат авж олди. У баъзилардек тортиниб, ўзини четга олмас, эркаклар суҳбатига ҳам аралашиб кетаверарди. Шу куни ётиб қолиб эрталабки нонуштада ҳам амакилар ёнида ўтирди. Гаплари ҳам, қилиқлари ҳам ўзига яратиб туради. Қоражон уруғлари ичидаги қизлар тезда унга таассуб қилиша бошлашганини, Гулгуннинг гапига ўхшатиб гапиришга уринишашётганини сезди. Шу атрофдаги бир фолбин хотин ҳақида гап кетди.

— Полвуннинг оёқлари чўлоқ, бир кўзи кўр, лаблари тиритиқ, юзлари йиртиқ...— деди бир шўх қиз Гулгунга.

— Ха-ха-ха-ха-а. Сенинг отинг нима?— сўради Гулгун.

— Зуҳра.

— Бечора полвунни худо қўш қўллаб урган экан. Шунча «ҳусн» билан қандай эр олди экан?— кулиб турган Гулгун негадир бир зумда тўхтаб қолди. Кулгилар йўқолди. Унинг хаёлидан бир нима ўтди...

— Эри мачитда сўфи. -

— Ҳа, шундоқ дегин.

— Полвун хотинни «Мисқол пари» дейишади.

— Үҳ-ҳўй-үй!— деди Гулгун,— сен жуда кўп нарсани билар экансан! Ойингларга айтгин, кўзмунчоқ тақиб қўйсилар!

— Кўзмунчоқ тақиши эскилик!

Ўртага жимлик тушди. Гулгун ўйланиб қолди. Сўзамол битта у әмаслигини пайқади.

— Сен Тошкентга олиб кетишига арзийдиган қиз экансан!

— Сиз бизнинг Ёнқўргонга муносибсиз, кеннаи!

— Шунинг учун ҳам мен ёнқўргонликларга келин бўлдим.

Қоражон билан Гулгун қишлоқда бир кун қолиб, эртасига жўнашди. Қоражон ёнқўргонлик баъзи йигитларни ишга даъват этиб, Чорвоқ қурилишига таклиф қилди. Кўп ҳақ тўланишини ҳам қўшиб қўйди. Баъзиларнинг ўз қишлоғидан чиққиси келмади. Тогин урса толқон қиладиган ҳамқишлоқларига қаради Қоражон:

— Бўлмаса шу ерда ўтираверинглар! Ёнқўргонликларнинг ўрнидан туриб бир жойга бориши қийин. Мана, кўриб турибман... Чотқолдан ўтганингиздан кеин Чорвоқ кранлари шундоқ кўриниб туриди.

Аввал индамай қараб турган оға-инилар юмшаб илжайишиди. Гулгун қулай фурсатдан фойдаланиб гапириди:

— Мен аёл бошимга қарамай, Тошкенту Чирчиқни кезиб юрибман. Ҳей, йигитлар! Энди сизлар бувимнинг этакларини қўйиб юборинглар. Катта бўлдингиз. Ўз қишлоғингиздан четроққа ҳам чиқиши керак. Бошқалар келиб сизга электр станция қуриб берадими?

— Ҳи-ҳи-ҳи-ҳи-ҳи,— соқоли мош-гуруч бобо ўзини тутолмай кулди.

Бошқалар ҳам кулиб юборди. Қандил буви ҳам ёнида ўтирган Гулгуннинг елкасига қоқди. Унинг шартакилиги ёққанди.

— Омон бўл, қизим! Бу амакиларинг бир иш қилишдан аввал ойиларидан сўраб қиласдилар.

— Ҳукумат катта иш бошлаган. Сизлар қишлоқда уймалашиб юрсаларинг тўғри бўлармикан?

Гулгуннинг астойдил гапираётганини пайқаган оғанилар бу гапнинг жиддийлигини, қуёв-келин фақат саёҳат, қариндошларини кўриб келиш эмас, Чорвоқча ўз ҳамқишлоқларини тўплаш ниятида эканини ҳам сезиб олишиди.

— Юрган дарё, ўтирган бўйра,— деди Қандил буви гарчи ўғилларининг кетишларини унча истамаса ҳам Қоражонни беихтиёр қувватлаб,— сенинг фикрингча, иш қанча муддатга бораркан?

— Сал кам ўн йилга.

— Тошкентдек шаҳри азимни бир кўриб қўймоқлик ҳам жуда фарз,— деди Қандил буви,— қадимгилар, ўзбек бойиса том солади, қозоқ бойиса хотин олади, деган. Ўзбеклар ҳозир жуда бойиган.

— Биз ўзбеклар асаларимисол тинмай уй соламиз, нектар йигамиз...

— Бизлар боришга борамиз,— деди йигитлардан бири,— аммо лекин муддати жуда узоқ экан..

— Ёқмаса, қочиб кетаверасан,— деди Қоражон.

— Ойижон, юринг, сизни ҳам олиб кетайлик,— деди Гулгун,— Сижжакни, Тошкентни бир кўриб келасиз.

— О-о-о, айланиб кетай, қизим. Раҳматлик бувангиз умрида бир маротаба Хўжакентдан ўтиб, Шўртепа бозорига борган, холос. Ҳозирги ёшларга Тошкенту Маскоп икки қадам. Икки дунё бир қадамдир авлиёнинг олдида, деган машойихлар. Ҳозирги ёш мулалар авлиёлардан ҳам ўтиб тушган.

— «Авлиё» эмас, икки дунё бир қадамдир авионинг олдида,— деди Қоражон.

— Мен ўзим ҳам аптамабелда Чорвоқча бориб турман. Кўрмаган нарсаларимни кўрдим. Шўро ҳукумати омон бўлсин, жуда ҳунарвон. Қадимги замонда Чирчиқ устида битта Эшаккўприк бор эди. Уни ҳам не-не мashaқатлар билан қуришган. Ҳозир кўприк қуриш чўт бўлмай қолди...

Эртасига эрта билан Қоражон билан Гулгун Сижжакка келишиди. Йўлда эру хотин ҳазил-мутойиба гап-

лар билан бирга ўз тогу далалари, бундаги бекнёс табиат ҳақида ҳам гаплашиб кетишиди. Бу тог оралиқларидан юз бор ўтсангиз, юз бор бетакрор гўзалликни кўрасиз, ясанган табиат кишиларга интизор. У ўз севгилисини қучган келинлардек сизни огушига олади.

Тоғлар фақат кўкламда эмас, ҳамма вақт гўзал. Бу ерда йилнинг тўрт фаслида ҳам жозибали манзаралар ва бўёқларни кўриш, нодир жониворлар билан юзмай юз келиш, сайроқи қушларни кўриш мумкин. Бу ер ҳали кашф этилмаган доривор ўсимликлар, нодир жониворлар, ҳашаротлар ва бир қатор маъдан ва тузларга эга бўлган харсанг тошлар ўлкасиdir. Асрлар бўйи ётган бу улкан харсанглар не-не замонлар гувоҳи бўлмаган. Улар неча минг йиллар давомида қиши қаҳратони, ёз жазирамасига бардош беришган. Тоғлиқлар бу тошларнинг ҳар бирига ном қўйишган, улар тўғрисида турли афсоналарни мароқ билан ҳикоя қилишади. Шамол ва ўзгарувчан ҳарорат туфайли харсанглар мўъжизавий шаклларга ҳам кириб қолади. Бир вақтлар яхлит бўлган тошлар ҳароратнинг кескин ўзгариши натижасида парчаланиб кетади. Баъзан шамол, баъзан сайроқи қушлар тошдаги ёриқларга турли ўсимлик урургларини олиб келади, улар аста-секин илдиз отиб, харсанглар устида гиёҳлар ўсади.

Чирчиқнинг чап соҳилида жойлашган Хўжакент қишлоғидаги қоятошлар йўловчиларнинг эътиборини қадимдан ўзига жалб этиб келган. Агар сиз қояларнинг устига кўтарилиб, атрофга назар ташласангиз, Чорвоқ тўғонига ва унинг қурувчилари истиқомат қилаётган кўркам шаҳардан тортиб, югуриб келиб Чирчиққа ўз сувини «ҳадя» этаётган Угом дарёсигача кўзингиз тушади. Қаршингиздаги ям-яшил чинорлар бағрида шинам чойхона ҳам бор. Бу ерга файз киритиб, чинорлар тагидан жилдираб оқувчи зилол булоқ сувлари куз ва қиши ойларida ҳам қуrimайди. Бу ердаги қояларда йигирмадан ортиқ турли катталиқдаги горлар бор, уларнинг баъзиларини табиат «қўли» билан қурилган «дераза»лар ёритиб туради. Уларда қачонлардир аждодларимиз истиқомат қилганлигини археолог-олимлар топишган тош қуроллар кўрсатиб турибди... Бу сўлим оромгоҳ билан танишув дастлаб тош даврида яшаган қадимги кишилар қояга ўйиб чизган расмларидан бошланади. Унда тог эчкилари ва қўйлари, ўқ-ёй отаётган овчилар каби лавҳалар тас-

вирланган. Бу суратлар бундан бир неча минг йиллар аввал чизилган. Минг йиллар оша бизгача етиб келган қоятошдаги расмларга қизиқиб тикилар экансиз, аллақачонлар йўқолиб кетган ҳаёт намуналарини ундан «ўқиб» оласиз. Қояларга ўйиб ишланган расмлар фажат қадимги тарих ва санъат намуналаригина бўлиб қолмасдан, балки уларни тўғри ажрата билиш туфайли қадимги аждодларимизнинг турмуши ва маданиятини, шу районда қирилиб битган ҳайвонларни аниқлаш мумкин. Хўжакент қояларида тасвириланган расмлар йигирмага яқин бўлиб, уларнинг баъзиларини яхши ажратиб бўлмайди. Учта тоғ эчкисининг расми чала чизилган, уларнинг олд оёқларини чизиб тугатиши учун ибтидоий рассомга нимадир халақит берган кўринади...¹

Гулгун билан Қоражон Сижжакда, ўз «визитлари» билан ота-онани курсанд қилиб, кўнгилларига хотиржамлик солишгач, эртасига Чорвоқقا келишди. Бундаги ҳувиллаган квартирани ҳам бир муддат обод этишиб, эртасига яна Тошкентга тушиб кетишди. Қоражон Гулгунни Музаффаровларникига эсон-омон элтиб қўйгач, ўзи яна Чорвоқقا қайтиб келиб, мамнуну масрур ишга тушиб кетди.

XXVI боб

ЧОРВОҚ ИЛҲОМИ

Киши.

Бешинчи, олтинчи декабрь кунлари Тошкентда қо-расовуқ бўлди; ерлар тошдек қотған, қатқалоқ, қорйўқ, лекин мўрилар, кўп қаватли уйлар тепаси, ариқлар, кўприклар панжарасини оппоқ қиров қоплаган. Тунда совуқ ўн-ўн икки даражага тушган, кундузи ми-нус икки, уч ва тўпдан кейин 0 даражада бўларди. Ишлар яхши, пахта плани бажарилган — ҳамма кишилар, ҳатто пахтага бевосита алоқаси бўлмаганлар ҳам хуррам. Ўзбекистонда пахтага алоқаси йўқ одамнинг ўзи йўқлиги учун юқоридаги ибора жоиз эмас. Ҳатто оғилхонадаги сигиргача бу ишга дахлдор... Саноату қурилишда ҳам ишлар жуда яхши. Қиши қанча кучайма-

¹ Н. Раҳматов, И. Отажоновларнинг газетада босилган хабаридан.

син, изгирин тишламасин, барибир юраклар барқ уради, ғалаба қувончи аёз заҳрини йўқотганди. Катта зафарда барчанинг ҳиссаси бор; шоирларнинг айниқса...

Шу кунлари Амир Равнақ машинасига ўтириб, тўсатдан Чорвоққа жўнади. Бир томондан, кўп мутолаа қилиб чарчагани, иккинчи томондан, қадрдони Файзулла Аҳмедовични бирон ойдан буён кўрмагани, учинчидан, юрагида гаплари кўпайиб, дўстини соғингани уйда ивирсиб ўтиришига йўл қўймади. Эрта билан йўлга чиққан шоир соат ўн иккиларга қолмай Музофаров ҳузурига кириб борди:

— Э, келсинлар, келсинлар! Хуш келибдилар! Қадамларига ҳасанот! Юз ёшга кирар эканлар, ҳозир Марҳаматой билан азизимни эслаб ўтирган эдик,— деди қучоқ очиб новча Файзулла Аҳмедович елкасидаги тўни тушиб кетмаслиги учун бир қўёли билан ушлаб, дўстини қучиб. У деразаданоқ шоир машинаси келиб тўхтаганини кўриб, югуриб айвонга чиққан эди. Кетма-кет Марҳаматхон ҳам шоир истиқболига чиқди.

— Хуш келибсиз, муллака! Ўртоғингиз кечадан бери сизни йўқлаб турган эдилар...

— Саломатмисизлар! Соғиндим, нима қиласай, бир ҳафтадан ортиққа чидолмайман. Мана, келдим!— деди чеҳраси очилиб Амир Равнақ. У бир кун бир мансабдор қабулига бориб, совуқ муносабатда бўлган у киши билан кабинетда бир лаҳза туриб, сўз айтмай орқасига қайтиб чиқиб кетган эди. Уша мансабдор кимса орадан бирон йил ўтгач, ўз вазифасидан бекор бўлганида, баланд зина устида хомуш туриб, одамлардан, Навоий кўчасига қандай чиқаман, деб сўраганини, доимо машинада юриб, Тошкент кўчаларини билмаслигини «Муштум»да ҳажв қилган ҳам мана шу Амир Равнақ эди.

— Бугун Ҳосил байрами, Тошкентда тантана... Бундоқ кунларда Ҳазрат шеър ўқирдилар, «оқ олтин» ижодкорларини табриклардилар?— Файзулла Аҳмедович дўстини ичкарига олиб киргач, одатдагидек жўмракда қўлини совунлаб юваётганида гап қотди.

— Телевизорда чиқиб, шеър ўқиб табрикладим. Газетада ҳам шеърим чиқди. Саратонда бормаган облас-тим қолган эмас. Так что, бир шоир қилиши керак бўлган ҳамма ишни қилдим. Газетага қаҳрамонларимиз ҳақида лавҳа ёздим... Мана, тўла ҳисобот бериб бўлдимми? Лекин баъзилар биронта газета ёки жур-

налга очерк тугул икки энли лавҳа ҳам ёзмадилар. Мен бир нарсадан хафаман!

— Яна хафалик? — жилмайди Файзула Аҳмедович,— хафа бўлманг. Биз хафа бўлсак майли, аммо сиз хафа бўлмайг, унда бу хафаликни шеърларингиз орқали бутун әлга ёясиз. Ҳамма хафа бўлади... Азизим, Сиз асло хафа бўлманг!

— Нега Ҳосил байрамига қатнашмадингиз, деб сўрамадингиз! Ҳозир шу байрам давом этяпти. Мен ўша ерда, пахтакорлар орасида бўлишим керак эди. Э-э-э, азизим, бундай пайтларда қайси бир майда мансабдорнинг айби билан бизлар четда қолдик. Бир куни кўз кўзга тушганда раҳбаримиз: «Ўртоқ шоир, қаёқларда юрибсиз, кўринмайсиз?» деб сўрайдилар. Ўроқда йўқ, машоқда йўқ, хирмонда ҳозир... кимсалар Ҳосил байрами минбариға чиқиб олишган. Ана шунга жаҳлим чиқади, азизим! Йккиласмчи, нега Ҳосил байрамини шаҳар четида — Отчопарда ўтказиш керак? Нега Тошкент шаҳри марказида бундай тантаналар ўтказилмайди? Отчопарни кўрмоқчи бўлганлар бориб кўраверишлари мумкин-ку! У ҳам керак. Ҳамма облас滩лардан от свора, мол овора қилиб, ўша «оқ олтин» яратганлар келса-да, уларни бир чеккага олиб чиқиб қўйсак! Уйимиз тўрини кимга асраймиз? Театрларда учрашувлар қилиш керак.

— Тўғри!

— Аллақаёқлардан келган туристлар шаҳар марказида юради. Майли, юрсин, қарши эмасман. Ҳосил байрамини ҳам бунда қилиш керак. Ана шунга куяман-да, азизим. Агар шу гапни айтсан ёки бирон калтафаҳм мансабдорни ҳажв қилсан, балсга қоламан. Мени «турмушдан орқада қолған»ликда айблайдилар.

— Тажанг бўлманг, шоир! — деди дўстига чой узатиб Файзула Аҳмедович,— Ҳосил байрамини шаҳарнинг марказида ўтказиш керак! Бу тўғри! Азаматларнинг кўксида Олтин Юлдузлар ярқираб турганини кўрганмиканлар улар?

— Оҳ, оҳ, азизим, дилимдагини айтдингиз. Мен бу гапни шеър қиласман!

— Йўқ, шеър қилмайсиз! — деди кескин бир вазиятда Файзула Аҳмедович,— керак эмас! Буни партия мажлисида айтамиз, бу — ички ишимиз. Шеър абадий! Эртага тузалиб кетадиган бир нуқсочимизни ҳамма ёққа жар солиш ва уни авлоддан авлодга қолдириб кетиш нега керак? Бундай гапларни бир хашаки шоир

ёэса бўлади, эртага эсдан чиқиб кетади. Сизга ярашмайди. Сиз айтган сўз мармарга ўйиб ёзилгандай тез орада ўчмайди. Чуқур ўйлаб қаращ керак. Юракни кенг тутинг. Бу иш душман тегирмонига сув қуядиган бўлмасин!

— Фикрингизга қўшиламан!

— Янги шеърларингиздан ўқинг! Янги шеърларингизни әшитгимиз келяпти. Номи унча таниш бўлмаган бир муаллиф «Навбаҳор» деган шеър ёзибди. Ўқидим. Сизнинг анча йиллар аввал шу мавзудаги бир шеърингизни әслатади. Ҳайрон бўлдим.

— Сезибсиз. Биз бир нима десак, улар ҳам шу ишни қилишади, аммо кейинчалик бизни тан олишмагандек, тумшуқлари кўтарилиб, биз шунаقا ишлар қиляпмиз, дейишади ҳам... Ҳей, укажонлар, яратилган бошқа асардан андоза олиш ижод эмас! Иккиламчи, катталарни ҳурмат қилишни ҳам билишларингиз керак! Йўқ, бу сўзларни кимга айтасиз! Вақти келиб, улар ўпкасини босиб олар, деб юрибмиз. Уч-тўрттаси бир бўлиб олиб бир-бирини мақташга ўтишяпти. Ё тавба. Ё алҳазар!

— Азизим, чарчабсиз,— деди Файзулла Аҳмедович,— бу ерга ишга келгунимча мен ҳам мана, Марҳаматойнинг хабарлари бор, жуда тажанг әдим. «Тошпўлат тажанг нима дейди», дегани мен әдим-да! Ҳозир бу ҳасрату тажангликлар деярли йўқолди. Иш билан қаттиқ бандмиз. Азизим, сиз ҳам менинг кунимга тушибисиз.

— Чорвоққа келиб ишланг, демоқчимисиз?

— Ха.

— Мана шу биз турган ердан сал нарироқда Хумсон қишлоғи бор. Шоир Машриқ Юнус ўғли Элбек шу ердан чиққан. Ўз ерида бундай катта қурилишларни кўрганида бағоят хурсанд бўларди. Шеър бағишлиарди. Эслаганимиз яхши бўлди. Мен Чорвоққа келиб ишлашга тайёрман.

— Лекин сиз цемент қормайсиз. Менинг ёнимда бўласиз. «Огни Чарвака» газетасининг штатсиз ходими бўласиз. Қурувчиларга шеърларингиздан ўқиб берасиз. Бугун Марҳаматой Тошкентга кетадилар, икки чол бунда қолиб, отамлашамиз: «Ош есалар ўртада сарсон илик...» қилишамиз. Бу ернинг ҳавосини қаранг! Тошкентда папирос чеккан, чекмаганинг фарқи йўқ, ҳаво тўла рутубат. Бунда маза қилиб юрамиз. Ўтган-кетган қизиқ гаплардан гаплашамиз, пешанамиз-

дан чак-чак тер оққан вақтларни эслаймиз... Саломатликлари керак! Нима қиласиз Тошкентда? Пенсионерсиз, «дафтаридин йўқ бўлак оғирлиғи...» бўлсангизу э, шоир, нима қиласиз у ёқда сасиб-бижиб! Эҳтимол, мана шу қурилишда юриб, илҳом келиб қолса бир жиддийроқ нарса ёзарсиз.

— Маъқул! Жуда маъқул! Сизнинг ёнингизда бўлсам илҳом келаверади! Файзли одамсиз, азим.

— Асабни қўлга олинг, шоир! Иккинчи маротаба дунёга келмайсиз, сал ўзингизга қаранг!

— «Кирланиб битдим узем, дунёни поклий олмадим», деган Абдулла Тўқай. Мана шунаقا! Бир ошнам менга «қош силанади, соч қирқилади», деб «чуқур фалсафий» фикр айтгандай бўлдилар. Мен унга агар сиз шунаقا тутуриқсиз «мақоллар» айтиб юрсангиз, ҳажв қиласман, дедим!

— Яна асабингизни бузяпсиз!

— Бўлди, бас, энди гапирмайман! Лекин омонлик бўлса, келгусида бирон йирикроқ асар ёзсан, ўша хумпарнинг «образи»ни кўрсатаман!

Тушки овқатдан сўнг Марҳаматхонни машинага ўтказиб Тошкентга жўнатишиди, икки ошна қурилиш бошқармасига чиқишиди. Файзула Аҳмедович ўз кабинетидан кимгадир телефон қоқди. Тошкентдан таникли шоир келганини, агарда хоҳлашса смена тугаш вақтида ГЭС корпусига боришажагини, шоир бунда янги шеърларидан ўқиб беришини айтди. У томондан, марҳамат, марҳамат, деган овоз, ГЭС агрегатларини монтаж қилаётганлар шоир билан учрашишдан жуда хурсанд бўлишларини маълум қилди. Вақтни аниқ гаплашиб олгач, Файзула Аҳмедович телефон трубкасини қўйди. Амир Равнақнинг ҳам чеҳраси очилиб кетди. Одамлар уни исташаётгани, ҳурмат билан таклиф этишаётгани кўнглини кўтариб юборди. «Сизни ишчилар чақиряпти, шеърларингизни эшитиб, жамолингизни кўрмоқчилар. Бу жуда муҳим гап», — деди Файзула Аҳмедович. Амир Равнақ сукут ичидагезиллар-сезилмас кўзига ёш олди. Файзула Аҳмедович Шишкинга, Қоражон Мингбоевга ва бошқаларга ҳам телефон қоқиб, соат тўртда ГЭС биносида шоир билан учрашув бўлишини, вақтлари бўлса келишларини илтимос қилди.

Смена тугагач, соат тўртда ГЭС корпуси ичидагезилмас кўзига ёш олди. Файзула Аҳмедович Шишкинга, Қоражон Мингбоевга ва бошқаларга ҳам телефон қоқиб, соат тўртда ГЭС биносида шоир билан учрашув жуда кўнгилли ўтди. У она ти-

лида, сўнгра рус тилида ўз шеърларидан ўқиб берди. Ҳозирги ўзбек адабиётининг катта арбоблари яратган асарлар ҳақида гапирди. Шоирга кўпгина саволлар ҳам тушди.

Амир Равнақ ғоятда мамнун бўлиб дўсти Музофаров билан бирга уйга қайтиб келди. Эртасига эрта билан у янги шеър ёзди:

Улкан ГЭС, ойнавон шифтлар кўкўпар,
Гумбурлар моторлар — қудратли нидо...
Бунда мардлар ишлар, поездлар чопар,
Юрт ишига ўзни қилишган фидо.
Мен ўқийман шеър, юзларча кўзлар
Ўзбек шоирига қадалди бир зум.
Янгради цех ичра ўзбекча сўзлар —
Эъзозлари — қарсак, севинч, табассум...
Барча қарсак чалар, бутун цех бирдек,
Манзур қилолдимми шеъримни пича —
Гўё Маяковский бу ерда бордек,
Кошки эди бўлсан юздан бирича...
Мен она тилимда ўқидим шеърим,
Шеърим бағишланган буюк дўстликка.
Тилим билмадилар, билдилар дилим,
Қадоқ қўл ишчилар турарди тикка...
Бирор комбинзонда, қўлида қўлқоп,
Бирор енг шимарган, бармоқ қорамой.
Бирор ҳайратланиб келганди шу тоб —
Улкан агрегатга бир зум қарамай.
Бирор кўзойнакда, мўйловлари шоп —
Оқсоқол ишчилар — ветеран балки,
Бирор ҳали дўмбоқ, балки у кашшоф
Кечагина келган, лабларда кулки.
Мен ўқийман шеър, қуёшли ўлкам —
Боғларим ҳуснини келтирдим бунга.
Гўё оташ цехда кашф этди кўклам,
Ўзбеклар қалбини бахш этдим сенга.
Сенга олиб келдим, эй гўзал Чорвоқ,
Бир варақ бўлса ҳам шеърим тотини.
Ўзум де, анор де, балки шафтоли...
Не десанг ҳам бўлар унинг отини.
Мен она тилимда ўқийман шеърим,
Шеърим бағишланган буюк дўстликка.
Баъзилар тил билмай, билдилар дилим...
Қурувчилар тинглар туришиб тикка.

XXVII боб

ХАЙРУШКА

Эрта билан уйқудан кўз очган Гулгун ўз каравоти ёнидаги чиройли тумба устида «*Zju Zju*» деган француз атири турганини кўрди. Бундай атирни у тўйга борганида, ўша олимнинг қизлари хонасида кўрган эди. Бундан бошقا «*fidji*» деган атирни ҳам ҳидлаб кўрган. Жуда ҳам хушбўй, жуда ҳам зўр эди. Ярим яланғоч Гулгун кўрпани оёғига итариб, қўл узатиб, қутичани олди-да, нариги каравотда пишиллаб ухлаб ётган Таманнога ҳам қарамай, биллур идишдаги қаҳрабо ранг атирга тикилиб, ҳидлади. Шу пайтда бирон деразадан уни яширинча кузатган бирон кимса унинг бўртиб чиққан оппоқ кўкси, кабутарсимон, чиройли бўйниу елкаларини, кўрпадан чиқиб қолган сонларини bemalol кўриши мумкин эди. Муаттар бир ҳид димоғини чоғ этди, у негадир дугонасидан қизганиб, қайта-қайта ҳидлади. Тумбочкиаси устида бундай қимматбаҳо атир пайдо бўлиб қолганига таажжубланмади. Нега таажжубланмаганига ўзи ҳам тушунмасди. Ноёблик олдida иттифоқо пайдо бўлган ноёблик бир-биридан ҳадиксирмай қўшилиб кетаверар экан-да! Бу қандайдир гайри одатий бир ҳол эдики, шунча ҳушёрлиги билан Гулгун буни ўйлаб ҳам ўтирумади. Уйқудан эркаланиб кўз очган Таманно ҳар кунги одатича Гулгунга тикилиб, уни ҳазил-мазах қилмоқчи бўлиб турган эди, унинг қўлидаги атирга кўзи тушиб, «нима?» дегандек бош ирғади. Гулгун атирга ўз ҳирсини қўйиб, кўз-кўз қилди.

— Бу «Зю-зю!»

— Кўриб турибман,— деди Таманно оғзини катта очиб, ҳомуза тортиб.

— Тумбочкам устида пайдо бўлиб қолибди.

— Бу акамнинг қилиғи... У қачонлардир кеннайимга «Шенъюар» атирини ҳам олиб келган эди...

Чақадиган бир нимани ушлаб олгандай, Гулгун шу лаҳза қўлидаги атирни тумба устига қўйди.

— Бу сенгами?

— Сенга,— деди Таманно ёстиқдан бош кўтариб. У ҳам Гулгундек ярим яланғоч, чиройли кўкси кўриниб турарди,— сенга, олавер! У атай сенга олиб келган.

— Нега менга? Қизиқ!

— Берганинг юзига қарама! Олавер! Улар мага-

зинчи, савдогарлар. Акам жинни-ку!.. Сенга олиб келибдими, олавер!

— Йўқ, бекор қилибдилар!

— Биргалашиб ишлатармиз. Хоҳласанг, мен ҳам суртиб туарман.

Ўртага бир неча дақиқалик сукут тушди. Гулгун каравот оёги томонга ташлаб қўйгани — кўк селон халатини тортиб олиб, елкасига ташлади. Негадир гўзал танини бекитди.

— Акамлар шунақалар... — деди яна Таманно кулиб, — э-э, улар жуда ёмон! Акамни опамлар, адамлар яхши кўришади. Эрка ўғил. Индамайман. Бўлмаса, буларнинг қилиб юрган ишлари учун ошналари билан бирга барчасини тўппонча билан отиб ташласа арзиди.

Гулгун миқ этмади. У тумбочка устидаги «Зю-зю»га яна бир қараб қўйди. «Зю-зю» секин-аста катта бир одамга ўхшаб, Гулгунга тикилди. У бу хонадоннинг эркаси ва ҳокими Хайрушкага ҳам ўхшаб кетарди. «Мен сизга аталганман, сизникиман...» дегандай бўларди. «Мени асло маҳмадона Таманнога бера кўрманг, мен фақат сизга аталганман, бундай «Зю-зю»лар фақат сизга муносиб...» дегандай гаплар эшитилди. Гулгун кўксини қўллари билан бекитди. У атир шиша-сидан уялгандай бўлди.

Хайрушка ўттиз беш ёшларга борган, қадди-қомати келишган, сўзга уста йигит. Хотин-қизлар дикқатини дарҳол ўзига тортади. У ўзига нигоҳлар қадалганини сезгач, камгар ва сипо бўлиб олади. Ичиди гап кўп — дунёнинг тагига етган кишилардек ақлли гаплар ҳам айтиб қўяди. Аммо, унинг баъзида рўпарасида диққат билан тикилиб турган кўҳлик жувонга парво қилмай, эътибор бермагандек, ўзини арши аълодан кептириб яна бир неча баландпарвоз гаплар айтиш одати ҳам бор. Бу гаплар аслида пўрсилдоқнамо гаплар эканини янги суҳбатдошлари сезмай қолади, уни яхши биладиган одамлар эса мийигида кулиб қўяди. У илгари юқоридан келиб, машҳур кишилар номини кўпроқ тилга оларди. Уни ёшлигига маҳалладагилар «Хайрушка» деб аташарди, яхшигина дутор чалиб ашула ҳам айтади. Буни қарангки, отаси бутун бошқа олам, боласи бутун бошқа олам бўлиб чиққан.

Хайрушканинг ўз фалсафаси бор; дунёда қўлга тушмайдиган ҳеч бир хотин йўқ. Қаловини топсанг қор ёнади. Бунинг учун фақат йўл топа билиш керак.

Уларни гап Силан алдаш, шароитга мослашиш, осмондан келиб мақтаниш... унинг найрангларидан фақат бири әди. У бир йили ўз онаси Марҳаматхонни ҳам жуда ноқулай аҳволда қолдирган әди; қамалиб қолган бир база мудирининг ўғирлиги фош бўлганида терговчи Хайрушка Музаффаровни ҳам сўроқ қилиб, отонани юрак ўйноғи қилган..

Она қўлидаги брильянт қўэли узугининг серқирра кўзига тикилиб туриб юраги орқасига тортиб кетган әди. Мощдек ярқироқ тош бир ботмонлик тегирмон тошидек оғир бўлиб туюлди. У бошига тушиб, мажақла-моқчи ҳам бўлган. Қулогидаги икки зирақ ҳам брильянт әмас, қулогига осилиб турган икки сариқ чаёнга ўҳшаган. У ҳатто қўл тегизгани ҳам қўрққан. Ҳар қалай, Хайрушка бу ишдан қутулиб қолди.

Шу йиллари Хайрушка «фан кандидати» деган илмий даража олишни жуда ҳам орзу қилиб юради. Шаҳримиздан магазинлардан бирида эркаклар костюми сектори мудири бўлиб ишлаб туриб, айни вақтда «диссертация устида иш олиб борди». Кўп одамлар «фан кандидати» бўлиб олган, «кандидат» бўлиш ҳозир бир қурум зиёлинома кимсалар орасида қадим чарлистон шим кийиш мода бўлганидек модага айланди. «Нима, Шоқосимдан менинг нимам кам, ўшанинг ақлича ақлим йўқми»,— деди ўзига-ўзи Хайрушка. Ўғлининг нимага лаёқати борлигини яхши биладиган Файзулла Аҳмедович аввал кулди, кейин: «Э, қўйсанг-чи, ўғлим, бирор эшитиб қолса уят бўлади,— деди.— Ҳамма ҳам кандидат бўла бериши шартми?»— деб шахтини қайтарди. Ўғлининг ёшлиқдан ишга тоқати йўқ, зеҳни сал пастлигини биларди.

Хайрушка отасидан бу гапни эшитиб хафа бўлди. Ўз ўғлини «камситган» отани у бир жеркиб ташламоқчи ҳам бўлди. Бу ишга журъяти етмади-ю, аммо бир неча кун қовоғини солиб, гаплашмай юрди. «Бўлса бўлаверсин, сизга нима?»,— деди Марҳаматхон кунлардан бир куни чучвара еб ўтиришганида Файзулла Аҳмедовичга.

* * *

... Гулгун билан Таманно ўрниларидан туриб кийинишиди. Катта тошойна олдида соchlарини текислаётган Гулгун хаёлидан бу хонадоннинг ўз сўзли «ҳокими» Хайрулла Файзуллаевичнинг уddабуронлигидан таш

қари, анчадан бери ўзига бошқачароқ қараётганини се-зиб, юраги шифиллаб кетди. Нима қилиш керак? Бир баҳона топиб, бу уйдан чиқиб кетиш керакми? Унда, ўз отасининг қадрдон дўсти Файзулла Аҳмедович нима дейди? Бу ҳурматли киши юзига оёқ тираган бўлмайдими? Хайрушкани ҳам айبلاغандек бўлиб чиқмайдими? Гулгун ўз фикридан қайтиб, тишини тишига қўйди. Хайрушканинг хотин қўйгани, кимгадир уйланмоқчи бўлиб юрганини ҳам эшитган эди. Бундан ташқари, қайси эркак хотинларга хушомад қилмабди? Бир аёл: «Вой эркакнинг ҳам ёмони бўладими...» — деб юрганда боши очиқ Рустамдек давангир, келишган бир йигит қизларга қараса нима бўлибди! Хушомад қилиш ёки бирон нимани туҳфа этиш гуноҳми? Эркак бўлса-ю, симёғочдек ғўдайган, қуруқ бўлса, гаплашишни ҳам, хушомадни ҳам билмайдиган совуқ бўлса, аёлларни кўрса тўрсайса, бундан ёмони борми!

Шундай қилиб, Гулгун ўзига-ўзи тасалли берди. У ўрнидан туриб, ювиниб, институтга жўнашга ҳозирлик кўрди. Охшонага кириб, чой қўйди. Ҳамма учун дастурхон ҳозирлаб, нон кесиб, ширинликлар тайёрлади. Стулларни тўғрилаб, пиёлаларни ювди. У, Таманнога ўхшаб, тарақ туруқ қилмай, чойнакнинг тумшугини учирмай, бу ишларни тез ва чаққон бажаарди. Бир лаҳзада олдига фартук тутиб, енгларини шимариб, ҳамма ишни муҳайё қилиб қўйди. У ошхонада чаққон ишлар экан, баъзан унинг қоматига, ақлли гапларию қилиқларига тикилиб маҳлиё бўлиб қолган Хайрушка унинг ўша «хунук», «бадбашара» кимсага текканидан хафа бўларди. Шундоқ гўзал нарса ўша одамга хотин-а! Бу гул-ку! Гулни гулга қўшмай алафу чақиртиканга қўшадими! Дунёнинг иши доимо мана шунаقا бир кам икки-я! Хайрушка фақат тупугини ютарди-ю, бундан бошқа ботиниб бирон нима деёлмасди. У Гулгунга нисбатан жуда ҳам эҳтиёткорлик билан иш тутарди; меъёридан ошириб қилиқ қилганини, сурбетликларини ёқтирмаслиги, жеркиб ташлашини ҳам яхши биларди.

Бошқалар ҳали ухлаб ётишганида Гулгун билан Таманно чой ичиб, портфелларини кўтариб, институтга жўнашди. Хонадан чиқишида икки қиз катта ойна олдида бир лаҳза тўхтаб, ўзларига қарашди. Таманно «Зю-зю» қутичасини очиб, биллур идишни қўлга олдида, унинг сурғичини узиб, француз атирини Гулгун ёқасига, ундан сўнг ўз ёқасига, кўксига суртди.

— Вой, бу жуда зўр-ку! — деди Гулгун атири ҳиди димогини чоғ этгач,— французлар атирини боплади. Аллақайси президент махсус самолёт юбориб ўз хотинида Париждан атири олиб келтирган экан.

— Бу гапни мен ҳам эшитганман,— деди Таманно дугонасига жилмайиб,— акамлар ҳам бу уйнинг «президенти». Нима, сенга тухфа қилса арзимайдими? Бу сенга!

— Бу уйнинг «президенти» атирини нотўғри адресга юборяптилар!

— Об-бо, берганинг бетига қарама,— Таманно ноёнб атиридан яна Гулгунга суркади-да, шишани унинг тумбочкаси устига қўйди. Шундан сўнг икки қиз кўчага чиқиб кетди.

Орадан бир кун ўтгач, ўқишдан қайтиб келишган Гулгун билан Таманно хонасига кирган Хайрушка уларнинг тезда тайёрланиб, машинага чиқишлиарини буюрди. Нега, нима гап, деб сўрашга ҳам улгуришмай, у чиқиб кетди. Дарҳол кийиниб, қўлига сумкасини олган Таманно ҳеч нима демади-ю, акасининг сўзини икки қилиб бўлмаслигини, унинг кейинги вақтда барча хатти-ҳаракатлари фақат яхшиликка эканини, магазинда ишлари йирик, қайфиятлари чоғлигини пайқарди. Ҳамонки шундай бўлгандан кейин, у нима деса дарҳол итоат этиш зарурлигини имо-ишора билан дугонасига сезидирди. Аслини олганда, акасининг яқиндан бери Гулгун кетида жинни бўлиб юргани, шу баҳона «шолининг орқасидан курмак ҳам сув ичиб қолаётгани» унга жуда қўл келарди. Акаси бундай «жинни» бўлмаганида ундан бир тийин олиш ўлимдан қийин! Бу нодон тилини осилтириб, сангигиб юрганда уни лақиллатиб, ўзига яхши импорт кийимлар олиб қолишини мўлжалларди.

— Нима гап? Қаёққа борамиз?

— Билмайман,— деди Таманно,— юр, чиқайликчи, қаёққа олиб борса, бораверамиз. Уйда диққинафас бўлиб ётаверамиزمи!

— Дарсим бор.

— Дарсни кечаси тайёрлаймиз.

Орадан кўп вақт ўтмай икки қиз бошқатдан кийинишиб, ўзларини яна ойнага солиб, ташқарига чиқишиди. Дарвоза олдида ўз машиналари шай туради. Кабинада ўтирган Хайрушка дарҳол ташқарига чиқиб, Гулгунга эшик очди. Орқага ёнма-ён ўтирган қизлар бир-бирига қараб қулишди.

— Ака, бизни қаёққа олиб кетяпсиз?

— Боргандা биласан! — деди машинани гуриллатиб юборган Хайрушка жиддий туриб.

У түппа-түгри машинани ўзи ишлайдиган магазин ёнига олиб келди-да, қизларни туширди. Кечаки Гулгуннинг сира оқ туфли киймагани ва баланд пошиали оқ туфлини яхши кўришини эшитган эди. Хайрушка икки жуфт ўттиз еттинчи размерли, баланд пошиали Чехословак туфлисини топиб, шерикларига тайнинлаб қўйган эди. У икки қизни магазинга бошлаб кириб, аёллар пойабзали бўлимига олиб келди. Сотувчи йигитга, бояғи туфлиларни ол, дегандек имо қилди. Синглиси билан Гулгунни стулга ўтқазиб, қўлларига қофоз қутидаги туфлини тутқазди-да:

— Кийиб кўринглар,— деди Хайрушка.

— Вуй, мунча яхши! — Таманно ҳайратланиб, тезда сарғиш туфлисини ечиб ташлаб, оқни кийди,— худди ўзимнинг размерим.— Гулгун ҳам оёғидаги қора туфлини ечиб, оқни кийди.

— Менга ҳам жуда түгри келди.

— Тўгри келдими? Еқдими? — Хайрушка сўради.

— Ҳа, жуда зўр! — деди Таманно.

Хайрушка Гулгунга ҳам қаради.

— Размери тўгри келдими? Еқадими?

— Яхши. Нархи неча пул?

— Бўпти, нархини суриштирманг.

— Үн еттинчидаги стипендиям тегади.

— Стипендия? — кулимсиради Хайрушка,— қани, юринглар, кетдик!

Хайрушка қизларни магазиндан олиб чиқиб кета туриб, мўйловли сотувчи йигитга кўз қисди. У ҳам, «кетаверинг, пули кейин бир гап бўлар», дегандек қўлини кўрсатди. Ўзларига тухфа этилган оқ туфлиларни қучоқлаб икки қиз яна машинага ўтиришди. Хайрушка Гулгуннинг музейларга киришни ҳам жуда ёқтиришини эшитган эди. У машинасини тўгри яқинда битиб, ишга тушган «Зангори гумбазлар» — Шарқ услубидаги ресторанга олиб борди. Бунда кабобу ош, лағмону сомсалар тайёрланарди. Шинам ва ниҳоятда гўзал бу «Зангори гумбазлар»нинг ичкарисига кириб, холи бир столни эгаллашди. Таманнонинг илтимосига кўра кабоб чақиришди. «Унча қорни очмаганини» айтиб, уялинқираб турган Гулгун кўпроқ Таманнога қаради. Бу ерда ҳам Хайрушканинг ошнаси борга ўхшайди; кимгадир имо қилган эди, тезда жизиллаб пишган ўн

сих кабобни оппоқ тарелкада олиб келишди. Пиёзу сирка, янги тандирдан чиққан нонгача бир зумда тайёр бўлди.

— Оҳ-ҳо, шашликни жуда боплашибди,— деди шўх Таманно акасидан ҳам, Гулгундан ҳам уялмай, тортингмай,— қани, совутмай олаверинглар!

Гулгун ҳам, Хайрушка ҳам бир сихдан кабоб олишиди.

Чой ҳам келди.

— Шампанскоеми, сухой виноми слиб берардиму, барibir ичмайсизлар. Дарс тайёрлазингиз керак,— деди Хайрушка камтарлик ва меҳрибонлик қилиб. У ўзининг ниҳоятда олижаноб эканини, умуман, ҳаммага меҳрибонлигини, шаҳарда уни танимайдиган одам йўқлигини билдиришга ҳаракат қиласди.

— Ичамиз, шампань виносидан олаверинг!— деди Таманно эркаланиб.

— Йўқ, дарс тайёрлайсизлар! Кўп ҳаддингиздан симанг! Бу атрофда менинг таниш-билишларим кўп. Ана, министр муовини ҳам, ҳув нарида Главканинг бошлиғи ҳам ўтиришибди. Катталар аксар шу «Зангори гумбазлар»га келишади. Менинг бу танишларим олдидиа ичишим мумкин эмас! Эртага шаҳарда дув-дув гап бўлади. Бунинг устига ҳозир иш вақти. Сени машинада ўйнатиб юрганимга ҳам шукур қиласвер. Шу бугун настроением яхши бўлгани сабабли сизларни ўйнатгим келди. Қаттиқ дарс тайёрлайсизлар, чарчайсизлар... Бир оз ҳордиқ чиқариш ҳам керак,— деди Хайрушка. Унинг бу гаплари Таманнодан кўра ҳам Гулгунга қаратилган эди.

— Шу ишларингизга ҳам раҳмат!— деди Таманно ўзига келиб. У акасининг кимлигини жуда яхши биларди.

— Ҳозир мороженое олиб келади.

— Пломбир олиб келсин!

— Шундай бўлади,— деди виқор билан Хайрушка.

Гулгун бўлса баъзан атрофига олазарак қараб, гапирмай ўтиради. Хайрушкадан ташқари атрофидаги «министрлар», «Главка бошлиқлари»нинг салобати босарди. Ҳаш-паш дегунча кабобни еб бўлишди. Официант йигитга имо қилган эди, мороженое ҳам олиб келди. Уни ҳам туширишиди.

— Бўкиб қолмасам яхши эди,— Таманно қиқирлаб кулди.

Бу маданиятсиз бир гап эканлигидан уялиб, Хай-

рушка ерга қаради. У Гулгундан сунъий бўлса ҳам уялгандай бўлиб ўтиради. Аслида жуда ҳам бети қаттиқ кимса. Зимдан Гулгунни кузатарди. Ўзини катта тутиб, деярли ёлғон гапларни айтиб, мақтанаарди. Бу гапларнинг барчаси пўрсилдоқ, ёлғон гаплар эканини Таманно сезиб ўтиrsa ҳам, унинг тиззасидаги оқ туфли бу ёлғончига нисбатан «бениҳоя ҳурмат» билан қарашга мажбур этарди. Акасининг барча «обўёси» фақат шу йўл билан топиларди. Отаси унинг бундай сохта ишларини кўриб, бир марта тарсаки тортган. Кеинин «микро инфаркт» бўлиб, касалхонада ётиб чиқкан.

«Зангори гумбазлар»дан мамнуну масрур чиқишган қизларни Хайрушка Санъат музейига олиб борди.

— Бугун энди дарс тайёрламайдиганга ўжшаймиз,— деди Таманно Гулгунни тортқилаб,— ке ўладиган дунёда бир ўйнасан ўйнаб қолайлик. Бир кунгина дарс тайёрламасак илмимиз камайиб қолармиди! Эртага икки кунлигини бир қилиб ярим кечагача тайёрлармиз. Казосини тўғрилаймиз. Бунақа қулай ишлар ҳар куни бўлавермайди. Акамларнинг акслиги тугса, ўйнаш у ёқда турсин, гаплашиш ҳам қийин бўлади.

Таманно сўзларига қулоқ солиб турган Гулгун хатолаб кулиб юборди. Таманнонинг бир сўзи унинг кулгисини қўзгатиб юборди. Нимага у қаттиқ кулаётганини Таманно фаҳмлай олмади.

— Бугун дарс тайёрламасангизлар, эртага икки кунлигини бирдан тайёрлаб қўя қоласизлар,— деди Хайрушка,— биз шунча ўқиб нима бўлдик! Магазин мудири! Магазин мудири бўлиш учун тригонометрияни билиш шарт эмас! Тавба! Агар бунақалигини билганимда вообще ўқимасдим. Калла бўлса бор, фаяқат адамлардан чўт қоқишини ўрганиб олсан кифоя эди...

Бу гапларни эшитиб турган Гулгун дам хижолат бўлар, дам бу уддабурон йигитга ачинарди. Таманно бўлса акасининг бу гапларидан ранжиб, энсаси қотди. «Унда нега «кандидат» бўламан деб юрган эди! Нега ўзини ерга уриб гапиради, мақтанса бўлмайдими»,— дерди фижиниб ичида. Таманнонинг айтишича, акаси Москвага ўқишига борганида хотини бунда бир киши билан юрибди... Бу гапни эшитган акаси қўйди-чиқди бўлган экан. Гулгун бу гап ёлғонлигини, Хайрушка Москвага бориб ўқимаганлигини биларди. У, умуман,

бирон олий ўқув юртида ёлчитиб ўқиган эмас. Бу хона-
донга яқин кишилардан бири «Хайрушка хотин устига
хотин олгани, лекин иккала хотин ҳам уни ташлаб
кетгани»ни бир куни лақиллаб айтиб қўйган эди. Хул-
лас, Хайрушка Гулгун назарида бир жумбоқ одамга
ўхшарди. Эҳтимол, унинг боши деворга тақ этиб тегиб,
ҳозир кўзи очилгандир. Умуман, бир одамни тамоман
ёмон ға ётамоман яхши дейиш тўғри эмас, дерди Гул-
гун. Инсон янгилиши мумкин. Инсон фавқулодда
қаҳрамонликлар, мардликлар кўрсатиши мумкин. Чун-
ки у фаришта эмас, инсон! Бир одамни ҳадеб ёмонлай-
вериш ҳам тўғри эмас. Ахир, ҳар бир ёмон деган ки-
шининг ҳам яхши томони бўлади-ку! Одамларни «фа-
ришталар» ва «девлар»га ажратиш мутлақо тўғри
эмаслигини Гулгун ўз отасидан кўп марта эшитган
эди.

Улар Санъат музейини томоша қилишди. Агар қў-
йиб берса, Гулгун аллавақтгача юришга тайёр эди. Ҳар
бир санъат асари ёнида узоқ-узоқ қолиб кетарди. Ми-
лоддан илгариги давр санъати ёдгорликлари, Афросиёб
шахри топилдиқлари Гулгунни ўйлатиб қўйди. Самар-
қанд атрофи, Зарафшон водийсидан топилган, бундан
беш минг йил илгари фил суюгидан ясалган найга узоқ
тиклиди. Катта залдаги «Чўмилаётган гўзал» суратига
тиклиб турган Хайрушка ёнига қизлар яқинлашиши
 билан ўзини бошқа томонга олди. Таманнонинг «бўкиб
қолдим» деганга ўхшаган яна бир ёқимсиз гапни ай-
тиб юборишидан чўчиди. Синглиси аввал шу сурат та-
рихини кимданdir эшитганини, инқилобдан сўнг князъ
одамлари сарой (ҳозирги Пионерлар саройи) деворида-
ги катта бир дераза ўрнига қўйиб, суваб юборганликла-
рини Гулгунга гапириб берди. Бу ноёб сурат йигир-
манчи йиллар охирида топилганини ҳам қўшиб қўйди.
Гулгун бу сурат тарихини тинглаб, кейин томоша қил-
ди. Унинг назарида худди шундай аёлни институтда
кўргандек — кимёдан дарс берадиган Раҳима Тешабо-
евна шу аёлга ўхшаб кетармиди?! Қошлирининг қора-
лигию лабларининг тиниқлиги, кафтлари худди Раҳи-
ма опанинг ўзгинаси-я! Бошқа суратни кўраётган Хай-
рушка «Чўмилаётган гўзал»га тикилиб турган Гулгун-
ни кузатарди. Икки гўзал бир-бирига қараб турганидан
завқланарди.

Қош қорайишига яқин Хайрушка билан икки
қиз машинада уйга қайтиб келишди. Улар ғоятда мам-
нун. Хонага киришлари биланоқ қўлларидаги короб-

кадан оқ туфлиларини олиб, бошқатдан кийиб кўришди.

Бугунги кун ниҳоятда гўзал ва мазмунли бўлганини икковлари ҳам самимий қайд этишди.

Орадан икки кун ўтгач, кечқурун Хайрушка, чой қўйиб беринглар, баҳонаси билан қизлар хонасига кирди. Китоб ўқиб ўтирган Гулгун Таманиндан олдин лип этиб ўрнидан турди.

— Мен, мен чой тайёрлайман! — деди Таманнонинг қўзгалмаслигини сўраб. Чунки шунча яхшилик қилаётган Хайрушкага чой эмас, ботинкаларини артиб қўйиш, кирларини ювиб, шимларини дазмоллаб беришга ҳам тайёр эди.

Гулгун ошхонага кириб кетгач, Хайрушка қоғозга ўроғлиқ бир нимани синглиси каравотига тап, этиб ташлади.

— Бу нима? — Таманно ётган жойида акасидан сўради.

— Атлас.

— Кимга?

— Сенга ва унга.

— Ака, сиз нима қиляпсиз?

— Ишинг бўлмасин! Унга кўрсат, танлаб олсин. Лекин бу тўғрида ойимларга чурқ этма! Бўйнингни узуб ташлайман!

— Гулгуннинг эри бор. У бироннинг келини. Сиз шуни биласизми?! Бир инженер йигитнинг хотини-я! Чорвоқда ишлайди. Сиз бирон қилиқ қилиб, адамларни хафа қилманг! Адам ўша инженер йигит билан бирга ишлайди. Бизга ишонганидан хотинини бунда яшаб туришига рози бўлган. Азбаройи адамларни ҳурмат қилиб, ишонганидан. Эсингизни йигиб олинг! Иккинчидан, сиз жуда кўп подарка олиб келяпсиз, ойимларга айтиб бераман.

— Ҳа, бўпти! Атласимни қайтариб оламан, — у каравотга яқин бориб, газетага ўроғлиқ атласни қайтадан олаётган эди, Таманно мушукдек човут қилиб, атласни ушлаб қолди. Дарҳол очди. Таманнонинг кўз олдида икки кийимлик хонатлас намоён бўлди.

— Э-э, олиб келдингизми, энди бермайман!

— Ойимга чақмоқчи бўляпсан-ку!

— Чақмайман. Лекин барибир биладилар..

— Ундоқ бўлса бер, бошқа одамга олиб бориб бераман!

— Йўқ!

- Гулгунга бир кийимлигини берасанми?
- Ҳа.
- Менга у ёқиб қолди.
- Бу фикрингиздан қайтинг! Агар сиз яна унга тикилаверсангиз, бу уйдан кетиб қолади! У сиз ўйлаган кизлардан эмас! Улар эр-хотин бир-бирларини жуда яхши кўришади. Тегажаклик қилсангиз, кетиб қолади, биз шарманда бўламиз!
- Қаёққа борарди? Сижжакдан қатнаб ўқиёлмайди-ку?
- Шу пайт хонага Гулгун кириб қолди. Ака-сингилини гапи кесилиб, Хайрушка ташқарига чиқа бошлади.
- Ошхонада чой дамлаб қўйдим,— деди Гулгун Хайрушкага.
- Раҳмат!
- Гулгун ялт этиб Таманно тizzасига ёйиб ўтирган хонатласга қаради.
- Аканглар олиб келдиларми? Вуй, мунча чиройли.
- Ҳа, Хайрушка олиб келди. Жуда яхши атлас экан. Бир кийимлиги менга, бир кийимлиги сенга...
- Иўқ, нега менга бўлади? Мен ўзи ҳозир ҳам анча қарздор бўлиб қолдим.
- Мен акамнинг сўзини айтяпман. У мен билан сенга атай олиб келибди. У жинни. Сенинг бирон ишинг унга ёқиб қолган. Ҳа, у бирон кимса яхшилик қилса, шунача яхшилик қилаверади... Гапнинг тўғрисини айтишим керак, сен унга жуда ёқиб қолган эмишсан...
- Бу нима деганинг?! Мен жуда хижолат бўлпман. Қоражон акам эшитиб қолсалар, нима ёўлади! Туфлини ҳам у кишига айтаман. Пулини берамиз.
- Ўзинг биласан. Бу атлас сен билан менга. Вассалом! Мен оламан.
- Мен олмайман!
- Шундан сўнг улар ўз жойларида конспект ўқишига киришиб кетишиди. Гулгун билан Таманнонинг кўзлари конспектда эди-ю, хаёллари каравот этагида ёзилиб, кулиб турган атласда эди.
- Орадан бир ҳафта ўтгач, иккала хонатлас икки қиз устида ял-ял ёнди...
- Чоршанба куни Марҳаматхон кечга яқин икки қизини олиб, янги массивда ҳовли-жой қилган бир уруғиникига меҳмонга борди. Уларни Хайрушка ўз машина-

сида ташлаб келди. Гулгун, ўқишдан чиққач, кутубхонага кираман, бир оз кечикиброқ келаман, деган эди. Марҳаматхон унга косага ош солиб, қозонга қўйганини Хайрушкага айтди. Хайрушка онасига, телефон қоқсангиз, бориб олиб келарман, деди. Хайрушка онаси, сингилларини ташлаб келгач, ҳовлида бир муддат айланиб юрди-да, кейин ўз хонасига кириб чўзилиб ётди. Соат еттиларда Гулгун келди. У бугун ўқишига янги хонатлас кўйлагини кийиб борган эди. Истиқболига чиқиб эшик очган Хайрушка унга қозонда ош борлигини, чой ҳам дамлаб қўйганини айтди. Шундан сўнг Хайрушка яна ўз хонасига кириб кетди.

- Аямлар қанилар?
- Меҳмонга кетишиди.
- Таманно ҳам кетдими?
- Ҳа.

У юз-қўлини ювиб, ошхонага кириб овқатланди. Чойнак билан пиёлани ўз хонасига олиб кириб, каравотига чўзилди. Бир-икки пиёла чой ичиб, кутубхонадан олиб келган «Гистология» китобини ўқишига тутинди. Орадан бирон соат вақт ўтгач, чарчаб келган Гулгунни уйқу элитди. Китоби кўрпа устига тушган ҳолда ёстиққа бош қўйиб ухлаб қолди.

Қизлар хонаси эшигига пайдо бўлган Хайрушка стол устидаги электр чироқ ёқиқ қолганини, Гулгуннинг қўлидан китоби тушиб ухлаб ётганини кўрди. Унинг оппоқ кўкси ҳам очилиб қолибди. Хайрушка хона ичига кириб, Гулгун тепасига келди. У эгилиб, қизнинг сони устига тушиб ётган китобни эҳтиёткорлик билан олиб, тумбочка устига қўйди. Хайрушканинг юраги гуп-гуп уради. У атлас кўйлакда пишиллаб ухлаб ётган Гулгунга бошдан-оёқ тикилди. Дунёда ундан гўзал нарса йўқ эди. Унинг ҳирси қўзғаб, ҳозироқ қучмоқчи бўлди. Яна бу ишдан ўзини тииди. Бир муддатдан сўнг кўрлани секин очиб, чарчаб келган Гулгун ёнига ётди. Уни маҳкам қучди. Бирдан уйгониб кетган Гулгун ўз ёнида Хайрушкани кўриб, сапчиб ўрнидан турди. У ёпишаётган эди, жон-жаҳди билан ба-шарасига шапалоқ тортиб юборди. Каравотдан пастга ағдарилиб тушди. Саросимада ўрнидан тураётган Хайрушканинг юзига қулоч кериб, яна бир-икки тарсаки тортди: «Аблаҳ экансан! Йўқол!» «Сени яхши кўраман...» Бу қовушмаган, совуқ гапни айтган Хайрушка мулзам бўлиб уйдан чиқиб кетди...

ХХVIII боб

СУВГА ЧҮККАН ҚИШЛОҚ ЕКИ ШОИР АМИР РАВНАҚ ХАТОСИ

Жабри устози беҳ, зи меҳри падар.¹
Саъдий

Еши кетган баъзи кишиларнинг аксар эзма бўлиши ва бунинг устига, тилаб олгандай ҳар куни бир нима дилини хуфтон қилиши маълум. Тез-тез диққатбозлик баъзи зиёлилар ҳаёти учун одатий ҳол. Лекин киши ўзини ўзи хафагарчилик гирдобига отмаслиги ҳам мумкин-ку! Бу унинг ўз қўлида. Бу кўп вақт ақл-идрок-нинг етуклигига ҳам боғлиқдир, дерди елкасига беқасам тўйинни ташлаб хаёл сурисиб ўтирган кезларида шоир Амир Равнақ. Бундай пайтларда у Саъдийни ўқиб, мутолаа қиласарди:

«Ёдимда, бир кеча севикли дилбарим эшикдан кириб келди. Мен шундай жадаллик билан ўрнимдан иргиб турдимки, беихтиёр енгим билан шамни ўчирдим:

Кўринмоқ бўлдиму менга қаро тунни қувар чеҳра,
Шошиб қолдим, нечук келди менга бу баҳт, саодат ҳам...

Ёрим ўтиргач, итоб қилиб деди: мени кўришинг билан чироқ ўчирганинг маъноси нима? Мен демидим: бунда икки маъно бор: биринчидан, сени кўрдими, қуёш чиқди, деб ўйладим, иккинчидан, шундай бир шеър хаёлимга келди:

Гар бегона шаминг узра келганда,
Соя қилса, ундан одамини ўлдир!
Ширин лаб ёр келса, қилганда ханда
Шамни ўчир енгла, ушбу маъқулдир».

Амир Равнақ иккинчи ҳикоятни ҳам ўқиди:

«Мен ҳеч маҳал давр жабр-жафосию фалакнинг кажрафторлигидан шикоят қилмаган эдим, лекин бир марта нолидим. Ушанда оёқ яланг қолган эдим ва кавуш сотиб олишга қодир әмасдим. Қаттиқ ўксиниб, Куфа шаҳридаги жоме масжидига кирганимда, оёқсиз бир одамга кўзим тушди. Шунда шукур қилиб, кавуш сизлигимга сабр этдим.

¹ Отанг меҳридан устознинг жабри афзал.

Қовурилган қуш қадри тўқлар олдида
Дастурхонда пиёз, кашнич, ўтдан кам.
Оч олдида ўтар товуқ ўрнига
Қуруқ сувда қайнаб пишган бир шолгом».¹

Киши баъзан жуда ҳам зарур ва доно гапларни айтиб юборади. Шайх Саъдий умри «баъзида» эмас, доимо илҳом билан ардоқланганини, бу мутафэкир шоир шеърий жавоҳирлар терганини кўнглидан ўтказди. Киши баъзан иккинчи бир одамдаги нуқсонни ҳам сезиб, уни йўқотиш йўлларини кўрсатиб, маслаҳат беради. Лекин киши ўзининг «танқидбоп» томонларини кўп вақт кўролмайди. Бирон кимсанинг муттасил камчилигини айтавериш сурбетлиқдан бошқа нарса эмас. Кишининг нуқсони бир маротаба кўрсатилгани маъқул... Амир Равнақ «эрмана бор ерда эл ўлмас, дармана бор ерда дард бўлмас»ни айтиб юрадиган мўйловдор инвалид Милтиқбой aka Қўйбоқаровни кўз олдига келтирди. «Кетмоннинг ўзини босма, калтак ейсан! Мехнат кишиси ўзини оёқ ости қилдириб қўймайди!» — деб юради Милтиқбой aka аксар. «Жоним ўзганинг чамзан боғида эмас, ўзимнинг чалдиворимда ором олади. Унинг лоҳас қиласидиган иссифи ҳам, совуқ лойгарчиликларига ҳам чидайман. Мен уни ташлаб ҳеч қаёққа кетолмайман. Саратонда денгиз бўйларига, аёзда иссиқ мамлакатларга учолмайман! Мен ўз еридан узилса қурийдиган бир гиёҳман», — деб юрадиган Файзулла Аҳмедович Музafferовни эслади. Бошқаларни гаи билан савалаш лозим бўлиб қолганида кўзини юмиб гапирадиган сижжаклик Чоршанба отани: «Ҳа, шоир aka, ёстиқни қучоқлаб ётибмиз», — дейдиган инженер Қоражон Мингбоевни ҳам кўз олдидан ўтказди. Бу йигит бир куни тўсатдан: «Сиз енгилишни ёки муваффақиятсизликни қандай ўтказасиз?» — деб савол берган эди. Шу саволи билан шоирнинг ёдида қолди. Бундай ҳолат Амир Равнақ ҳаётида кам учрагани сабабли, у инженерга ҳайратомиз боққан. Нега бундай савол туғилди, деб анча ўйлаган ҳам.

Якшанба куни шоир ўз машинасида яна, Чорвоқ қайдасан, деб йўлга чиқди. У ҳаммадан кўпроқ фикрлар талошида ўзи билан беллаша оладиган Файзулла Аҳмедовични соғинган эди. Ўзининг янги шеърларини

¹ Гафур Ғулом ва Шоислом Шомуҳамедовлар таржимаси.

биринчи бўлиб эшитадиган ҳамда ўз баҳосини берадиган дўсти бу гал ҳам уни очиқ чеҳра билан кутиб олиб, одатдагидек, гапни «Эшитамизми, йўқми?»дан бошлади. Шеър ўқишидан аввал бир муддат фалсафий, дунёвий гаплар айтиш, агар жуда ҳам чуқур бир нарса айтилмаганда Англиядаги Несс кўлидаги улкан маҳлуқни кўришгани ёки бизнинг Галактикадаги ўта улкан юлдуз, шу Галактика туманинг бир четидаги нуқта — Қуёш системамиз эканини гапиради. Коинот беҳудуд экани, на ибтидосио ва на интиҳоси борлиги, бутун бир Қуёш системамизни доира қилганда ҳам ундан катта юлдузлар борлигини айтарди. Коинотнинг бепоён эканини «икки материалист» ўйлаб-ўйлаб поенига етолмасдилар. На Берунию Улугбек, на Эйнштейн, на Галилей, на Гершель ва на Амбарцумян туғал фикр айта олганлар! Дунёнинг чегараси фақат олло таолонинг ўзига маълум, деган Мирзо Улугбек. Бу идеалистик гапда ҳам бир фалсафа бор...

— Мозийда фирмъавнлар қилич ва қон билан баланд эҳромлар қурдириб, ўзларининг буюкликлари ва одамларнинг ўрмалаб юрган чумолилардек ожиз эканини кўрсатмоқчи бўлганлар. Амир Темур ҳам жаҳонга: «Менинг қудратимни билмоқчи бўлганлар осмон-ўпар қасрларим пештоқига, мадрасаю миноралар гумбазига, кошинлар жилvasига қарасинлар», деган экан. Мовароуннаҳру Хурросон меъморлари Самарқандда қазога етардилар...Самарқанднинг ҳар қарич тупроғида бир тарих ётиди, бу ерда лоқайд қадам ташлашга ҳақимиз йўқ! Ердан, деворлардан, гиштлар орасидан аждодларнинг овози келиб туриди...

— Фикрингизга қўшиламан,— деди Файзулла Аҳмедович,— энди, азизим, марҳамат қилиб шеърларинингизни ўқиб берсангиз.

Амир Равнақ костюмининг ён чўнтағидан буқланган қофозни олиб, чиройли қилиб кўчирилган бир шеърини қайтариб чўнтағига солди-да, бошқа бир шеърни ўқий кетди:

Агар минг йил умр ваъда этсалар,
Десаларки, дунё тургунча борсан...
Дердим, нечун минг йил бўлишлик сарсон?
Менга бир инсоний умр кифоя!
Инсоний бўлмаган ҳамма нарса ёт,
Ишлаб яшамоқлик — умрлик гоя.
Одамий бўлган-чун мазмунли ҳаёт —

Баҳорда барг ёзиб, ёз билан пишиб,
Кузда баргларини тўкишлик не соз!
Ўзлигинг яралган моддий олам-ла
Қўшилиш, баъзида қордай сарафroz
Далаларга қўниш, ёмғирда ёғиши..
Яна кўклам келиб, биз барг ёзамиз —
Фарзандлар кўзи-ла кўрамиз юртни.
Яна эл кезамиз, дунёни сезамиз,
Демак, бу тупроқда ётмадик, турдик.
Фасллар! Келдию кетдиси бўлган
Инсоний, сермазмун яшамоқ — гоя.
Совуқ минг йилларни кечирсин зоглар,
Бизга бир инсоний умр кифоя!

— Қалай?

— Қалай эмас, олтин! — деди Музаффаров, — яна ўқинг! Чўнтакка қайтариб солиб қўйганни ҳам ўқинг!
— Ўзи битта эди.
— Ўқинг! Кейинги пайтда мени қийнаяпсиз. Битта шеър билан шундан-шунга келармидингиз! Ўқе-енг!
— «Ўзбек гўзали» шеъримни ўқийман.
— Ҳа, ана шуни ўқинг.

Музаффаров шеърни диққат билан эшитди. Кейин сўради:

— Кимга багишланган?
— Бир одамга...
— Биламан! — деди истеҳзо билан кулиб Музаффаров, — бу шеърнинг ўз тарихи бор. Уни кейин айтаман. Энди, бояги, чўнтакка солиб, мендан яширган шеърни ҳам ўқинг!
— Бошқа шеърим йўқ, азизим, — деди илжайиб Амир Равнақ. У зўрлаб шеър ўқитганни жуда ёқтиарди. Шу сабабли ҳам Музаффаров иши тиқилинч вақтда ҳам, шеър эшлишга иштиёқи бўлмаган фурсатда ҳам дўстини атай зўрлар, янги шеърини ўқиб беришини истарди. Амир Равнақ лабининг таноби қочиб ошнасига майин бир овоз билан, жуда берилиб шеър ўқиб берарди. У яна эътироуз билдириди: — Йўқ, азизим, минг қийнасангиз ҳам учинчи шеърни ўқиёлмайман!

— Нечун?
— Махфий. Эгаси бор. Бирор учун ёзиб берганман.
— Э, бундоқ денг.

Амир Равнақ чўнтағидаги шеърни инженер Қоражон Мингбоевга топшириши керак, унинг жуда ўтиниб сўрагани учун ёзиб келган эди: «Укам Қоражон!

Шеърни ёздим, аммо дилингиздаги гавҳарни ифодалай олдимми, йўқми, билмайман. Тушунарли бўлсин учун халқимиз йўлида битдим».

Аввал анча таранг қилиб шеър ўқишини ёқтирадиган шоир бир муддатдан кейин тепасига Нозима хонимдан:

«Ҳама илму аҳойид рус забонида муҳайёдур,
Агар уқсанг, ани чашм олдида олам сурайёдур»,

мисралари эпиграф қилиб қўйилган «Улуғ рус халқига» шеърини ўқиб берди.

— Э, бор экансиз-ку, азизим! — деди Файзулла Аҳмедович бу салобатли шеърдан жуда мамнун бўлганини изҳор этиб.

Яқинда қайси бир газетада янги шеърлари эълон этилиб, шоир ҳақида ширингина бир лавҳа ҳам босилган эди. Музafferов шу лавҳани эслади.

«... Амир Равнақ дегандা бизнинг кўз олдимизда най оҳангидек сўлим, жон олғувчи, баҳорнинг илк кулгиси — лолаю чучмомалардек нафису беғубор лирик бир шоир гавдалаҳади. Аммо, иккинчи томондан, ҳамал ойи момақалдироқлариdek тоғу тошларни ларзага соловчи кучли тўқнашув ва гумбурлашлар тимсоли — тугал достонлар муаллифи ҳам намоён бўлади. У эрта билан шошмай тараниб, ўзи юриб ўрганган кўчадан ишхонага бориб келадиган, қўли бўшаганида шеър ёзив қўядиган, текис бир зиёли киши эмас. Муҳаббати ҳам сертўлқин, илҳоми ҳам дарё, қаҳри ҳам етиб ортадиган, баъзан ўта мулойим, баъзан ҳаяжону ёниш, совур ойи чақмоқлариdek пайдар-пай қарсиллашлар, баъзан ўз она-ерим, ўз халқим, деб фидойи бўлиш, ўта соддалик, қаҳқаҳаю ҳозиржавоблик, баъзан ролга кириб кетиб, Ҳамлет бўлишлиқ, баъзан кичик бир укаси ҳақ гапни айтиб, шаҳ берганида гувраниб, тан олишлиқ, шеърни ниҳоятда ўзига хос, табиий ўқишлиқ, дуторни яхши чалишлиги билан шоир ҳеч бир қолипга сигмайдиган, тоғлардек серқирра санъаткордир. Унинг суҳбатида бўлган, у билан бирга юрган кимса ҳамма вақт ўзини тетигу бардам, серзавқ ва кучли ҳис этади. Эрталабдан-кечгача учиб чарчамайдиган қалдирғочлардек, у фикрлашда асло чарчамайди, шахматда ногаҳоний қалтис ҳужумлари билан рақибини шошириб қўяди. Талант эгаларини, баҳодирларни булбулу қарчигайга ўҳшатиш илгаридан бир одат тусига кирган. Биз бошқачароқ муқояса қилмоқчимиз: «Амир Рав-

нақда фил чидами, йўлбарс ҳужумкорлиги мавжуддир...»

— Азизим, ҳозир жуда яхши замон. Ҳозир ҳеч ўл-маслик керак! — деди шоир, — илҳом ҳеч тинчлик бермайди, ишлашим керак.

— Кўп ишлаётганинг яхши. Бирон роман ҳам ёзмадингиз-да, — деди Файзулла Аҳмедович, — ҳаётни ҳар томонлама кўрсатардингиз. Кейинги пайларда разведкачилар, жиноят қидирив ишлари ва Ғарбий Европа олди-қочди фильмлари шунаقا кўп кўрсатилмоқдаки, киши атрофидаги ҳамма нарсага шубҳа билан қарайдиган бўлиб қолди. Ҳатто бирон музейда бўлиб, суратларни томоша қилаётганингизда ҳам шу атрофда қандайдир шубҳали одамлар таъқиб этиб юрганга ўхшайди. Бу чарчашибикан? Йўқ, бу — юқорида қайд этганимиздек фильмларнинг ниҳоятда кўп кўрсатилаётгани. Одамларга ишонч, меҳнат жасоратига ўргатадиган, севги ҳақидаги, мардлик ҳақидаги фильмлар кам. Азизим, мен сизни бир ойсиз бу ердан жўнатмайман! Илгаригидек, «Чорвоқ чироқлари» редакциясига киринг, ёрдам беринг. Улар сизнинг илгариги ишингиздан мамнун. Қурилиш ҳақидаги шеъларингизни босиб чиқаришади.

Шундай қилиб, якшанба куни эрта билан Чорвоққа келган Амир Равнақ тушгача дўстининг хонаи хосида шакаргуфторлик қилиб ўтириди, кейин бирлари сабзи тўғраб, бирлари қозонга ўт ёқиб, «камбағал одамга бир сиқим бўлса ҳам ош яхши» деб, ўз қўллари билан ош дамлашди. Бу бир хонали уйда жиз-биз бўлаётгани, қўй ёрининг «муаттар ҳиди» бошқа қаватдаги қўшнилар димогига ҳам урилди. Улар «Тошкентдан чиққан кекса инженер»нинг ҳафтада икки марта ўз қўли билан ош қилиб туришини ҳам билишарди. Ёлғиз турадиган, камгап, новча бу одам катта мутахассис эканини эшишишган. Музаффаровга уч қаватли кунгай уйнинг биринчи қаватидан бир хонали квартира берилган. Бу квартиранинг ҳовли томонида бир парча ер, балкони, ошхонаси, керакли ҳамма нарсаси бор. Бир қушга ҳам дон керак, ҳам сув. У шаҳардан қозон-товоқ, капгир, лаган, пиёла, чойнак ва бошқа зарур нарсалар олиб чиққан. Ош дамлангач, Файзулла Аҳмедович Қоражон Мингбоевга телефон қоқди. Амир Равнақ ҳам буни жуда истаган эди. Улар иккови ҳам «Чотқол йўлбарси»га илинган эдилар. Чунки бу беҳусн йигитнинг ҳусни қалбida, унинг суҳбати ҳам чиройли эканини билишарди.

Шу куни уйда диванда газета ўқиб, думаланиб ётган Қоражон югуриб чиқди. «Почча»нинг келгани хабари уни дарҳол ўринидан қўзғатди. Уч ошна бир шеърхонлик қилишиб, бир дунёвий гаплардан обдан гаплашиб, дамланган ошни сузиб, ош олдидан қиттак-қиттак отишди. «Ош есалар ўртада сарсон илик, Амир чироқ ёғи, Файзулла пилик...» бўлиб, ўзларича кексалик гаштини суришарди. Шоир учун ўчоқда олов, устида палов, ташқарида ёғиб турган ёмғир қандай яхши! Афсуски, бу гал палов бору ёмғир йўқ... Амир Равнақ гўё Файзулла Аҳмедовичга сездирмагандай бўлиб ёнидаги янги шеърини Қоражонга берди. Бу шеър Гулгунга аталгани, бу шеърни Қоражон номидан ёзганлиги ўз-ўзидан маълум эди. Аммо бу хуфия имо-ишорани биллиб турган Файзулла Аҳмедович ўзини билмаганликка солди.

Ошдан сўнг шоирнинг уйда ҳамалиб ўтиргиси келмади. У «ҳаётни кўриши кераклиги, кўрган афзал» лигини айтиб, дўстларини ўринларидан қўзғатди. У Чорвоқ кўли атрофини ва тўғонни бир айлантириб томоша қилиб келишни илтимос қилди. Тиним куни бўлса ҳам тўғонга бориб келишни кўнглидан ўтказиб турган Қоражон учун бу гап жуда қўл келди. У югуриб бориб эшик ёнида турган машинасини ҳайдаб келди. Файзулла Аҳмедович газни, чироқларни ўчириб, елкасига плашини ташлаб, машинага чиқди. Аввал тўппа-тўғри чўғон бошига бориб, ложувард сувга, тоғларга, гуриллаб ишлатган техникага, иккинчи сменада ишлатганларга қарашди. Шоир тофу кўл манзараларига ҳайратланиб тикилар, ўзидан-ўзи шивирлаб нимадир дерди. Бу, албатта, шеър тўқиши бўлса керак, деди ичидаги Қоражон. Аммо бу бекиёс манзараларга у ўрганиб қолган, бу ерларда нима гўзал эканлигини ажратади. Унинг кўз олдида «БелАЗ», харсанг тошлар, тупроғу шиббалайдиган оғир машиналар. Шоир кўролмаётган, унинг оёқлари остидаги буюк тўғон бағрида, қатламлар орасида қанчалаб нозик ва сезгир аппаратлар борлигини, устида гумбурлаб юрган машиналарнинг ҳар бир юришини сезиб, тебраниш даражаларини рақамлар билан кўрсатиб турган асбобларни ҳис қилиб турарди. Қоражон йўл-йўлакай бунда ишлатган шоффёрлар, ер шиббаловчилар, прораб билан гаплашиб олгач, яна «гўзал манзаралар» шайдоси Амир Равнақ билан Файзулла Аҳмедовични машинага олиб, Сижжак томонга жўнашди. Яна бир қадрдонлари — «бурама».

мўйловли Милтиқбой Қўйбоқаров гўё уларни кутиб тургандай эди. Ошна-оғайнилар сұхбатига зор бу инвалид киши ҳар гал Файзулла Аҳмедовични кўрганида қучоқ очиб отамлашарди. Икки фронтчи ошна учун қанча йилдан сўнг сог-саломат, ўйнаб-кулиб юриш баҳтидан афзал баҳт борми? У шунча зўрлаганига қарамай, уйга киришмади. Мақсад — кўл атрофларини тосмоша қилиш. Милтиқбой ака куёви билан илиқ омонлашгач, машинага ўтириди. Қоражон югуриб ҳовлига кириб Санобархон билан ҳам ҳол-аҳвол сўраб, кўришиб чиқди. Милтиқбой ака «икки тойчаси»ни машина тагига ётқизиб, дўстининг ёнига ўтириди. «Тоғ такаси» қиялик, баландликларга кўтарилиб, зингиллаганча Наволисой томон жўнади. Рӯпарада Асқартоғ, пастда кўл, олмазорлар... Наволисойга етмасдан, шу орада пастликда Чоршанба ота ҳовлиси борлигини эслаб, Амир Равнақ Қоражондан машинани пастликка буришни сўради. Чоршанба ота ўғлининг тўйини ҳам эслашди. Катта йўлдан сўқмоққа бурилаётган пайтда Милтиқбой ака эътиroz билдириди:

- Ў ҳовлилар қолган эмас, у ёқ кўл-ку!
- Лаббай? — Амир Равнақ ҳайратомиз Милтиқбой акага қаради,— нима бўлган?
- Кўлнинг тагида қолиб кетган. Ахир, сув сал кам юз метр кўтарилди. Сижжакнинг паст томонлари сув остида қолиб кетган.
- Ростданми?
- Ҳа, ана, сув кўриниб турибди-ку! У ёққа боришининг ҳожати йўқ. Чоршанба отанинг ҳовлиси қолидими!
- Азизим, майли, борайлик! Мен бир кўрай! — деди Амир Равнақ. Кейин у Қоражонга мурожаат этди,— шундоқми, иним?
- Ҳа. Жуда кўп қишлоқлар сув остида қолган,— деди Қоражон Мингбоев машинани сўқмоқ йўлда эҳтиёткорлик билан ҳайдаб,— Юсупхона, Бурчмулла томонларда, бу томони Жартепа, Камар, Шўнғиқ, Бақачўл, Боғистон, Сижжакнинг қуийи томони сув остида қолиб кетди. Олмазорлар ҳам қолиб кетди.
- Ия! Ё тавба! Қишлоқлар ғарқ бўлди, денг??
- Ҳа.
- Одамлар-чи?
- Уй-жой берилган...
- Сув босгандা қочиб улгуришдими?
- Ҳа,— деди кулимсираб Қоражон.

Милтиқбой ака билан Файзулла Аҳмедович гапга аралашмай шоирни кузатиб туришарди.

Сижжак қишлоғининг Писком дарёси бўйида улар машинадан чиқишидди. Илгари бу қиялик пастидаги кенг олмазорлар ичида Чоршанба ота ва яна бир неча кишиларнинг ҳовлилари бор эди. Пастан оқиб ўтадиган дарё ҳатто кўзга ҳам кўринмасди. Баланд тепаликкача лимиллаб ложувард сув чиқибди. Олмазору ҳовлилар сув остида қолган. Баъзи жойларда баланд қайрагоч, ёнғоқ ва теракларнинг учлари сувдан чиқиб туради.

Сув ниҳоятда тиниқ, мисоли шиша. Қуёш нурлари кўл узра синиб, ярқирарди. Бу ерда табиат ниҳоятда гўзал, оби ҳаво ниҳоятда поку беғубор. Қани энди инсон ҳамиша мана шундай тоза ҳаводан нафас олса! Нафас олиш ҳам овқатланиш каби инсон тириклигининг муҳим омили. Мана шу ерда тўйиб нафас олган киши маза қиласди! «Бу ердагилар жонининг ҳузурини билар экан-а!» — деб қўйди шоир.

Амир Равнақ тепаликдан сувга, улкан ложувард шишага тикилди — шиша остида худди шу тепалик пастидаги Чоршанба отанинг ҳовлиси, хонанинг гиштин пойдеворлари, нураган тандиру ўчоқ қолдиқлари, айвон устунлари остидаги харсанглар, тош ётқизилган йўлкалар шундоқ кўриниб туради. Амир Равнақ бошқа ҳовлиларга, деворларга, иморатларнинг қолдиқларига ҳам тикилди. Гўё айвон устунларини маҳкам қучоқлаб сув остида ётган Чоршанба отани ҳам кўргандек бўлди. Ўз ерини жондан ортиқ севувчи бу қария ҳовлисини ташлаб бошқа жойга кетишини ақлига сифдиролмаган Амир Равнаққа сув остида чангак бўлиб ётгандек туюлди.

— Ҳа, мунча тикилиб қолдингиз, шоир? Кўл остида жавоҳир топдингизми? — сўради Файзулла Аҳмедович.

— Ҳа, азизим. Жавоҳир, бу — халқим. Мен сув остида халқимни, киндик қонимиз тўкилган еримизни кўряпман.

— Муболага қилманг. Халқингиз ажойиб квартиralарга кўчирилган...

— Билмадим, билмадим...

— Ҳа, шундай,— деди Қоражон Мингбоев.

— Ота ҳаётмилар, ёки?..

— Ота янги уйга кўчиб ўтгандан кейин кўп ўтмай қазо қилдилар,— деди Милтиқбой ака.

Амир Равнақ ва бошқалар таомил бўйича юзларига фотиҳа тортдилар.

— Давлат олти ой бурун госстрах орқали қишлоқ аҳолисига ер учун, иморат учун пул тўлади. Хоҳлаган кишиларга Хўжакент, қолаверса, Фазалкентга тушган кўп қаватли бинолардан жонига қараб квартира кўрсатди. Қишлоқнинг кўпчилик аҳолиси тарқалиб кетиши хоҳламади. Қариндош-уруглар бир-бирларидан узоқлашиб кетмасликлари учун Сижжак атрофидан планли ерлар берилди,— деди яна Милтиқбой ака.

— Чорвоқ тўғони қурилиши билан Баш лойиҳага мувофиқ Писком, Кўксув, Чотқол дарёларининг қўшилиш жойида сув юз метргача кўтарилиб, дарё ёқасидаги бир неча қишлоқлар сув остида қолиши кўзда тутилади. Сижжак ва Нанайга ўхшаш қишлоқларнинг ярмини сув босиши керак. Чорвоқ ҳавзасида улкান кўл пайдо бўлиб, бу ерда катта сув запаси тўпланади, ҳам ажойиб оромгоҳ вужудга келади. Ҳозирги пайтга келиб худди шундай бўлди,— деди инженер Қоражон Мингбоев.

— Ота-боболарнинг қабри ҳам сув остида қолдими?

— Ҳа. Баъзи жойларда.

— Сизлар, ўзбеклар, қандай қилиб бу ишга рози бўлдингизлар? Мана, божам академияга мухбир аъзо, Ватанимизни фашизмдан сақлаб қолганларнинг бири. Қандай қилиб аждодлар қабрини сув остида қолдириб, таҳқир этишга рози бўлдингизлар?! Бу нима, бунда ҳам бир ярамаснинг қўли борми?

— Азизим, қизишманг! Бу рўйи заминда инсон хоки бўлмаган бирон ер бормикан?— деди Файзулла Аҳмедович,— ҳали яна минг йиллар ўтиши муқаррар ва муҳаққақ! Сиз азизимнинг хоки билан менинг хоким қаерда қолишини биз қаёқдан биламиз. Ҳар қалай, шу курраи замин устида бўлади. Тўғри гапни айтсан, бу курранинг ўзи улкан бир қабристон. Айни вақтда, авлодлар силсиласини берадиган гулистон ҳам... Буни тушуниш керак. Ҳиссиётга берилманг.

Амир Равнақ баланд тепалик устида чўққайиб ўтириб, тиниқ сув остидаги ҳовли девори, уйлар пойдевори, тандиру ўчоқларга тикиларди. Ҳув анави ерда, Чоршанба ота сўрисида тунаб, осмонга қараб ётиб шеърлар ёзган эди. Ҳозир бу ер кўлнинг жаҳаннамий туби. Хумсону Сижжакни, «ҳеч одам ўлмаган қишлоқ», бунда қадимий ўзбек уруглари яшайди, дердилар. Амир Равнақ бир соатлар чамаси тиниқ сув тубига

тиклилиб ўтирди. Бошқаларнинг ҳам шаҳардан чиққан «мўътабар шоир» раъйини қайтаришга ҳаддилари сиф мади.

— Сидқий Хондайлиқий ҳаёт бўлганларида бу ишларни кўриб кўп изтироб чекардилар. У зот муazzзам шоир эдилар...

Бу гапга ҳам ҳеч ким жавоб қилмади.

Бир муддатдан сўнг улар яна машинага ўтириб, Милтиқбой ака ҳовлисига қайтиб келишди. Кечгача бу ерда дастурхон устида шакаргуфторлик бўлди. Аммо Амир Равнақ кўз олдидан сув остида қолган ҳовлилар асло кетмас эди. Қош қорайганда Қоражон Милтиқбой ака билан хайрлашиб, икки меҳмонни Чорвоққа олиб келди. Амир Равнақ Файзулла Аҳмедовичнида тұнаб қолиб, әртасига — душанба куни әрта билан Тошкентга тушиб кетди.

У шаҳарга етиб келиб, андак ҳордиқ олди-да, ке йин кабинетига кириб, қўлига ручка олди. «Дил ойнасин хиралатмиш жаҳл губори...» деган ҳажвий шеър ёзди. Бу шеърда баъзи лаганбардорларнинг қилиқлари танқид этиларди. Бунга ҳам қовул қилмай, «Ғарқ бўлган қишлоқ» шеърини ёзди. Шеър мана бундай бошланарди:

«Сувга чўқди гўзал қишлоқ, ҳей, она-Ер!
Эзгу замин кўз олдимда бўлдими ғарқ?
Қайга кетди тўзиб ўзбек — қадрдон эл,
Мозийда не жафоларни кўрган бу халқ.

Бешик оқди, қулаб айвон, босмишdir том,
Сув остида қолмиш тандир, ёнган ўчоқ...
Азиз маскан, хайр энди, келмас илжом,
Қалбан куйлаб, очган эдим, сенга қуchoқ.

Тарихинг зўр, ерларинг бой, tengsiz гўзал,
Жоним каби сени севдим, эй ўзбегим.
Темур, Бобир қудрати бор сенда азал,
Навоийни пирим девдим, эй, ўзбегим...»

Орадан бир ҳафта ўтгач, дўстини соғиниб Чорвоққа келган Амир Равнақ ушбу янги шеърини ўқиб берди. Сукут сақлаб турган Файзулла Аҳмедовичга «шеър қалай?» дегандек имо қилди. Икки чаккасидаги томирлари бўртиб, ерга қараб турган Файзулла Аҳме-

дович индамади. Бир муддатдан кейин унинг овози чиқди:

- Унча эмас.
- Нечун?
- Нечун бўларди, менга ёқмади!
- Бадий жиҳатдан саёзми ёки гоявий жиҳатданми?
- У ҳам, бу ҳам...
- Таажжуб! Сизга шеър ёқтириш ҳам қийин.
- Сизнинг кўп шеърларингиз менга ёқади. Лекин сиздек бир шоир шундоқ катта бир қурилишга, меҳнат қайнаган жойга, одамлар матонат кўрсатаётган ерга келиб, топганингиз шу бўлдими? Офарин!
- Азизим, сизга ёқмабди, майли,— деди ёрилган пулфакдек шалпайиб Амир Равнақ.

Шундан сўнг улар бошқа мавзуга ўтишди. Қурилиш бошқармасидаги ошхонага киришди. Кечга яқин шоир шаҳарга қайтиб тушиб кетди. Унинг негадир Қоражон билан учрашишга ҳам ҳафсаласи бўлмади. Яна бирон ҳафталар ўтгач, бу шеър Амир Равнақнинг бошқа шеърлари орасида газетада босилиб чиқди. Унга Қоражон Мингбоевнинг ҳам, Файзулла Аҳмедовичнинг ҳам кўзи тушди. Чунки Амир Равнақ имзоси билан чиқадиган шеъру мақолаларни кузатиб юриб, дарҳол ўқишарди. Файзулла Аҳмедович дўстининг ўжарлигини эслаб, тилини тишлиб қолди.

Бирон ўн кунлар ўтгач, бошқа бир газетада «Амир Равнақ ҳаётга игнанинг тешигидан қарамоқда» деган мақола босилди. Сал ўтмай «Бургага аччиқ қилиб...» деган мақола ҳам чиқди. Иккала мақоланинг муаллифи ҳам шоирнинг юрт олдидаги катта хизматларини қайд этиб, чалғиб юрганига ачиниб ёзишган эди. Шу куниёқ Амир Равнақ бу мақолаларни, «ижодни камсириш, менсимаслик ва дўқ», деб айюҳаниос солиб, партия Марказий Комитетига борди. Уни илтимосига кўра ҳурмат билан қабул қилиниб, Маданият бўлимидан жуда босиқлик, донолик билан арзини тинглаб, сұхбатлашишди. Бу учрашув иш кунининг охири бўлганлиги сабабли, бўлим мудири ўз машинасига шоирни ҳам олиб, йўл-йўлакай Тошкентнинг бекиёс гўзал марказини атай томоша қилдирди. Қадим Ҳажимал, Тўқли Жаллобдан то Эскижўвага келгунча ботқоқ, тор кўчаларни, Дегрезликдан то Пиёнбозоргача бўлган йўлни, пастқам иморатларни, каталак уйларни элашди. Машаллаларда қуртлаб ётадиган ҳовузларни ҳам тилга

олишиди. Лекин ўжар шоир масъул ходимнинг босиқлик билан айтатган сўзларини сезса ҳам, ўз фикридан асло қайтгиси келмасди.

— Биз сизни жуда ҳурмат қиласмиш,— деди масъул ходим шоирни эшигига олиб келиб, хайрлашаётганда,— хизматларингиз катта. Лекин бу шеърингиз ғоявий мажруҳ, умум Ватанимиз халқларининг мустаҳкам дўстлигига рахна солади. Мен, шахсан Сиздан, ҳеч қачон бундоқ шеър ёзишингизни кутмаган эдим. Етти ухлаб тушимга кирмаган. Мен Сизнинг шеъру достонларингизни жуда яхши кўраман. Сиз бекорга лауреат бўлмагансиз. Кейинги бутун бир авлод сизнинг ва бошқа атоқли адилларимизнинг ажойиб асарларини ўқиб, ўрганиб катта бўлишяпти, десам хато қилмасман. «Фарқ бўлган қишлоқ» шеърингиз ҳақида, менимча, танқидчилар жуда ҳам холис ва тўғри ёзган...

— Мен қўшилмайман!— деди Амир Равнақ,— но камтар сўзим учун узр!

— Идеологияда биз ҳеч қачон келишувчиликка борлмаймиз! Янглиш тушунибсиз. Океан ортидаги чет эл буржуа радиолари бизга бўхтон ёғдираётган бир пайтда Сиздек атоқли шоир ҳақиқатни кўрмай, чалғиб юрганингизга таассуф билдиримай иложим йўқ. Хайр!

— Хайр,— деди Амир Равнақ ўз эшиги олдида машина кетидан ағрайганча қараб қолиб.

* * *

Ошналарнинг ёнига бормай, яккалангандай, ишга ҳам қўли бормай, хомуш юрган шоирга кунлардан бир кун хотини мурожаат этди:

— Адаси, сезишимча, бир нимадан хафароқ кўринасиз? Хомуш юрасиз. Иштаҳангиз ҳам унча эмас. Илгари ҳар куни соқолингизни қириб, тоза, кўркам юрадингиз. Мана, соқол ҳам ўсган, ўзингизга қарамайсиз. Сабаби нима?

— Э, хотин, мени танқид қилишиди. Хато шеър ёзибман...

— Э, тавба. Тўғри ёзиш керак. Ўзингиз ҳаммага тўғри бўлишликни даъват этасиз-ку!

— Пўстагимни қоқишиди. Бир кичик шеърга шунча шов-шув қилиш керакмиди! Мен сал чалғиганга ўхшайман! «Ўзбегим» деган фикр негадир қўй тикандек юрагимга ёпишиб олган. Файзулла Аҳмедовичга, қадр-

донимга бу шеър ғалат сезилибди, демак, янглишганга ўхшайман. Янглишибман. Одамлардан, китобхонла- римдан хижолат бўляпман.

Эру хотин анча вақтгача хомуш сухбатлашиб ўти- риши...

XXIX боб

ЕВУЗ ИШОРА

Бир ҳафтадан буён Чорвоқда жим бўлиб кетган Ҳазратов бугун кечқурун Тошкентдаги ўз ҳовлисига бўшашиб, таъби тирриқ кириб келди. Даҳлизда кутиб олган Гулбадан эрининг руҳи пастлигини сезиб, дарҳол сўради:

— Ҳафамисиз?

— Йўқ. Чарчаганман.— У ҳар галгидек, эшакнинг ўлими итлар учун тўй, деган «мақол»ни айтмоқчи эди, бу сафар негадир тилига чиқармади.

— Ҳайрият,— Гулбадан ўзининг ширин сўzlари, ҳазилу дилбар қараашлари билан «кўз очиб кўрган» эрининг кўнглини овлаб, хафақонлик рутубатини тарқатиб юбормоқчи бўлди. Ҳазратов хотинининг бундай бебаҳолиги, «бошқаларга» нисбатан чиройлилигини, кўнгли тозалигини яхши биларди-ю, «эркаклар бошқани кўрса ияди» қабилида иш тутарди. Бугунги хафа бўлиб келишининг боисини Гулбадан мутлақо билмас, у эрини «ишдан чарчаб» келди хаёл қилиб, унга навозиш кўрсатарди. Эрини «юради», деган гапларга ҳам асло ишонмасди. Аслида бугунги «хафалик»нинг боиси бошқа нарса: Қиёмхўжа билан учрашишга тоқати йўқ бўлиб қолган Обакихон эди... Бу чиройли жувон қиличек, кифти келган «инженер»га хотин бўламан, деб орқасидан Тошкентга келди. У Гулбаданнинг борлигини яхши биларди. Ўшанда Ҳазратов уни хўжалик ташкилотларидан бирига ҳисобчи вазифасига жойлаб қўйиб, кун ора учрашиб туришди. Кейинчалик ўйнашини Чорвоққа олиб келиб, ОРСГа ишга жойлаб қўйди. Лекин Ҳазратовнинг «ўз кишиси»— Ишларбек Сапчабошев Обакихон билан «мустаҳкам алоқа» боғлаганини сезиб, таъби тирриқ юрарди. Обакихоннинг Ҳазратов билан тамоман иши бўлмай, Ишларбек билан ишрат сураётганини, гўё бунинг олдига похол тўкиб алдаб кетганини кўрганида ёлгон гапириб юрганини сезган

Ҳазратов бориб Сапчабошевни уриб, дабдала қилмоқчи бўлди. «Исбот йўқлиги» сабабли ўзини тутди.

Дарҳақиқат, Обакихон ўзига оро бериб, Ишларбек билан шивирлашиб юрганини, бу сирли ишни Ҳазратов ақлан сезиз қолгани уни оёққа турғазді. Обакихоннинг маккорлиги, сотқинлигидан ранжиган Ҳазратов мана бугун ҳовлисига кирибоқ уйдаги каравотга ўзини ташлади, «бу дунёнинг ишлари шунаقا чаппа...» эканидан ранжиб, қаттиқ уҳ тортди. Аммо «у билан қанча вақтдан буён ширин дақиқалар ўтказгани... Унинг энг яхши вақтлари Ҳазратов билан бўлгани... қаймоқнинг мазасини кўп тотганини» хаёлидан ўтказиб, ўзига тасалли бермоқчи бўлди. Лекин бу «сотқинлик...»—Сапчабошев билан алоқаси — газабини қўзғар, бетоқат қиласарди.

«Беш кунлик дунёда обдан ўйнаб-кулиб қолиш керак. Қирқдан ошиб, ажин тушгач, менга ким қарапди»,— дерди Обакихон ўзига-ўзи. У, дарҳақиқат, чиройли, серқичиқ жувон. Қадди-қомати келишган йигитларга тикилар, қилиқлари билан улар диққатини тезда жалб этарди. Кўйлаги кўп, «гарнинг кийими жомашовда чирийди», дегани шу Обакихонга тааллуқлидай, ҳар куни янги кўйлак кияди. Кирчи хотинлар хонатласларини магзавада ғижимлай берарди.

Эрининг каравотда юз тубан йиқилиб, жонсиздек ётганини кўрган Гулбадан у яхши кўрадиган чойнакда аччиқ чой дамлаб олиб келиб, ёруққа солинса яланғоч аёл сурати кўринадиган япон пиёласида қайтариб-қайтариб, эрига сунди.

— Бегим, ичинг! Чарчоғингиз кетади.

Тўнкарилиб ётган Қиёмхўжа ўнгланиб, хотинига қаради. Унинг рўпарасида ҳақиқатан ҳам Гулбадан табасум қилиб турарди. Хотинига узоқ тикилди. Қўлидаги пиёлани олиб ҳўплади. Шундоқ «хафақон» вақтларда Гулбадан нозик қўллари билан эрининг икки чаккасини, елкаларини уқалаб қўярди. Токи асаб бир оз бўшашсин, дегандай, Қиёмхўжа гўзал хотинига қараб кулди. Ўзининг нақадар жирканч одам эканлигини ўйлаганда покиза ва маъсума бир гул олдида шўрҳоқ ўт — сассиқ алаф ётгандай бўлди. «Ит ҳам, бит ҳам сўриб ташлаган» Обакихондан ўз хотини минг чандон гўзал эканини пайқади. Илгари унинг «ишқида» маст бўлиб юрганида ўз хотинининг гўзаллигини сезмаган, қўрс гаплари, силташлари билан уни ҳақоратлаган эди. Унинг хаёли, дарду фикри ўйнашида бўларди. Ин-

сон табиатида шундай одат бормикан? Худо ҳамма эр-какларни ҳам шундай қилиб яратганмикан? Қиёмхўжа Ҳазратов ҳеч қачон ўзига-ўзи паст назар билан қарамаганди. Ҳозир эса Гулбадан — болаларининг онаси, садоқатли хотини олдида ўзини бир махлук-қа, гимирлаган қуртдан ҳам паст бир нарсага ўхшатди.

— Бегим, ваннахонада сув иситиб қўйибман, юз-қўлиингизни ювиб чиқинг. Тиниқасиз. Чарчоғингиз ёзилади.

— Хўп,— деди сапчиб ўрнидан турган Ҳазратов,— юзимни ювиб келишим керак! Шу юз билан сенга қарашлик абллаҳлик, Гулбаданхон.

— Бу нима деганингиз?

— Юзим чанг, бугун қурилишда бўлганман. Кийимларим ҳам қурум...

Гулбадан миқ этмади. Эрининг баъзида пойинтар-сойинтар шундай гаплари бўларди. У ўзига тасалли берарди-ю, ичдан ўйланиб қоларди. Бир вақтлар эри-нинг қандайдир бир жувонга элакицганини сезиб, уйларида анча жанжал бўлган эди. Лекин эрининг Обакихон билан алоқасини, шундай хотин дунёда борлиги-ни асло билмасди.

Ҳазратов ваннали хонага кириб, илиқ сувни шариллатиб қуийиб ювинди — яна унинг кўз олдига Обакихон келди. Ванна ва душ кўз олдига ўйнашини келтиарди. «Сапчабошев... ярамас! Бу одам менинг яхшиликларимни билмади! Савдогар!» — деди у ўзига-ўзи. Бирорнинг тўшагида ётиб, жамоат мулкига чанг солишдан чўчимайдиган, қалтис ишларни қиласвериб хирп бўлиб кетган Ҳазратов нечун ҳозир инсоний фикрлар оғушига кириб қолганини ўзи ҳам пайқамасди. (Ҳар қандай ёмон одамни ҳам мутлоқ ёмон қилиб кўрсатиш тўғри эмас. Аммо шу «қора» деб тушунилган кимсанинг ҳам феълу ишидаги йилтираган томонларини айтиш ибратлидир.)

Ҳазратов ваннада туриб, қачонлардир ўқигани, нариги кўчада яшайдиган Амир Равнақнинг бир шеъри хаёлидан ўтди:

«Ўзга ёр — ўзга диёр, бўлмагай ҳаловати,
У ойдек ярқирару, йўқ нурин ҳарорати.
Юлдуздек жилва қилас, лекин у ғоят узоқ —
Ўзга ёрни ўйлама, қовжиратмоқ одати...»

«Хўб айтган-да», — деди ичида, гарчи шу шоирни тили аччиқлиги учун хуш кўрмаса ҳам. Шундан сўнг у артиниб, тараниб, уй кийимларини кийиб, ваннахонадан чиқди. Енгил тортид. Катта хона ўртасида йилтирайдиган, гичирлайдиган паркет пол устидаги қип-қизил гилам устида туриб, деразаси тўғрисидаги миразатеракларга тикилиб, хаёлга отилди. Умуман, ишлари яхши, омади келиб турибди, бошлиқларга ёқади, ўзининг ишчанлиги ҳақида Георгий Садовниковга телефон қилдирди, Наманган, Чортот сув омбори қурилишида орден олганини ва бошқа «фазилатлари»ни айттириди. Шуларни дилидан ўтказди. Энди бу ёғи яхши бўлиб кетади, деди ўзига-ўзи. Обакихон бўлмаса, яна бошқа Сбакихон-да... Аммо ғашига тегиб юрган Мингбоев билан ҳам ҳисоб-китоб қилиб олиш пайти етгандир, деди у кенг ва кўркам, ўз жиҳозлари, қимматбаҳо ашёлари билан музейни эслатиб турувчи катта меҳмонхонаси ўртасида қаққайлб туриб. Ўз обрў-эътибори билан бу «бадбашара»ни эзib ташламоқчи бўлди. Уни ёғи остига олиб, буйдалаб ташлашга уринди. Ҳазратовни Трестдаги катталар суюшади, инженер Мингбоеvning югургани сомонхонагача! Ҳазратов «Фикр қиларди», у сал чап томонга қайрилиб, ўзининг файласуфона фикрлаётганини катта тошойнада кўради. «Ярамас Мингбоевни тамоман эзib ташлаш, одамлар олдида беобрў қилиш, бу гапни Садовников орқали министрнинг қулогига ҳам етказиш, тўғонда сув сирқиш авариясини партия мажлисида кўришни тезлатилиш» лозимлигини ўйлади. Қоражон Мингбоевнинг ўша куни: «Сиз инженер эмас, савдогар бўлиб қолгансиз, сиз ўн йилдан бўён бирон ишни инсоф билан қилганингизни билмаймиз, бирорларнинг зиёфатини еб мақтайсиз. Қўлингизни совуқ сувга урмайсиз! Айшу ишрат, ўзингизни лаган-товоққа солишдан бошқа нарса қилмаяпсиз!» — деган гапи то қиёмат эсидан чиқмайди. Бу гап эмас, ҳақорат, деди у ўзига-ўзи. Кишиларни ҳақорат қилишни қонун қоралайди, шу бўйича жиноий иш қўзғалади. Мен сенга кўрсатиб қўяман, деди муштумини қисиб катта хона ўртасидаги гиламда қадди-қоматини тошойнага солиб турган Ҳазратов. «Сен менинг кўйлагим ичига кириб қолган бургадек безовта қиляпсан, холос. Сени тирноқларим билан қирс этиб эзib ташлайман! Чучварани хом санаб юрибсан, нодон!» — деди гўё рўпарасида турган, юзлари куйиб кетган, чаандиқ Қоражон Мингбоевга ўқрайиб.

Ҳазратов Мингбоев билан олишувни «кенг миқёсда» кучайтириб юборди. Бир партада ўтириб ўқиган икки ўртоқ бир-бирига душман бўлиб қолишиди. Ҳазратов инженер бўлиб обрў қозонган қишлоқи йигитни тамоман эзib ташлаб, иккинчи бош кўтариб юролмайдиган қилиб қўймоқчи эди. Аммо Қоражон Мингбоевнинг фронтда қон кечиб келгани, собиқ фронтчилар уни доимо қўллаб-қувватлашаётгани бошига гурзи уриб, ма-жақлаб ташлашига йўл қўймасди. Шундай шахслардан бири — ён қўшниси Файзулла Музаффаров, иккинчиси — Иван Иванович Шишкин. СУ-2 да юз берган хато муҳокамасида участка бошлиғи Мингбоевга жазо беришга биринчи бўлиб Музаффаров қарши чиқди. У партия мажлисида қаттиқ туриб, Мингбоевни ҳимоя қилди. Мана шу тошкентлик, пенсионерлигига ҳам қарамай отилиб чиққан эски инженерни ўртадан кўтариб ташлаш, кам деганда қурилишдан ўз уйига жўнатиб юбориш Ҳазратов учун жуда зарур бўлиб қолди.

Шу ишда Ҳазратов билан қурилиш таъминот бўлимининг мудири Сапчабошевлар яна тил топишдилар. Ўртадаги Обакихон воқеасини эсламай, бу «кичик гап», деб қарашди. Ҳазратов ўз «думи» — Сапчабошев билан маслаҳатлашиб, яна шу Обакихонни ишга солишимоқчи бўлишиди. Ёқут кўзли тилла узук кўтариб келган Ҳазратов кунлардан бир кун Обакихон бағрида ўз максадини айтиб йиглади. Обакихон орзу қилган брильянт кўзли узук ва пул ваъда қилиб ўйнашининг оёқларини ўпди. Хайрушканинг Гулгунга ошиқлигини, бу йигит Мингбоев хотини билан гап бўлганини оламга ёйиш керак, деди. Музаффаровнинг хотини — Марҳаматхоннинг ҳам юрагига ғулгула — алам солиши керак. Ичдан портлатамиз, дейишиди улар. Марҳаматхоннинг ҳам, Гулгуннинг ҳам моховини чиқариш — тишни ковлаш билан баробар! «Ғам еманг, боплайман!» — деган ишорани қилди Обакихон. Дарҳақиқат, Файзулла Аҳмедовичга суюниб қолган, уни жуда ҳурмат қиласидиган Марҳаматхоннинг феълу автори қўуни-қўшниларига маълум эди. Ҳазратов билан Сапчабошев ўзларининг машиналарида Обакихонни шаҳарга олиб тушиб, эски квартирасига қўйишиди. Ўйин-кулги, тараллабедодликни яхши кўрадиган Обакихон жума куни Марҳаматхонни қўярда-қўймай зиёфатга олиб борди. Бу «хушфеъл», «ёқимтой» жувон билан илгаридан таниш эди. Эрининг

Чорвоқдалиги ва айниқса, озгина «гап бўлган» Кимсанхон билан зиёфатга боришга аввал истиҳола қилиб турган Марҳаматхон кейин негадир рози бўлди. Обакиҳон уни авради. Файзулла Аҳмедович анча йиллар илгари ўз хотинини Қудратиллаев деган бир врач кимсадан қизғанарди. Келиб-келиб зиёфат шу одам уйидаги бўлиб чиқди. Гарчи, улар ўртасида ҳеч гап йўқ ва умуман, бу кишини Файзулла Аҳмедович унча ёқтири маса ҳам унинг хотинбозлиги, шилқимлиги туфайли Марҳаматхонни ундан қизғанарди. Ёшлигига таниш бўлганлиги, баъзи гаплар бичиб-тўқилганлиги сабабли кўнглига бир қоралик ўрнашиб қолганди. Марҳаматхон Кимсанхон билан бирга зиёфатга борганини эридан яширди. Яшираётганини Музafferов сезиб, Кимсанхон ҳовлидан чиқиб кетгач, хотинини сиқиққа ола бошлади. «Нега бу хотин атрофингда ўралашиб қолди? Қаёққа бординг?» Марҳаматхон эрига тўғрисини айтди. «Сен кичкина хотин бўлмасанг, кексайганингда бу нима қилиқ?» Эрининг бу гапи Марҳаматхонга тегиб кетди. У эридан ўн беш ёш кичик, қирқ тўққизларда эди. Марҳаматхон ёшини яширади. Эрининг «кеекса» сўзи ёқмасди. Ўша куни зиёфатда Кимсанхоннинг зўрлаши билан озгина шампань виноси ичгани, Қудратиллаев билан чақчақлашиб гаплашгани, бир бола уларни фотосуратга олганини өслади. Кимсанхон бу ишни атай уюштирганини пайқади. Обакиҳон кейинчалик Музafferовнинг бошидан икки шоҳ ўсиб чиққани, хотини «шунақа...» лигини гап қилиб, маҳаллага ёйди. Эрини яхши кўрадиган Марҳаматхон Обакиҳоннинг маккорона ўйини билан унга зарба бераётганини, бу пухта ўйланган ўйин эканини пайқамай, эри юрагига ханжар урарди. Обакиҳон учун фақат мана шу керак. Чўзилиб ётишга вақти йўқ, Чорвоқда ишлаб, тинмай елиб-югуриб юрган «машҳур гидростроитель», академик Музafferовнинг ўз хотинининг «хиёнати» орқали кексайганида вайрон қилиб, сафдан чиқариб юбормоқчи эди. Шу йўл билан Ҳазратов яна бир катта гурзини Музafferов бошига туширди: «Мана сенга ишлаш! Мана сенга эътибрсли бўлиш! Мана сенга пенсияда кўмилиб ётмаслик! Мана сенга бир қишлоқини ҳимоя қилиш!!!»— демоқчи эди. Музafferов оиласидаги қиёмат-қойим Гулгундан сир тутилди, у бу ишдан хабарсиз эди. Унинг ўзи ҳақида ҳам маҳаллага гап тарқалганди. Бу гап — Файзулла Аҳмедович Хайрушканни дўппослаб урганидан кейин бошланди. Ҳамма нарсага ишонувчан,

Ҳақгүй эрининг юрагига зарба бергани учун Марҳаматхон қаттиқ азоб чекди. Эрининг инфаркт бўлишига озгира қолди. Музаффаров анча вақтгача без бўлиб юрди. Рақиблар мудаффаийат қозонди. Чунки Обакихон Марҳаматхоннинг хом, ишонувчан, алдаса бўладиган, содда хотин эканини илгаридан биларди ва шунга таянган эди. У ўз ниятига етди. Бу бўлган бир воқеани әслатарди. Ёши ўтиб қоған профессорнинг хотини жуда қизганиб, гаъқиб остига олиб қийнар, азоб берарди. Уни ёш қизлардан ҳам қизганарди. Аслида у ниҳоятда покиза, деярли сўфи одам эди. Юраги ишдан чиққан у кекса сейфни очаман деб, шу лаҳзада ўлган. Асабини босолмай, бақириб ўтирган Музаффаровнинг қоши тагида бир нима электр токидек чирс этиб, кўзи ярқираб кетди. Шундан сўнг бошининг ярми зирқираб оғриб, кўзи тиниб, боши айланиб, гавдаси ўз мувозанатини йўқотиб, каравотга ётди. Ҳеч нарсадан бехабар, ҳурпайган Марҳаматхон эри ёнига кирган эди, у бақирди:

— Йўқол бу ердан! Тўнка! Сен ярамас ҳар бир душман учун қуролсан! Сенинг ақлингнинг пастлиги, бир нарсага тушунмаслигинг, онгсизларча ишонувчанлигинг бошимга бало бўлди. Худо сенга жиндаккина ажл берганида нима қиларди! Ҳар бир маккор менинг хонадонимни осонгина тор-мор этиб ташлайверадими?! Одамларнинг уста бўлиб кетганидан хабаринг йўқ! Жинни! Энди мен сенга қандай қилиб тушунтираман!

Файзулла Аҳмедовичга қақшатқич зарба беришнинг ёлғиз биргина йўли — унинг соддадил, ишонувчан (баъзилар Марҳаматхонни «бурунгининг одами», дейишарди) хотини орқали бўлиши кераклигини Ҳазратов ўйлаб топди. Ҳазратов назарида Қоражон Мингбоев ва Музаффаровни қулатиш ҳаёт-мамот масаласи. Ҳамкаслари ўртасида ва умуман, давлат олдида Музаффаровнинг эътибори кучаяётгани, Мингбоев билан бирлашгани Ҳазратовни очиқдан-очиқ талвасага солиб қўйди. Ҳазратовнинг уруш йилларида Наманганд томонларда юргани... қисман Файзулла Аҳмедовичга маълум эди.

Кунлардан бир кун, Кимсанхон Марҳаматхонларникига кириб, хушлашмаса ҳам бир фотосуратни бериб чиқиб кетди. Бу фотосуратда Файзулла Аҳмедович «С.» деган аёл билан тоғ манзараси фонида елкалари елкаларига тегиб, кулиб туришган эди. Обакихон суратни бериб: «Мени айтманг, опажон, мен онлангиз бузилмасин, вақтида домлани қўлга олинг, деган мақсад-

да келдим. Номим ёмонга чиққанини ҳам биламан. Лекин бу хотин сизнинг эрингиздан бошқанинг ҳам турмушини бузган. Гулгун билан Ҳазратла ўғлингизни гап қилган ҳам шу», — деди. Марҳаматхон донг қотиб, ерга ўтириб қолди. Юрагига шубҳа тушган Марҳаматхон Обакихоннинг атай қилган фитнасидан, «бир иш борга ўхшайди», хаёл қилиб, эри билан яна айтишиб олди. Бу иш ҳам Обакихон учун жуда керак эди. Ҳазратовлар домла Музаффаровнинг юраги яхши эмаслигини билишарди. Бу имони бақувват одамни фақат ўз ичидан ўт чиқмаса, бошқа йўл билан қулатиш мумкин эмаслигини пайқаган Ҳазратову Сапчабошевлар фитна ханжарини соддадил Марҳаматхон орқали қадамоқчи бўлишди. Бундай маккор ишларни билмайдиган Марҳаматхон ширин гап, сохта илтифот туфайли талтайиб, оиласига, эрига ва ўзига тўғриланётган ханжарни мутлақо кўрмасди. Ўз иши билан ўзи овора бўлиб қолган Музаффаровнинг куйиниб хотинига қилган насиҳатлари шамолга учди. У буни тушунмас, ўжар бўлиб, эримнинг бир айби бор, у шунинг учун ҳам кўп гапириб, буни хаспўшлайти, деб ўйларди. Фотосурат бу шубҳаларни тасдиқловчи ҳужжат бўлди. Хотинининг бундай нозик ва маккор жангларга қобил эмаслигини Файзулла Аҳмедович биларди-ю, аммо бундай «жанг» кенг тус олмаслигини, бошланиб қолгудай бўлса, дарҳол олдини олишини, рақибининг гирибонидан тутишини кўнглидан ўtkазиб, кўпчилик ичига тушган рақибларни тумтарақай қочиришни ўйларди. Аслида-чи, аслида ундей эмас. Фитначилар жуда ҳам қатъий жангга тушмоқчи. Бу фитна орқасида катта фожиа яширинган эди.

Музаффаров хотинининг кўп нарсага тушунмаслиги, эридан шубҳаланишдан кўра, Гулгуннинг улар оиласига келиб, ўғли билан гап бўлиб қолганидан қийналар эди. Мана, фожианинг бошланиши. Душман бешафқат. Ҳазратов Музаффаровнинг тобути елкаларда лопиллаб Чигатой қабристонига боришини ва ўзи шу тесбути тепасида хомуш кўрингани билан ичдан яшнаб нутқ сўзлашини орзу қиласди.

Йўқ! Йўқ! Йўқ!

Бундай бўлиши асло мумкин эмас! Файзулла Аҳмедининг хаёллари төрқаб, ҳуши ўзига келди. Ёмон туш кўрган одамдай чарчаб ўрнидан турди. Унинг кўз олдида маккор, ажувза-алвасти Обакихон билан бирга Ҳазратов турарди. У дам илжаяр, дам ғазабланиб, бароқ мушукдек пихиллаб, тирноқларини қайраб, ҳози-

роқ сапчиб, юзларингни шилиб ташлайман, томоғингга ёпишиб, тишлаб, бўйин томирларингни узиб ташлайман, дегандек бўларди. Музаффаров билан Мингбоевнинг қўлида катта сўйил — бужғон ёғоч, шу билан ёввойи бароқ мушукни — ажинани уриб, ерга қапиштириб қўйишга чоғланишарди, улар бир-бирларига ташланиш учун пайт пойлашарди, ким кимни...

Орадан бир ҳафта ўтгач, Обакихон Марҳаматхонларнида турган Гулгуннинг бу хонадондан чиқиб кетганини эшилди... У кечга яқин кийиниб, безаниб, атай Марҳаматхон ёнига ҳол сўрагани кирди. «Бу воқеа...» маҳаллада дув-дув гап бўлганини, одамлар оёғи билан эмас, тили билан юришини айтиб, ачингандек бўлди. Боши қотиб, довдираб қолган Марҳаматхон гапиришини ҳам, гапирмаслигини ҳам билмасди. Агар судга берса, ўғлингизни қамайди, деди онанинг юрагига ғулгула солиб Обакихон. «Сен, кап-катта хотин ҳар доим шу ишни қилиб келяпсан, сени эмас, менинг ўғлимни бир шўхлиги учун қамайдиларми», деди ичидаги Марҳаматхон.

Лекин, энг ёмони шу бўлдики, Обакихон Гулгун билан Хайрушканинг «дон олишиб юргани...» тўғрисида ёзиб, бу юмалоқ хатни Чорвоққа, инженер Мингбоевга йўллаган эди...

Қирқиб олинган новдани бир томонга эгиб қўйиб юборсангиз, у иккинчи томонга ҳам эгилиб, кейин аслига қайтади. Бизнинг аёлларимиз тўғри йўлдан бориб, баҳт топишиди. Жамиятимизнинг тенг ҳуқуқли эгалари бўлди. Лекин аёллар ичидаги баъзилар бор, улар новдадек иккинчи томонга ҳам эгилиб, кейин аслига қайтади, тушунмай ё ортиқча шуҳрат кетидан кетиб, Обакихонга ўҳшаб қолишади. Уларни суюқоёқ деб ҳам «закончи», «шаллақи», деб ҳам айблаб бўлмайди. Обакилар кишилар бошига ташвиш солмоқда. Бу жароҳат узоққа бормай, тез тузалиб кетса керак. Ҳар қалай, унинг пайдо бўлишида баъзи имони бўш, ишратбоз кишилар сабабчидир, деди Музаффаров ичидаги.

Инженер Қиёмхўжа Миёнхўжаевич Ҳазратов нодон эмас, у ўзига етгунча серфикр, айёр одам — у Мингбоев билан Музаффаровларни қулатиб сафдан чиқариш учун бир неча зарбалар берди. У Наманганда юрганида бундай ишларнинг устаси бўлиб олганди. Одамларни ишонтириб, муваффақият қозонган. Лекин ўзининг жарлик қаърида эканини, тубанликка тушганини сезмасди. Ўйнашига ишониб, ёвузликни зўру зар би-

лан ёпиб, бу ўйинда ютиб чиқишини мўлжаллаф юради.

Бу ишлардан Гулбаданинг асло хабари йўқ, Ҳазратов хонадонининг бекаси бўлиб ўтириш билан масрур эди.

XXX боб

ЕНГИЛИШ

Ўн учинчи апрель куни СУ-2 участка бошлиғи, инженер Мингбоев қурилиш бошлиғининг буйруғи билан вазифасидан четлатилди. Тўғон қурилишидан ҳеч ёқ-қа кетмайман, деган гапи ҳисобга олиниб, гараж ихтиёрига юборилди. Қурилиш бошлиғи Садовниковнинг су буйруққа имзо чекмаслигининг иложи бўлмади. У «Чотқол қишлоқларидан чиққан биринчи гидростронтель-инженер» ҳақида ҳеч қачон ёмон фикрга бормаган оди. Уни соғдил, серғайрат бир ёш мутахассис деб биларди. Начора, иш бўлган ерда камчиликлар ҳам бўлади, қурбонлар ҳам бўлади... Лекин Мингбоев хусусида пайдо бўлган гап-сўзлар тез ривожланиб кетди. Ҳатто унинг қадрдан дўсти, қурилиш партия ташкилотининг секретари Иван Иванович Шишкун ҳам ҳайрон сўлиб қолди. Хунук гаплар қаёқдан чиқаётганини ҳеч билишмасди.

— Сен кетмон юзини босяпсан! Даюс! — деди Ҳазратовга қамти келиб қолган Қоражон Мингбоев, — пешанангга қарсилаб тегишини хаёлинингга келтирмаяпсан! Сен, савдогар ўғли, қаёқдан ватанпарвар бўлиб қолдинг! Сен меҳнат қилиб, қўли қаварган, офтобда елкаси куйган кишилардан эмассан! Сенинг кимлигинги яхши биламан! Мени бир қишлоқи деб, ботинкангнинг пошнаси билан қуртдек эзиб ташламоқчимисан?!
Хато қиласан!

Ҳазратов донг қотиб қолди. Ҳозироқ юзига мушт тушиб ерпарчин бўлишини кутиб, атрофга олазарак қараб, ёрдам сўрамоқчи бўлиб турганида, Қоражон, «Сен ҳали шошмай тур!» деб ерга тупурди-да, йўлида давом этди.

Жаҳлу ғазаб уни ишдан совутиб, ўз қишлоғига итарди; у кутилмаганда Ёнқўргонга жўнади. Гаражга ҳам бормади. Қишлоқда ишдан бекор бўлганини одамларга билдирамай, ўзи туғилиб-ўсган кўримсизгина бир хона ичидаги ёстиқ қучоқлаб ётди. «Ўтники ўтга, сувни-

ки сувга, қолди қатиқнинг пули...» бўлиб, Қандил буви дамлаб келган чойни ичиб, хаёл дарёсида сузиз ётаверди. У Ҳазратовни, бурга, деб «камситган» экан, у «бурга» эмас, чаён, ундан ҳам каттароқ заҳарли илон бўлиб чиқди. У ўз атрофига бу ердаги баъзиларни тўплаб, коњяк ва кабоб кучи билан одамларни қўлга оларди. Унинг баъзи ишлари тўғон бағрига силқиган сувдек юрагини зирқиратарди. Лекин бу лўттибоз Садовниковдек одамни қандай қилиб қўлга олиб, Шишкинга тазийқ кўрсатганига сира ақли етмасди. Ўз ўрнига Ҳазратов тайинланиб, прораб Никаноренко ҳам Мингбоевни қувватламагани маълум бўлди. Қоражонга ё экскаваторда, ёки «БелАЗ»да ишлаш таклиф этилди. Агар у хоҳласа Помир тоғидаги Сарез кўлига юборилишини, бу ерда ҳам тўғон қурилиши бошланажагини айтишиди. 1911 йилги зилзила натижасида тоғ қулаб, катта кўл пайдо бўлгани, бу келгусида бениҳоя кўп энергия манбаи эканини биларди. Сарез кўли денгиз сатҳидан уч минг метр баландликда бўлиб, йигирма миллиард кубометр сув тўпланган. Қоражон Мингбоев у томонга боришини истамади, ҳозирча шофёр бўлиб ишлашга ҳам кўнгли бўлмай, Чотқол бағридаги ўз қишлоғида ётарди. Бу иш тўсатдан бўлгани сабабли, ундан Гулгун ҳам хабарсиз. Кейинги кунларда Қоражон яна ёлғиз. Ногаҳоний буйруқ чиқишига асосан тўғон қурилишида меҳнат суръатининг пасайгани, олтинчи стбордан сув сирқигани, иш графигининг бузилгани сабаб бўлди. Бундан бир ой муқаддам пъезометрлар берган сигнал тўртинчи стборда сув сирқиганини кўрсатган эди. Бу ҳам Бошқарма диққатини тортган эди. Юқоридан тойиб қулаган «БелАЗ», қўл остидаги бир шофёр йигитнинг маст бўлиб босқинчлил қилгани: иши прокуратурага оширилгани... ҳам участка бошлигининг тарбиявий ишларга қарамай қўйганини кўрсатарди. Бу фактлар — Ҳазратов қўлидаги «козир» ҳисобланарди. Иван Шишкин бир куни Садовниковга: «Мингбоевни туяни устида ит қопти қилмайлик», деди. Аммо бу гапга Садовников эътибор бермади. «Амир Равнақ деган миллий маҳдудликка тушган бир шоирни қурилишга олиб келгани, унинг тұхматомуз шеъри маҳалий матбуотда қоралангани...» ва бошқа гаплар ҳам парторг Иван Шишкин қулогига етган эди. Албатта бу гаплар унга ёқмаган. Буларни Ҳазратов гуруҳи тинмай парторг қулогига қуярди... Квартираси эшигини қулфлаб, эски машинасини Бошқарма ҳовлисида қолдириб,

бир кунда Ўнқўргонга жўнаган Қоражонни Файзулла Аҳмедович ҳам билмай қолибди. Бу ишларга тушунмай, таажжубланди.

Қоражон ўз қишлоғига қайтиб келиб, бир неча кун хонанишин бўлиб ётди. Диққатбозликка Қандил буви ортиқ чидай олмай, қалаванинг учини йўқотган кимсадек безовта эди. Баъзан кимга ниш уришини билмай ўзидан-ўзи қақшарди: «Ҳукуматни деб фронтга бординг, ҳукуматни деб ёндинг, ҳукуматни деб тоғ кесдинг, ҳукуматни деб тўғон кўтардинг, дарё тўсдинг... Энди керагинг бўлмай қолибдими? Ҳайдаб юборишдими? Эшак деб ўйлашган экан-да! Эшакнинг ўлими — итлаор учун тўй қилишаётган бўлса керак! Ўз ерингда сени ҳайдашдими?! Ўз ерингда-я! Энди ўшалар оёгини усатиб ўтиришгандир?! Икки хонали уйни ҳам тортиб олишса керак! Уйи бошида қолсин! Ҳўжакентлик Анбар отиннинг оталари етти мартаба Маккага борган, сажаравлик хўжалардан дейишарди. Савдогар — қаллоб бўлиб чиқди. Үгиллари кейинчалик ҳовлисини сотиб, шаҳарга қочиб кетишиди-ку! Сени ҳайдайдиган ўша казз-казолар ҳам қаллоб! Албатта бир куни иллати очи-либ, миси чиқади!»—«Йўқ, ойижон, бундоқ эмас,— дерди Қоражон,— сизнинг фифон бўлишингизга арзимайди». Ўбу гапни айтарди-ю, кўз олдида ширатбоз Ҳазратов пайдо бўларди. Унинг ёдига Амир Равнақ билан Музafferов суҳбати келди.

«Сиз, азизим, ўз фарзандларингизнинг ким бўлишини истардингиз?»

«Аввало, инсон. Кейин, агар юрагида қўри бўлса, ишлаб ўзини кўрсатса, дейман. Агар талант әгаси бўлса, унда қўлга киритган ютуғи билан қаноатланиб қолмасдан, доимо юксакликка интиладиган, заҳматкаш кимса бўлишини истардим. Шу юрт учун катта ишлар қиласверишини истардим...»

«Қиличи синиб, қалқони тешилган», баъзиларнинг назарида «қулаган» Қоражон Мингбоев шу кунлари туш кўрди: тушида Гулгуни билан Чирчиқда чўмилишаётган эмиш. Гулгунни сув гирдоби ўраб, оқизиб кетибди. Қоражон тезоқар дарёнинг у ёғидан сузиб, бу ёғига ўтиб, севиклисини қидиармиш, лекин тополмасмиш. Нафаси қайтиб, бўғилиб уйғониб кетди. Кўз очиб, хомуш ўтирди. Гулгунни согиниб, эртага Тошкентга тушиб чиқишини ўйлади.

Раҳбэрлар ишдан кетганида, баъзан қўл остидағи одамлар ачинишади, уни эслашади, гарчи «тақдирга

тан беришса» ҳам барибир у билан бирга ишлашган вақтни қўймасади. Қўл остидаги одамларда меҳри қолган раҳбар — яхши раҳбар.

Смирнов, Можаев, Абдуманноплар уни эслаб, қишлоққа ҳам келиб кетишиди.

Яқинда шаҳардан чиққан мухбир Бошқармада инженер-консультант Файзулла Аҳмедович билан сұхбатлашиб, газетага мақола ёзибди. Унинг бир жавоби Қоражонга жуда таъсир қилди.

«... Тарихга қиёс қилиб кўрсак, инсон умри ялт этиб ўчган учқун билан баробар. Ер юзи гўё қаттиқ ва беҳаракат кўрингандай бўлгани билан, аслида, доимо ҳаракатда, ўзгаришда. Чексиз текисликларда ер қавати бир йил ичидаги уч ва беш миллиметр ё кўтарилади, ё пасайди. Зилзила бўлиб турадиган ерларда ер қатлами бир йил мобайнида ўн икки, ўн беш миллиметрғача ҳаракат қилади. Бу фанга маълум... Демак, Чорвоқ тўғони ҳам ҳаракатда, у зичланади ҳам, бўшашади ҳам. Инсон ўз қўли билан яратган нарсани ўзи идора қила олади. Ишонч керак. Қўрқув ярамайди!» — деган.

Шу кунларда иттифоқо Ҷенқўргонда пайдо бўлган Обакиҳон Қоражон Мингбоевга рўпара келиб, саломаликдан сўнг жўрттага савол берди:

— Қоражон ака, сиз курашда енгилдингиз. Бу сиз учун жуда оғир, албатта. Қуяётган бўлсангиз керак? Енгилишни сиз қандай ўтказасиз?

Қоражон ўйланиб қолди. Бу гапга жавоб қилгиси келмади. Кейин, у Ҳазратовнинг ишонган одамларидан бири әканлигини билиб, қўйпол жавоб қилди:

— Эрта саҳардаги «смена»нгизни қандай ўтказсангиз, биз ҳам шундай ўтказамиз...

Обакиҳон аввал ҳайрон бўлиб, тушунмади. Кейин су гапни пайқагач, бурнини қийшайтириб, жўнаб қолди.

«Дунёда энг зўр қурол бор: у қиличдан ўткир, миллиқдан даҳшатли, у бўй эгмас ботирларнинг бошини эгади, қул қилади, шаҳарлар олади. У нима, деб сўрарсиз, у — бузуқ аёлнинг макри», — деган эди бир куни Файзулла Аҳмедович.

Икки ҳафтадан кейин Қоражон Мингбоев яна Чорвоққа келиб, эрта билан тўғон бошига чиқди. Қўпийиллик қадрдони, прораб Никаноренко ҳам янги участка бошлиғи Қиёмхўжа Ҳазратов билан тил топишиб кетганини сезди. «Мен бу ерга ишлаш учун келганман, гуруҳбозлик, фитналарга аралашмайман. Бошлиқлар нима деса шуни қиласман», — дебди у одамларга. Бу гап

Қоражон Мингбоев юрагига ништардек санчилди. «Вой, нодон-е, мен гуруҳбозлик қилдимми?! Мени ёмон ишлади, деб ўзлари ишдан бўшатдилар-ку! Ўша «сув сир-қиши»да ёки бошқа нуқсонларда мен билан баробар сеннинг ҳам айбинг бор-ку! Нега мен кетдиму сен қолдинг?» У асосий рақиби қолиб хаёлан прорабга ёпишиб кетди. Тўғон тепасида бу «бывший» совуқдан-совуқ сигарета чекиб юрди. Одамлар кўнгли учун саломлашарди-ю, лекин биронтаси: «Шу иш тўғри бўлмади! Биз инженер Мингбоев билан бирга ишлаймиз!» — демади... Ўрнига тайинланган Қиёмхўжа Ҳазратов одамлар олдидаги ўзини Қоражон Мингбоевнинг эски ўртоғи эканлигини таъкидлаб: «Қандоқ қиласми... тайинлашгача экан, бўйин товлаб бўлмайди, солдатмиз...» — дегандек қовоқ солиб, у билан совуққина омонлашди-ю, кейин ўзини четга олди. Нарироқда прорабга нималарни дир турушунириб, Бошқарма томон равона бўлди. Прорабга катта «ҳуқуқ» бериб, сен ишга боғлиқ одамсан, ишлайвер, дерди. Қоражон кўчага ҳайдалган итдек, эшиги олдида мукка тушиб ётмай, ўзи тарбиялаган Геннадий Смирнов деган ёш шофёр йигитчанинг ёнига — «БелАЗ» кабинасиға кириб, карьерга кетди. Тушгача унинг машинасида ўтирди. Унга қарашди. «Мени бу ердан бошқа борадиган жойим йўқ, мен ҳам энди «БелАЗ» оламан, бирга ишлашамиз», — деди Қоражон. Йигитча нима дейишини билмади, инженер, участка бошлиғи бирдан оддий шофёрликка тушиб қолса ёмон бўлар экан. «Менимча, шу тўғри бўлади. Нима дейсан, Смирнов?» — деди Қоражон суҳбатдошига тикилиб. «Қоражон Мингбоевич, бу нарсани ўзингиз ҳал қилині. Агарда СУ-2 да ишлашингизни хоҳлашмаса, СУ-3 ги қўйишишин. Сиз инженерсиз, у ишни ҳам яхши олиб кетаверасиз». Қоражон кулди: «Азизим, мен ишни яхши олиб кетмаганим учун бўшатишди...»

Қоражон Мингбоев туши пайтида Смирнов билан бориб ошхонада овқатланди, сўнг кечгача тўғон устида айланиб юрди. Қаёққа ҳам борарди! Эрта-индин, квартирани ҳам бўшат, деб қолишлари мумкин. Агар шу Ҳазратов бўладиган бўлса, албатта квартирани ҳам топшириб, қишлоққа тамоман жўнашга тўғри келади. Ишонмагин дўстингга, сомон тиқар пўстингга! Ҳазратов тез фурсатда каттанинг — Садовниковнинг ишончини қандай қозонганига асло тушунмасди. Садовников майли, унинг бошида мингта ташвиш, лекин Иван Шишкиннинг «бир юз саксон градус» ўзгариб кетгани-

га, Ҳазратовни қувватлаганига ҳайрон бўларди. Шишкін покиза одам. Буни Қоражон жуда яхши билади. Наинки Қоражон, бу ерда ишлаётганларнинг кўпчилиги уни жуда ҳурмат қиласди. Одам танийдиган Файзулла Аҳмедович ҳам шу оқ қошли, сап-сариқ Иван Шишкін билан бир-икки мулоқотда бўлгач, «э, бу бутун одам экан», деган эди. Наҳотки, у Қоражонни ҳимоя қилмади! Демак, айб ўзимда, деди Қоражон ўз-ўзини қоралаб.

Барвақт квартирасига бориб, ёлғиз ўтиргиси келмади. Ёлғизлик ёмон! Негадир у яна тоғни қўймасди; тог қоплони майсазордан кўра ҳам қизиган харсанглар, қоялар остини ёқтиради. Такаларни пойлаш, какликларни учирин Чотқол йўлбарсларининг азалий одати. Сменадан кейин Қоражон яна ўша Қўнғирбуқа чўққиси томон кўтарила бошлади. Сменани топшириб, тўғондан пастга тушиб кетаётганлар «феъли ғалати инженер»нинг чўққига тирмасиб чиқиб кетаётганини кўришди.

— Ана, «Чотқол йўлбарси» тоқقا чиқиб кетяпти,— деди тўғон устида, ўз машинаси ёнида туриб юқорига тикилган Смирнов.

— У, йўлбарс эмас, Чотқол сичқони!— деди Ҳазратов кулиб.

Никаноренкога бу гап ёқмади, у ўзини зўрлаб йўталди.

— Инженер Мингбоевни камситманг, яхши эмас!— деди Смирнов,— бирга ўқиган экансизлар... У ҳали ўзининг йўлбарслигини кўрсатса керак!— Смирнов лабидаги сигаретани ерга туфлаб ташлаб, этиги учи билан эзди. Шундан сўнг машинасига ўтириб, жўнаб қолди.

— Кўрдингизми, ўртоқ Никаноренко?!— деди бирдан газабидан ранги оқариб кетган Ҳазратов,— бунинг фамилияси нима эди?

— Смирнов.

— Мана шунақаларни йўқотиш керак! СУ-4 га, цемент заводига борсин! Иккинчи унинг башарасини бунда кўрмай! Бошлиққа шундай муомала қиласдими! У, анави, тог йиртқичининг одами!

Прораб яна индамади. Шу одам участка бошлиги бўлиб тайинлангандан бўён тўғон устида кулги, ҳазил, қийқириқлар йўқолиб, кишилар қовоқ солиб ишларди. Бир-биридан бад олишарди, майда шикоят ва баъзан диққатбозлик, асаб бузиб бақиришлар тез-тез бўлиб ту-

парди. Прораб Никаноренко ҳам негадир ундан ҳайиқар, тўғрироғи, у билан расмий гаплашарди. Георгий Исаевич Садовниковнинг ўзи ҳам кейинчалик шу одами СУ-2 га бошлиқ қилиб тайинлаганига ҳайрон ёди.

Қоражон Қўнғирбуқа чўққисига чиқиб, ясси харсанг тошга ўтириди. Ловва-ловва ёнаётган шарқ осмонига — шафаққа тикилди. Унинг бағри ҳам худди шундай аланга олиб ёняпти! Ёнепти? Нега? Ишдан олинганигами? Йўқ! Уни партия сафидан ўчиришдими? Йўқ! Қамашмоқчими? Йўқ! Мансабни боғлаб берибдими?! Нега бунча жириллаш! Оҳ-воҳ уриш! Участка бошлиғи бўлмасам кун кўролмайманми?! Лекин, лекин... (Қоражон яна ўйланиб қолди. Миясида фикрлар талоши. У бир ўтни юлиб олиб, беихтиёр чайнайди.) Гулгунга нима дейман? Милтиқбой акаю, у ҳақда шеър ёзган Амир Равнақлар олдида нима деган одам бўламан...

Баланд қоядан ўзини пастга ташлаб, бир йўла бу ташвишлардан қутулсамикан? Бу бир лаҳзалик иш. «Йўқ! — деди у ўзига-ўзи хитоб қилиб,— бу номардлик! Мен уларга кўрсатаман!»

Човут қилмоқчи бўлган йўлбарсдек беихтиёр ўрнидан туриб кетган Қоражон яна ўйланиб қолди. У яна шафаққа тикилди, гарби-жануб томондаги шафақ остида, Тошкентда Гулгун бор... Наҳотки, у суюқоёқ. Наҳотки, у ўша Хайрушка билан дон олишган бўлса?! Бу томонда ҳам унинг аҳволи чатоқ... У йўлбарсдек ўқириб, ўша Хайрушкага ташланмоқчи бўлди. Қўлида далилу исботи йўқ, нима деб унинг гирибонидан ушлайди. Яраланган йўлбарсдек кўзлари ёниб, тўғри келган кишига човут қилмоқчи бўларди. У ўйлар, ўйлаб-ўйлаб, Садовниковга ҳам ҳужум қилмоқчи бўларди.

Йўлбарсни, гарчи бир ойлигидан бошлаб сут билан боқиб катта қилинганида ҳам муайян бир пайтда тасодифан тушган ташқи зарба ёки қўполлик бир лаҳзадаёқ уни ўзаслига — йиртқичлигига қайтаради. Жуда ўрганиб кетган йўлбарс бу лаҳзада ўз тарбиячисига ҳам ҳужум қилиши мумкин. Лекин сал ўтмай, у яна эски ҳолига тушиб ўкинига келади. Катта йиртқичлар ҳақидаги бу гап кўпчиликка маълум.

Қоражон чалкаш хаёллар гирдобида довдиарди.

У қайтадан ясси харсанг тошга ўтириди, бошини баланд тутиб, сўниб бораётган шафаққа тикилди. Бу пайт Чорвоқ шаҳарчасида анор донасидай беҳисоб чироқлар йилтиарди. Бутун водийга, тог оралиқларига

чироқлар сочилган. Пастда ГЭСнинг гумбурлаши, тўғоннинг иқки ёнидаги туннелдан тушаётган сув шариллаши шундоқ эшитилиб турарди. У қўли билан беихтиёр пешонасини, куйиб чандиқ бўлиб қолган юзларини силади. Чандиқ излари унинг хаёлига яна қонли урушни эслатди...

Яхши дўст қоронгида чироқ.

Ёнаётган танк ичиди куйиб кетаётган сержант Мингбоев лукни очиб, икки шериги билан ўзларини ташқарига отишга улгуришган эди. Ёнаётган танкнинг гумбурлаб портлаганини эшитган. Шундан сўнг икки йиртқич фашист билан ҳаёт-мамот жанг кетган... Бир фашистнинг бўғзини тишлаб узиб ташлагани ёдида... Кейин кучдан толиб, ҳушсиз бўлиб қолган Қоражонни учинчи куни кимдир жанг майдонидан судраб олиб чиққанини, юз-кўзларини бинт билан ўраётгайни аранг-араанг сезган эди. У ҳеч нарсани кўрмас, юз-кўзи куйиб, қўллари қорамой аралаш куйиб, пуфак бўлиб кетган эди. Санбатга Ирина деган ҳамшира ўқ дўли ичидан олиб чиққанини ҳам биларди. Шу ҳамшира унинг жароҳатини бинт билан ўраган. Бу исем унинг кўрмайдиган кўзи олдида қўёшдек порларди. Унинг жамолини кўрмаган бўлса ҳам товушидан энг гўзал қиз, суратда кўргани Алёнушканинг шинель кийиб олгани дерди. Шу Ирина снарядлар портлаб, автоматлар очередь бериб турганида танкчи Мингбоевни жанг майдонидан олиб чиқди. Ҳар бир дақиқада ҳамширанинг ҳам ҳаёти хавф остида турарди. Мингбоевнинг ҳаёти бу қиз учун шунчалик азизмиди! У смоленсклик рус қизи экан. Қоражон ундан кейин узоқ муддат Пензадаги госпиталда ётди. Унга неча бор қон қўйишиди, юзини операция қилишиди. Энди мен абадул-абад кўр бўлиб қоламан, деган Мингбоевнинг кўзини очишиди. Россиянинг ҳар куни бомбардимон қилиб турилган қадимий шаҳарларидан бирида у яна ёруғ дунёни кўрди. Петров деган жарроҳ унинг кўзини операция қилган эди. Бу хушфеъл жарроҳ академик Филатовнинг шогирди экан. Петров қиёфасида рус кишисига хос самимийлик, бошқа миллат фарзандларига нисбатан байналминал олижаноблик туйғуларини сезиб турарди. Суҳбатдаги гапига қараганда, отаси Путилов заводининг ишчиси, революция қатнашчиларидан экан. Узбек йигитининг ҳаётини сақлаб қолишида, кўр бўлиб қолган кўзини очишида Петровга ўхшаган олижаноб кишилар Пенза госпиталида қанча эди! Уруш тугагандан сўнг Қора-

жон Мингбоев оз муддат Чирчиқ химкомбинатида ишлади. Бу ерда у партия сафига кирди. Цех бошлиги Михаил Иванович Соколов, Андрей Петрович Матушкинлар унга кафолат бериди. Яна бир кафолатни район комсомол ташкилоти берди. Улар яна бир ўзбек йигитига ишониб, унга камол тилашди. Қоражон Мингбоев ундан кейин Политехника институтига кирди. Рус олимлари унга илм ўргатиши... Мана, орадан қанча йиллар ўтди, у — инженер, катта бир қурилишда ишламоқда. Ишламоқда? Ҳа, уни участка бошлиги вазифасидан пасайтириши! Буйруққа Садовников имзо қўйди-ку! Бошқа ким ҳам имзо қўярди? Садовников душманми? У «маҳаллий халқни ёмон кўради»ми? Ўртоқни айблашдан аввал мен ўзимга ҳам бир қараоб қўйишим керак, деди ўзига-ўзи яна Қоражон. Тўғри, ҳозир баъзи вайсақи, тирақи бузоқлар ўртага миллат ажратиш заҳрини тўқадилар, бу шахсларнинг фитнасига дучор бўлиб, кўрнамак бўлгандан кўра ўлган яхши!

Қоражон Мингбоев хаёлини Георгий Исаевич Садовников қуршади. У бир ўтиришда, суҳбатда, икки оғиз сўз билан ўзининг ёшлидан иши Ўзбекистонга боғлиқ эканини айтган эди. Москва политехника институтини тамомлаган Садовников ўттизинчи йилларда Ўзбекистонга йўлланма олиб, Мирзачўлда ирригация қурилишида қатнашди. Уруш йиларида Фарҳод ГЭС қурилишида бош инженер муовини бўлиб ишлади. Бош инженер Иван Петрович Бабун қурилишда фожиали ҳалок бўлгач, унинг вазифасини бажариб турди. Ўзбекистон ҳукуматининг раҳбарлари, қисман Акмал Икромов ва Файзулла Хўжаев, кейинчалик Усмон Юсупов ва Шароф Рашидовлар Георгий Садовников номини эшишишган. Унинг халқ олдидаги хизматлари тақдирланган. Бутун умрини Ўзбекистон ва унинг халқлари ишига бағищлаган бу одамни кўплар қадрларди. Қандил буви бир куни: «Ҳай, Қоражон, мана бу Садовниковинг ўрис бўлса ҳам ўзваданам яхши. Ёки ота-боболари ўзва бўлгәнмикан...»— деган эди. Онасининг бу гапини эслаб беихтиёр мийигида кулди.

Қандил буви уч кам саксонда. Ёш қургур ўтиб бородир, энди бундан бу ёғига ноку анор бўлармидим, қариллик — оҳу надомат, дерди баъзан урууглари ичидагутириб. Ўтган қари-картангларнинг удумини қилиб, доимо ўзига ўлимлик йигарди; саккиз метр малла, ўттиз метрлик дока, атисовун, элликта рўмолча, қозиқ-

лунги ва ҳоказо... Аммо, бурноғи йили қишлоққа янги күчіб келған Нұғай отин деган мусоғир бир хотин вафот этганида, савоб бўлади, деб ўз ўлимликларини бериб юборди. Шундан кейин Қандил буви яна ўлимлик йигишга тушди. Магазиндан дока сотиб олди. Тошкентга тушаётганларга тайинлаб, маллача, пахта атирсовунгача олдириб қўйди. Бу сафарги ўлимлик ҳам Чорвоқда, аллақаёқдан күчіб келған бир кампирга буюрган экан, яна Қандил буви савобга қолди. Кўнгли бўш, очиқдиллиги сабаб бўлиб, зир югуриб юрган йигитларга: «Менда бор», деб юборарди. Шундан сўнг, даранг-дурунг қилиб очиладиган эски сандиқ устидан кўрпа-тўшаклар олиниб, бошқа кийимлардаги нафталин ҳиди урган ўлимлик «кўзга тўтиё» бўлиб, бўғчани йигитлар зинғиллаганча олиб кетишарди. Шундай бир пайтда ким магазиндан докаю малла қидириб юарди. Баъзан дока топилса, малла топилмас, малла топилса, докаю рўмолча топилмай қоларди. Кампиршоларга барча удумни бажо келтирмаса юракка армон — шунча фарзанд боқиб, битта ироқи совуну тобутни кўтариб қабристонга борганларга табаррук деб рўмолча улашилмаса, бу яхши эмас! Бир ўлимлик ва яна эски пулга икки минг сўм пул уруш вақтида жамоага бериб юборилган эди. Хуллас, кўнгил бўшлик сабаби бўлибми, ёки бувининг ўз тили билан айтганда, «худонинг хоҳиши шундоқ бўлдими», ҳар қалай, ўлимлик ўлгур жойида турмас эди. «Битта мамлакатга арзирлик ўғлингиз бор, ўлимлик йигиб нима қиласиз», — деганлар ҳам бўлган. Лекин Қандил буви бу гапга эътиroz билдиради: «Шундоқ, айланиб кетай, шундоқ! Аммо, қазойим орқамда қоладиганларни қийнамасин. Ўлимлик деган нарса нима гап, ҳозирги янги пулга икки юз сўм харажат қилинса, ҳамма нарса олиб қўйилади. Қариллик қурғур мўрт...» — дерди. Кампир ўз фикри, ўз фалсафасида ҳақ эканлигини сезишгач, индашмасди. Баъзан бутун бир мамлакатга арзийдиган ўгиллар машинасида тўрт томонга югуриб, малла топишомлай қийналишган вақтлари ҳам бўлган... Янгидан тўплangan ўлимлигини бўхча қилиб, сандиққа ташлаб, маҳкам бекитилгандан сўнг, орадан бир ҳафта ўтар-ўтмас яна эски сандиқ ўлгур даранг-дурунг қилиб очиладиган бўлиб қолди... Майдачуяда болалик ўз инисининг хотини тўсатдан қазо қилиб қолди. Куйинкб, бўрсиллаб кетган Қандил буви ўлимликни ўз қўли билан олиб чиқиб берди...

Қўнғирбуқа чўққисида турли хаёлларга чўмиб ўтирган «Чотқол йўлбарси» бир муддатдан кейин яна пастликка тушди. Бу тепаликнинг бир яхши хусусияти бор — унда ўтирган одамнинг дили равшан тортади, бир томонда водий чироқлари, бир томонда буюк кўзгу — Чорвоқ кўлининг ярқираши киши дилини ёритади. Қандайдир бир самарқандий сарин шабада юзларни еллиб, ўпиди, юракдаги ғуборларни учирив кетади.

Қоражон тоғдан тўғон устига, ундан айланма йўллар орқали пастга тушиб, шаҳарчага равона бўлди.

XXXI боб

ТИМСОҲЛИ КУЛ

Туш пайтида СУ-2 объектидан ўз машинасида Бошқарма томон қайтиб келаётган Георгий Садовников ёнма-ён ўтирган инженер Ҳазратовнинг илтимоси билан унинг квартираси олдида машинани тўхтатди, тушликни бирга қилишликни сўради. «Камбағал одамга бир сиқим бўлса ҳам ош яхши...» деган гапни эслашиб, кулишди. Ҳазратовнинг таомга кўп эътибор бериши, ҳатто Москвага борганида ҳам чамадоннинг бир чеккасига капгиру бир пакет қофозга зира, гулқант, яна бир пакетда девизира гуруч олиб кетишини биларди. Садовников шу билан учинчи бор унинг уйида бўлиши. Хушмуомала, чақон, меҳмоннавоз Гулбаданхон дамлаган ош бошқача бўларди: «Гуручлар лаганда юриб кетар эмиш». Бир куни кайф устида Гулбаданга ўткир тикилиб қараган Садовников уни, ҳақиқий ўзбек қизи, деди. Бу гапни эшитган Гулбадан меҳмонлар кетгандан кейин эридан, бу яхши деганими ёки ёмон деганими, деб сўради.

— Биринчиси,— деди Ҳазратов рашк қилиб,— бошлиққа ёқиб қолибсан, лекин ҳушёр бўл, бошинг ҳандалакдай узилиб кетмасин!

— Жинни бўлдингизми! Об-бо-о! Мунча кўнглинигиз қора!— деди Гулбадан эрининг қизғанганидан хурсанд бўлиб,— ўзлари?..

— Бу ўйдим-чуқурлар, цементу қувурлар ичиди ҷангга ботиб юришимнинг боиси сенлар! Мақсадим сени бой қилиш. (У гапириб туар Ҷекан, кўз олдидан сержозиба Обакихон ҳам ўтди.) Бўлмаса тинчгина министрликда ёки Трестда ўтираверсам, бирор нима

дермиди! Моянаси ҳам ёмон эмас эди. Садовниковни хотинбоз дейишади...

— Кекса одам-а?

— Ҳа! Кексалар ёмон бўлади! Емга ўрганган от...

— Қўйинг-е! Одамларнинг соғи қолмапти-да! Мен уни париштаси бор одам дердим.

— Паришталик одамларни у дунёда кўрасан,— деган эди ўшанда кайфи ошган Ҳазратов,— Садовниковлар ҳам ўзимиз қатори...

— Унда ҳамманглар қўшмозор бўлинглар!

Гулбадан шу ерлик халқ билан яхши гаплашадиган, «шоҳу гадога баробар» эрининг тили билан айтганда, «одамшаванд» Георгий Садовниковни бу гал ҳам илиқ навозиш билан кутиб олди. Эрининг, «ҳушёр бўлгин», деган гаплари ёдига тушиб, чиройли ёноқлари қизариб турган эди, Ҳазратов буни сеизиб: «Илдам-илдам ишингни қиласер, ҳазиллашган эдим. Қайнатиб қўйган бўлсанг тезда гуручни солиб, ошни дамла! Бир соатдан ортиқ ўтирамаймиз!»— деди. Гулбадан шоша-пиша дастурхон устига нозу неъматларни қўйиб, ошга гуруч солди. Ҳазратов жавондан арман конъягни олиб билур қадаҳларга қўйди. Икки ошна майдалаша бошлишди. Япроқланган қазию «Тошкент суви» конъякнинг жонини киритди. Бир муддатдан сўнг улар «ман сизга айтсам...» бўлиб қолишиди. Георгий Садовников ўзбекларнинг меҳмоннавозлигини таърифлаб, бундай сахийлик дунёниг ҳеч ерида йўқлигиги эътироф этарди-ю, баъзан бу ҳолни танқид ҳам қиласерди: «Бор-йўгини сарфлаб тўй қилиб едириб юборишларига қўшилолмайман! Бизлар мезбон сифатида мингларча чет эллик меҳмонларни кутиб оламиз. Уларга Самарқанду Тошкент; Бухорою Хивани кўрсатамиз, атласу тўнгача кийгизамиз... Лекин шу нозу неъматини сочган одамлар ҳам ўша Брюсселу ньюйорклик жанобнинг дастурхони устида ҳурмат қилиниб, қўр тўкиб ўтирадими?! Унинг ҳам гапларига қулоқ солиб ўтирадиларми? Гап шунда! Агар шундай қилинганда, кўп яхши бўларди. Лекин минг афсус».

Қиёмхўжа Ҳазратовни бундай умуминсоний гаплардан кўра ҳам ўзининг шахсий манфаати қизиқти-рарди. Бундай «ҳавойи» гапларни баъзан эшишиб туриб эснарди. У қандай бўлса ҳам яхшилаб ўмаришни, бир нималик бўлиб қолишни ўйларди. Ўмаришда у жуда хирп бўлиб кетган: «Мингта сиз-биздан битта жиз-биз яхши»,— дерди у. Бу унинг «фалсафаси» ва кўп ишла-

тиб юрадиган мақолларидан бири. Сочилиб турадиган дэвзира оши киргунча икки ошна конъяк ичиб бир-бирларига гап бермай сухбатлашиб ўтиришди. Кеча Ҳазратов базадан Садовниковнинг ёш хотини Мария Сергеевнага ҳозирги чирсиллаб турган модадаги пальто ва баланд пошналик чехословак туфлисини топиб келгани, хонадонида нимагаки зарурат туғилиб қолса, Сапчабошев орқали түғрилаб беражаги Георгий Исаевичнинг кайфини чоғ қилган эди. Бола-чақанинг бирлаҳзалик қувончи, хотиннинг кайфи чоғлиги ҳамма оталарга завқ берганидек, Георгий Исаевич ҳам темирдан ясалган робот эмас, ҳамма инсонларга хос кайфу айш суриш унга ҳам бегона эмас. Унинг ҳам нафси, ғурури бор...

Садовниковнинг кайфи чоғлиги, тариқдек бўлса ҳам молу ишратга мойиллигини сезган Ҳазратов меҳмонини бир неча бор ўпиди, қучиб, ўз кўнглидаги гапларини бидирлаб гапиради. Агар бирон ҳушёр одам сиртдан кузатиб турса, у гапиришдан кўра ҳам авраётганга ўхшарди. Оғзи мойланган Садовников унинг гапларини тоқат билан эшитишга мажбур. Ҳазратов аввал кўпчилик бошлиқларга ёқадиган «қўй улашиш» латифасини айтиб берди: «Бир киши одамларни миннатдор қиласман деб, ҳаммага биттадан қўй улашибди. Шундан кейин ўзи югуриб бориб йўл устидаги сой кўприги тагига тушиб, бекиниб турибди. Кўппридан молни уриб сўкиб олиб ўтиб кетаётган ҳалиги одамлар қўй улашган кишини сўкиша бошлашибди: «Қўй берган одам яна бир қаричгина арқон бермайдими! Шу ҳам ҳотамтойлик бўлдими-ю, падарингга лаънат! Бу қўйни қандай қилиб уйга олиб кетамиз?!»— дейишибди». Бу латифани эшитган Садовников қаҳ-қаҳ уриб кулиб юборди.

— Бизнинг қурилишда ҳам шунаقا одамлар бор...

— Одамлар ҳеч миннатдор бўлмайди, Георгий Исаевич,— деди Қиёмхўжа қадаҳларга яна конъяк қушиб.

Садовников индамади.

— Баъзи кишиларнинг мансабга чиқиш усулини эшитганимисиз? Бу ҳам латифа.

— Йўқ?

— Муовини ўз бошлигини мақтайвериб-мақтайвериб, яна ҳам баландроқ мансабга чиқариб юборар экан. Бошлиқ кетаётсиб ўрнига ўша муовинини қолдиаркан. Янги бошлиқ бўлган муовиннинг ҳам кейинчалик муо-

вими мақтайдар экан. У ҳам вақти соати етгач, ўрнига мувонини ташлаб каттароқ жойга кетар экан...

- Бир-бирини ялаб, денг?
- Ҳа. Бу усулга нима дейсиз?
- Ўзингиз нима дейсиз?
- Яхши.

— Бўлмаса, анави Шишкинга айтиб қўйинг, шу йўлни қўлласин! Ҳа-ҳа-ҳа-ҳа-ҳа...

— Қўрқманг, Георгий Исаевич, Шишкинни тилини қисиқ қилиб қўямиз. Бу, жўн гап. Анави Мингбоевга ўхшаганларга эҳтиёт бўлинг.

Садовников ўйланиб қолди.

— Қадрли Георгий Исаевич, ҳали бизнинг базага жуда кўп мол келади,— деди Ҳазратов ўйланиб қолган Садовников ёнига стулини андак сурин,— керак бўлса Тошкентдан ҳам топиб келаман. Ошналарим кўп. Базани ноёб молларга тўлдириб юбораман. Ноёб молларни шундоқ муҳим қурилишларга юбормаса, қаерга юборади! Сизнинг номингиздан хат тайёрлаймиз. Боплаймиз!

— Сиз билан мен инженермиз, вазифамизни унуби қўймайлик.

— Йўқ, ҳеч унутмаймиз! Политехника институтини битиргунча жигаримиз эзилиб кетди. Энди, қадрли Георгий Исаевич, яшашни ҳам билишимиз керак-да! Оғзимиздаги ошимизни олдириб қўядиган сўтак бўлмаслигимиз керак! Сизнинг ҳам бу мансабга етишиниз хамирдан қил суғургандек бўлган эмас!

Садовников яна сукут сақлади.

— Биз ўзимизни ўйлашимиз керак!— деди яна бидиллаб Ҳазратов,— ҳеч ким миннатдор бўлмайди. Бувим раҳматлиқ: «Итга берсанг ошингни, итлар тажир бошингни...» дер эдилар. Шу ёшга кирганимда энди ақлим киряпти. Ҳеч ким миннатдор бўлмайди. Ўзингизни ўйлай беринг.

— Йўқ, сизнинг миянгиз электрон вичислителидек тез ишлайди. Лекин бошқачароқ ишлайди...

- Ҳа-ҳа-ҳа-ҳа. Қанақа бошқачароқ?
- Бошқачароқ-да. Шўҳроқсиз...
- Дутор чалиб берайми?
- Марҳамат.

— Ош киргунча сизга ўзбекнинг бир мақомини чалиб бераман. Тушунмасангиз ҳам эшитасиз-да, Георгий Исаевич!

— Нега тушунмас эканман! Менга ўзбек куйлари

жуда ёқади. Жуда ҳам дилрабо, жуда ҳам ҳароратли куйлар. Яхши куй ҳаммага ҳам ёқаверади. Мен рус кишисиман, лекин менинг бутун умрим, муҳаббатим Ўзбекистон ва ўзбек халқи билан боғлиқ. Фарғонада ишлаганимда Уста Ғиёс, Үмрзоқ ота, Қўшчи бобо деган кекса пахтакорлар билан қадрдан эдик. «Сиз бизни юракдан эъзозлайсиз, кам бўлманг», деган эди. Мен ўзбекларнинг тарихан ниҳоятда бой халқ әканини яхши биламан.

— Офарин, Георгий Исаевич, сфарин!

Киёмхўжа дуторни созлаб, Навони жуда ҳам эзиб, келиштириб чалди. Георгий Исаевичнинг завқ билан тинглаб ўтиргани унинг ўйчан кўзларидан сезилиб турарди. Унинг кўз олдида беқиёс бир гўзал водий — тоғу шаршаралар, майсазору боғлар пайдо бўлди. Бу манзара кишига қайфичоғлик бағишларди. Унинг кўз олдида ажойиб бир кўл, беназир табиат манзаралари пайдо бўлди. Лекин қайси бир киножурналда кўринганидек, бу гўзал кўл четида гёё танини яшириб, қимир этмай ётган, агар бирон жонивор яқинлашиб қолса, сапчиб, тишлаб олиб кетадиган тимсоҳлар ётарди. Мол-дунё ўйлида ҳеч кимни аямайдиган Ҳазратов гўзал кўл ичидা бурнини чиқариб, яшириниб ётган тимсоҳга ўхшарди. Георгий Исаевич гўзал бўлиб кўринган бу «кўл» атрофида эҳтиёт бўлиб юришни кўнглидан ўтказди. Чунки бунда на касбини ҳурмат қиласидиган, на тарихини биладиган ва на халқига садоқат сақлай оладиган кимса — тимсоҳнамо йиртқич хавфи борлигини сезгандай бўлди. Ҳа, мулоқот баъзан киши дилини билиб олишда энг қулай восита.

Наво тугаши билан Гулбадан чинни лаганда девзиранинг ошини олиб кирди. Икки ошнанинг бири қўл билан, бири кумуш қошиқ билан тушира кетишиди. Ора-чора чой ҳўплаб турган Георгий Исаевич дераза тахтасида турган кечаги газеталардан бирини олиб, «Ўзга цивилизацияни қидириш ўйлида» деган кичкина хабарни ўқиб берди. Унда ёзилишича, олимлар коинотдаги бошқа тараққий топган, ҳаёт бор планетани кучли радиотелескоплар орқали қидириш лойиҳасини тузабётганликлари маълум қилинган эди. Аэронавтика ва космик бўшлиқни ўрганиш маркази мураккаб антенналар ёрдамида бошқа дунёдаги ақлли жондорлар сигналини тутишни мўлжаллаяпти. Коинотга кучли сигналлар юборилган...

— Ҳар қалай, сиз билан бизга ўхшаб, бошқа пла-

нетада ҳам тўғон қураётганлар бўлса керак,— деди Георгий Исаевич яна чой ҳўплаб,— бўлмаслиги мумкин эмас. Инсон тафаккури жуда ўсиб кетди.

— Ҳа,— деди Ҳазратов кафтига эчки боласининг калласидек паловни қўндириб ошаркан, — дунёда гап кўп...

— Сиз билан биз унчалик узоқча қаролмаганимизда ҳам, сал нарироқни кўра билишимиз керак,— деди Георгий Исаевич,— шунда янглишмаймиз. Дунёнинг ярмини қўлга киритган подшоҳ Темурланг ўлар чоғида: «Ўнг қўйлимни тобутдан чиқариб қўйинглар», леб васият қилган экан.

— Сизга қойилман, Георгий Исаевич. Офарин!

Бир соатга деб кирган Садовников Ҳазратов уйида кечгача қолиб кетди. Унинг ичиб, эзма бўлиб келганидан хотини ҳам, болалари ҳам хурсанд бўлишмади.

Тошга ёмғир кор қилурму... деганларидек, Георгий Исаевичнинг гап билан урган шапалоги эртасига ёк Ҳазратовнинг эсидан чиқиб, яна ўзини базага урди.

XXXII боб

УЯСИ БУЗИЛГАН ҚУШ КАВИ..

Қоражон калаванинг учини йўқотиб, боши гангидиб, қурилишда изғиб юарди. У қадрдон дўст, ошналари ёнига борар, қарашар ва тинмай чекарди. Ўзига нисбатан жиндак юрагида илиқлик бор ҳамма одамлар ёнида бўларди. Шундай қилиб кунлар ўтаверди. У кимданdir маънавий мадор тиларди. Унинг кўз олдида Иван Иванович Шишкин билан Файзулла Аҳмедович Музаффаров турарди. «Руҳи сўник кишидан, футур кетар ишидан». Унинг жиддий бир иш қилишга қўли бормас, анчагина совиган эди.

Жароҳатланиб ҳолсизланган кийик тогда ўз шериклари шохини ялаб, даво топиб, кучга кириб кетар экан.

Ўзига қарши махфий найзалар тўғриланганидан мутлақо хабари йўқ инженер Қоражон Мингбоев соддалик қилиб ўша кунлари елиб-югуриб ишлаб юрган экан. Инсон бемор ётаркан, қазодан аввал қадрёнларини таажжубга солиб бир қадар тетикланиб, кўзини очгандай бўлади. Қоражон Мингбоев ҳам ишдан чётлатилиши олдидан одамларга ниҳоятда меҳрибон,

дилкаш, чеҳраси очиқ бўлган эди. У илгариgidан ҳам серғайрат әди. Бу субҳи козибга¹ ҳам ўхшарди. Унинг назарида ҳамма ишлар яхши: қурилишда меҳнат қайнамоқда, атроф тогу бўстон, майсазорларда қўю қўзи-лар гашт қилиб ўтлаб юрибди... У ҳам ўз болалигини эслаб, шу майсазорларда чопқиллаб юргандай бўларди. Шу майсалар орасида чақиртикану учли чўкиртаклар борлигини билмас, товонига порт кириб,войвойлаб қолишини мутлақо ўйламасди. Ҳа, дарвоҷе, оёғи состида яширинган миналардан, ўқ ёмғирларидан, замбаракларнинг гумбурлаши, тупроқ, дуду оташ кўтарган бомбалардан қўрқмаган абжир солдат йигит оёғи остидаги чақиртикандан қўрқармиди! У кирза этиги билан бундай тикану чўкиртакларни босиб-янчидек келган. Аммо шу абжир йигит тўғри сўзлиги, меҳнат-севарлиги, ҳалоллиги билан баъзиларнинг гашини келтириб юрар экан, нима, бу ёмонми! Тўртта-бешта кимсанинг ола қарashi — давлатнинг ола қарashi эмас-ку! Ҳазратов уни «берилган» дерди. Ҳалоллик, ўз вазифасини инсоф билан бажариш — юртга садоқат демак! Ўз партияси олиб бораётган ишга садоқат демак! «Берилган» деганлари сўкиш эмас, аксинча, фахрли, эътиборли гап бўлиши керак эди. Шу муazzам мамлакатим деб қон кечиб, жонини аямаган, танк ичида ёниб кетган одам юртдан меҳнатини аяйдими! Қоражон Мингбоевнинг тарбияси Ҳазратовдан бошқачароқ бўлган. Лекин Мингбоевнинг жуда катта нуқсони ҳам бор, у ҳаммани ҳам ўзига ўхшатиб юради. Ҳамма унинг наздида бир қолипдан чиққандек қўринади. Бирор кўпроқ, бирор озроқ, аммо ҳамма ҳам ўз куч-қудратига қараб ишлайверади, деб ўйларди. Ишда қобилиятсиз, нўноқ баъзи кимсалар қурилишда ўз обрўсини ошириш мақсадида Қоражон Мингбоевга ўхшаган «берилган»ларни беобрў қилиши ёки ўртадан кўтариб ташлаши зарур эди. Мана шундоқ, очиқ курашга чоғи келмайдиганлар майдонга тушмай макрга ўтадилар.

Қиёмхўжа Ҳазратов ҳамтовоқларига ўзини мақтатишдан иш бошлади. У радиодан келган баъзи муҳбирлар олдида сохта камтарлик кўрсатиб, зиёфатдан ҳам асло пул аямасди. Ўзининг фотосуратини ҳам область газетасида чиқарди. Қурилишдаги баъзи ёш ходимларнинг пешанасини силаган бўлди. «Одам ўзининг

¹ Субҳи козиб — ёлғон тонг.

ҳалол межнати билан обрў олиши керак. «Ўзини ўзи мақтатиш — аҳмоклик!» — деди бир куни Қоражон Мингбоев Ҳазратов олдида. Бу гап ошнасининг у ёқ-бу ёғидан ўтиб кетган бўлса ҳам, маккорлик билан қиляётган ишининг қоқ илдизига болта урилаётган бўлса ҳам индамади. Аммо Ҳазратов жон-жаҳди билан киришган, шуҳратни худодан тилаб олаётгандай, борвужуди билан киришар эди. Қоражон шаддодлик қилиб, меъёридан ошиқроқ аччиқ сўзлар айтиб юборса ҳам у чидарди. Улуғ Ватан уруши йилларида мамлакат ичкарисида тошу тарози тортилган, машаққатли йилларда бозор ичидаги баъзан сурбет кимсалар юради. Тирикчилик учун новвойлик қилиб юрган хотин-халаж саватидаги нонга чанг солиб, тепкилаб урганингизга қарамай оғзига тиқиб еяверарди. Ерга ётқизиб муштласангиз ҳам нонни чанглаб еб оларди. Урганингизга қарамасди. Ҳазратов ҳам, Файзулла Аҳмедовичнинг айтишича, шунаقا сурбет одам. У ғоятда шуҳратталаб: шуҳрат йўлида урасизми, сўқасизми — бефойда!

Шундай изтироб чекиб юрган оғир кунларнинг бирида Қоражон Гулгунни кўргани Тошкентга тушди.

Таажжуб! Мана, бугун учинчи апрель, Тошкентда қор ёрятти... Апрелда қор ёққанини кўрганмисиз? Ҳа, жуда таажжуб! Континентал иқлим дегани шу бўлса керак — тез ўзгариб туради, гоҳ совуқ, гоҳ иссиқ... Гоҳ булатлар тўполони, гоҳ жазирама. Кейинги йилларда шаҳарда кўп тарқалган қора қуш — майна дарахтдан дарахтга ўтиб сайраб, йиғлаб юргандай... Баҳордаги қор қандай совуқ! Ҳовлилардаги очиб қўйилган токлар ҳам яна шоша-пиша тўғри келган нарса билан ёпилди. Андак иситмаси бор Қоражон Тошкент кўчаларида юради.

Бу гап у шаҳардан таъби тирриқ қайтди. У йўл-йўлакай Чорвоққа тушиб, кимсасиз ётган ўз квартирасига кириб, устини чанг қоплаган диванга ўзини ташлади. Тошкентда, Файзулла Аҳмедович уйида Гулгун йўқ эди. Қўшниларининг айтишича, қаёққадир кетган эмиш. Дарвоза олдида Қоражон машинаси пайдо бўлиши билан қайси бир ковакдан югуриб чиққан Обакихон гап ичидаги Хайрулла отини атай тилга олиб, «машинасида Гулгунни олиб юради...»ни айтиб, кулади. Ёш хотинининг гўё «қингир юргани»га шама қилинди. Сиртидан сездирмаган бўлса ҳам ичдан куйиб кетган Қоражон қандай қилиб Чорвоққа етиб келга-

нини билмади. Одатдагидек юз-қўлини ҳам ювмади. Чой қўйишга ҳам эринди. Хайрушка билан Гулгуннинг бир-бирига кўз қисишиганини эшитиб дарғазаб бўлди. Умуман, бу текис йигитнинг Гулгун атрофида айланиб юришидан шубҳаланди. Унинг юраги ёнар, қандайдир мавҳум шубҳалар-пашшадек боши атрофида ғингиллаб учарди. Бир муддат диванда чўзилиб ётгач, беихтиёр сапчиб ўрнидан турди-да, ёқасини тўгрилаб, костюмини елкага ташлаб қўшниси, дўсти, парторг Иван Иванович Шишкинларникига чиқди. Галина Сергеевна Қоражоннинг костюми елкада, ўзларникига келаётганини деразадан шундоқ кўриб, кузатиб туради. Оппоқ, лўмбиллаган Галина анчадан бўён Қоражон Мингбоев изтироб чекиб юрганини билар, деярли ҳамма гапдан хабардор эди. Эрининг қадрдон дўсти, инженернинг ишдан олингани, хотини Тошкентда ўқиётгани, куйиб юрганидан ҳам, Отеллодек раشكчи эканини ҳам биларди. Негадир бу текисланмаган харсанг тош — дўлвор йигит Галинага ёқарди. Унинг кенг елкалари, сўлоқмон муштларига суқ билан тикиларди. Лекин ўзининг қадрдону олижаноб, тўғри сўз эрига боқиб, бу хаёлларидан уялар, дарҳол ўзини қўлга оларди. Чотқол тоги қатламларидаги бесўнақай харсанг тошларга ўхшаган Қоражон Мингбоев гўё унинг момиқ кўкси устига қулаб тушиб, эзиз юбораётгандай, ўзини баъзан четга оларди. Узоқ вақт кўришмаган қадрдонлардек, Иван Иванович ва Галина Сергеевна билан бир-бирларига тўйишмай сухбатлашишиди. Қувноқ, гўзал Галина «ишдан четлатилган» Қоражоннинг дардига шерик бўлиб, илгаригидек унга катта ҳурмат билан қарашини билдириб, унга навозиш этарди. Галина Қоражон билан ҳазиллашарди. У билан қурилиш, иш ҳақидаги гаплардан кўра ҳам ўз ҳаёти, Гулгун ҳақида гаплашишни истарди. Эри қуюшқондан чиқиб кетишни ёқтирмаслигини билса ҳам Галина бу забардаст, фронтчи йигит билан ҳазил-мазах қилиб гаплашиб ўтираверарди. Бир куни Иван Ивановичнинг олдида Қоражонга хушомад қилиб, «моя любовь», деган гапни айтди. Эри сал ўзини ноқулай сезгани билан хотинига унча эътиroz билдирмади. Шунчаки ҳазил, деб билди. Шу ёшгача уйланмай, яқинда уйланган Қоражон Мингбоевни Галина гапга солиб, бунинг боисини билишга қизиқарди.

— Менга ҳеч ким тегмаган... Мендан қизлар йирт-

қичдан қочгандек қочишарди. Мен шўрлик қандоқ қиласай...— Бирдан нолиб қолди Қоражон,— урушдан қайтиб келганимдан кейин қишлоғимиздаги кўз оссимга олган Холида менга тегмади. Шундан кейин юрагим совиб кетди...

— Инсон тоқ ўтмаслиги керак эди, Мингбоев,— дерди унга тикилиб ўйламсираб турган Галина,— дунё жуда мураккаб. Лекин...

— Сиз менга тегармидингиз?— кутилмаганда гап ташлади Қоражон Иван Иванович балконга чиққанида. Галина қизариб кетди. У аввал нима дейишини билмай саросимада қолди. Бу одобсизларча, менсими берилган саволга жавоб қилгиси келмади. Бир лаҳзадан кейин Галина мийигида кулди:

— Ҳа, тегардим. Лекин сиз кечиккансиз, яхши кўрган эрим бор...

— Сиз менга ўхшаш бедавога тегишингиз мумкинмиди, деб сўрамоқчи эдим. Ҳозир менга тегинг, демоқчи эмасман!

— Сизга нима бўпти!— Галина қаҳ-қаҳ уриб кулади.— Сиз танқда ёнгансиз. Бу — чандиқ жасур йигит учун ҳусн! Ёшингиз анча ўтиб кетди. Шунга ачинаман, холос...

Йигирма йил деганда биринчи марта Қоражон Май байрамини ўзининг Ёнқўргон қишлоғида ўтказди. Болаларнинг байроқча кўтариб, сурнай чалгани, майдонда сафда тизилгани, барабанларнинг дириллатиб урилганини ҳисобга олмаганда, байрам бунда бир қадар сокин ўтарди. Шу улуғ айём кунлари Қоражон хотинини етаклаб Ёнқўргон, Сижжак, Хумсон ва охири Чорвоқда юрмоқчи бўлди. Бунинг иложи бўлмади. Қизил Юлдуз ордени ҳам костюмига қадалганча гардеробда қолди.

* * *

Худди шу куни эрта билан Файзулла Аҳмедович Чорвоқдан Тошкентга тушиб келди. Лекин Пушкин кўчасининг ярмига етганида унинг машинасини тўхатиши; намойишчилар ўтадиган йўллардан ташқари барча майда кўчалар беркитилган эди. Файзулла Аҳмедович шофёр йигитга уйига кетаверишга рухсат берди. Ӯзи машинадан чиқиб, кўча йўлкаларида турган одамлар тўпига борди. Шунча илтимос қилса ҳам бир мўйловдор ёш милиционер уни қўйиб юбормади.

— Уйимга ўтиб кетай, кекса одамман!

— Рухсат йўқ! Мумкин эмас!

Файзулла Аҳмедович бу ердан кетиб, бошқа томонларни ҳам айланиб келди. Ҳамма ёқда одам, ҳамма кўчалар беркитилган. У ўз уйига ўтиб кетиш учун қулай бояги чорраҳага келиб, ёш милиционерга яна мурожаат этди:

— Мени қўйиб юборинг, иним, уйга бориб укол олишим керак!

— Мумкин эмас, тушунинг! Буйруқ шундай, биз у томонга ҳеч кимни ўтказмаймиз!

— Мен буйруқ борлигини биламан, лекин сиз тушуниб, менинг гапимга ҳам қулоқ солишингиз керак!

— Йўқ, мен сизнинг гапингизга эмас, командиримнинг буйругига қулоқ соламан!

— Бу тўғри, аммо..

— Гражданин, менга халақит берманг!

— Мен, мен... академик Музаффаровман, мана гувоҳномам! — деди Файзулла Аҳмедович атрофига ола-зарак бўлиб. Бунда турган ёш-яланг олдида енгилтаклик қиласётгани сезилиб қолишидан хижолатда эди. Атрофдагиларнинг бу гуфтигўга эътибор бермаётгандарини сезгач, ёш милиционерга яна мурожаат этди: — Обкомнинг аъзосиман! Наҳотки сиз менга ишонмасангиз? Мен ҳозир бориб укол олишим керак, кексалик... Қўйиб юборинг! Мен академик Музаффаровман...

— Бизда академиклар кўп, ҳамма академикларни қўйиб юбораверсак, тартиб бузилади. Гражданин, орқага ўтинг!

Файзулла Аҳмедович «э, нодон!» деди ичида. «Академик» сўзини тилга олганига минг пушаймон бўлди. Ётмишга яқинлашганида шунаقا, ярашмаган қиликлар қилганига ўзидан-ўзи хижолат бўларди.

У ўша жойда ғўдайиб турганча тураверди. Лекин орадан яна ярим соатча вақт ўтгач, бу ердан ўтиб кетаётган йўғон бир милиция офицери Музаффаровни кўриб, атай яқин келди, улар бир-бирларини байрам билан қутладилар.

— Бунда нима қилиб ўтирибсиз, домла?

— Уколим бор,— деди тажанг бўлиб турган Файзулла Аҳмедович кулимсираб, рўпарада — ўн қадамча нарида бояги чақмоқ мўйловли ёш милиционер ўқрайиб турарди. У ҳамма гапни тушунтириди,

— Утиб кетаверинг,— деди офицер Файзулла Аҳмадовичга йўл кўрсатиб. У анча жойга боргач, офицер ёш милиционерга бир нималар деб, Музаффаровни кўрсатарди. Офицер тахминан: «Сиз Музаффаровни танимайсизми, у ҳурматли киши, академик. Уколим бор, деяптилар... Буйруқقا итоат қилиш, уни бажариш керак, лекин кўриб турибмизки, шу ҳурматли одам анави кўчага — уйига ўтиб кетади. Йўл бериш керак эди. Юраги ёмон бўлиб, ўзини ташлаб юбориши мумкин. Ҳукуматимиз учун биздан ҳам кўпроқ жавоб берадиган одам...» Ёш милиционер ходадай қотиб турарди.

Файзулла Аҳмадович омон-эсон ҳовлисига етиб келиб, дарҳол укол олди. Марҳаматхон атрофида гирдикапалак бўлди. Фарзандлару неваралар барчаси 1-Май намойишига чиқиб кетишган эди. Унинг шу байрам куни ҳам қурилишда қолганидан жаҳли чиқиб ўтирган Марҳаматхон эрини кўриб чеҳраси очилиб кетди. Лекин бу тажанг одамнинг бугун Чорвоқдан аzonлаб йўлга чиққани сабабини билмасди: кеча бу ерда пайдо бўлиб қолган Обакихон Ҳазратовни қидирган бўлиб, Файзулла Аҳмадович хонасига кирди. У ниҳоятда ясанган, безанган эди. Икки кўқсини очиб, Файзулла Аҳмадович столига яқин келиб, унга хушомад қила бошлади. Музаффаровнинг бир оғиз очилиб гапиришига илҳақ эди. Лекин Файзулла Аҳмадович қовоғини солиб ўтирганча ўтираверди.

Аслида Обакихоннинг бирон қариган академикка тегиб олиб, давлатига эга бўлиш нияти ҳам йўқ эмас эди. Инсульт бўлиб, оғзи қийшайиб қолган кекса бир академик атрофида айланиб, одам қўйиб, нечоғлик ҳаракат қилди, аммо сўққабош чол ўлгур пишиқлик қилиб, давлату ҳовли жойини қизига мерос қилиб қолдирди. Расмий эри Қоризода бўлишига қарамай, у Музаффаровга ҳам кўз сузиб кўрмоқчи эди. Ҳазратов Намангандаги Кимсанхонни, «Мен инженер — академикман», деб алдаган эди. Аслида ўз «ишида» у дарҳақиқат «академик»лиги кейинчалик маълум бўлди. Шу кунларда уни яна бир чўтири йигит судраб юрибди. У ўзини заготзерононинг бошлиғиман, деб таништирган. Бу, заготзерно бошлиғи ҳам Обакихон кўзига «академик» бўлиб кўринди. Қари академикларни «овлаш» ҳозирги кунда баъзи эрсиз жувонлар ўртасида мода бўлиб қолган — бу «ишини»

дарҳол илғаб олган Обакихон юз-кўсими бўяб, Ҳазратов қолиб «ов»га шайланди. Унинг Чорвоқдаги хатти-ҳаракатидан чўчиган Файзулла Аҳмедович байрам куни ҳамма нарсани ташлаб, хотини ёнига шаталоқ отиб қочган эди.

Файзулла Аҳмедович, ёш, мўйловли милиционер-нинг хит қилгани сабаб, яна илгаригидай тажанглиги бошланди. Бундай пайтларда Марҳаматхон уни қувватлаб таскин беришга уринар, нобоп баъзи кимсалар гашига тегаётганини айтиб, «тезаксиз майдон бўлмас» мақолини эслатиб қўярди:

— Баъзи одамлар ёмон бўлиб кетган. Қирқ йил заводда ишлаб пенсияга чиққан Мирёқуб aka қазо қилди. Шу маҳаллалик Ҳазратов машинасини нариги кўчадан буриб кетди-ку! Беш минутга кириб кўнгил сўраб чиқишига ярамади! Агар анови мансабдорнинг мушуги ўлса, кўнгил сўраш у ёқда турсин, эрталабдан кечгача дарвозаси олдида турарди...— деди Марҳаматхон.

— Баъзан кўзим оёқ остида ўрмалаб кетаётган чумолига тушади,— деди Файзулла Аҳмедович,— уни босиб ўлдирмаслик учун ё нарироққа, ёки тўрт энлик берироққа оёқ қўяман. Юриб кетаётган йўлимда тирик жон ўлмасин, дейман. Ҳалиги йўлини тўсган йигит хафа қилди... Лекин тилимни тийдим. Бефойда!

— Тўғри қилибсиз, адаси.

— Чорвоқда Ишларбек Сапчабошев деган бир қурт пайдо бўлди,— деди Файзулла Аҳмедович хотини,— у ҳамма ишни қиласди. Ҳеч нарсадан ҳазар қилмайди. Жуда ҳаром одам. Мен унга: «Ҳаром ишни кўп қиласиз, бу ерда ишлаётган бошқа халқлар вакилларидан одам уялади. Наҳотки, ўзбеклар шунчалик пасткаш бўлса, деган гап тиллари учida турибди...» дедим. У бўлса: «Зиёлисиз-да, Файзулла Аҳмедович, ҳамма гапни бадиий қилиб айтасиз», дейди. Бу гапга нима дейсан! «Шоирлар ўзининг шифирида бир нарсани иккинчи нарсага ўхшатиб гапиради, дейдилар, шу ростми?»— сўради мендан Сапчабошев. Рост, дедим. Улар гиёҳларни гапириради. Қуёш билан гаплашади. Одам сиймосида тўнгизни, тўнгиз сиймосида одамни ҳам кўрсатишлари мумкин, дедим. Бу гапга фаҳми етмади.

Урушдан қайтиб келгандан кейин, участка солдим — ғишт қўйдириб, бозордан миху ромгача сотиб

слиб уй солдим. Еу участка ҳам ер қимиirlашда дабдала бўлди. Ҳозир баъзилар икки қаватли зинали, меҳмонхонали уйларда турадилар. Ҳукуматга фойда берардан кўра ундан олари кўпроқ. Бу ҳукуматни тузгунимизча қанчалар қурбон бердик. Энди паркетли хоналарда туриб, кумуш жўмраклардан сув ичиб, чинни ванналарда чўмилиб, норози бўлишлик! Ҳей, пўконидан ел ўтмаганлар! Бошларига тарсаки тортиб юборгим келади!

Бу асаб бузилишининг ҳамда нохуш воқеаларнинг эсланиши боиси битта эди; мўйловли ёш милиционерга ўзининг академикигини айтиб тили куйгани бўлди. Музаффаров умрида бундай мақтанчоқлик қилмаган. Енгилтак одамларни савалаб келган кимсанинг ўзи шундай қилиқ қилиб қўйгани ниҳоятда виждонини фижимлади. «Хом сут эмган инсонмизда,— деди ўзига-ўзи.— Укол ўлгурга шошиб бундай мақтанчоқлик қилдим. Ишқилиб, ўша ёш йигитчанинг ёдида қолмасин-да бу иш! Ишқилиб, у бирон танишимга: «Бир Музаффаров деган академик бор экан», деб айтмасин-да!» Бу ҳам ҳолва. Дўсти Амир Равнақ шу кунларда Навоийнинг тасаввуфга, «ваҳдатул мавжуд»¹га алоқаси ҳақида тадқиқот ёзаётгани энсасини қотирди. Шунча ишлар турганда тасаввуфни ковлаштириш зарурмикан?! Шоирнинг беретка кийиб, қўлига узук тақиб юрганига ҳам чидаган эди. Ёки шоир халқи шунақароқ бўлармикан? Вақти-ваҳти билан айниб турадими? Ўтмиш адабиётидаги бу фалсафий оқим «худо ломакон...» лигигача ёзибди. Э, тавба, дерди Файзулла Аҳмедович қадрдонидан ранжиби.

— Мана шунақалар менинг асабимни қағшатяпти, Марҳаматой! Бўлмаса, мен ҳеч нарсадан хафа бўлмайман, юзга кирадиган одамман.

— Йўқ, адаси, сиз қўшнимизнинг әшаги думсиз бола түгса ҳам, лойга ботиб қолса қаеридан ушлаб тортаман, деб тажанг бўлиб, ухламай чиқадиган кишисиз!

— Ха-ха-ха-ха-а-а-а! Бопладинг! Менинг жазоимни фақат сен берасан! Омон бўл! Яна! Марҳаматой энди ҳаддингиздан ошманг. Кўзойнагим қани? Топиб бер!

¹ Ваҳдатул мавжуд — пантеизм. Фалсафий оқим.

Қоражоннинг кўринмас одамга ўхшаб қурилишда юрганини сезишарди. Уни баъзан тўғон устида, баъзан пастдаги ГЭС қурилишида, автобазада ва баъзан қурувчилар шаҳарчасида кўрган одамлар бор. Енқўргонга кетиб қолди, деб юрган Ҳазратов хато қилди. У Чорвоқда «БелАЗ» ҳайдаб чарчагач, тўғоннинг ўнг томонидаги Қўнғирбуқа чўққисига чиқиб соатларча ўтирас; бу ўша, «йўлбарс важоҳатли» кимса эканини рақиби кейинги кунларда узоқдан бемалол кўрарди. Ҳамма ишни ўз ҳолига ташлаб қўйиб, қизишмай иш олиб борадиган, тиниб-тинчимас одамларни ёмон кўрадиган Қиёмхўжа Ҳазратов Мингбоевни бунда ўралашиб юрганидан жуда нотинч эди. У бир-икки бор Шишкинга мурожаат этиб: «Мингбоев ариза-париза бердими?» — деб сўради. Шишкин йўқ ишорасини қилди. «У ариза кўтариб юрадиган одам эмас, у бутун одам. Лозим бўлса шартта гапиради ёки райкомга бориб айтади. Айб ўзида эканлиги учун индамай юрибди...» — деди. «Қурилишда изғиб юрган эмиш?» — деди анча сиполик билан Ҳазратов. «Нима қилсин, бу ерни яхши кўради. Дўстлари кўп... Ишлагиси келади. Шу сабабли айланиб юрган бўлса керак...» — деди у. Ҳазратов миқ этмади. «Бу ерга уни йўлатиш керак эмас!» — деган гапни айттолмади. Лекин кунлардан бир кун Қоражон қурилиш Бошқармасига кириб, Файзулла Аҳмедовичга йўлиқди, у ўрнидан туриб, гангуб, ўз ерида «хор бўлиб юрган» одамга ҳурмат кўрсатди. Уни диванга таклиф этиб, ўзи ҳам унинг ёнига бориб ўтирди.Faқат Амир Равнақ келгандагина ошнасига шундай илтифот кўрсатарди. Стол устидаги чойнакдан пиёлага чой қўйиб, Қоражонга узатди. Бу илтифот илгари уйда ётган кекса инженерни турғазиб, ҳаёт қайнайётган жойга олиб келиб, савоб иш қилгани учун миннатдорчилик изҳори эмас, балки Файзулла Аҳмедович ўзи мажруҳ, хунук юз бу одамнинг юрагида олижаноблик туйғулари тўлиб-тошиб ётган ва умуман, бу одам бутун одам эканлиги учун ҳам беихтиёр ҳурмат қиларди. Унинг ишдан четлатилишини бир англашилмовчилик деб биларди, холос. Дил дилга ойна, Қоражон Мингбоев бу туйғуни ҳис этгани учун ҳам ҳеч кимга мурожаат этмай, бир ойлардан сўнг Музаффаров ёнига кирди. Бир муддат-

лик ҳол-аҳвол сўрашдан ва умумий гаплардан сўнг Қоражон мақсадга ўтди:

— Нима қилиш керак? Қандай маслаҳат берасиз?

— Бўш юрмай, ишлаш керак. Бу вақтинчалик танбеҳга ўхшайди.

— Қаерда?

— Сизга қаер айтилган эди?

— Уй-жой қурилиш бошқармасида,— деди Қоражон. Бир нафаслик сукутдан сўнг, яна қўшиб қўйиди:— Мен, парторг билан гаплашдим. Тўғондан кетмайман. Менга «БелАЗ»да ишлашга рухсат берилсин, деб сўрадим. Оддий шофёр бўлиб... Шишкин рози бўлди. Ишлайвер, мен гараж бошлиғига Садовников номидан айтиб қўяман, деди. Нима дейсиз?

— Ишнинг катта-кичиги бўлмайди, ука. Ишлаб туриш керак!

— Ҳазратовнинг мени кўргани кўзи йўқ. У мени бу ерда юришимни ҳеч истамаётибди.

— Бу ер Ҳазратовнинг катта холасининг уйи эмас. Бу ер ҳалқ қурилиши!

— Мени бир зааркунанда одамга ўхшатиб, тўғонда ишлаётганларни менга нисбатан ҳушёр туриши тайинлабди. Наҳотки, мен душман бўлсан?

— Сиз душман эмассиз. Асабингиз чарчаган. Шу сабабли ҳар бир гапдан нотўғри холоса чиқаряпсиз. Унинг димоғдорликларига, лўттибозликларига тупуриш керак!

Қоражон Мингбоев қўлидаги пиёлани Файзулла Аҳмедовичга узатди. Қисқагина сұҳбатдан кейин у хайр-хўлашиб, ташқарига чиқиб кетди.

ТҮРТИНЧИ ҚИСМ

XXIII боб

ПОЛ ОСТИДАН ТОПИЛГАН ОДАМ СКЕЛЕТИ ЁКИ ОЗГИНА
ОЛДИ-ҚОЧДИ САРГУЗАШТ ГАП...

Ўша куни Хайрушканинг башарасига тарсаки тортиб юборган Гулгун дарғазаб, устидаги атлас кўйлагини ечиб полга отди. Сочлари тўзиб, йифидан қовоқлари шишиб кетди. Ўзининг кийимларини кийиб, эшикдан чиқиб кетаётганида меҳмондан қайтиб келиб қолган Марҳаматхон унинг йўлини тўсиб, маҳкам қучоқлади.

— Тўхтанг, қизим! Сиздан ўтиниб сўрайман, тўхтанг! — у ялиниб-ёлвориб Гулгуннинг қўлидан ушлади. Машинадан югуриб тушган Таманно билан Тасанно ҳам Гулгуннинг йўлини тўсишди. Фақат Хайрушка рулда щумшайиб ўтиради.— Ичкарига кирайлик, илтимос қиласман! Ичкарига кирайлик!

— Йўқ, кирмайман!

— Жон қизим, ўтиниб сўрайман. Вой, мен ўлай, мени қора босмаса, меҳмонга кетаманми! — Марҳаматхон ўзининг юзларини тимдалаб, оҳ ура бошлади. У Гулгуннинг тўзиб кетган соchlари, дарғазаб важоҳатидан ҳозироқ бир кори ҳол бўлишини сезиб, ранги ўчиб кетди. Хайрушканинг, «сал тегишуздим...» дегани юрагини шифиллатди.— Вой, мен ўли-и-й! Агар ичкарига кирмасангиз, ҳозир юрагим приступ бўлиб, ўзимни ерга ташлайман! Ёмон бўлиб кетяпман. Вой, вой... Хайрулла тегишмай ўлсин! Сен жувонмарглардан биронтанг уйда қолсаларинг бўлмасмиди?!

Марҳаматхон икки қизи билан Гулгунни қўярда-қўймай, ялиниб-ёлвориб қайтадан уйга олиб кирди. Марҳаматхон хонасида хун бўлиб йиглаётган Гулгун шу ўтирганча тонг ортириди. Тонг отгунча Марҳаматхон унга насиҳат қилиб чиқди. Бир шўришни бошламагин, жон қизим, деб ялиниб йиглади. Шундан сўнг ўғлини ҳам хотинсиз бебош бўлиб юргани, тоза куйдираётганини эслаб, йиги аралаш қаргади. Музafferовлар хонадони мотамсароликка айланиб

кетди. Бундоқ шилқимлик ёмон оқибатларга олиб келишини она ҳам, сингиллар ҳам, Хайрушканинг ўзи ҳам фаҳмлаб, миқ этмай тонг оттиришди. Босқинчилик — оғир жиноят, у суд қилинади! Марҳаматхоннинг вижир-вижир гапини эшитавериб, Гулгуннинг кўзи ти-ниб кетди. Онанинг шу аҳволга тушиб, талвасада ҳар хил гаплар гапириб ташлаётгани, дам валокардин гомизиб ичиб, дам валидол шимаётганини кўриб, боши қотди.

Тонг отиши билан Гулгун ҳамма дафтар-китобларини, ўзига тааллуқли нарсаларни йигиштириб, чамадонини кўтариб, бу хонадондан чиқиб кетди. У ялинисб-ёлвориб оёғига ёпишган Марҳаматхонга ҳам, қизларга ҳам қарамади. Улар дарвоза олдида ҳайрон бўлиб қолишиди. Бир муддатдан сўнг ичкарига қайтиб кирган Марҳаматхон ҳовли ўртасида гангиг турган ўғли Хайрушкага жирканч бир назар билан қаради. Хайрушка тўнғиллади:

— Тегишган эдим, менга тегсин, девдим...
— Э, башаранг қурсин сени! Сен одам бўлмадинг, ҳайвон бўлдинг!

Хайрушка бошини эгиб, индамай турарди.
— Орқасидан машинада югуриб борайми?
— Қаёққа борасан! Агар борсанг, сени милицияга ушлаб беради. Сен бебош бола мени адо қилдинг,— у пиқиллаб йиглади,— ўзини трамвай тагига ташласа нима қиласми? Бориб, Бўрижарга ташлаб юборса-я! Ёки прокурорга бориб арз қилсачи?

Хайрушка ҳам, қизлар ҳам миқ этишмади. Онага шайтон васваса соларди. Унинг кўзлари ола-кула бўлиб, ерга йиқилди: «Вой, мен қора боскур, энди Санобархонга нима деб жавоб қиласман?.. Унинг дадаси олдида юзимиз қора бўлди, даданг билан унинг дадаси ўртасига низо солиб қўйдинг... Энди нима қиласми...»

Ерга йиқилган онани Хайрушка билан икки қиз елкаларидан суяб кўтариб, уйга олиб киришди.

Шу куни Гулгун Ўрдагача трамвайдага келиб, тўппа-тўғри Қашқар маҳалласи томон бурилди. Тор кўчалардан бирига кириб, кўримсизгина эшикни тақиллатди. Бу хонада унинг ҳамқишлоқ дугонаси Назми (эркалаб уни «Пучук» дейишарди) квартирада турарди. Югуриб чиқиб эшик очган пучук қиз рўпрасида оқариб, соchlари тўзиган Гулгунни кўриб, донг қотиб қолди.

— Сенга нима бўлди? Ичкарига кир,— улар торгина ҳовлини кесиб ўтиб, бир хонага киришиди. Бунда Пучуқ қизининг ўзи ёлғиз турарди. Гулгун қўлидан тўр халтадаги китобу буюмларини олган Пучуқ дарҳол дугонасини табуреткага ўтқазди,— нима бўлди, нима гап?

— Ўғли...— деди гапиролмай ўпкаси тўлиб Гулгун.

— Эй, ярамас, номард!— деди Пучуқ Хайрушканни лаънатлаб,— бир-икки келганимда мени кўриб, менга ҳам шилқимлик қилган эди. Номардлик йўлига ўтибди-да!

Бир муддатдан кейин Гулгун бошини деворга тиради. Қоражоннинг кўнглига бир гап келади, деб юраги шигиллаб кетди. Агар эри шубҳаланса ўзини ўзи бир нима қилишини айтди... Бу шармандалика ҳеч чидаб туролмайман, деди.

— Нодон бўлма!— деди Пучуқ дугонасига. Ҳозироқ ваннага кириб, чўмилиб, ўзини тартибга солиб олишни сўради. Ўзи шоша-пиша плитага чой қўйди. Ҳамқишлоқ дугонасига чой ичирди. Кейин сув иситиб, уни қўярда-қўймай обдан совунлаб, яхшилаб чўмилтириди... Тун бўйи ухламай чиққанидан қовоқлари шишиб кетган Гулгунни ётқизиб ухлатди. Шу бугун дугонаси бахтига унинг ишга бормайдиган куни бўлганлиги сабабли, тепасидан қўзгалмай ўтириди. Пучуқ ҳам институтга киргани Тошкентга келиб, киролмаган эди. Йиқилди, унинг биронта суянчиғи бўлмади. Чорвоқлик бетончи ишчининг қизи, «ўтолмадим», деб қишлоққа қайтиб боришга юзи чидамай, Текстилькомбинатда ишчи бўлиб ишларди. Ҳозир, комибнатдан квартира олгунига қадар бир қариндошлариникида яшаб турарди.

Аразлаб, Музаффаровларникидан чиқиб кетган Гулгуннинг бир кундаёқ ранги сўлди. У холи қолган чоғларида узоқ хаёлга чўмар, одамлар олдида бу сўлғинликни билдирамай, у ёқ-бу ёққа қарагандай, гапларга ҳам аралашиб, бирон нима дегандай бўларди. Унинг қовоқлари синиқиб, ранги кетди. Юзи ҳам бир бурда бўлиб қолди.

Шу куни кечга яқин уддабурон Назми дугонасини кийинтириб, почтамтга олиб борди. Узининг турар жойи ўзгарганини хат орқали ота-онасига маълум ҳилмоқчи бўлган Гулгуннинг фикрига қарши чиқди.

— Хат икки кунда боради. Бу мумкин эмас,—

деди Пучуқ,— сени қидир-қидир бошланиб кетади. Извалид дадангнинг шунча чеккан азоблари етмайдими!.. Телефон қиласми!

«Шунча чеккан азоблари етмайдими...»— деган гап Гулгуннинг боши атрофида аридек ғувиллаб учиб юрган даҳшатли хаёлларни бир оз орқага сурди. Улар икков почтамтга бориб, қишлоқ Советига телефон заказ қилишди. Қишлоқ Советининг ранси Пучуқнинг тогаси. Орадан бирон ўн минутларча вақт ўтмай Пучуқ билан Гулгун кабинага киришди. Пучуқ тогаси билан салом-алиқдан кейин, ҳозироқ Милтиқбой ака Қўйбоқаровларнига кириб, қизлари Гулгун ўзининг ёнига келганини, Музаффаровлар билан «сал айтишиб қолиб», аразлаганини тушунтириди. Тогасига ўз адресини яхшилаб ёздирди. «Нима бўлди? Нима деб айтай? Бир ерга боргандан кейин камтар бўлиб туриш керак-да»,— деди тогаси тўнғиллаб. «Музаффаровнинг мешчанка қизлари билан чиқишмай қолибди. Мингбоевга ҳам айтиб қўйишин. Шундоқ деб айтинг, тогажон!»— деди бижиллаб Пучуқ.

Лекин барибир эртасига, куннинг ўрталарига бсрб, янги адресга извалид Милтиқбой ака билан Санобархон ўпкасини қўлтиқлаб кириб келишди. Пучуқ эрта билан комбинатга кетган эди. Калаванинг учини йўқотган, кайфи бузуқ Гулгуннинг хаёлига ўқиш ҳам келмай, дугонасини ишонтириб, алдаб ишга жўнатган бўлса ҳам бари-бир ёлғиз ўзи хаёлот дарёсида фарқ ўтиради. Тўсатдан ота-онанинг кириб келгани уни ўзига келтириди. Ота-она ранги сўлган қизларига тикилишди. Уларга Гулгун Музаффаровнинг «мешчанка қизлари билан чиқишмай қолгани»-дан бўлак ҳеч гап айтмади. Бир муддат бу уйда туриб, кейин ётоқхонага ўтиб, ўқишини давом эттиришини таъкидлади. Лекин шу куни ёқ Милтиқбой ака қизини машинага солиб, Сижжакка олиб кетди.

* * *

Тошкентдаги зилзиладан кейин, айниқса эски Қашқар маҳалласидаги ичкари кўчаларда қулаб тушган пастқам иморатлар анча-мунча топиларди. Бу ерда яшайдиганларнинг деярли ҳаммаси янги биноларга кўчиб ўтишгач, Бош план бўйича ер текисланиб, кўп қаватли бинолар учун майдон ҳозирланар-

ди. Бир неча бульдозерлар кечаю кўндуз тинмай гуриллаб, янги тушажак биноларга майдон очиб, котлован қазиётган пайтда қандайдир бир уй остидан, тупроқ уюмлари орасидан одам суюклари чиқиб қолди. Бульдозерчи дарҳол моторни ўчириб, милицияга хабар қилди. Бундан бир ҳафтача бурун ҳам шу атрофдан сопол идишда кумуш ва мис тангачалар топилган эди. Ҳовлиқиб келган жингалак сочли, паст бўйли, ёшгина йигитча хумчани олиб кетиб акт тузган эди. Музей қабул қилиб олган бу топилдиқларнинг тарихий жиҳатдан аҳамияти борлиги учун доимо ҳуркович отдек қулогини динг тутиб, чақчайиб турадиган милиция ходимига ҳам, бульдозерчига ҳам ташаккур айтилди. Шу ҳафта ичи қандайдир бир ҳовлиниңг тсқилари устидан эски китоб чиқди. Бу китобнинг ҳам аҳамияти бордек кўриниб, Шарқ қўл ёзмалари институтига топширилди. Ернинг юзагина қисмидан, тахта-пол тагидан инсон скелети, бош суяги, қовурғалар... чиқиб қолиши доимо иши юришиб, ташаккур олаётган йигитчани шошириб қўйди. У бўлак-бўлак бўлиб сочилиб ётган инсон суяги — бош чаноги, қовурға ва қўл суюкларини турган жойида дарҳол фотосуратга олди. Бу иш бир неча соат давом этди. Текширилаётган жойга чет кишилар киритилмади. Шундан сўнг, кечга яқин қўлқоп таққан формасиз ва милиция формаси кийган кишилар суюкларни йиғишириб олиб кетишиди. Инсон суяги топилган ҳовли атрофига ҳеч кимса қўйилмаганига қарамай, барибир одамлар буни кўришди. Зилзила сабабли уйи бузилиб, бу ердан кўчиб кетган одамнинг поли тагидан инсон скелети чиқиби, деган гап оғиздан оғизга кўча бошлади. Дарҳақиқат, юзагина тупроқ уюмлари орасидан инсон боши чаноқлари, қовурғалар, оёқ суюклари чиқиши милиция бўлимидағи ёш ходимни «чуқур ўйлатиб» қўйди.

Шу кундан бошлаб бу ҳовлиниңг эгаси, ҳамда инсон суяги топилган хонада турувчи кишилар изланди. Шу собиқ маҳалланинг комитет раиси орқали эгаси — кексагина бир хотин сўроқ қилингандан сўнг жингалак сочли йигитча Музаффаровлар ҳовлиси томон югуриб кетди.

Дув-дув гапнинг ҳақиқатдан узоқ эканлигини кишилар пайқаса ҳам, лекин барибир Қашқар маҳалладаги хона поли остидан инсон суяги топилиши кишиларни ўйлатиб қўйган эди.

Текширув ишлари жуда тез кетди. Милиция тили билан айтганда, бу жиноятнинг изи ўчмаслиги ҳамда бу ҳақда гап оғиздан оғизга ўтиб кетганлиги туфайли жиноятчи қочиб кетмаслигини кўзда тутиб, қидирув ишлари яшин тезлигига бошланди. Бу ишда арқонни узун ташлаб қўйиш методи қўл келмаслигини маъқул кўришди. Иккиламчи, жиноятчи мурдани ўрага ташладим, хаёл қилган, уйлар йиқилиб, бульдозерлар текислаганида анча чуқурликда ётган мурда яна ҳам кўмилиб, устига янги бинолар ёки асфальт йўллар тушса абадул-абад изи очилмаслиги мумкин эди ва буни жиноятчи билиб, бамайлихотир юрган бўлиши эҳтимолдан холи эмас... Мана шу томонларни ҳисобга олиб, жингалак сочли йигитча тез «ҳаракатга киришди».

Инсон суюги топилганининг учинчи куни Сижжак қишлоғида, онаси бағрида уч-тўрт кун турмоқчи бўлиб, бамайлихотир эркаланиб ўтирган гўзал Гулгун Қўйбоқаровани милиция ходимлари машинага солиб, шаҳарга олиб боришмоқчи бўлишди. Унинг қишлоққа келганини ҳали Қоражон билмасди. Эси чиқиб, капалаги учиб кетган қизнинг ранги девор бўлиб ўчди. Уйда ухлаб ётган Милтиқбой ака қўлтиқтаёғини тўқиллатиб ташқарига чиқди, қизини олиб кетаётган милиция ходимларини қайтарди.

- Нима гап? Нега?
- Сўрайдиган гап бор,— деди жингалак сочли ёш милиция ходими,— ўша ерда гаплашамиз.
- Бир нима қилибмидинг?— Милтиқбой ака қизига мурожаат этди.
- Йўқ.
- Ўйлаб кўр.
- Ҳеч нарса қилганим йўқ,— деди титраб Гулгун.
- Менинг қизимни қамай олмайсизлар!— деди Милтиқбой ака ғазабланиб,— унинг гуноҳи йўқ! Мен қон кечиб келиб, бу болаларни катта қилганман. Менинг хонадонимдан жиноятчи чиқмайди! Мен уни сизларга бермайман!— дея дарҳол қозиқдаги қўш оғизлик ов милтифини қўлга олди.
- Енгилтаклик қилманг!— деди милиция ходими,— биз қизингизни қамамоқчи эмасмиз. Бир гапни сўраб, аниқлаб олмоқчимиз, тушундингизми! Юринг, сиз ҳам хоҳласангиз бирга боринг.
- Бораман! Албатта, бораман!

— Сизнинг фронтчи эканингизни биламиз. Жула ҳурматли одамсиз. Қаҳрамонликларингизни ҳам биламиз. Лекин қўлингизга миљтиқ олиш ярамайди! Биз ҳам бир ишни текшириш учун көлдик. Сиз қонунини яхши биласиз.

— Ўзингизнинг фарзандингизни мен машинага босиб олиб кетмоқчи бўлсанм, нима қиласардингиз? Ёнингиздаги тўппончага қўл юргутирасизми, йўқми?! Сиз бирорвни жазолаётганингизда ўзингизга ҳам бир қаранг, йигитча! Ҳовлиқманг! Халқа жабр етказиш ҳар қандай жиноятдан ҳам ёмон! Ҳа-а!

Миљтиқбой ака машинада Гулгун билан ёнма-ён ўтириб, милиция ходимлари билан бирга шаҳарга тушиб кетди. Гулгун ҳам, Миљтиқбой ака ҳам, Сижжак участкаси милиция ходими ҳам жуда ҳайрон эдилар. Шаҳардан машинада чиққан милиция ходими — жингалак сочли сариқ йигит бу ишдан хабардор бўлса ҳам бир оғиз сўз айтмади. У ҳар замон-ҳар замонда Гулгунга қараб қўяр, наҳотки, шу нозик, чиройли қиз одам ўлдирса? Наҳотки, у мурдани яшириб, хона поли тагига ташласа! У ўзига-ўзи, баъзан оғир жиноят қилган шахслар қўй оғзидан чўп олмаган, хокисор бўлиб кўринади, кейин сир очилиб, фош бўлгач, йиртқичга айланаб кетадилар, деди.

Машина то Тошкентга етиб боргунича жингалак сочли йигитча миқ этмай, йўлда бир кори ҳол бўлмасин, деб сергак, қулоғи динг келди. Миљтиқбой ака бўлса, бу қандай кўргилик бўлди, деб, агарда қизини олиб қоладиган бўлсалар, ўша ерда йиқилиб қолишини, бу аламга бардош беролмаслигини ўйларди.

* * *

Қуёш ҳамма ерга бир хил нур сочгани билан бир ерда гул, бир ерда шўрхоку сассиқ алаф битади. Ҳар ернинг ўз чамани, гулзорию ташландиқ култепаси бор. Магзава тўклиладиган ерлардан гул унмайди. Гулгун ҳовлидан чиқиб кетган кундан бошлаб Обакиҳон илгари тарқатган гаплари тасдиқланганлиги, Музafferовнинг ўғли ёмон иш қилгани ҳақида маҳаллага жар солган эди. Шу куни ёки бу воқеани бутун маҳалла билди. Баъзи қўёни-қўшнилар ҳовлиқиб «нима гап?» дегандай Файзулла Аҳмедович ҳовлисига киришди. Аввал нима дейишини билмай, саросимада кўча эшик билан уйга зир югуриб, қўрқиб кетгани-

дан дамо-дам ёғлоги билан сув ичиб юрган Марҳаматхон бир зумдан сўнг кўзи қоронгилашиб, уйга кириб йиқилди. Таманно билан Хайрушка нима қилишини билмай, онаси тепасида туришарди. Бир қўшни кампир хотинларга:

— Бу nimаси! Боринглар, уйларингга киринглар. Бирорвинг ярасини тимдалаш яхши эмас! — деб дўқ урган эди.

— Ҳой, кампир! — деган ўшанда кўзларини олакула қилиб Обакихон,— сен уйингга кириб ўтиравер! «Шўро ҳукумати учун қон кечганлар» ҳам қамаларкан-ку! Бизни ҳам бошимизга қора кун тушганда, мана шу йигитча устимииздан кулган!

— Худодан қўрқмайсизми, Кимсанхон? — кампир яна гапирди.

— Йўқ, қўрқмайман! Буларнинг ҳам уйига ўт тушаркан-ку! — у Музофаровлар эшиги томон томоқ қириб тупурди.

Обакихон атрофидаги уч-тўрт хотин аввалига, нима гап, деб тушунмай томошаталаб бўлиб турнишган эди. Обакихоннинг очиқдан-очиқ хусумати борлиги, қўшнисини ҳақорат қилиб, тұхмат ёғдираётганини пайқашгач, секин-аста уйларига кириб кетишиди. Кўчада унинг ёлғиз ўзи қолди. Эшикдан бошини чиқариб турган кампир ҳам эшигини ёпиб, уйига кириб кетди.

Кўчада бўлаётган бу гапларнинг барини уйда чўзилиб ётган Марҳаматхон эшитиб туради. «Кутимаган балс, оёқ остида ётган фалокат,— дерди ўзига ўзи Марҳаматхон,— ўғил ўстирмай мен ўлай!»

* * *

Шу куни тушга яқин улар шаҳарга етиб келдилар. Район милицияси идорасига киришиб, Гулгун Қўйбоқаровадан, дарҳақиқат, Қашқар маҳалласида ижарага квартирада турганмидингиз, деб сўради.

— Ҳа,— деди Гулгун ҳайратомуз.

— Қаерда ўқийсиз?

— Тошкент медицина институтида.

— Мана бу суюклар — инсон суюги. Булар сиз яшаган хона поли остидаги ўрадан топилди...

— Ўрага тушиб кетибдими? Ўра йўқ эди-ку? — деди Гулгун қўл суюгини олиб, у ёқ-бу ёғини қараб,— яна бир чаноқ ҳам бор эди.

— Бор гапни аниқ, тўғри айтиб беринг! Булар инсон суюгими?

— Ҳа.

— Воқеа ҳандай бўлган?

— Мен бу суюкларни институтдан олиб келиб, анатомия бўйича дарс тайёрлардим. Улар токчада турарди. Шу орада бир ҳафтача квартирада бўлмадим. Дудгонамнида турдим,— Гулгун кабинетда ўтирган отасига қайрилиб қараб, Музаффаровларнида турганини маълум қилди,— йигирма олтинчидағи зилзила ва умуман шундан кейин мен бу ҳовлига келмай қўйдим. Квартира ҳақини олдиндан тўлаб қўйганлар гим сабабли, шундай келиб бир уй эгаси билан хайрлашдиму бу вайронага бошقا келмадим. Бош чаноқ ва қўлларни институтга олиб бориб топширишим керак эди. Бу ишни ҳам қилолмадим.

Милиция терговчиси телефон трубкасини кўтариб шу масала юзасидан ким биландир гаплашди. У ҳайрон бўлиб қолди: «Ҳа, бериб юбориш керак. Экспертизадагилар ҳам кулишди. Пастки жағ билан юқори жағни бирлаштирган мис симни ҳам кўрмабсиз. Бу воқеа — анекдот! Эҳтимол, жаноблари бу симни мурданинг тилла тиши деб ўйлагандирлар. Ха-ха-ха... Ҳафа бўлманг, Пармоноп, сиз кўп жиноятларни фош этгансиз, аммо мана бу иккинчи муваффақиятсизлигингиз. Баъзан шунақаси ҳам бўлади. Қиз бола қўрқаний йўқми?»

— Йўқ, дадалари ҳам шу ерда,— деди жингалан сочли йигитча.

— Бош чаноқ ва бошقا ҳамма суюкларни ўша студент қизга бериб юборинг, институтга топшириб қўйсин,— деди яна у одам.

— Ҳўп бўлади,— деди йигит трубканни қўйиб бўшишиб. Кейин Гулгунга қаради,— буни қаранг-а, сизларни безовта қилдим. Кечирим сўрайман. Инсоннинг суюги бўлгандан кейин мен қидирув бошладим. Мана буларни олиб бориб институтга топширас экансиз. Мен янглишдим. Яна бир карра кечирим сўрайман.— У суюкларни қоғозга ўраб Гулгунга тутқазди.

— Шунақа экан, акаси, бизларни шунча ердан ҳовлиқтириб олиб келиш яхшими!— тулақди Милтиқбой ака,— ҳозир бунинг онаси иккита туғиб ўтирибди!

— Кичерегиз, дедим-ку! Кичерегиз.

— Сен, йигитча, милицияга шу йил хизматга келганимисан?

— Ҳа. Одамнинг скелети чиққандан кейин суриштирабиз-да!

Кекса бир милиция капитани йигитчанинг ёшликт, шошмашошарлик қылганини айтиб, Милтиқбой ака ва Гулгундан уэр сұради.

— Суриштірмай кет-е! Мен бир фронтовой кишиман. Милицияга ҳурматим ниҳоятда катта бўлмаса сени ҳозир роса дўппослардим. Қизиқ бола экансанку! — деди Милтиқбой ака қизини етаклаб ташқарига чиқиб. Кетидан чиққан бояги жингалак соч йигитча машина олиб бориб қўйишини айтган эди, Милтиқбой ака унамади. Чунки у машина яна қишлоққа кириб борса, оғзига кучи етмаганлар учун гап топилади, деб шу лаҳза кўчага чиқиб бир ошнасига телефон қоқди. Орадан йигирма минутча вақт ўтгач, Гулгун билан Милтиқбой ака турган гастроном ёнига машина етиб келди. Улар яна шитоб билан Чорвоқ томон жўнашди. Ўйга етиб келган Милтиқбой ака тиззасига уриб кулади.

* * *

Ҳурматли китобхон! Бу бобда айтилган гаплар бўлган воқеа. Бу англашилмовчиликни ёзишдан мақсад --- чуқур ўйламай, ҳовлиқиши одамларни қийнаб қўяди, норозилик тугдериши мумкин, деган гапни айтмоқчи-ман. Баъзан расмият тўсиқларини бузиб, камтару меҳрибонлик билан одамлар кўнглига йўл топиш жаҳолат ва туҳмат илонларининг бош кўтаришига йўл қўймайди. Улуғ ўзгариш жараёнида яхшилик ва илгор фикрлар мустаҳкамлиги синовдан ўтади, гайри инсоний одатлар, туҳматчилар ўлаётган илондек, минг буралиб, тўғри келган кишини чақади. Баъзан эса у то боши мажақлангунича қиласиган ишини қилиб қўяди.

Энди икки оғиз сўзни Музаффаровлар хонадонидан ёшитинг.

XXXIV боб

ИНФАРКТ

Хайрушканинг растрата қилиб қамалиб қолгани фақат Марҳаматхону Файзулла Аҳмедовични эмас, бутун оилани ларзага солиб, юзини ерга қаратди. Ма-

газинда бўлган ревизия Хайрулла Мўзаффаровнинг жуда кўп пулни ўзлаштириб юборганини, ҳисоб-китоб ишлари издан чиқиб кетганини очиб ташлади. Лекин дастлабки кунлари «Оёқ остида ётган бу фалокат», «Кўргилик ўтиб кетар, ким шундоқ бўлсин депти...» деган гапни тарқатишиди. Жуда ҳам бошини кўтаролмай қолган Файзулла Аҳмедович одамлар юзига қарай олмай, бу «кутилмаган фалокат»ни тезда тўғриланнишини ўйларди. Музafferovlar хонадони алам дудига ўралди. Улар ич-ичдан куйишарди; қирқ йиллик партия аъзоси, номдор бир одамнинг оиласидан шундоқ ярамас кимса чиқиши уни гангитиб қўйди. Баъзилар: «Аталага ҳам тиш синадими, ахир, ўзлаштирилган пулни тўланса, қамамай қўйиб юбориш керак эди-да! Таңбеҳ бериб, штраф солиб уялтириш керак эди-да!» — деса, баъзилар Хайрушкани ёқалашиб милицияга тушди деди. «Қадим биз ёқалашиб, кўйлакларимиз йиртилиб, қонга беланиб келардик, бунинг учун суд қилиб, қамоққа ҳукм этмас эдилар-ку?! Тавба! Агар бир шапалоқ учун ҳам қамайдиган бўлсалар, энди кўчада юриб бўлмас экан-да!» Музafferov Марҳаматхон билан маслаҳатлашиб, ўғлини қутқариш хақида ошналарига мурожаат этажаги, шаҳар судининг раиси ўзининг талабаси бўлгани, министр ҳам таниш, бир оғиз илтимос билан ўғлини чиқариб юборишиларини айтиб, хотинига тасалли берди. Файзулла Аҳмедович, сабр қилиш керак, дегани билан ўзининг ичи ёнарди. Бу шармандалика ҳеч чидамасди. Гал шаҳарга тарқалиб кетган. Шунча гапиргани билан аслида у ҳеч кимга мурожаат этмади. Ўғлининг магазинда анча-мунча пул ўзлаштиргани исботланиб, буни ўзи ҳам бўйнига олиб, актга қўл қўйган. Терговда ҳам бўйнига олган. Демак, ҳамма масъул кишилар, мансабдорлар жиноят қилган ўз болаларини қутқариб олаверсалар, унда жамоат нима дейди? Қамоқ мансабсиз кишиларнинг болалари учунми? Қонун ҳамма учун баробар эмасми?! Ўғлининг қамалиб қолганини эшитиб, ўзингизга у ёқ-бу ёққа қатнаш ноқулай бўлса, мен бу ишни қиласман, деган фирибгар бир танишини ҳам уйга киритмади — менинг ички ишимга аралашманг, деди у чумчуқдек ликиллаб турган шахсга. Жамоат ичida ўзини тута олмай, пул ўзлаштирган экан, бундай нобакор ўғил жазосини тортсан, деди. Лекин рўпарасида турган у лўттибоз кимса: «Сиз бундай содиқ бўламан дейсиз, ўглингиз турмада ёмон одамлар

ичида баттар бузилиб кетади... У ерда одам ўлдирғанлар ҳам бор...»— деди. «Барибир сиз аралашмайсиз!»— деди Музаффаров беихтиёр жеркиб, бақириб, асабий бир ҳолда. Таниш кимса чиқиб кетгач, Марҳаматхонга қараб: «Ўғлимиз жиноят қилиб қамоқда ўтирган бўлса ҳам барибир у мана шу ярамасдан юз чандон пок!»— деди аъзойи бадани титраб. «Адаси, баъзан шунақалардан ҳам фойдаланиш керак,— дегандек қилди Марҳаматхон эрининг фикрига қўшилмай,— бирор сизга ёрдам бераман деб келса-ю, сиз уні сўкиб ҳайдасангиз! Сизнинг обрўйингизга қарапидилар! Шунча йиллик хизматларингизга ҳам қарашибди-ку! Танбеҳ бериб чиқариб юборади, деган эдингиз, чиқаришмади-ку? Прокурор ўз шогирдим, яхши йигит, текшириб, чиқариб юборади, деган эдингиз-ку? Қани, уч-тўрт кун ётсин, қамоқ деган нарсани ҳам кўрсин, бу пўконидан ел ўтмаганларнинг ақли киради, деган эдингиз! Улар ўғлимизни чинакамига қамаб юборишид! Аввал яхши гапириб, ўғлининг ҳамма гапларини ёзиб олиб, тафтиш ҳужжатларига қўйл қўйдидириб олишибди! Агар яқин кишингиз бўлганида, сизни кекса коммунист деб ҳурмат қилишганида шунақа бўлариди?!» «Тилингни ти-и-й!»— деб бақириб юборди Файзулла Аҳмедович. Бир зумдан сўнг у индамай ўтириб қолди. Бўйни, чакка томирлари бўртиб, бир лаҳзадан сўнг ранги оқариб кетди. Эҳтимол, бу иш унинг рақиблари томонидан пухта ўйланиб қилинган фитнадир. Ўғлининг ҳеч қачон кўчада бирорни калтаклаб келганини, пул ўзлаштирганини эшитган эмас эди. Хайрушкани баъзи уруғлари: «Ҳақиқатан ҳам қиздек йигит»,— дейишарди. Умрида бирорни ҳақорат қилмаган, ёқалашиб, бурнини қонатмаган бу бола қилиқ чиқариб, қамалиб ўтириши жуда таажжуб! Машалладаги баъзи «газанданамо» кимсалар бу «ҳалим» — Хайрушкани қамалганига кулишди.

Музаффаров уч кунгача хотини билан гаплашмади. «Ёғ ютганда ёт яхши, қон ютганда қариндош...» керак бўлар экан. Озиб, бир ҳолатда бўлиб қолган Марҳаматхон атрофидаги «эр омад, шер омад»лари ғойиб бўлиб, сўққайиб ёлғиз ўзи қолди. Таманно, Тасаннолар оначалик куйишмас, фақат унга тасалли беришарди, холос. Бир камбағал одамга тегиб кетган опаси келиб, шу оғир кунларида ёнида ўтириди. Бу хотинни унча ҳурмат қилишмас, тўй-ҳашамларда у бечора ошхонадан чиқмас эди. Шу опаси Марҳаматхоннинг ку-

нига яради. Камситилиб келган бу хотин, адъюкатлар бюросига бориб, бир адвокатни ҳам ёллаб келди. Бунақа ерларга Файзулла Аҳмедович ҳам, катта ўғли ҳам боришни эп кўришмаган эди.

Ўғлининг қамалиши Музаффаров кўксига ханжар бўлиб урилди. Қаттиқ танбеҳ ва пўписа билан ўғлимни бўшатиб юборишади, деб юрган Музаффаров янглишиди. Унинг ўғлини суд қилиб, уч йилга кесиб юборишади. Хайрушканинг жингалак соchlари олиниб, узоқ бир лагерга юборилди. Файзулла Аҳмедович ёдига бундан бир неча ой илгари Марҳаматхон билан бирга бориб кўришгани «Флория Тоска» операси тушди. Унда император офицери қамоқдаги инқилобчи йигитнинг синглисига: «Мени хурсанд этсанг, акангни ўлим жазосидан олиб қоламан», — деб ваъда этади. Мақсадига етгач, қизга ҳам қарамайди, акасини ҳам отиб юборишади... Бу опера мазмуни Музаффаровни жуда ўйлантириб қўйган эди. Эҳтимол, ҳаёт доим шундайдир, унинг баъзи одамларга суюниб иш тутиши, ҳаммадан фақат яхшилик кутиши рўёдек чалкаш нарсадир!

Ҳар қандай қоронги кунлар ортидан ёруғ кунлар албатта келади. Ўғли бошига тушган иш ташвиши билан Музаффаров жуда эзилиб кетди. Марҳаматхон милиция, прокуратура, суд органларига югурди — бормасликнинг ҳеч иложи бўлмади. Унинг аламига шерик бўлишар, бу қайfu «кутилмаган тасодиф» әканини айтиб, жилла бўлмаганда кўнглини овлаб, тасалли беришарди. Суд ва тергов органларида софдил, чидамли одамлар ишлаётганини, безорилик қон-қонига сингиб кетган шахслар билан гаплашиш ниҳоятда тоқату чидам талаб қилишини ҳам ўз кўзи билан кўрди. Баъзи безорилар жиноятлар кодексини яхши билишини, сурбетлигини кўриб, оғзи очилиб қолди. Бундай безорилар қашқатеёқ бўлиб кетгани, панд-насиҳат билан уларни одам қилиб бўлмаслигини ҳам тушунди. Яхши ҳам ҳукуматнинг бундай жазо органлари бор, бўлмаса бу безориларни ҳеч эплаб бўлмаслигини сезди.

Дунё ўзи шундайдир — Файзулла Аҳмедовичнинг елиб-югуришлари, ҳақиқат учун курашлари, одамларга меҳрибонлик қиласман деб, бунинг орқасидан азоб чекишли, бир кичик ноҳақлик учун мансабдор кимсалар билан гоҳ телефонда, гоҳ мажлисларда қаттиқ гаплашганлари ва умуман унинг қилиб юрган барча ишлари ўзини ўйлатиб қўйди. У баъзида савоб иш

қилаётирман деб, хато қилаётгандек бўларди. Марҳаматхонни жеркиб ташлаганига ачинди, у — она, унинг бағри ёнарди. Унинг сўзларида ҳақиқат борга ўхшаб кўринди. Ўғли воқеаси унинг ўзига қаратилган бир қонли ханжарга ҳам ўхшаб кўринди. Шу йўл билан рақиблари уни майдондан итқитиб ташламоқчи бўлаётгандирлар! Рақиблар учун шу «тасодиф» етарли, улар энди «хизмат кўрсатган», «эътиборли», «софдил» Музafferовга қарши кампания бошлаб юборишлари учун қулай шароит вужудга келди. Марҳаматхоннинг гапида жон бор: соддадиллик, илону чаёнга ҳам беозор махлук, деб озор бермаслик ўз бошига етди. Унинг кўз олдига Қоражон Мингбоев келди; бу довюрак йигит уни ташвиш чангалидан қутқариб олиши мумкин, деб ўйларди. Лекин унга билдирамади. Бу абжир йигиттинг ниҳоятда юраги тоза ва дўсара, яхшилик қилгач кимсага жонини берадиган одам эканлигини биларди. У гарчи дунё ишлари, сиёsat соҳасида Музafferов каби кўпни кўрган, чиниқан бўлмаса ҳам, мард йигит эди. У бир куни Садовниковлар ёнида, агар яна Матросов, Эрйигитовлар керак бўлиб қолса, мана шу Қоражон Мингбоевдан чиқади, деган эди. Белига граната боғлаб, ўзини душман танки тагига ташлайдиганлар мана шу йигитга ўхшаганлар эканига жуда ишонган эди. У икки бор турмага хўрак ва иссиқ кийим олиб борди. Марҳаматхоннинг аламини енгиллатиш учун лозим бўлса ўғли ўрнига ўзи бориб ётишга рози эди. Хотинининг нолаю фигони юрак-бағрини эзиз ташлади. Онанинг оҳига ҳеч нарса чидаб туролмайди. Хайрушка онага шунча азоб берди, у эмас, она юраги қамоқда ўтиради. Хат ёзишганида унга сабртоқат, сабот билан жазони ўташ, интизомни бузмаслик кераклигини уқтиришар, йигит киши оғирчиликка чидаши лозимлигини таъкидлашиб, Чкаловдек қаҳрамон ҳам ташвиш чеккани ҳақида ёзишарди. Она нима ишлар қилмайди, дейсиз! Хайрушка албатта илжайган бўлиши керак, у оначалик изтироб чекмасди. Қамоқхонадаги кунлари тез ўтиб, эркинликка чиқажагини кутарди. Файзулла Аҳмедович ҳар ҳафта ўғли ҳолидан хабар олиб турарди.

Кейинги йилларда Музafferовнинг ниҳоятда асаблари қақшаси натижасида ҳар нарсадан бад олиш дардига мубтало бўлиб қолган. Орқасида қандайдир бир соя юргандай. Айниқса, кечки пайтларда унинг кўзига жин ва арвоҳлар дам шохли одам, дам соқол-

ли, дам эчки қиёфасида кўриниб кетарди. Ёшлигидан ҳеч қандай ақидаларга ишонмовчи Музаффаров ҳозир саъзида хаёл сурис қоларди; дунё моддий, аммо қандайдир киши кўзи билан кўролмайдиган бошқа дунё, бошқа куч борга ўхшарди. Яна бир муддат ўтгач, бу чалкаш хаёллар чарчашлик, асабларнинг қақшали натижасида пайдо бўляпти, деб далда берарди ўзига-ўзи. Ўғлининг қамалиб қолгани бу «таъқиб дарди»ни яна ҳам авж олдирди. У дераза олдида узоқ вақт кўчага қараб турарди. Унинг ҳашаматли дарвозаси ёнидан ўтиб кетаётган кишилар: «Мана шу Файзулла Музаффаровнинг ҳовлиси! Бу одам эски партия аъзоси бўлса ҳам ўғлини тарбиялай олмади.. Унинг ўғли турмада. Отанинг аҳволи уйдай-ку, боланинг аҳволи бундай! Совет ҳукуматининг ишонган одамларининг болалари шунаقا! Ўғли одам ўлдирибди. Отаси шунча ҳаракат қилгани билан чиқариб ололмабди...»— дегандай бўларди. У бўлса, «Ёлғон!»— деб бақириб юборишга оғиз чоғларди. Чунки унинг ўғли одам ўлдирмаган, фақат камомат бўлган.. У миқ этмай яна дераза орқасида туради. Яна бир қур ўткинчилар Музаффаров дарвозасига қараб, бир-бирига пичирлашиб, қўли билан эшикни кўрсатаётгандай бўлишарди: «Мана шу ҳовли илгари министр бўлган Музаффаровники. Раҳбар бўлган одамнинг ўғли қамоқда ўтирибди... Шуларнингки ўғли шундоқ бўлгандан кейин, бизларга ўхшаганлар худога нима деймиз! Баъзи мансабдорларимиз ичидан чириган, хотинбозлик қилишади, давлат пулини ўмаришади, болалари ҳам...» «Ёлғон!!!» Турган жойида яна бақириб юборгудай бўлди Музаффаров. У титраб кетар, юраги санчиб, боядан бери чўнтагида эзғилаб тургани валидол идишини олиб, бир дона дорини тили тагига ташларди. Шу лаҳза дарвозаси ёнидан ўтиб кетаётган Кимсанхонлар шу томонга қараб тупуриб кетаётгандек бўларди. Музаффаров миқ этмай қолди. Яна унинг юрагига игна санчилгандек зирқираб кетди. Эрта билан кўчага чиқиб кетаётган қизлари шу маҳаллалик бир кичик бола дарвозага бўр билан ёмон сўз чизиб кетаётганига кўзи тушиб, дарҳол латта билан ўчиришибди. Қизининг латта билан дарвозани артаётганига қизиқсинган Музаффаров кўчага чиқиб, бу ҳолни аниқ кўрди. Ёмон сўзнинг ўрни шундоқ билиниб турарди. Тентак болалар нечук бундай қилишди экан, деди ўзига-ўзи Музаффаров, биз энг ёмон кимса бўлиб қолдикми?.. Бу

ҳолни билган Марҳаматхон эрини юпатиб, болалар нима ишлар қилмайди, эътибор бериш керак эмас, деди. Чизиб қочган бола шу маҳаллалик ишчи, Социалистик Мөҳнат Қаҳрамони Эргашали аканинг невараси. Музаффаров яна хаёлотга шўнгиди. Демак, бу мўътабар оиласда ҳам биз ҳақимиизда ёмон гаплар юрарканда... У жойига ўтириб қолди, у энди лол, юрагини кимга очиб, кимдан нажот сўрашини билмасди. Яқингинада у бир мажлисда сўзлаб, европалик баъзи жанобларнинг Совет Ўрта Осиёсига тез-тез меҳмон бўлиб келиши, маданият ва фан арбобларининг юксалгани, катта ихтиrolар қилинаётгани билан танишиш эмас, бу томонга келиб экзотика қидирадилар, тутя ва минораларни кўрадилар, бозорларга кириб, бешик, сумак сотиб оладилар, фотоаппаратлари билан пахса деворлару мўриларнинг суратини оладилар. Бизнинг китобларимиз, ёзувчи ва олимларимиз ҳақида гап кетса, уларнинг ранги учади. Бундоқ мавзуда гаплашишни истамайдилар! Жаноблар бизни эмас, елкасининг пахтаси ўйнаб чиққан гуппи чопонли қадимги ўзбекларни кўргиси келади. Улар жуда анои, деган эди. Ўзининг ўша катта мажлисда қизиққонлик қилиб гапирганидан ҳозир хижолат бўлиб кетди. Демак, «гуппи чопонли ўша ўзбек» ўсиб, кимсан Музаффаров бўлибди. Оқибатда ўша Музаффаров айнаб, оиласи чириб, фарзанди қамоқда... болалар унинг эшигига ёмон сўзлар ҳам чизиб кетадиган бўлибди! Катта гапирмаслик керак эди, деди ўзига хитоб қилиб Музаффаров. Лекин у кўпроқ ўз ўғлидан қаттиқ хафа бўларди; сен, нодон, ахир кимнинг оиласидан чиққанингни билмасанг! Сен, ахир, тайини йўқ, ҳаром ишлар қилиб юрган кимсанинг боласи эмас эдинг-ку! Сен, ахир, ҳаром топилган пулга ичиб, лўттибозлик қилиб юрган кимсанинг боласи эмас эдинг-ку! Эргашалилар каби пешана тери билан пул топиб, ҳалол яшаб келаётган Музаффаровнинг фарзанди эдинг-ку! Сенинг отанг маст бўлиб, умрида бирор билан ёқалашган, бирорни ҳақорат қилган одам эмас эди-ку! Нечун сен бундай бебаҳт тасодифга йўлиқдинг?! Ахир сенга, кўзингни оч, қадамингни билиб бос, демабмидик?! Қайси гуноҳларим учун бу кўргилик менга юборилди? Баъзи муттаҳамлар тараплабедод қилиб юрибди-ку!

Ўғлининг майший томондан бузуқлигини ҳам эшитган эди. Қадим Беҳбудий «Падаркуш» драмасини бекорга ёзмаганини, гарчи бошқа замон, бошқа давр

бўлгани билан бундай бузуқликлар қизамиқ дардиdek тақрорланиб тураверишини эслади. Бир куни у Сапчабошевга, башарангизга қараб туриб жаҳолат кўраман, сиз одам одамга бўри дейсиз, сизнинг худоингиз пул, сиз бундан олтмиш-етмиш йиллар илгари яшаган зиқна бойваччаларга ўхшайсиз, деган эди. Шу «бойваччанамо шахслар» энди унинг юзига: «Ҳа, қўлга тушдингми?!»— деб тик қарамоқдалар. «Мен жаҳолатга ўхшаб кўринганим билан менинг ўғлим қамоқда ўтиргани йўқ! Совет ҳукумати кимни қамашни билади! Агар мен «бойвачча» бўлиб, ҳукуматга зид иш қилганимда, мени аյб ўтирас эдилар!»

Қаттиқ изтироб чекиб юрган кунларининг бирида кечга яқин эшикдан Ишларбек Сапчабошев маст кириб келди. Унинг қўлида тугун, тугунда ўн кило-граммча гўшт. Дастурхон ёзишиди. У арақ қуйиб беришларини илтимос қилди. Чекилмайдиган хонада сигарета чекиб, хонани тутунга тўлдирди. Музаффаровнинг чекмаслигини, маст кимса билан гаплашмаслигини билиб, атай пойинтар-сойинтар сўзларни айтиб, алжий бошлади. «Ўлгандан кейин каттами-кичиқ, шоҳу гадо бир ерга боради...»— деган эски гапини қайта-қайта тақрорлайверди. Бу билан у илгари катта мансабдор бўлган Музаффаровнинг жигига тега бошлади. Марҳаматхоннинг бир неча бор эрига тақрор тақрор имо-ишора билан бу ярамаснинг гапларига эътибор берманг, сассиқ оғиздан ширин гап чиқмайди, деганига ҳам қарамай, Музаффаровнинг тоқати тоқ бўлиб, ранги ўча бошлади. Сапчабошев атай ўғлидан гап очиб: «Биттагина укам қамалиб қолди, сиз ҳаракат қилмассангиз, мен ўзим ҳаракат қиласман! Пулни аччиқ чайнаймиз... Укамни қамоқда ўтқазиб, мен қандай еб-ичиб юраман,— деб йиглади. Ундан сўнг Музаффаровга дўқ қила бошлади:— Орденларни қўша-қўша тақинг! Аммо менинг укам турмада ўтирсин! Орден берган ҳукумат нега ўғлингизни қамайди?! Бир томондан орден бериб, бир томондан қамайдими?!— У яна ҳўнграб йиглади:— Йўқ! Мен ҳамма пулимни ўшаларга бериб, укамни қутқариб оламан!» Меҳмонга ҳеч озор бермайдиган Файзулла Аҳмедовичнинг сабр-тоқати тугади. У тутақди: «Ҳей, оғзингизга қараб гапиринг!»— деди. Лекин Сапчабошев яна ошди: «Бас, тўғрилик ҳам етар! Сизнинг чеснийлигинизни бир тийинга олмайман! Ҳа, сизни бир тийинга олмайман! Ўғлингиз турмада ўтирамишу, сиз қан-

дай қилиб юрибсиз! Уни қутқариб олиш керак!» «Йўқол бу ердан! — деди ранги оқариб кетган Музаффаров. — Йўқол! Агар чиқиб кетмасанг, ҳозир сени отиб ташлайман! Майли, ўзимни ҳам ўғлимнинг ёнига олиб борсинлар!» У титраб, ичкари хонага кириб кетди. Шулаҳза Марҳаматхон ва қизлари оға орқасидан кириб, стол фаладонини очишга йўл қўйишмади. Музаффаров ҳозироқ чиқиб, тўппончаси билан бу муттаҳамни отиб ташлаши аниқ эканини сезишиди. Ишнинг бирдан жиддий тус олганини сезган Сапчабошев сачраб туриб, бош яланг жуфтакни ростлади. Орқасидан чиққан Марҳаматхонга имлади: «Нима қиляптилар?» Ғазабидан ранги оқариб кетган Марҳаматхон Сапчабошевнинг қўлига тугунини ушлатди: «Йўқол, тезроқ! Сен ифлосни отиб, яна балога қолади. Ҳе, башараңг қурсин!» — деди. Ишларбекнинг кайфи учиб, телба-тескари қадам ташлаб, жўнаб қолди. Ичкари хонада асабий титраб ўтирган Музаффаров кўз олдида Ишларбек Сапчабошевнинг калтакесакдек совуқ башараси пайдо бўлди. «Ёмон ўғил ўзининг хатти-ҳаракати билан отанинг бўйнидан боғлаб душманлари қўлига тутқазар экан», — деди ўзига-ўзи. Музаффаровнинг барча «ошналари» шаҳарда гап тарқатишиди. Уни атай «кўргани келиб», жиноят ва суд, прокуратура, турма... деган сўзларни айтишарди. Очиқдан-очиқ кўксига ханжар уришарди. Хайрушка шу масъул оиласида ўсаётганини ҳис этмай, бошқа нобоп кишиларга ўхшади, ота-онасининг поклигини билмай, қаллоблик, пул билан ҳамма ишни битираман, дейдиган кимсаларга яқинлашиди. Ушалар таъсирига тушиб кетганини Музаффаровлар иш билан овора бўлиб, асло сезишимаган.

Якшанба куни эшикдан кириб келган Амир Равнақ айвонда хомуш ўтирган Файзулла Аҳмедович билан ҳол-аҳвол сўрашди. Андуҳ денгизига гарқ бўлиб ўтирган дўстига далда бермоқчи бўлди. Амир Равнақнинг юпатувчан, кўнгил кўтарувчи гапларидан сўнг Файзулла Аҳмедовичнинг ҳам, Марҳаматхоннинг ҳам чиройи очилиб, шоирга меҳр-муҳаббат билан қаравади. Музаффаровнинг география, умумжаҳоний гаплар, астрономияга жуда қизиқишини билиб, бугунги «Правда» газетасида босилган кичик бир мақолани ўқиб берди: «...Инсон шу кунгача назарий жиҳатдан чексиз фалакиётга қўл узатган бўлса, энди техникаий қўлини узатди. Инсон кўпдан бери ўзга олам билан алоқа қилишни орзу қиларди. Мана, бир неча йил,

дирки, Совет Иттифоқи астрономлари радиотелескоп ёрдами билан космосга тикилиб, узоқ оламлар садо-
сини тингламоқда...»

«Правда»нинг хабар беришича, шу йил... «олтинчи ноябрда Қрим ва Пуэрто Рико яқинидаги Аресибо оролларидағи обсерваториялардан юборилган ғоятда кучли радиосигнал олимлар фараз қилиб айтган бошқа планетада яшовчилар томон йўлланди. Бу сигнал уч минутча давом этиб, бунда ИНСОН ва унинг МИЯСИ, ЕР борлиги ҳақида, Ердаги ҲАЁТНИНГ КИМЁВИЙ ТАРКИБИ ҳақида маълумот берилган. Радиосигнал «Сомон йўли» четидаги юлдузлар тўдаси томон юборилган. Сигнал нур тезлигига учиб, 24 минг йилдан сўнг мўлжалланган жойга борар экан... Олимларнинг айтишича, уч юз миллион юлдуз ичида кам деганда бир юлдузда тараққий топган ҳаёт бўлиши мумкин, деган фараз бор. Бу, ГИПОТЕЗА».

— Эҳ-ҳа,— деди Музаффаров,— бу сигнал йигирма тўрт минг йилдан кейин этиб борса, унгача Ерда анча-мунча гаплар бўлиб кетса керак. Фиръавнлар замонига энди тўрт минг йил бўлган бўлса, бунаقا замонлардан беш-олтитаси ўтар экан...

— У вақтгача Хайрулла қамоқдан чиқиб қолар-а?— деди Марҳаматхон, яқинда осмонга космонавт чиқади деб тушуниб.

— У вақтгача сен билан мен дунёга неча минг маротаба келиб кетамиз,— деди кулиб Файзула Аҳмедович.

Шоир келган кунлари Музаффаровнинг андак чирий очиларди, у қадрдони кекса бир одамнинг асабини бузмайдиган, аксинча, кўнглига ёқадиган гапларни топиб сўзлаётганини пайқаб турарди. Амир Равнақ дўсти Музаффаровга багишланган янги шеърини ўқиди:

* * *

Ф. М. га

19
Бошига тушганида ногиҳоний қаттиқ кун,
Яхшилаб билиб олди: ким дўстю ким душман...
Ачинганларни кўрди ўзи каби бўлиб хун,
Сояси юриб, деди: «Гёё бир чалкаш тушман...»

Садоқату обрўйи, эллик йиллик меҳнати
Булғанмасин, дедилар, дўстлари бўлди тирак.

Қадрдон бўлиб кетган ҳалқига унинг оти —
Инженернинг дили пок, ютига ғоят керак!

Аммо топилиб қолди сассиқ оғизларга иш —
Висир-висир... чеккада тарқатдилар уйдирма:
«Үгли муттаҳам экан, отасин керак қувиш!
Обрў билан юриш-чун мутлақо йўл қўйдирманг!»

Бу ҳеббимлар кимлиги ҳаммага маълум эди:
Фирибгар, маишатбоз, манманликка гирифтор...
Сиз, ахир, куласизми отанинг ташвишидан!
Ўзингизга бир боқинг, патосу оғзингиз ғор!

Бурнини жийиришиб, ўшқиришиб, бегуноҳ
Киши пайига тушиб, қилмоқ бўлдилар бадном.
Мен ҳали тириқдирман душманлар, бўлинг огоҳ!
Ҳақиқат — қилич қўлда, ҳали бордир интиқом!

Янглишдинг, хато қилдинг. Гуноҳ қилдинг, Хайрулла.
Кўзингни оч, жиноят қашқирига бўлма ем! 19
Интизому ақл ҳам одобу ҳалол меҳнат
Қаддинг кўтарар! Бу иш дардга қарши бўлар эм.

— Офарин! — деди Файзулла Аҳмедович, — жуда яхши ёзибсиз. Ташаккур! Дилемдаги дардимни билибсиз. Нобоп ўғил ҳаммамизни андуҳга солди, — унинг кипригига икки томчи ёш илинди.

— Азизим, сизнинг андуҳингиз — менинг андуҳим.

— Бу шеърни газетага боссангиз Хайрулла чиқиб қолармикан? — Марҳаматхон жон-жаҳди билан шоирга тикилди.

Файзулла Аҳмедович билан Амир Равнақ бир лаҳза жим бўлиб қолишиди.

— Ойнинг ўн беши қоронғи бўлса, ўн беши ёргу... Марҳаматхон, синглим, хафа бўлманг, ўғлингиз чиқади. Албатта чиқади.

— Айтганингиз келсин, мулла ака, юрак-бағрим узилиб кетди. Мен адo бўлдим... Нодон бола нима иш қилиб қўйди!

«Фикрни сўздан бошқа воситалар билан ҳам ифодалаш мумкин, фикрдан маҳрум сўз — магиздан ажралган пўчоқдир», — дерди хотинига Музаффаров. У

бир гапни икки-уч бор такрорлаган кимсани хуш кўрмас, эзмалик олдида чида буролмай, бомбадек ёрилиб кётарди.

Тиним куни Файзулла Аҳмедовичнинг уйида бўлишини биладиган Ишларбек Сапчабошев яна маст ҳолатда телефон қоқди. Телефон трубкасини кўтарган Марҳаматхондан бир оғиз сўзи борлиги, домлани чақириб беришларини сўради. Музаффаров истар-истамас трубкани қулоғига босди. У ёқдан маст одамнинг беандиша овози ёнида турган Марҳаматхонга ҳам шундоқ эшитилиб туради: «Ҳей, домлажон, менинг домламсиз-а? Шуни айтинг, инженер Музаффаровмисиз?» Музаффаров: «Ҳа»,— деди. У ёқдан яна заҳарли овоз эшитилди: «Мен тўртта болани тарбиялаб вояга етказдим... Ажойиб болаларим бор. Мен отаман. Мен сотқин эмасман... Мен...»

Музаффаров унинг гапини бўлди:

— Нима демоқчисан?!

— Ҳеч нима! Сиз катта одамсиз, биламиз! Сиз, кимсан, академик Музаффаровсиз! Сиз партия аъзосисиз... Сиз...

— Нима демоқчисан?!— Музаффаров бақирди.

— Бақирман! Бақириш кетмайди! Бақирадиган вақтингиз ўтиб кетди! Мен сотқин эмасман!

— Сенинг сотқин, сотқин эмаслигинги билмайман!

— Гапим рост, домлажон, ха-ха-ха-ха-ха-а! Ўзимнинг домлам!

Музаффаров жаҳл билан трубкани қўйди. Бир муддатдан сўнг яна телефон жиринглади. Тутақиб турган Музаффаров, бошқа кимса бўлса керак, деб трубкани кўтарди. Яна ўша беибо, маст овоз:

— Ал-ло! Домлажон, мен сотқин эмасман...

Музаффаров трубкани қарсиллатиб урди. Нариги хонада турган Марҳаматхон чўчиб кетди. Шундан кейин Марҳаматхон бу ярамас кимсанинг яна сурбетлик қилишини пайқаб, телефон симини суғуриб ташлади.

— Бу аглаҳ ўз отасини шундай қилиб ўлдирганини эшитган эдим, энди менга тикилганга ўхшайди,— деди Музаффаров бир оз бўшашиб.

— Ўзи ўлсин!— деди Марҳаматхон шартта,— бу гаванда ўлса ҳамма тинчиди. Сизга ўлим истаса, худоё ўзи ўлсин!

— Сиртлонга на йўлбарсу арслон рўпара келади: у кучли бўлганлиги учун эмас, жирканч ва ифлос, ўлим-

тикларни ейиши учун ундан ҳазар қилиб қочадилар. Йўлбарс сиртлон яқинига келмайди, ҳатто узоқдан кўрса ҳам лўкиллаб қочади. Билмай овқат ичига пашша тушиб, ичга кетса, албатта ўхчиб, уни қусиб ташламагунча киши тинчимайди. Сиртлон танига ҳеч қаҷон бирон йиртқичнинг тиши теккан эмас. Ёруғ дунёда шундай жирканч махлуқлар ҳам ўт-ўлану тупроқни босиб, сув ичиб юради... Кўппак йўқлигига ҳовлини бароқ мушуклар эгаллаб олганидек, қоплону йўлбарстар бўлмаганида даштда сиртлонлар ҳукмронлик қитади.

Сапчабошев ва сиртлон... Бу муқояса эҳтимол жоиз юмасдир! Музafferов ўйлаб, хаёл суриб қоларди. Ўғлиниг қамалиб қолгани, Ишларбекнинг атайин қилаёт-ан сурбетликлари, шу йўл билан ўч олаётгани Музafferов юрагига ларза соларди. У кейинги кунларда хотуш юрар ва юраги санчаётганидан тез-тез валидол чимарди. Ора-чора хотинига билдиrmай йигирма томми валокардин иcharди. Кунлардан бир куни кечқурун елевизор кўриб ўтирган Файзулла Аҳмедовичнинг ўsatдан юраги саншиб, бир лаҳзадан сўнг ўзини билтай полга йиқилиб тушди. Саросимага тушган Марҳатхон эрига дори ичирмоқчи бўлди. Лекин Музafferовнинг ҳуши ўзида эмас эди. Ранглари оқариб, кўрив кетган қизлари «Тез ёрдам»га телефон қоқишиди. Тез ёрдам машинаси етиб келганидаям Музafferовнинг ҳуши ўзига келмай, полда ётарди. Уни машинада асалхонаага олиб бориш асло мумкин эмаслигини айшиб, оҳиста кўтариб, каравотига ётқизишиди.

Бу кўнгилсиз хабарни эшигтан Қоражон шу куни ёқ елиб, Файзулла Аҳмедовични кўриб кетди. Улар гап-ашиша олмади. Кўзи очиқ, қимиirlамай шифтга қаб ётган Музafferов «не кунларга қолдик...» деганай бўларди инженер Қоражон Мингбоевга.

XXXV боб

НАМАНГАНДА ТУГОН БУЗИЛИБ, ЧОРТОҚНИ СУВ БОСИШ ФОЖИАСИ

Биринчи Май куни қош қорайишига яқин кутилманда район радиоузелидан: «Диққат! Диққат! Граждилар! Қорабоғ томондан сув босиб келяпти, болаларї, бетоб кишиларни олиб, тезликда Кушан қирларига

чиқинглар! Сайҳонликдаги кишилар, Кораскон аҳолиси, дараҳтларга чиқинг!» Шу орада қўлига товуш куҷатирадиган аппаратлар ушлаган милиционерлар ҳам: «Гражданлар! Тезда болаларни олиб, баландликка чиқинглар, сел келяпти!» — деб ҳамма ёққа жар сошлишарди. Ногаҳоний бу совуқ товуш бир лаҳзадаёк Янгиқўргон райони аҳолисини ларзага солиб, оёққа қалқитди. Байрам куни, ҳамма шоду хуррам, масрур ўйнаб юрганида, меҳмондорчилигу базмлар бўлаётганида даҳшатли хабар! Капалаги учиб кетган одамлар ўрниларидан тура солиб, кўчада ўйнаб юрган болаларини қидириб қолишибди. Радиоузелдан яна: «Гражданлар! Тўғон бузилиб, сув босиб келяпти...» — деган совуқ товуш такрорланди. Чортогу Кораскон кўчаларида чақалогини кўтариб, ёш боласини етаклаб чопиб кетаётган аёлларнинг ҳисоби йўқ. Кимdir ранги оқариб кетган, бирор боласини тополмай, у ёқдан бу ёққа бақириб югуради. Милиция, маъмурий ташкилотлар ходимлари одамларга ёрдам бериб, йўл кўрсатар, кўп болаликишиларнинг болаларини тепаликка олиб чиқиб берарди. Бу ерда ҳаммага таниш милиция офицери Раҳимов икки бор бола кўтариб тепаликка чиқиб келди-да, икки оиласи тинчтиб, далда берди. Саросима ичидаги қишлоқдан чиқиб кетаётган аҳолини молхоналардан кузатиб турган сигирлар, боғлоғлиқ эчкилар бу кутилмаган қиёмат-қойимни сезиб, узун-узун маърашарди. Лекин ҳеч ким бу жониворларни ёнига бориб, етаклаб қочишини ўйламасди. Ҳатто бечораларнинг арқонини ечиб юбориш ҳам ҳеч кимнинг ёдига келмасди. Чорток кўприги, Алихон ва Қорабоғ қишлоқларига борадиган катта асфальт йўлда район ва облостъ раҳбар ходимларининг машиналари ҳам пайдо бўлди — оқшом қоронғилиги ичидаги машиналарнинг икки кўзи ёниб у ёқдан бу ёққа югуришарди. Колхоз раиси Юсуфжон аканинг оиласи узоқда қолган эди, у Кораскондаги Эшон маҳаллада адашиб юрган икки болани кўтариб тепаликка югарди. Ҳали замон келадиган қуюн ҳамма ёқни босиб кетиш хавфи кишиларни саросимага солган — одамларнинг бир-бiri билан иши йўқ, радиоузел ва милиционерлар қўлидаги овозни баланд қилувчи карнайдан: «Гражданлар, сел келади, тезроқ Кушан қирларига чиқинглар, ёш болаларни кўтариб олинглар!» — деган овоз танини зириллатарди. Қандайдир бир даҳшатли аждарнинг югуриб келаётгани одамларни ваҳимага солган эди. Улуғ Ватан урушининг

Қатнашчиси, юз фашист газандани ўлдирган, юз ўлимдан қолган Қўчқор чўлоқ ҳам қўлтиқтаёқларини тўқиллатиб Кушан қирларига томон чопарди. У «оберштурмбанфюрер»ни ҳиқилдоғидан бўғиб тутиб олиб келганида эти андак бўлса ҳам жимирлашмаган эди. Ўттиз йилдан ошди, лекин бостириб келаётган сел ҳамма нарсадан даҳшатлироқ эди. Эскигина гимнастёркасида уч Шуҳрат ордени шовдираб турган абжир Қўчқор кўчадаги бир болани қўлтиқлаб олиб тирақайлаганича чопиб борарди. «Худо берганга беравераркан, бозаларнинг кўп бўлгани яхши, бири коғир бўлса, бири мусулмон...» — деб юрадиган Ойшабиби каттакон нон саватдаги пилла қуртини бошига кўтариб, лапанглаб тепаликка борар, корасконлик милиционер йўл-йўлакай унга мурожаат этарди: «Кампир саватни ташланг, жонни сақлаб қолиш керак!» Кампир унга бир қараб қўйди-ю, индамай кетаверди. Сават ичидағи тут баргларида вижир-вижир ипак қурти эди.

Кечга яқин Чортойсой атрофидағи қишлоқлар аҳолиси — мингларча ёшу қари — икки томон қирликлар сари чумолидек ўрмаларди. Орадан бир муддат ўтгач, ўн-ўн беш метр баландликдаги қорамтири бир нима вишллаганча, даҳшатли шовқин солиб ўтиб кетди. Ундан сўнг яна ўша қора ваҳшат киши баданини жимирлатиб, совуқ бир вишиллаган овоз чиқариб келиб ҳамма ёқни босди. Тепаликда турган колхоз раиси наздида бу қорамтири сув фақат Корасконни эмас, барча далаларни, бутун дунёни босиб кетгандек бўлди... Ҳаёг тўхтади энди, деди у ўзига-ўзи. Ҳамма сув остида қолади, қайтадан Нуҳ алайҳиссалом чиқиб, дунёдаги жониворлардан бир жуфтдан қайиққа солиб олиб қоладилар... Унинг хаёлида вишиллаб, ҳамма ёқни вайрон қилаётган қорамтири сув ер юзи косасига тўлаётгандай, ҳали замон қиру тоғлар ҳам сув остида қолиб кетадигандай бўларди.

Аслида, юқориликдаги Алихон қишлоғи остидағи Қорабоғ сув омборининг тўғони бузилиб, лиммо-лим турган улкан сув омбори ўз йўлидаги бетон кўприклиарни бузиб, йигирма тонналик экскаватору бульдозерларни қутичадек оқизиб, дараҳтларни тортқилаб йиқитиб, пахтазорларни босди. Чортогу корасконликларнинг етти ухлаб тушига кирмаган бу даҳшатли воқеа каттадан-кичикни саросимага солди; улар сув балоси, ўт балосидан асрар, деб бежиз айтилмаганини сезишиди.

Шу куни Кораскон томонларда кучли ёмғир бўлган эди. Қундузи байрамни ўтказибоқ қурилиш штабига келган инженер-ирригатор Иномжонни Алихон томонида кучли жала қуяётгани ваҳимага солиб, машинасидан тушибоқ ўзини штабга урди. Кейинги ҳафта ичидаги сув омбори — улкан кўл лим-лим тўлганини ва бу мельёридан ортиқча эканини қурилиш бошлиғига айтгали эди. У бўлса: «Сувни эҳтиёт қилишимиз керак, тошлириқ шундай. Биласиз-ку, бултур пахтага сув етмади!» — деган эди. Иномжон миқ этолмади, чунки кўз олдига киши юзига қаттиқ гапирмаса ҳам кейин биллиб ишини қиладиган «хушмуомала», маккор бир одам келди. У билан ўйнашиб бўлмас эди. «Ўйнашмагин арбоб билан арбоб урап ҳар боб билан...» деган гапмана шу одамга тааллуқли эканини биларди. Бир марта унинг чаққан заҳрини тортган, яна шундоқ бўлишини асло истамасди. Шу одамнинг бевосита буйруги билан сув омборининг туннель дарвозалари маҳкам беркитилиб, сув чиқарилмаслиги, сувни тежаш қаттиқ тайинланганди, бултурги сув танқислиги уни қўрқиган эди. Реал ҳақиқатга қараб хулоса чиқариш, ўйлашни ёқтирилмайдиган, бир қадар қотиб қолган одам эди у. Бу «раҳбар»нинг асосий фалсафаси: «Чопқир аргумоқ ҳозирча сенинг остингда экан, уни чоптир, гаштини сур. Сенинг аргумоқда жавлон уриб юришинг доимий эмас. Бир кун келиб бу аргумоқ ҳам гойиб бўлади — яъни мансаб деган нарса ҳам абадий эмас... Ана ундан сўнг афсусланиб юрмаслигинг учун ҳозир гаштини суриб қол!» — дерди. У кўп ичганидан бурни учи қизариб, соchlари оқариб, сийраклашиб кетган эди. Илгариги инженер Ҳазратов у билан яхши тил топишарди. Ўз «кишилари»ни ва умуман ўзига алоқадор одамларни қўллаб-қувватлайдиган бу кимса Чорток сув омбори қурилишининг бошлиғи Ҳазратовнинг мукофотланишига ҳам сабаб бўлди. Шундан сўнг ошнаси Ҳазратов Республика Сув хўжалиги ва мелиорация министрлигидаги масъул ходимлар диққатига тушиб, Чортокдаги «миниатюра» қурилишдан кейинчалик Чорвоқдаги «гигант»га кўтарилди. «Бола-чақани тинчтириб қўйиб, ишни дўндириб, соғ юриш ўзи баҳт, — дерди у «раҳбар», — кексаликка иш қўйимаслик керак. Кексалик — оҳу надомат! Давринг кепти — сур бегим! Одамзоднинг пули бўлганда ақли бўлмайди, ақли бўл-

ганди пули бўлмайди. Шу сабабли, давринг кепти, ўй-наб қол, бу дамнинг ҳаловатини ҳеч қачон тополмайсан!»

Кўлдаги сув лиммо-лим косадек чайқалиб туарди, бунчалик кўп сувни тупроғу шағалдан бостириб қўтарилган тўғоннинг узоқ вақт ушлаб туришига шубҳа билан қаарди, Иномжон. Ишқилиб, шарманда бўлмайлик-да, деди юрагини қўрқув босиб. Қурилиш бошлиғи эрталабдан бошлаб маст бўлиб ётарди. Унинг қурилиш штабига келадиган ҳоли йўқ эди. Уч-тўрт кундан буён тинмай ёмғир ёғаётгани сабабли қурилишда иш тўхтаган, скрепер ва бульдозерлар тўғон пастида — ишлаб турган ерларида қолиб кетган. Фақатгина «МАЗ» машиналарини штаб ёнидаги сайҳонликка олиб келиб қўйилган эди. Узоқда, тўғоннинг чап томонидаги туннель ёнида жирафага ўхшаб қўтарма кран, ундан нарироқда бир неча цистерналар юмалаб ётарди... Иномжон штабда папирос чекиб ўтиравермай, бекорчиликданми ёки юрагига бир ваҳима тушганиданми, ишқилиб нимадир унинг қўлини телефон трубкасини қўтаришга ундаdi. У ҳозирги участка бошлиғи Хегайга қўнғироқ қилди. Хотинининг айтишича, у ухлаб ётган экан. Шундан кейин у трубкани қўйиб ташқарига чиқди — ёмғир тиниб, осмонда булутлар чоки сўқилгандай... У тўғон устига қўтарилиб, орқа томонда жимирлаб турган ложувард сувга қаради. Юрганида брезенг этигига ёпишиб, бир ботмон лой кўчарди. Қир тупроғининг ундеқ ёпишқоқлиги ҳаво исиганида чангид, билқ-билқ тупроқ бўлиши Иномжонни кўп ўйлатарди. Шағал, қум, тупроқ шиббаланса метин бўлиб кетиши тўғон учун жуда муҳимлиги институтда домлалар лекциясида кўп такрорланганини ҳам эслади.

Савқи табиий¹ бўлдими, Иномжон тўғон устидан юриб туннель яқинига келди — минг метрдан ортиқ масофани хаёлу лойга ботишлар билан ўтказиб, бетон туннель ёнида сув жилдираб оқаётганига кўзи тушди. Шу пайт соат олтилар эди. Жаладан қолган сувмиқац, деб у юрганича пастга тушди. Йўқ, бу тўғон тагидан сизиб чиқаётган омбор суви эди. Унинг кўзлари тиниб кетди. Бир муддатдан сўнг кўпайиб, бир ариқ сув отилиб чиқа бошлади. Тўғон таги бир юз йигирма метр; наҳот шунча масофадан сизиб чиқяпти? Унинг кўз олдида сув фонтан бўлиб отила бошлади. У юргани-

¹ Савқи табиий — интуиция.

ча штабга бориб, телсфон трубкасига ёпишди; райкомга, ундан сўнг милицияга, ундан сўнг... Унинг хаёлига бирон бульдозер ёки скрепер билан ўша сув чиқаётган ерии бўғиб қўйиш келди. У шоффёр йигит билан яна туннель томонга чопиб кетди. Тўғоннинг ярмисига етмасданоқ туннель ёнидан бир анҳор сув икки устун баландлигича осмонга кўтарилиб, вишиллаб, ҳайқириб чиқаётганини кўрди. Унинг яқинига бориб бўлмас эди. Шу атрофда турган цистерналарни оқизиб кетди. Орадан ўн минут ўтар-ўтмас қаттиқ гумбурлаш пайдо бўлиб, тешиб оқаётган тўғоннинг тепаси босиб тушди. Қуюн мислсиз даҳшат солиб, ўкириб, Чортоқ томон югурди. Иномжон кўз олдида тепаликда турган жирағага ўхшаш кўтарма крани бир-икки бошини чайқаб, йиғлагандек бўлиб сувга шўнгигб кетди. Иномжон оғир темирнинг сув юзида қалқиб оққанини умрида биринчи кўриши эди. Бульдозерлару бетон бўлаклари даҳшатли аждарнинг дам кифтига чиқиб, дам ичига қириб кетарди. Шовқин-сурон Чортоқ водийсини қонлаган. Ҳозироқ оёғи остида турган тўғоннинг ҳаммаси бузилиб, оқиб кетиши ҳёлидан ўтди. Лекин чўкаётган кеманинг капитани бирга чўкиб кетиши лозимдек, жасорат анъанаисига содиқ Иномжон жойидан қимиirlамасди. Наманганни сув босса, Наманган адо бўлса, ўзининг тириклиги нега керак?! Ахир, унинг бола-чақалари сув остида қолиб кетса-ю, у жонини асраб қолса!

Қиёмат-қойим. Гумбурлаш, шамол... Табиат қаҳри. Ер сувга чўкарди. Бир-икки соат ичиде Чортоқ томонларда ҳамма ёқни одам босди; партия ташкилоти, милиция, ҳарбий қисмлар келиб улгурди-ю, аммо тўғон томонга ҳеч ким ўтолмади. Йўллар бузилган, бетон кўпирклар дабдала, айқириб оқаётган сув унинг ўзини ҳам чархпалак қилиб юборарди. Бу мислсиз ёвуз қудратга тенг куч йўқ. Шоффёр йигит штаб олдидағи машинани олишга ҳам улгуrolмади, машина ғойиб бўлган. У қирга қараб қочиб кетди. Тўғон устида турган Иномжоннинг ҳуши ўзига келиб, қир томон юра бошлиди. Рўпарада, кўз олдида мутлақо сувга ўхшамай қолган қандайдир бир ёвуз, ваҳший жондорга — афсоналардаги аждаҳога ўхшаган бало Чортоқсой водийсига — дам қирларга, дам ўрларга сапчиб, буралиб, пишиқириб, ҳамма нарсани вайрон этиб, Наманган томонга югуради. Иномжон назарида, қора аждаҳо остида Кораскон, Айқирон, Чортогу Уйчи... бари қолиб кетди. Боя, икки соатлар бурун Чортоқ томондан келган сире-

нанинг баданни жимиirlатувчи қичқириқ овози ҳам шовқинлар ичида эштилмай қолган эди. Иномжоннинг назарида Эскиер, Чуст, Тўрақўргон сув омборлари ҳам тўғонни уриб, тошиб кетгандай, Наманган тепасидаги оромгоҳ ерларда ҳам каналга сув лиммо-лим тўлиб, шаҳарга таҳдид солаётгандай... Унинг кўз олдида шох-сумбати келишган, «ҳа бўл, ҳа бўл!» га кўпроқ эътибор берган, республика юбилейига «совға» қилиб, тўғонни фойдаланишга топширган собиқ қурилиши бошлиғи Ҳазратов ҳам келди. Бу силлиқ йигит Наманганга келиб, товуқхонага тушиб қолган хўролигидан ташқари, иши ҳам ҳаромроқ бўлган экан, деди у ўзиға... Урушдан илгари, ўттиз еттинчи йилгача Уйчи районида райком секретари бўлиб ишлаган Иристоев Намангандан Уйчигача катта йўл қурдириб, магистрал йўлнинг икки томонига тераклар экишнинг ташаббускори бўлган. Одамларнинг айтишича, ўша пайтда унга, «йўлни кенг қурдинг, терак ўтқаздинг», деб айб қўйилган экан. Ҳозир ўша мингларча гўзал тераклар ўлиб кетган Иристоевни авлоддан авлодга эслатиб турибди. Бу ердан ўтганлар гўзалликни кўриб, унинг яратувчиларини яхши гаплар билан хотирлайдилар. Аммо наридан-бери ишни «қотириб», мукофот олишни кўзлаган маишатбоз Ҳазратовнинг халқ бошига солган фожиасини унтишармикан? Тупроқ яхши шиббаланмади, устма-уст қуруқ тупроқ тўклилаверди. Шиббаловчи машиналарнинг ҳайдовчиларига шароит яратилиб, назорат қилинмади. Улар баъзан сояда домино ўйнаб ўтиришди. Бу пайтда Ҳазратов маҳфий бир хонада ишрат сурарди.

Бундан икки-уч соат илгари жамоат ва маъмурий ташкилотлар — милиция ва ҳарбий қисм вакиллари билан халқни қирга кўчираётган колхоз раиси Усуффон ака кенг пахтазорда, ердан энди бир қарич бўй чўзган гўзалар ичида туради. Рўпарасида кимсасиз қолган Кораскон қишлоғини сув босаётгани, зарб билан келган тўлқинлар уйларни ағдариб, баъзи синчлик уй деворларини тешиб чиқаётганини тун гира-ширасида кўриб туради. Ҳамма чироқлар ўчган, зулмат. Булутлар аро баъзан ярқ этиб кўриниб қолган баркашдек ой сув босаётган қишлоқни ёритар, лекин у ёритса-ёритмаса ҳам одамларини сув етолмас тепага чиқариб қўйиб, пастда, пахтазорда ёлғиз ўзи, «шу ерларни босолмайсан, пахтазорларни сенга бермайман!» деб ҳужумга чоғлангандай, ёлғиз қолган хипчагина раис

ҳамма нарсани, ҳамма ерини кўриб турарди. Унинг кўз олдида гуппа-гуппа томлар боса бошлади. Алла-қаерда сигирнинг маъраши, қозиги ечилмай қолган эчкининг ноласи қулогига етиб кела бошлади. Иккимич соат аввал болаларни кўтариб Кўшан қирларига югуришаётган пайтда, қўрқув ичида, молхоналардаги сигиру бузоқларнинг маъраши қулоққа кирган эмас. Шу лаҳза унинг кўз олдига яқинда туқсан сигирию кичкина бузоқча келди. Ҳозирги гумбурлаб босган шу том молхона эмасмикан? Сигир тинмай ялаётгани бузоқча билан том остида қолмадимикан? У оёғи тагида бузоқ бўйича келган сув бир муддатдан сўнг нариги карталарга ҳам ўтиб кетганини, тиззасидан лойқа сувга ботиб турганини пайқамай қолди. Унинг хаёли Чортоксой ва бетон кўприк томонларда гумбурлаб, вишллаётган сувда эди. Чортоксой деган, ёз бўйи шағал-тошлари қизиб, кичик бир сув оқиб ётадиган ер қолган эмас. Икки томони баланд қирлар билан ўралган водий лим-лим сувга тўлиб кетган эди. Шу онда бирон вертолёт билан водий устида учған киши сув устида қалқиб оқаётган дараҳтлару мингларча бочкалар, томлар, кўрпа-ёстиқлару бешикларгача кўриши мумкин эди. Оқиб кетаётган қўю қорамоллар, аравалар сув юзида қалқиб-қалқиб кетарди. Даҳшатли бир манзара водийни қамраган.

Тунда, соат ўн иккиларга бориб сув жуда авжига минди. Қирда, тепаликларда жон ҳовучлаб, болаларини қучоқлаб ўтирган одамларнинг кўзи пастдаги водийда, Чортоксой ўзанида. Ҳеч нарсани писанд қилмай, кўприкларни, темир йўлларни бураб оқаётган сув бу ерда ҳам ҳоким эди. Табиатни енгамиз, табиат инсон ҳукмига итоат этади, деган гапларнинг бу ерда акси бўлди. Битта хато — осойишта, ложувард, осмон каби тиниқ сувни жунбишга келтириб, аждаҳога айлантириди. У халқ бошига мислсиз мусибат солди. Соат 2—3 ларда ҳам сувнинг қаҳри пасаймади. Тонготар, соат 4—5 ларга бориб сув тошқини жазавасидан тушшиб, пасая бошлади. Чорток водийсида ўкираётган аждаҳо пасайиб, тинчили. Ҳамма ёқ қуйқа сув, аммо бақириб, шовиллаб оқишилар тинчиган эди. Катта ер ўртасида тиззасидан сувга ботиб турган раис Қораскон томон юра бошлади. Унинг қўлида каттакон таёқ, балчиқ тўлгани этиги билан аzon маҳали шалоп-шалоп этиб юриб, қишлоқ ичига кирди. «Нима бўлди ўзи? Наҳотки, бир кечада шунча даҳшатли воқеа? Қишлоқлар чўқди, не-

ча минг гектар пахта майдонлари сув остида қолди. Янги ғўзалар чирқираганча ботқоқ остида қолиб кетди... Қўшини қирилиб, енгилган, қиличи синиб, қалқони тешилган саркардадек, раис сувда шалоп-шалон қадам ташлаб, ёлғиз ўзи қишлоқ томон келарди. Шунча мусибатни худо юбордими? Бу худонинг қаҳрими? Худо ўз бандаларига мунча жафони раво кўрмаса? У Кораскондаги эшон сағанаси ёнидан ўтаркан, шундай овозлар қулогига эшитилгандек бўлди. Бу фожиада Ҳазратов қўли борлигини раис билмас эди. Агар у билганида ҳозироқ самолётда учиб, Тошкентга келар, ундан автобус билан Чорвоққа чиқиб, бу ерда савлат тўкиб юрган Ҳазратовни гирибонидан ушлар эди. У ўша номардни то Намангандагача, ундан Чортокқача судраб олиб келарди. Ҳа, судраб олиб келарди! Бу ердаги бутун фожиани кўрсатарди, ундан кейин оёгининг остига олиб тепкиларди. Бир замонлар халқ бошига фожиа келтирган қўрбошини ҳам жамоа оёқ остига олиб, янчиб ташламоқчи бўлган эди. Халққа зиён етказгандарни халқ қўлига бериш, халқнинг ўзи жазолаши тўғри бўларди, дерди раис.

Бу фожианинг сабаблари текширилмоқда. Даствабки тафсилот ҳақида маъмурий орган облости партия ташкилотига қўйидаги мазмунда докладнома ёзди:

«Мазкур йилнинг Биринчи Май куни маҳаллий вақт билан соат 20 да Чорток сув омбори тўғони ўпирла бошлади. Тўғон бузилишининг олдини олиш ва сув тошқинига йўл қўймаслик учун барча эҳтиёт чоралари кўрилди. Шунга қарамай тўғонни бузилишдан сақлаб қолиш мумкин бўлмади, сув тўғонни бузиб, Чортоксой бўйлаб мислсиз суръат билан оқа бошлади.

Сув тошқини хавфи маълум бўлгач, Чортоксой атрофида яшаётган аҳоли огоҳлантирилди, шунингдек, бу ҳақда қўшни Уйчи ва Намангандаги районлари ҳамда Намангандаги шаҳри аҳлига ҳам хабар берилди. Жамоатчиликнинг уюшқоқлик билан қилган ҳаракати натижасида зудлик билан 60 кишидан иборат оператив, техник воситалар билан таъминланган ОВД шахсий состави йифилди. Ленин колхози, Ойқирон ҳамда Кораскон қишлоқ Советлари ва Чорток посёлка Совети биргаликда халқ қўнгилли дружиначилари аҳолини хавфли зондан шошилинч олиб чиқишида фаол қатнатдилар. «Чорток» санаторийиси биноларига бирма-бир кириб чиқишиди. Бу ишда уларга қишлоқ Советларининг ГО-20

деб номланган 4 та овозни кучайтириш асбоби, 3 та радиостанцияси қўл келди.

Умумий тартиб органлари ўз вақтида ҳаракат қилганлари натижасида, байрам куни бўлишига қарамай, сув тошқини бўлиб ўтган жойларда бирорта ҳам тартиббузарлик ҳоллари рўй бермади. Барча ташкилий ишларда ОВДнинг шахсий состави ҳамда қишлоқ Советларидан жалб этилиб тузилган дружина аъзолари мардлик ва фидокорлик кўрсатдилар...»

XXXVI боб

«МУРДОР ҰЛУРМУ ВАҲР ЕТУРСА КИЛОВ ЛАБ!...»

Хотинининг Хайрушка билан гап бўлганини эшигтан Қоражоннинг дарду дунёси қоронги бўлиб кетди. У аввал ишонмади, лекин ўртада шайтон бор... У ўйланиб қолди. Бориб ўша «суюқоёқ»нинг юзига тупуриб, Хайрушканни дабдала қиласамикан? «Йўқ, исбот керак,— деди ўзига-ўзи.— Қанақа исбот? Бу нарсани исботлаб бўладими? Шармандалик!» У Қўнғирбуқа чўққисига чиқиб, орқадаги тик жарликка ўзини ташлаб юбормоғчи бўлди. Дунёга келиб, ғурбатдан бўлак нима кўрдим?! Бир ишонган кишим, севикили инсон шундай сотқин бўладиган бўлса, дунёning нима қизиги бор?! Агар унинг ўйнаши ўша Хайрушка қамалмаган бўлганида нима қилишимни ўзим билардим! Мен бир ёнган одамман! Мен бир ўлиб кўрган одамман — менинг учун ўлимнинг қўрқинчли томони йўқ, бошқаларнинг оёғи қалтирайди. Наҳотки, эътиқодимиз бир, фронтчи Милтиқбой аканинг қизи шунаقا бўлса?! Наҳотки, у ҳирсга берилиб кетди?! Унинг хоинлик қилиши асло мумкин эмас эди-ку! Ваъдаю вафо қани? Еки мен, бир чандиқ одам... ёқмай қолдимми? У менинг қучогимда ҳамма нарсани унутарди, дунёда ёлғиз сиз ўзингиз, дерди-ку?! Бу гаплар ёлғонмикан? Бир ой, ярим ойга чидолмайдиган жувонларданмикан? Бу қандай шармандалик! У ўзининг эркаликларини, ёқимли қилиқларини Файзулла Аҳмедович уйида ҳам қилган. Шилдир Хайрушка унинг изига тушиб, лақиллатган. Наҳотки,

¹ Ит тилини теккизгани билан денгиз ҳаром бўлиб қолармиди? (Оғаҳий.)

аёллар шундай ожиз, алдаганга, хушомадга учади? Наҳотки, муҳаббат деган нарса вақтингчалик, уни дарроз ўзгартириш мумкин? Наҳотки!.. Наҳотки!.. «Турмуш — ўтмас арра билан қуриган тўнкани қирқиш — эр бир томон, хотин бир томон...» — деган эди-ку шоир. Амир Равнақ ҳам Қоражоннинг кўзига ёмон кўриниб кетди. Бу одам Гулгунни гўзал деб мақтаб, шеърлар ёзди. Сен шоир бўлсанг, унинг ҳуснини мақтамай, меҳнатини куйлаш керак эди, садоқат ҳақида шеър ёзиш керак эди! Оҳ, ўлдим, куйдим, деб ёзиб, ёшларни бузиб юбораётисиз!

Имзосиз хат... Бу хат Қоражоннинг бағрига урилган ханжар бўлди. У, мана, бир неча кундан бўён жонини қўярга жой тополмайди. Бу гапни ҳеч кимга айттолмайди ҳам. Ўша «базми жамшид...», Файзулла Аҳмедович қизлари ва бошқа жувонлар ўртасида айтилган эски қўшиқлар, «Ака, ёшман, ёмон йўлга бошламанг...» деган ашула, зиёфатнинг тафсилоти, Хайрушканнинг ошинаси — киши билмас жуда бойиб кетган райпашчеторг мудири ҳовлисидағи базм, бу ерга Обакиҳоннинг келгани — бари, бари маълум бўлди.

Қоражон беихтиёр тишлигини тижирлатди. Бу чириш-ку! Бу, текин томоққа семирган «бойваччалар» уйига Гулгун қайси юз билан борди экан?! Наҳотки, баъзи шаҳарликлар шунаقا бўлиб кетган? Мен нодон нега хотинимни шаҳарга юбордим? Мутлақо рози бўл маслик керак эди! Афсус! Минг афсус!

Ўша беибо қўшиқ, имзосиз хатда ёзилганидек, Қоражон қулогига эшитилиб, газабланди. Амир Равнақнинг: «Токдан вақтида узумни олинмаса, елини тўлиб кетган сигирдек занглар азоб чекармиш...» — деган гапи ҳам Қоражон хаёлидан ўтиб, уни яна мавҳум, қоронги ва шубҳали хаёллар қуршади. Беибо қўшиқ! Унинг боши қотиб қолган, бошини икки кафтига олиб, тинмай ўйларди. Ёки ҳаётнинг шундай пасту баланд, ҳақу ноҳақ томонлари билан келишиш керакми? Хотининг чиройли бўлса, унинг шундай куйдиришларига бардош бериш керакми? Ҳаёт ўзи шунаقا, кўплар мана шундай «ҳаётнинг инжиқликлари»га кўниккан, бўлмаса яшаб бўлмайдими, дегандай бир овоз ҳам эшитилиб кетди...

Қоражон ҳозироқ Тошкентга югурмоқчи бўлди. Аммо бир бўлак муз юрагига ёпишиб, совитди. У Тошкентта эмас, яна ўз қишлоғига жўнади,

Қиши. Ерлар оппоқ қор. У даралар оша қишлоққа келарди. Узоқда Чирчиқ шовиллайди. Хўжакент тепасидаги қоялар қора девларсимон хўмрайиб туришарди. Довон оша сўқмоқ йўлда кетаётган Қоражон олдидан йўлни кесиб бир нима ўтгандай бўлди. У аввал эътибор бермаган бўлса ҳам бир лаҳзадан сўнг эти жимирилашиб кетди. Бу нима? Тик қоятошлар ёнига яқинлашганида бояги шарпа — қорамтири «ит» яна лип этиб йўлни кесиб ўтди. У чиябўрига ўхшарди. У Қоражоннинг юзига бир қараб қўяру яна қор устидан чопиб, гойиб бўларди. У итми, чиябўрими — билиб бўлмасди. Бу шарпа Қоражон юрагига қўрқув солди. Асаблар қақшаб, руҳий азоб чекиб юрган киши кўзига шарпалар кўринаверади, ҳар қандай иродали одам бўлса ҳам ожизлик жарлигига юмалай бошлайди. У қўрқмади, унинг энди қўрқадиган нарсаси қолмаган эди, на шарпа, на бўри ва на жонига қасд қилган йўлтўсарлар қўрқита оларди! У ёлғиз қоялар оралаб ўз қишлоғига борарди. Қишлоққа кираверишда, эшик тепасига шинамгина қилиб солингган болохонада чироқ ёниб, дуторнинг ҳазин овози эшитиларди. Бу Холмурод деган муаллим йигитнинг уйи. Бешта фарзанд кўрган бу йигитнинг вафодор хотини бултур рак касалидан ўлди. Майда болалар ичиди қолган Холмурод болаларини ухлатиб, тепасига кампирни қўярди-да, ўзи эшик тепасидаги болохонага чиқиб, бозиллаган сандалда эртанги дарсга тайёргарлик кўтар, ўқувчиларнинг иншосини текширади. Ишларини битиргач, қозиқдаги дуторини олиб, юракдаги дардини титроқ торлар тили билан айтарди, йиғландек бўлиб, фарзандлари баҳтини кўриб қувнолмаган вафодор хотинини эсларди.

Қишлоқда кўп эшиклар занжирланмайди. Қоражон бир муддат кўчада туриб, дутор навосини тинглади. Дутор дам юраги тўлиб ҳўнгиллаганга, дам эзилиб йиғлаганга, дам қайнаб-қайнаб гаплашганга ўхшарди. Дам чертмакка ўтиб, ўша жонон зарда билан юриб чиқиб кетганга; дам елкасига осилиб, ўпич бераётганга; дам буралиб, иффат билан кулиб турганга ўхшарди.

«Ҳар ким ўз дардини эслаб чаларкан-да,— деди қишлоқ кўчасида тунда ёлғиз қаққайиб турган Қоражон,— мана, азизим Холмурод, иккимиз ҳам бир хил, иккимиз ҳам ўз жуфтини йўқотган оҳулардек дилимиз бўзламоқда, дилимиз ўртамоқда. Лекин иккимизнинг гамимиз икки хил: биримиз вафодоримизни йўқотдик, биримиз бёвафони...»

Қоражон эшик орқасидаги лопиллаб турган тахта зинадан кўтарилиб, ошнаси ёнига кирди.

- Ия, Қоражонмисиз?
- Ҳа. Ассалому алайкум!
- Салом!
- Дуторингиз овозини эшитиб, эшигингизни босиб ўтиб кетолмадим.
- Хуш келибсиз! Қани, қани, марҳамат!
- Икки кун дам олиш. Шу сабабли кампирни кўриб кетай, деб келаётганим.
- Машинангиз йўқ, пиёда?
- Ҳа, дўстим, пиёдаман. Участка бошлиғи вазифасидан бекор бўлганман. Ҳозир «БелАЗ»да ишлайпман. Холмурод индамай қолди. Бир лаҳзадан кейин у пастга тушиб, чой олиб чиқмоқчи эди, Қоражон тўхтатди.
- Безовта бўлманг. Менга «Чўли ироқ»нimi ёки ўзингизга ёққан бирон куйни чалиб беринг, илтимос қиламан. Мен дуторни жуда соғиниб қолганман, дўстим. Бир чалинг! Менга бошқа нарса керак эмас.

Холмурод дуторини қайта қўлга олди.

Тун. Жимжитлик. Узоқдан шаршара овози келарди. Аҳён-аҳёнда қари бир кўпракнинг эринчоқлик билан вов-вов деб қўйган товуши эшитилади. Тоғ оралиғидаги шинам қишлоқдаги хоналардан бирида ўзбекнинг жон олгувчи сози — бебаҳо дутор овози янгради. Бошини солиб, хаёл дарёсига гарқ бўлган Қоражон кўз олдида Гулгун дам кулиб, ҳазил-мутойиба гаплар айтиб, орқадан келиб Қоражон кўзларини маҳкам бекитиб, қулоқларини секин тишлаб қўйгандек бўларди. Бир дамдан сўнг, у бир гуноҳкор одамдек йиғлар, юзларига қаролмасди. У йилгариги Гулгунга ўхшамас, унинг лаблари бўялган, кўзлари ости, қовоқлари кўкариб кетган эди. Бир лаҳзадан кейин эса беибо, бети қаттиқ қизлардек Қоражонга чақчайиб қарап, суюқоёқ жувонларга хос қаҳ-қаҳ уриб, сохта кулар ва ҳеч нима бўлмагандек, ёлғон гапиради. Хаёл ичидаги Қоражон, ё тавба, деб ёқасини ушлагандек бўларди, одам ҳам шундай тез ўзгариб қоладими? Жувонлар бузилиб, нопок йўлга ўтиб олгач, ёлғон гапиради, гапга уста бўлиб, ҳар қандай шароитда ҳам пинагини бузмай, шубҳаю ишончсизликни бир лаҳзада йўқотишга уринади. Бўянади, безанади, тез-тез янги кийимлар кияди, меҳнату ўқишдан кўра айшу ишрат, базму кўнгил очарларни истайди. Гапга уста, келишган йигитларни ёқти.

ради... Гулгун унинг назарида мана шунақа бир уста жувон бўлиб қолгандай...

Холмурод билан Қоражон аллавақтгача бирга ўтиришди, ўртада гап кам бўлди. Кўпроқ ёлғиз дуторнинг ўзи гапирди. Ҳамқишлоқларнинг дардлари бир-бири а ухшаш эканлигини сезиши. Муаллим йигит Қоражонга тикилиб туриб, дард чекаётган бир ўзи эмаслигини пайқади.

Икки соатлардан кейин Қоражон ўрнидан қўзғалиб, ўз ҳовлиси томон юрди. Унинг қулоғида дутор оҳанглари, кўз олдидা эса бевафо Гулгун...

Шанба, якшанбани қишлоқда ўтказган Қоражон душанба куни Чорвоққа тушди; гаражга келиб, ўз «БелАЗ»ини минаётганида бошлиқ унинг тезликда Бошқармага боришини, шаҳардан чиққан бир одам кутиб ўтирганини маълум қилди. Қоражон ҳайрон бўлди. Шу муддат ҳовлида эгасиз шўппайиб турган узининг «ТТ»сига минишга рухсат олиб (бу эски машинани Ҳазратовнинг кўнгли тортиб минмаган эди), унга чиқди-да, гуриллатиб Бошқармага жўнади. Бунда уни кутиб турган Амир Равнақни кўриб, ҳайрон бўлди. Улар ҳол-аҳвол сўрашгандан сўнг, божа (Файзулла Аҳмедович)нинг инфаркт бўлиб ётгани, аҳволи ёмон эканлигини, ҳамда уларнинг ҳовлисидан чиқиб кетган Гулгун бегуноҳ экани, уни ташлаб қўйиш яхши эмаслигини айтди. Файзулла Аҳмедовични ҳам, рафиқангизни ҳам кўришингиз керак, деди қатъий. Шоир жуда ҳам ҳаяжону таҳликада эди. Қоражон уни бундай ҳолда ҳеч кўрмаган эди. У яна бир бориб ўз қадрдони Файзулла Аҳмедович билан кўришиб, хайрлашиб қолмаса жуда армон бўлади, деди.

Қоражон аҳвол жиддийлигини, қадрдон кишиси қили устида турганлигини сезиб, шу ердан гараж бошлиғига телефон қилди-да, Амир Равнақни ўз машинасига солиб, ғизиллаганича шаҳарга тушиб кетди. Орқада шоирнинг машинаси келарди. Хўжакент билан Товоқсой оралиғига тезликни юз-юз йигирмага чиқаришиди. Ундан сўнг то Исканларгача юзда, ундан то Дўрмонгача саксонда келиши. Бир ярим соат деганда Музаффаровлар ҳовлисига етиб келишиди. Улар Файзулла Аҳмедович билан бир-икки имо билан гаплашишгач, Таманно Қоражонни ҳовлига чақириб, эрта билан отаси тайинлаган гапни айтди: «Гулгуннинг ҳеч қандай гуноҳи йўқ, у жуда покиза жувон, извогарларнинг гапига қулоқ солмасдан, ҳозироқ бориб, уни дугонаси

уийдан олиш лозим». Бугун эрта билан Файзулла Аҳмадович: «Гап бериб қўйишимдан» олдин, мен бу англашилмовчилик йўқолганини эшитишим керак»,— дебди. Үғлининг қамалганидан кўра ҳам Қоражон оиласининг бузилиши унинг учун жуда оғир эди. «Қонунний туғилиб, обрў билан ўлиш баҳт», деб юрадигац Файзулла Аҳмадович, шоирнинг ҳазиллашишича, қонунний туғилиб, обрў билан тупроққа боришни кутиб ётарди.

Музаффаров ёнида бир муддат турган Қоражон катта, кўркам, «музей» деб аталадиган хонадан ҳовлига чиқди, Марҳаматхон аяга далда бериб, Файзулла Аҳмадович тузалиб оёққа туриб кетадилар, деди. У Музаффаровлар ҳовлисига кириб, бир соатлик вақт ичидә бир дақиқа ҳам қовоғини очмади. Турмада ўтирган ярамас ўғил ўз қилмиши билан отани инфаркт ға Гулгунни бадном қилди. Мунча касофат экансан, деб йиғларди Марҳаматхон ўғлининг қилмишларидан куйиб. Таманно аллақачон Қоражон машинасига чиқиб ўтишарди. У «виждон амри», софдиллигини изҳор этмоқ мақсадида Гулгун кўчиб борган Пучуқ қиз уйини кўрсатиб, Қоражон билан Гулгунни учраштириб қайтиб келмоқчи эди. Бу ишни Марҳаматхон унинг қулоғига роса қўйган. Амир Равнақнинг Чорвоққа боришини ҳам Марҳаматхоннинг ўзи ўтиниб илтимос қилган эди.

Йўлда Таманно ўртадаги сукунти бузди.

— Гулгун ҳақидаги гап — пуч гап! Мен бу билан хонадонимизни ҳимоя қилиб, сизни хотинингиз билан ярашиб, тинч бўлинг, деяётганим йўқ, мен ҳақиқатни гапирияпман. Мен ҳамма вақт Гулгун билан бирга бўлганман. У жуда ҳам яхши қиз, покиза қиз. Агар мен эркак бўлганимда, сизнинг ўрнингизда бўлганимда, уни бунчалик ташлаб қўймас эдим... Қасам ичib айтамки, Гулгунда гуноҳ йўқ! Гулгун покиза!

Қоражон индамади. Навоий кўчасидан ўтишгач, Таманно «ўнгга», «чапга», деб йўл кўрсатиб турди. Ичкарилиқдаги бир ҳовли эшиги ёнида машинани тўхтатишиб, дарҳол ичкарига киришди. Уларнинг ҳовлига киришганини кўрган Пучуқ қиз югуриб эшик очиб чиқди. У Таманнони танирди. Чандиқ Қоражонни ҳам бир кўришда таниди. Шу йигитни Гулгун бир ҳафта уйдан чиқмай, нигорон бўлиб кутган эди.

— Келинглар!

— Гулгун борми? Чақиринг!

— Яқинда чиқиб кетган эди,— деди Пучук қиз аға суслангандай,— сиз ўртоқлари бўласизми?

Қоражон бош иргади.

— Боядан бери хат ёзиб ўтирган эди. Бечора сизни жуда кутди. Кечадан буён тинмай йиғлади. Шунча овутсам ҳам бўлмади. Ўқишга ҳам бормади. Столни устида сизга хат ёзган, конвертда, менга кўрсатмади.

Қоражон юрганча хона ичига кириб, стол устида ги конвертни олди. Конверт устига «Қоражон акамга» деб ёзилган. Қоражон ёпиширилган конвертни дарҳол йиртиб, хатга кўз ташлади:

«Бебаҳо баҳодирим Қоражон ака! (Гулгун аввал «эрим» сўзини ёзиб, уни ўқиб бўлмайдиган даражада ўчириб, ёнига «Қоражон ака»ни ёзган эди.) Мен Сизни анча кундан буён кутдим, энди маълум бўлишича, Сиз мендан юз ўғирдингиз, жирканяпсиз. Аслини олганда мен бегуноҳман ва Сизнинг илгариги Гулгунингизман. Мен ҳеч қачон Сиздек бир олижаноб одамни, юракдан севган кишимни бир фирибартга алиштирган эмасман, мен ҳали бу даражада пасткашликка ўтмаганман. Мен хиёнат қилмаганман. Лекин мўътабар хонадоннинг талтайган, ахлоқи нопок боласи ўз хулқи билан мени бадном қилди. Сизнинг юрагингизда шубҳалар пайдо бўлди, иғвогар кимсалар учун гап топилиб қолди. Мен ўзим қийинчилик билан ўсан бир қишлоқ қизи эдим, ҳаётда омади келмаган, бир инвалид кимсаннинг баҳти очилмаган фарзанди эдим. Сизни севиб, сизга тегар эканман, баҳтимни топдим, деган эдим. Бу баҳт мени ўқишга, олий маълумот олишга унданган эди. Начора, қисматим ёмон экан. Мен ҳаётни бир майсазорга ўхшатибман, аммо бу майса гуллар ичида чўкиртаклар, заҳарли тиканлар борлигини билмабман. Майли, қисматим шу экан... Отамни, Сизни уялтиришдек азобга чидолмайман... Мен номи қора, ахлоқсиз қиз, деган маломатни эшитишни истамайман! Мен покизаман! Иғвони факат сўзим билан исботлаб, асоссизлигини айтишдан бошқа чорам йўқ. Акажон, мени кечиринг. Мен Сизни севаман. Гуноҳим йўқ. Мени ёмон сўз билан эсламанг.

Адо бўлган Сизнинг Гулгунингиз».

Қоражон хатни ўқиб, охирига етмасданоқ ёнида ҳеч гапга тушунмай, ҳайратланиб турган Пучук қизга қаради:

— Қаёққа кетди?

— Билмайман. Анави...

— Хўш? «Анави» нима?! Нима дедингиз?!

— Хатни ёзида йиглаб чиқиб кетди. Шунча овутсам ҳам ҳеч бўлмади. «Мен энди ҳеч кимга керак эмасман. Иккинчи бор турмушим бузилиши... Мен ҳозир кутубхонага бораман, ундан сўнг қишлоққа чиқиб кетаман...» деди, холос. Лекин кейинги пайтларда Анҳор бўйига бориб дарс тайёрлаётган эди. Уша жойни менга кўрсатган. Қишида ҳам сув бўйига борасанми, деб сўрасам, шу айқирган сув Чирчиқдан, бизнинг Сижжакдан ўтадиган Писком билан Чотқол дарёлари қўшилиб, Тошкентга келади, деган эди. Лекин Писком билан Чотқол суви қўшилса ҳам, одамлари қўшиломаяпти, деб кулган эди. Бечора бунда етим қўзидек ичдан бўзлаб юрибди. Юрагида гапи кўп, кимга айтади. Мен ҳеч нарсага тушунмаётирман. Сиз ҳақингизда доимо энг яхши гапларни айтарди. Сизни жуда кутди. Уни ташлаб қўйиб яхши қилмадингиз. Тошкентга келиб ўқишининг шунақ маشاқватлари бор, чидаш керак, дедим мен унга.

— Уша ерга борайлик! Тезроқ бўлинг! — Қоражон ёш болалардек ҳовлиқиб, ранги ўчиб, тезроқ эшикка чиқишга интиларди. Үнинг гапларидан латта ҳиди келётганини бояёқ пайқаган, ўзини қўярга жой тополмай, қақраб, лаблари ёпишиб, тез-тез Таманнога маъносиз қараб қўяди.

— Кутубхонага борамизми? — Пучуқ қиз сўради.

— Йўқ, сув бўйига!

Улар учов машинага ўтириб баланд кўпприк остидан айқириб оқаётган Салор томон югуришди.

— Чиқиб кетганига қанча бўлди? — машинада сўради Қоражон.

— Бир соатдан мўлроқ...

* * *

Музаффаровлар уйидан чиқиб кетгандан кейин Гулгун билан Қоражон фақат бир марта институтда учрашишди. Бу учрашув жуда ҳам совуқ бўлган эди. «Мен Тошкентда туролмайман, мен ўқишини ташлаб кета қолай...» — деганида Қоражон заҳарли сўз билан: «Сиз бу ерга ўқишига келгансиз, фақат ўқишига! Шуни биласизми!» — деган эди. Ясан-тусан, қувнаб юрган Гулгун бир зумда руҳи сўниб, Хайрушканинг шилқимлиги.. Қоражон қулоғига етганини фаҳмлаган эди. Гулгун

миқ этмай, ерга қаради. Бу ерга қараш Қоражон юрағидаги шубҳалар бўронини кучайтириди. Бошқа бирор гап айтиб, Гулгуннинг дилини оғритгиси келмади, чукки бир нарсанни обдан пишиқ билмай туриб, кишига айбтақаш — фазилат әмас. Бу учрашувда Қоражон уннисизлади, бу ҳам Гулгун қалбига наштар бўлган. «Пулнингиз борми?» — «Ҳа, бор. Етарли...» — деган эди Гулгун, гарчи ёнида пули тугаган бўлса ҳам. Шундан кейин улар совуққина хайрлашишди. Қоражоннинг барча илтифотлари сохта, унинг юраги тўла алам, шубҳаю ишончсизликларга тўлганини Гулгун жуда яхши пайқаб турарди. Ўша, Хайрушка деган ярамаснинг Ҳазратовлар билан ҳам танишлиги, алоқаси борлигини англаган. «Хайрушканинг шилқимлиги,— деди ўзига-ўзи Гулгун,— демак, Қоражон қулоғига бориб етибди-да... Энди нима қилиш керак? Тўғрисини айтиб, йиғлаш керакми? Үқишини ташлаб, қишлоққа кетиш керакми? Ёки Қоражонга димоғ қилиб, агар у шубҳаланиб, Хайрушкага ишора қиласа, лўлилик қилиб, бақириб, уришиб ташлаш керакми? Ёки ялиниб, узр сўраш керакми? Нима қилмоқ керак?» Гулгуннинг боши қотиб қолган эди. Аммо у Қоражонни яхши кўярар эди. Унинг эркалашларини, кучли ироди, оқ кўнгиллигини ҳаммадан юқори қўярди. Наҳотки, шу шилқимлик сабаб бўлиб, турмушлари бузилиб кетса?! Бундан бир неча ой илгари ўқищдан чиқишини мўлжаллаб келган Қоражон билан кинога тушишганида, залда илгариги эринекин Гулгуннинг «бир ойча умр қилиб, муросалари келишмаганидан» хабари бор эди. Рўпара келиб қолган бу кимса олдида у қизариб кетди, лекин нима қилишини билмай Қоражонга гап қотиб, унга эркалангах эди. Фавқулодда бундай қайноқ ҳаракатни кўриб, Қоражон кулиб қўйган эди. Гулгуннинг жуда ҳам очи-либ, чиройли бўлиб кетганидан у албатта куйган. Аммо юзлари чандиқ, ёши ҳам ўтинқираган одам билан юрганига ҳайрон бўлиб: «Юрадиган бўлиб кетибдй», деб ўйлаган бўлса ҳам керак... Бу, ниҳоятда сирли ҳолатни Қоражон сездимикан? Агар сезган бўлса, унинг бирумда қизариб кетиши эрида яхши таассурот қолдирмаган... Қоражоннинг совуқ хайрлашиб, унинг ёнига келмай қўйганига шу ҳам сабаб бўлдимикан?

Ўн кундан бери Гулгун Қоражонни кутади. Қоражон унинг тушларига ҳам кирди. Ҳамма гапни очиқ айтмаса-да, ойисини жуда соғинганини, уйдагилар ун-

дан хафа бўлишдими, келишмаётганини дугонаси Пузук қизга айтган эди. Дугонаси фақат ойисини эмас, эрини ҳам соғинганини биларди. Қишлоққа бориб кела қолсанг бўлмайдими, деса, Гулгун дарслари кўплигини баҳона қиласди. Бултур шу кўчалик бир жувон ўзини ўтиб кетаётган троллейбус тагига ташлаганида, троллейбус ҳайдовчи йигит эпчиллик билан тормоз берриб, югуриб тушиб, ёш жувонни қутқариб қолган эди... Нега бундай қўрқинчли, фожиавий хаёллар қуршаётганини ўзи ҳам билмасди. Танкда ёнган йигитни шубҳа музликлари ичига отаётганидан ўзи қийналарди. Бир одамга шунча жафоми? Унинг шунча кўргиликлари ўзига етмасмиди? Уйланиб олиб, тинчгина яшайман, деганда яна шубҳалар... Бекорга хафа бўлаётганини унга тушунтириб бўладими! У бир шубҳали нарсани обдан текшириб, ишонмагунча тинчимайди. уни қандай қилиб ишонтириш керак! Гулгун боши берк кўчага кириб қолди. У нима қилишини билмасди. Ҳаммадан ҳам севикли кишиси — эрининг юз ўғирганлиги ўлимдан ҳам оғир бўлди. Мана, ўн кундирки ундан дом-дарак йўқ. У энди келмайди...

Гулгун хат ёзди-да, пальтосини кийиб, момиқ рӯмоли билан бошини ўради. Унинг хаёли жойида эмас эди. Нима қилаётганини ўзи билмасди. Гўё кутубхонага кетаётган бўлиб, қўлида папка, қор учқунлаб турганда тўппа-тўғри айқириб оқаётган Салорнинг баланд кўприги устига келди. Бунда сув икки катта туннелга шигиллаб кириб, юз метрча наридан айқириб, ваҳима билан чиқиб кетарди. У кўприкнинг чўян панжаралариға қўлинни қўйиб, сувга тикилди: наҳотки, унинг қисмати шу бўлса? Наҳотки, у бир неча минутдан сўнг гойиб бўлиб, ёруғ дунёдан ўтиб кетса... Бадномлик, шармнинг совуқ қўли уни сувга итара бошлади, қандайдир бир овоз: «Ташла ўзингни, э, қўрқоқ, ташла! Бир лаҳзадан сўнг сен бу машаққату, ҳақорату гапсўзлардан тамоман қутуласан! Сен ҳомиладорга ўхшаяпсан, бу ўша ярамас ўйнашидан бўлган, деб эринг ҳам тан олмай сени ҳақорат қиласди. Бола кимни ота дейишни билмайди... Ташла, бу ҳақоратдан бир йўла қутуласан» — дегандек бўларди. Аммо, ёруғ дунё, ҳаёт, Сижжакда ўтирган онаси унинг елкаларидан ушландек бўларди: «Тўхта, тўхта, жоним қизим! Сен шайтон васвасасига учрабсан, сен яшашинг керак! Сен ҳаммамиз учун ҳам яшашинг керак! Сен юрт учун ҳам яшашинг керак! Сен комсомолсан, комсомол тарбияси

қани?! Йиртқич душманлар билан курашда матонат күрсатган комсомоллар авлодидансан-ку! Наҳотки, сен шу даражада иродасиз бўлиб қолдинг! Сенинг отанғим? Сенинг отанг юрт қаҳрамони! Орқангга қайт, болам! Иродали бўл!»— деган овоз қулогига эшитиларди.

Қор ёғарди. Изгирин. Кўчалар кимсасиз. Ҳар замон-ҳар замонда кўприк устидан трамвай гумбурлаб ўтиб қолади. Ундан кейин троллейбус ҳам. Айқириб оқаётган Салор кўпригига ёлғиз турган қизга ҳеч ким эътибор бермасди.

У энди ортиқ хаёллар талошига бардош бериб ўтирамади. Васвасаю шубҳанинг совуқ қўли уни итара бошлиди; у кўприкнинг чўян панжаралари устига чиқаётганида аллақандай бир машина узоқдан нурли кўзларини қадаб, юрганча кўча қоидасини бузиб йўлкага чиқди-да, кўприк панжараси олдида турган Гулгуннинг ёнгинасида тўхтади. Машинадан отилиб чиққан Қоражон Гулгун қўлидан ушлади. Улар жим, садосиз бир-бирларига қараб қолишиди. Машинадан тушган Таманно билан Пучуқ қиз ҳам Гулгунга яқин келди. Улар ҳам нима дейишни билмай, сукут қилишиди. Бир лаҳзалик саросима, сукутдан кейин Гулгун Қоражон қўлларидан билагини олди.

— Ҳа, нима қилиб юрибсизлар?— сўради Гулгун дугоналаридан. У ҳамма нарсага тушунган бўлса ҳам ўзини соддаликка солиб, пинагини бузмади.— Мен кутубхонага кетаётib, бир лаҳза бунда тўхтаган эдим...

Лекин кутубхонанинг бошқа томонда эканини иккι дугона яхши билишарди.

— Кетдик!— деди Қоражон қизларни машинага таклиф этиб.

Уч дугона машинага чиқа бошлади. Гулгун ҳам чиқиб, йўлда: «Мен кутубхона ёнида тушиб қолишим керак...»— деди бегона одамлардек Қоражонга лоқайдлик билан. Қоражон индамади. Йўл-йўлакай Таманни, ундан сўнг Пучуқ қизни ҳам олиб бориб, эшиги ёнида машинадан туширди. Гулгун ҳам тушаётган эди, Қоражон унга мурожаат этди:

— Сиз жойингизда ўтиринг!

Гулгун нима қилишини билмай, жойида ўтириб қолди. Пучуқ қиз пастга тушиб, машинада турганларга хайр ишорасини қилди. Машина гуриллаганча жўнади.

Тоғ қоплони боласини тишлаб, қоялардан қояларга кўтарилиб, инига юрганидек, ўзининг эски «ТТ» ма-

шинасида йўлбарс сиёқ киши Гулгунни гўё елкасида кўтарганча тоғ томон жўнаб қолди. Енгил машина тасмадек йўлда гувиллаганча учиб борарди. «Бунда ме нинг нарсаларим бор, олишим керак...» Қоражон жа воб қилмади.

Улар иккови ҳам машина юнидаги миқ этмай ўтиришар, Гулгуннинг кўзи атрофда, ҳар замон-ҳар замон рулда ўтирган Қоражон чаккаларига ёмон назар билан қараб қўяр, ҳеч нарса демасди. Улар икки душман, икки ёт одамми ёки икки қадрдонми, билиб бўлмасди.

Машина шу юрганича икки соатлардан сўнг Чорвоққа кириб келди. Қоражон машинадан тушиб, ёнидан калитини олиб, квартираси эшигини очди.

— Марҳамат, киринг!

— Кирмайман!

— Киринг, илтимос қиласман!

Гулгун хонага кирди. Столлар тартибсиз, эски-туски кийимлар диван устида сочилиб ётибди. Ичкари хонадаги ўз каравотида янги модадаги пальто, қундуз қалпоқ, атлас ва тумба устида чиройли қутида атира. Кийимликлардан кўра ҳам тумба устида турган атири қовоғи солиқ, гаплашгиси келмаётган Гулгун диққатини тортиди. Қоражон ташқарига чиқиб, машинани ўнг томонга олиб қўяётганида Гулгун тумба устидаги атирини қўлига олиб кўрди. У француз атири «Зю-Зю» эди. Гулгуннинг юраги шифиллаб кетди. Бу нима? Бу жўрттага қўйиб қўйилганмикан? Ёки бу билан унга бир сирли нарсани эслатмоқчими? Гулгун атирини яна тумба устига, ўз жойига билинтирмай қўйди-да, хона ичидаги пальтосини ҳам ечмай тик тураверди. Эшикдан кирган Қоражон хона ўртасида сумкасини кўтарганча қаққайиб турган Гулгун ёнига келди. Унинг эътирозига қарамай, маҳкам бағрига босди. Гулгун шунча типиричилагани билан Қоражоннинг кучли билакларидан чиқиб кетолмади. Қоражон Гулгуннинг ёқут лабларидан ҳеч тўймай ўпарди. Қошлиридан, кўзларидан, дудоқларидан ҳам ўпарди. Гулгун, кўзларida ёш, Қоражон бағрида йигларди...

Бир зумдан кейин улар хона четидаги юмшоқ диванга ўтиришди. Шармдан юзлари қизариб кетган Гулгун кафтлари билан кўзларини бекитди. Қоражон хотинига суқланиб, соғиниб тикиларди. Унинг қўлларидан, кўзларидан ўпди:

— Менга қара, мени соғиндингми, йўқми?

Гулгун индамади.

— Бу атир сенга. Сенга олиб келдим. Буларни ҳам...— деди Қоражон ҳаяжонланиб.— Тошкентдан ол ганман. Олганимга ҳам анча бўлган. Бу француз атири. Ҳозир атир-упа магазинларидағи энг яхши атир шу экан.

Гулгун юрагидаги шубҳа йўқолди. Шу атир ўлгурудан бошланган фожия яхшилик билан тугагани юрагини тинчитгандай бўлди. Демак, шу кунларда магазинларда «Зю-Зю» сотилган экан, деди ўзига-ўзи. Бир муддатдан сўнг у эркаланиб, эри бўйнидан қучди, юзидан ўпди. Хотинининг оппоқ билаклари сиқиғида Қоражон мумдай эриб кетди. Гулгун бўлса хурсандчиликдан йигларди...

XXXVII боб

НИҚОБ ЙИРТИЛДИ

Гулгун Қоражон бағрида йигларди... «Агар сиз шундоқ ёруғ кунда менинг дилимни билолмасангиз, унда бу кўзнинг чиндан ҳам сўқирилигига ишондим...»— дегандек бўлиб, Қоражоннинг кўзларига тикилиб боқарди. «Мен осойишта турмуш кечирмоқчи-ман, минг-минг одамларнинг турмуши каби турмуши қуришни умид қиласман. Мен муҳаббатим, ҳаётим аллақандай романларга ўхшашини ҳеч истамайман! Менинг ёшим ҳам катта, лекин ҳаётда омади келмаган кишиман. Менинг қил устида юриб, рашку шубҳалар қилишга тоқатим йўқ! Бу ошиқ-маъшуқлик гирдобига мени ташлама! Мен бола-чақали, насиб бўлса келин-куёвли, неварали киши бўлишни, бошқа ўзбекларга ўхшаб ували-жували бўлиб яшашни истайман...»— дегандек бўларди Қоражон унинг кўзларига тикилиб.

Шу кундан бошлаб Гулгун Чорвоқда эри билан бирга яшай бошлади. У институтдан бир йилга академик отпуска олди.

«БелАЗ»да ишлаётган Қоражон ўзининг кундалис нормасини икки юз фоиз бажаарди. Мутлақо гаплашишни истамаслигига қарамай, кейинги кунларда унинг атрофида Қиёмхўжа Ҳазратов хира пашшадек айланишар, у билан сўрашиш, илгаригидек ошиначилик қилишга йўл қидиради. У участка бошлиғи валик

зифасидан олингач, бу қишлоқи аразлаб кетиб қолади, деб ўйлаган эди. У кетмади. Файзулла Аҳмедовичнинг: «Меҳнатнинг катта-кичиги бўлмайди, ишлаш керак! Тўғон қаддини гап билан эмас, иш билан кўтаряпмиз», — деганига амал қилди. Ҳамон шундай экан, мен қишлоғимдан ҳамма йигитларни бу ерга олиб келаман, деб ўнтага яқин ёнқўргонликларни бошлаб келиб, қурилишга ишга киритди. Улар ҳар ерда ишлашмоқда. Отпуска олган Гулгун қурувчилар шаҳар-часидаги поликлиникада фельдшер бўлиб ишларди. Бунда ҳаммага таниш врач Сергей Сергеевич Парадоксов Гулгунни ишга олиб, ҳомийлик қилди. Орадан иккита ҳафта ўтгач, тўғон устида Амир Равнақ пайдо бўлди. У шағал, харсанг тош ташиётган машиналар орасида ўралашиб юарди. Галстуғи қийшайган, бошида шляпа, бурнига кўзойнак қўндирган бу зиёлиниг-чанг-губор ичида юриши, баъзан тепаликдан пастга, дарё ва тоғ манзарасига тикилиб қолиши, қўлидаги дафтарчасига алланималарни ёзиши бунда ишлаётган шофёрларнинг, прорабнинг диққатини жалб этар; улар бу сергайрат зиёлига қараб кулиб қўйишарди. У кимнидир қидираверди ҳам. Улкан «БелАЗ»ига шағал ортиб, уни пастликдан вағиллатиб чиқиб келган Қоражон Мингбоевнинг кўзи шоирга тушди. У белгиланган жойга шағални тўккач, машинани четга олиб, кабинадан чиқди.

— Салом, шоир оғамизга, салом!

— Ассалому алайкум! Э, бормисиз, иним? Сизни қидиравериб оёғим қавариб кетди. Аҳволлар қалай? Ишлар, уй ичиларингиз? Кампир бақувватмилар?

— Ҳаммаси яхши.

— Сизга хушхабар олиб келдим, божа, яъни сиз билан менинг қадрдоним Файзулла Аҳмедович ўринларидан туриб ўтирибдилар. Врачлар рухсат берди. Бечора қирқ кун қимиirlамай ётди-я! Қари қиз овга чиқар, кетидан говга чиқар, деганларидек, бечора пенсияга ҳам қарамай, халқим, партиям учун, деб ишга тушган эди, касофат ўғлиниг қилмиши уни йиқитди. Яхши фарзанд юрт бойлиги, ёмон фарзанд эл бошига тушган бало. Маҳмудхўжа Беҳбудий «Падаркуш» асарини бекорга ёзмаганлар. Шунача, иним! Анча паронанда бўлиб, тарқалишиб кетдик. Энди зора яна бирлашсак, Милтиқбой оғамиз саломатмилар? У кишига ҳам божам салом дедилар!

— Файзулла Аҳмедович тезроқ тузалиб, ўридан

туриб кетсин! Отдек бўлиб, юриб кетсин! Иккинчи йиқилмасин!

— Яшанг, айтганингиз келсин,— деди илжайиб, Қоражоннинг илгаригидай Файзулла Аҳмедовични ҳурмат қилганидан мамнун, терисига сиғмай шоир.— Сизга салом айтдилар!

— Миннатдорман. Биздан ҳам салом айтиб қўйинг!

— Мен, азизим, яқинда Арманистонга, бир улуғ шоир юбилейига бориб келдим. Ўтган куни келдим. Тоғ орасидаги Гегарт ва Гарни маъбудаларини, ундан кейин Матенадорон¹га бориб, арман алифбосини яратган Месраб Маштоц² ҳайкалини, Мусо пайғамбар осмондан келиб тушган Эчмиадзин муқаддас монастирини ҳам бориб кўрдим. Худди мана бу ўзимизнинг Чорвоқ қўлига ўхшаш Севанни кўрдим. Кўп одамлар билан мулоқотда бўлиб, кўп нарса ўргандим. Тоғлари тоғларимизга ўхшаш экан. Аммо, арчазорлар билан қопланган ўзимизники чиройли. Ўзбек тилимиз ҳам жуда шеърбоп, сержаранг. Мен, азизим, шу ўзимизниң бекиёс Чорвоқ водийси ҳамда қурилиши ҳақида достон ёзаётирман. Бу ерга тез-тез келиб тураман. Бу ерда ишлаётган баҳодирлар ҳақида ёзиш иштиёқи тинчлик бермаяпти.

— Яхши иш қиласиз.

— Азизим, бу «БелАЗ» деган полвон қанча юк кўтаради?

— Қирқ тонна.

— О-о-о, отангга раҳмат! «Тасвири «БелАЗ» ёки «БелАЗ»— полвон» деган маҳсус боб ёёсам нима дейсиз?

— Зўр бўлади.

Амир Равнақ Қоражон «БелАЗ»ига яқинроқ бориб, уни бир айланиб чиқди. Кабинага ҳам кўз ташлади. Ундан сўнг бу филга ўхшаш улкан машинанинг кифтига чиқиб, ҳамма ёғига разм солди.

— Бу, маъво! Техниканинг қудратини қаранг-а! Агар шу бўлмаганда тўғонни қанча вақтда қуарардик?

— Эллик йилда.

— Азамат «БелАЗ» полвон! Бир вақтда, биз болалигимизда, Чигатой томонда Аваз полвон бўларди.

¹ Матенадорон — Еревандаги машҳур кутубхона.

² Месраб Маштоц — асримизнинг 405 йилида яшаган, арман ва грузия алифбосини яратган маърифатпарвар олим.

Беш пуд юкни кўтарганда ҳайрон қолган эдик. «Тасвири «БелАЗ» полвон» бобини мана шу тўғондан бошлайман. Тўғон кўзимиз олдида қад кўтариб, фалакка бўй чўзяпти. Фалакда «Союз — 5» учиб юрибди, бу Ер курраси устидаги катта уй — илмий лаборатория. Мана, азизим, биз қандай яхши замонда яшаяпмиз. Кўзимизга қуёш нури тушиб турибди, биз яшаяпмиз, яратяпмиз. Мен — материалист, реалистман. Ҳеч қачон илоҳиётга ишонмаганман. «Шариатсиз киши учса ҳавога, кангул берма анингдек худнавога...» деган эдилар ҳазрат Қулҳожи Аҳмад Яссавий. Мен бу мистик фикр-га қаршиман! Мана, сиз тўғону нур манбаи қуряпсиз. Яратувчи баҳодирлар ҳақида бизнинг улуғ шоиримиз мир Алишер Навоий бундай деганлар:

Чарх еткурди ою кундин ҳишт,
Ясалур деб ер узра етти беҳишишт.
Ҳар замон ўзга шакл этиб пайдо,
Шоҳ тамошосига бўлиб шайдо...

Мен, азизим, ўша шоҳман, мана мен тамошосига келдим. Совет шоирлари эркин, ҳалқ севган, ўз сўзли, бўюк мамлакатга эгадир. Шу сабабли мен мир Алишер Навоийни устозим дейман. Агар Навоий ҳазратлари ҳаёт бўлганларида «БелАЗ» полвон ҳақида ғазал ёзмай қўймас эдилар. Эзмаланиб, қимматли вақтингиски олаётганим учун узр, мен азизим Файзулла Аҳмедович-нинг ўлим тўшагидан бош кўтариб турганларига, яна сафимизга қўшилаётганларига ич-ичимдан қувониб, мана шунаقا қилиб юрибман. Кайфиятинг яхши бўлса, илҳом деган нарса ҳам тез кела қолади. Божэниг ту залаётганлари руҳимни кўтарди. Мана энди мен «БелАЗ» полвон ҳақида ёзаман. Худо хоҳласа, қайнатангиз Милтиқбой билан ҳам учрашаман. У зот жуда ажойиб, бебаҳо кимса. Шундоқ яхши одамларнинг ёргу дунёда соғ-саломат юришлари ўзи баҳт, ука. Сиз энди ишингизни қиласаверинг! Мен яна бирон соат бу ерда айланаман.

— Келинингиз шу ерда, бизниги киринг. Мен соат бешларда бораман.

— Албатта бораман! Мен севикили қизим, фарзандим Гулгунхон тайёрлаган чойдан бир пиёла ичиб, фотиҳа ўқимай кетмайман. Сиз ишингизни қиласаверинг! Мен бу ерда ғимирсиб юриб, «БелАЗ» полвонларни бир кўриб олай.

Қоражон Мингбоев кабинага чиқди. Мотор гурил.

лади. «БелАЗ» ер депсиниб, яна вағиллаганча каръер томонга жўнади. Тўғон устида йигирмадан ортиқ улкан машиналар, шиббаловчи «МАЗ»лар, бульдозерлар вағиллаб, тинмай ҳаракат қиласарди. Бошига қулоқчиқ, оёғига кирза этик кийиб олган прораб у ёқданбу ёққа югурап, Амир Равнақни мухбир хаёл қилиб, ўзини ишчан кўрсатарди. Прораб ортиқча ҳаракат қилиб, ўзини кўрсатишга уринмасин, барибир тўғон бошида ишлаётганларнинг ҳаммаси ҳам, дарҳақиқат, тупроққа беланиб, чинакам меҳнат қилишарди. Улкан тўғон тог қоматини кўтарган, Қоражоннинг Амир Равнаққа айтишича, битишига яна беш метрча қолган. Тўғоннинг баландлиги бир юз олтмиш саккиз метр... Қирқ бири қолибди-да, деган эди шоир. Лекин шунча қизғин иш кетаётган бир пайтда, бунда участка бошлиғи Ҳазратов жуда кам бўларди. Кейинги кунларда бу ерга шоир Амир Равнақ ундан кўра кўпроқ келди. Ҳазратовнинг вақти Бошқармада ва яна ўз улфатлари зиёфатида ўтарди.

Енгил машинада тўғон устига чиқиб келган кипригигача сап-сариқ Иван Шишкин кимнидир қидириб юрарди. У Амир Равнақ билан кутилмаганда учрашиб қолиб, эски қадрдонлардек сўрашди. Эсадалик қилиб ташлаб кетгани, Москвада нашр этилган рус тилидаги шеърлар тўплами учун ташаккур айтди.

— Бир нима ёзмоқчига ўхшайисиз, ўйлаганим тўғрими?

— Мутлақо тўғри. Шеър-да...

— Катта иншоот битяпти. Бу яхши. Бизнинг қардошлигимиз Улуг Ватан уруши жангларида, мамлакат қил устида турганида синовдан ўтган эди. Мана бу улкан қурилишда бу метин қардошлик яна бир синовдан ўтиб, ўз меваларини бермоқда... Шундай эмасми, ўртоқ Амир Равнақ?

— Сиз достонимнинг дастлабки мисраларини айтиб бердингиз. Раҳмат!— деди мамнуният билан шоир,— айтинг-чи, азизим Иван Иванович, тўғонда ҳозир қанча машина ишлаб турибди?

— Бир суткада қирқ учта «БелАЗ—540», ўнта «КрАЗ» ва ўнта «МАЗ — 525», бу шиббаловчи машина. Тўғон узунлиги етти юз олтмиш икки метр. Маррага етишга беш-олти метр қолди. Финиш яқин. Поэмангиз битганда бизга ҳам албатта ўқиб беринг. Мен анави «Чотқол йўлбарси»ни қидириб юрибман. Мингбоевни. Ҳей, Никаноренко, Мингбоевни кўрмадингми?

— Каръерга кетди,— деди прораб кафтларини оғзига карнай қилиб, баланд овоз билан.

— Иш кўп, ўртоқ Амир Равнақ, менга рухсат беринг, кетдим,— деди Шишкун у билан қўл қисишиб.

— Хайр, Иван Иванович, поэмам битгач, албатта сизга, Мингбоевга, бу ердагиларнинг ҳаммасига ўқиб бераман.

— Шундоқ бўлсин,— деди дилкаш Иван Иванович Шишкун шоирга зиёлинома, майин илтифот билан гапириб.

Бир муддатдан кейин пастдан вағиллаб чиқиб келган «БелАЗ» Шишкун ёнида тўхтади, у кабинада ўтирган Қоражонга бир нима деди. Қоражон ўйланғиб қолди. Ундан сўнг яна машинани юргизиб, прораб кўрсатган жойга массани тўкиб, тўғон четида, одамлардан нарироқда турган парторг ёнига келиб машинадан тушди. Бир муддат улар ниманидир гаплашиб қолишиди. Бу гап жуда муҳимлигини икковининг қиёфасидан сезиши мумкин эди.

* * *

Намангандаги Чорток сув омборининг тўғони бузилиб, қишлоқларни сув босиб кетганини эшитган инженер Қиёмхўжа Ҳазратовнинг оёғи қалтирай бослади. У яширинча Тошкентга тушиб, Узгидропроектга кириб, бу ердаги танишларидан Намангандаги тафсилотини сўради. Аҳволни аниқ билди. Ундан сўнг Узбекистон Сув хўжалиги ва мелиорация министрлигига ҳам кириб, Намангандаги бу фожия тафсилотини суриштириди. Ҳамма нарса аён — Чорток сув омборининг тўғони чап тоҷондаги туннель ёнида ўйилиб, сув уриб кетган... Бунда сал кам саккиз миллион кубометр сув тўпланган эди. Бу ҳазилакам сув әмас! Бу ерда инженер Қиёмхўжа Ҳазратов тўғон қурилиши бослиги бўлиб ишлаган... Хўш, энди бу ёғи нима бўлади? Ишнинг ҳа бўл, ҳа бўл қилиб, нарица т-бери туғатилгани, шиббалашнинг сифатсиз ўтгани бари, бари... бир зумда унинг кўз олдидан ўтди. Чорвоқдаги бу улкан тўғон битса, у яна ҳам юқорироқ муносабтни, маҳсабни кўзлаган эди... Шу сабабли ҳам у баъзи мансабдор акаларга орқа қилиб, жанг ичидаганг бешлади — инженер Мингбоевни ситиб чиқариб, ўрнини эгаллади.

Эҳтимол, бирон ўйдан кейин бу ўрин ҳеч кимга ҳам керак бўлмас, Ҳазратовнинг ўзи ҳам ариза ёзил, ташлаб кетарди. Ҳозир начка-пачка пуллару обрў уни «жангга» олиб кирган эди.

Безгак бўлган одамдай бир кунда ранги ўчиб кетган Ҳазратов тўғон устида прораб Никаноренкога унибуни топширгандай бўлиб, ўзининг тўсатдан бетоб бўлиб, аъзойи бадани оғриётгани, ёмон нарса еб қўйганга ўхшаётганини билдириб, шаҳарга жўнади. Шулаҳза «БелАЗ»ини вағиллатиб пастдан чиқиб келган Қоражон Мингбоев тўғон устида Ҳазратовнинг бўшашиб турганини, унга бир нима демоқчи бўлаётганини сезиб, юзини тескари қилганча, машинаси газ бериб ўтиб кетди. Ҳазратов ўз машинасида тўппа-тўғри қувучилар шаҳарчасидаги квартирасига кириб, уни-бунни олдида, шу машина билан Тошкентга тушиб кетди. Бу ерда ўралашиб юрган Обакихонга ҳам қайрилиб қарамади. Йўкко соатдан сўнг машинасини Сквер атрофида тўхтатиб, бу ердаги омонат кассага кирди. Нариги бир туйнукда, одамлар орасида навбат кутиб турган Амир Равнақни кўрмади. У иккинчи туйнук ёнига келиб, бир кишидан кейин турди. У бетоқат, нимагадир шошгандай бўларди. Кўзларини шира босгандай, саломлашаман, деб турган шоирга ҳам эътибор бермади. Амир Равнақ ундан хафа бўлмади, чунки у шунақа димоғдор, ғўдайган одам эканлигини яхши биларди. У омонат дафтарчаси билан паспортини ҳам бериб, кассадан тўрт пачка катта пул олиб чиқиб кетди. Бу ердаги қари-қартанг пенсionерлар унинг орқасидан қараб қолишиди. Ҳазратов тўғри уйига келиб, пулни Гулбаданга топшириди-да, наридан-бери телефон ёнига ўтириб, ошналарига сим қоқа бошлади. Хотини Гулбаданга, тобим йўқ, иситмам бор, деди. Гап орасида Наманганда иш чатоқроқлигини, Чортот тўғони бузилиб, сув тошиб кетганини айтди. «Вой ўлай, энди нима бўлади?» — деди эри билан Наманганда анча вақт турган Гулбадан ваҳимага тушиб, «Нима бўларди, мен раҳбар бўлганман, ишлаганлар бошқа! Ўша вақтда ҳам кўп вақт касал бўлиб юрган эдим, асли врачдан справка олиб қўйсан бўларкан... — деди хаёлга чўмиб Ҳазратов, — райкомдагилар, водстрайдагилар жавоб берсин! Нега мен ташвиш қилишим керак! Мен ишни комиссияга топширганман...» — деди ўзига-ўзи далда бериб. Аммо, қир тупроғини бульдозер билан сурдириб, қани,

тезроқ бўла қолинглар, деб шошириб, шиббаланган жойдан лаборатория анализлари олмаганилиги кўнглидан ўтди. Тўғон сифатсиз, бўш қурилганлигини ўзи яхши биларди. Лекин, бу ерда сув юқорига чиқмайди, олти миллион кубометрдан ошмайди, деб ўйларди. Мен тезроқ ишни битириб мукофот рўйхатларидан четда қолмасам бўлди деб, ишни «дўндириш»ни ўлади. Ўшанда Облводстройда инспектор бўлиб ишлаб юрган Иномжон Чортоқдаги Ҳазратов қилаётган ишни кўриб: «Ака, трамбовканинг мазаси йўқ-ку! Сизлар кетгандан кейин ким боқса боқаверсин бўладими?» — деган эди. Ўшанда Ҳазратов: «Ҳа, жуда берилган кўринасиз! Емон ишлаётганимиз йўқ. Бу ер база эмас, ҳамма ёқ тупроқ, нима, бульдозерни ўмарармидим. Қўрқманг!» — деган. Иномжон: «Ўмариш эмас, ўмарсангиз ўмараверинг, гап қанча қишлоқлар, минг-минг одамлар ҳаёти ҳақида кетяпти!» — деган эди. Ҳазратов уни ўшанда ҳажиқиз деб сўкиб, қўрқоқликда айблаб, кўп ваҳима қилаверманг, деб оғзига урган эди. Ҳазратовнинг кўп вақти Кимсанхон ҳовлисида ўтарди.

Иномжон ўшандә ёқ бу иш қўйл учиди бўлаётганини пайқаб, жизгинак бўлиб юриди-ю, кучи етмади. Бироғ ерга хат ёзиши ифвогарлик деб тушунди. Мана оқибат!

Ҳазратов телефонда ошналаридан бирига тезликда стационардан жой тайёрлашни, касаллигини, шу бугуноқ ётиши лозимлигини айтди. Шинаванда ошнаси шу бугуноқ келаверинг, жой тайёр, деб «ўғил болалик» қилди. Ҳазратов Чорвоқдан келган машинани қайта-риб юборди. Оч, чанқаган шофёр йигитга бир бурда нону бир пиёла сув ҳам беришмади. Бу — Володя деган сариқ йигитча Шишкиннинг жияни эди. Бу йил ҳарбий хизматни тамомлаб, ишга кирган эди. У итоаткорлик билан эшикда бир соатча туриб, кейин яна Чорвоққа жўнаб кетди. Ҳазратов хотинига наридан-бери ош дамлатиб еб, кечки салқинда бояги ошнасининг машинасида стационарга кетди. Етиб боргач, ошнаси қандайдир врачлар билан гаплашиб, уни люкс-хосхонага жойлаштириб қўйди. Касалхона либосини кийиб олган «бемор» Ҳазратов каравотда ётиб, тинмай сигарета чекар, хаёл уни яна Наманганса олиб кетарди. Сув босган колхоз далалари, қишлоқлар, вайронга кўпиклар, бошпанасиз қолган одамлар, том босиб, ўлдирган моллар, паррандалар, сувга оқсан бойликлар... Сифатсиз иш, сансалорлик, манманлик оқибатида қанча

фожиа! Қанча қурбон ва неча миллион заар... Бунинг учун Ҳазратов жодига солиниши керак! (Бирдан у ўрнидан туриб сабаб кўрсата бошлайди.) Йўқ, мен атай қилибманми! Биз фақат шошдик. Шошиш орқасида иш сифатсизроқ бўлди... Мен атайи қилганим йўқ!

«Нега шошдинг? Ким сени шошишга мажбур қилди?!»— Шундай бир овоз қулогига эшитилди. Бу товшум кимники эканини ўзи ҳам яхши билмасди. Бу прокурорми, ким? Ҳар қалай, унинг юраги қинидан чиқиб кетди.

«Ишни барвақт топшириб, планни бажарайлик, дедим».

«Сифатни ўйладингми?»

«Биз шошдик. Бўйнимга оламан. Мен кўпроқ мукофот олишни ўйладим».

«Яна нимани ўйладинг?»

«Пулни, ўзимни, маишатни...»

«Сен мамлакатга катта заар етказдинг. Сен атайнми ёки атай әмасми, катта жиноят қилдинг!»

«Йўқ, йўқ!»

«Одамлар ҳалок бўлди, қишлоқлар вайрон бўлди, пахта майдонларини сув босди... Давлатга катта зиён етказдинг!»

«Мен онгиззлик қилганман, тушунмаганман, рост! Ҳишиниб кетиб, ҳеч ким билан ҳисоблашмаганман, партия органларини ҳам менсимай қўйганман, одамлар билан ҳисоблашмадим... Менинг камчиликларим кўп. Бу гапларни чин дилимдан айтиётирман, мени кеширглар...»

«Сен маиший томондан ҳам бузуғсан! Сенинг ўз кабинетингда ярамас ишлар қилиб қўлга тушганинг ҳам бизга маълум. Сен бироннинг силасини буздинг! Сенинг партия масалангни вақтида кўрмай, кэлишувчилик қилиб юрган Иван Иванович Шишкун ҳам ҳали жавоб беради! Сен мансабдор кишилар атрофида ўралашиб, уларнинг ожиз томонларидан фойдаландинг. Оддий меҳнаткаш ҳалқни назар-писанд қилмадинг. Кимнинг амали бўлса, у билан гаплашдинг, сени ҳалқ ҳукмига ҳавола қиласиз!»

«Гуноҳкорман. Кечиринглар. Юртим, давлатимдан сўрайман, мени кеширглар».

«Энди сенга юрт керак бўлиб қолдими?! Сен юртингни вайрон қилиб, одамларни чумолича кўрмадингку! Сен фақат пачка-пачка пулларни ўйладинг. Сен

га тўсқинлик қилганларнинг юзига чанг солдинг! Ифво билан ишдан ҳайдаттирдинг. Давлатни таладинг...»

«До-о-о-о-д!..» — деб, Ҳазратов уйғониб кетди. У кўзини очса, касалхонанинг юмшоқ каравотида ётган экан...

* * *

Шу кунлари Амир Равнақ билан Қоражон учрашиб қолди. Уларнинг сухбати қуийдаги мазмунда бўлди:

— Янгича беклар, тўралар пайдо бўляпти,— деди Амир Равнақ қизишиб,— эҳтимол, хато қиласман, лоқин чуқур кузатишмдан кейин шундай қарорга келдимки, баъзи кишилар қадимги бойваччаларга ўхшаб кетишган...

— Гапингизда жон бор. Улар асосан сиёсий жиҳатдан қолоқ, жамиятимизни яхши билмайдиган одамлар. Кишининг сиёсий онги мансабига қараб белгиланмайди. Мен оддий бир ишчини яхши танийман, у, сиз шама қилаётган мансабдордан анча саводли ва узоқни кўрадиган одам. Сал мансаб тегса, одамгарчиликдан чиқамиз. Баъзилар, албатта! Мана шу «ҳайвон» сизнъ фифон қилиб, аччиқ шеър ёзишга мажбур этяпти. Порахур, икки юзламачи бу шахс халқимиз юзини ерга қаратган экан, биз бундан бу ёғига эҳтиёт бўлишимиз керак. Улар ўзларини покиза кўрсатадилар. Кўзингиз шамғалат бўлдими, бир томондан уриб, ўмарид кетадилар. Ҳаромга қўйл урадилар. Агар уларнинг қўйини ушласангиз, гуруҳ бўлиб олиб, сизга ҳужум қиласидилар, номингизга қора суркайдилар. Нима қилмоқ керак?

— Партияга айтмоқ керак! Халқа маълум қилмоқ керак!

— Қандай қилиб?

— Мен аризабозлик қилмайман, мен ўз асарим билан айтаман!

— Ўз асарингизда бу гапларни айтинг! Бу савоб иш.

* * *

Орадан бир ойча ўтгач, Чорвоқ қурилишига республика прокуратурасидан бир киши келиб Ҳазратовни излаб юргани Қоражоннинг қулогига етди. У одам қу-

рилиш бошқармасида бўлиб, кадрлар бўлимидан баъзи ҳужжатларни олгани, парторг Шишкин билан ҳам гаплашгани маълум бўлди. Кейинчалик Намангандаги жиноят юзасидан иш қўзғалиб, сохта бемор бўлиб стационарга бекинган Қиёмхўжа Ҳазратовни тегишли ерга олиб кетишганини эшилди. Илгариги замонда ўғрилар қўлга тушадиган бўлса, мачитга қочар экан. Чунки, «худонинг уйи»да ур калтак-сур калтак қилишмасди. Ҳозир баъзи оёғи қалтирайдиганлар тезда касалхонага қочишади, чунки давлатнинг инсон-парварлигини, бетоб одамга озор бермаслигини билишади.

Инженер Қоражон Мингбоев дарҳол ўз вазифасига қайтадан тикланди. У яна СУ-2 тўғон қурилишида участка бошлиғи. Уч ойча у ўз вазифасидан четлашиб юрди. Ишдан вақтинча четлаштирилганда дўсти учун қаттиқ туриб, уни ҳимоя қилмагани, принципсизлик қилгани учун партия мажлисида Иван Иванович Шишкин анча гап эшилди. У дўстининг юзига қаролмасди. Лекин Галина Гулгун ёнига келиб, «ҳамма гапни унга тушунтириди». У эрининг ёнини олмади. Аммо ишнинг яхши томонга қараб кўчаётгани, илгариги жанговар дўстлар яна бирлашаётгани сабабли, Қоражон Шишкинга нисбатан юрагида ҳеч адоват сақламади. У прораб Никаноренко билан ҳам ўртада ҳеч нима бўлмагандек, илгаригидек ишлашиб кетаверди. У баъзан ўзининг қадрдан «БелАЗ»ини ҳам гумбурлатиб ҳайдаб қоларди. Бу машинага Шишкиннинг жияни Володяни гараж орқали расмийлаштириб, ишга олди. Гулгун бўлса поликлиникада ишлар, у баъзан «Тез ёрдам» машинасида қурилиш участкаларига ҳам келиб турарди.

Файзула Аҳмедовичнинг туриб юрадиган бўлганини, яқин кунларда врачнинг рухсати билан бу томонларга келиб қолишини эшилган Милтиқбой aka қизи ва күёвини кўргани Чорвоққа келди. Бугун Амир Равнақ ҳам келган, Иван Иванович Шишкин, Никаноренко, бир неча шоғёрлар тўпланишиб туришган эди. Машинадан тушиб, қўлтиқтаёқда, костюмига жанговар орденларини тақиб олган Милтиқбой aka одамлар билан қўл қисишиб, омонлашди. Шундан сўнг Шишкинга қаради:

— Дўстим Шишкин!!! Анавининг ишлари люблю Мамажон бўпти-ку! Синглингни...— деди Милтиқбой аканинг бир томон мўйлови лип-лип учиб,— шу топда

Ёнимда бўлса-я! Э, худо, мен бир пронтовой бандангга шафқат қилиб, ўша номардни рўпара қил! Майли, ке-йин ўзинг дўзахингни раво қилсанг ҳам! Бўкиртириб уриб, бир армондан чиқмасам, кўзим очиқ кетади! Э, худо, ўшани менга рўпара қил!

Йўқ, Милтиқбой ака ниятига етолмади; Ҳазратов қўлга олинган эди.

— Унинг яна бошқа гуноҳлари ҳам очиляпти. У топилгач, биз унинг партия ишини кўрамиз. Бундай кимса сафимиизда бўлмайди,— деди Иван Шишкін Қоражон Мингбоевга қараб.— У ҳаммадан бад оларди, ҳаммадан қўрқар, ҳеч кимга ишонмасди. Тавба!

Қиёмхўжа Миёнхўжаевич Ҳазратов шу даражада кўп қабиҳ ишлар қилган эдики, одамлардан қўрқарди. Кишиларга соxта яхшилик қилган бўларди. Кўза кунда эмас, кунида синишини, бир куни ҳаётида фожиа юз беришини кутарди: ё қамалади, ё биронта ўйнашининг эри пичоқлаб кетади. У баъзан каравотда чалқанча ётиб, ўйлаб, ўзидан-ўзи қўрқиб кетарди. Тўсатдан кириб қолган Гулбадандан ҳам чўчир эди. Силлиқ кийинадиган, галстук, шляпа, сўнгги модадаги костюм ичидаги шунча жиноятни қилиб, пинагини бузмай юрадиган, ҳатто баъзида баланд келадиган, кимсан, «инженер Ҳазратов» кейинги пайтларда ёмон ухларди. Босинқираш, юрак санчиғи, хаёлотга чўмиш... булар бари Гулбаданди ҳайрон қиласди.

— Ёв қочса, ботир кўпаяди қабилида гапираётганим йўқ, у билан бизнинг партия ташкилотимиз шугулланган. Лекин Наманган воқеаси тез очилиб қолди,— деди Шишкін.

Қоражон индамади.

— Бу тўғонда ҳам ишни расво қилмаганмикин? Шиббалаш қалай бўляпти?

— Бу томонда у эмас, биз ишлаганмиз! — деди Қоражон Мингбоев.

— Иван Иванович, шунча қадрдон бўлиб, дўстингизни ҳимоя қилолмадингиз-а. Ҳа, майли,— деди Никаноренко. У оз-моз Шишкінни ёқтирмасди. Пайтдан фойдаланиб, бир чўқиб олди.

— Бу гапни сен менга гапирмагин! Ҳаммамиизда ҳам ўзимизга ярашур гуноҳ бор; мана шу Мингбоев Фронтда танк операцияси учун Совет Иттифоқи Қаҳрамони бўлса арзирди. Характеристикалар ёзилиб, ҳамма 1.ш ҳал бўлганида ўзлари қовун тушириб қўйганлар.

Буни ўзлари биладилар... Ундан кейин Қизил Юлдуз ордени билан алмаштирилган.

— Ҳей, яхшилар, анави люблю Мамажонни менга топиб беринглар! Уни бир дўппослаб, аламдан чиқардим. Қўлим қичияпти. Ҳа, номард! — Милтиқбой ака қўлтиқтаёгини кўтариб-кўтариб қўярди.

XXXVIII боб

ГУЛГУН ЭЛ ХИЗМАТИДА

Кутилмагандаги, эрта билан СУ-2 тўғон участкасининг бошлиги, инженер Мингбоевни қурилиш бошқармасига, Садовников кабинетига чақиришди. Кабинетда парторг Шишкун ҳам ўтиради. Жомакорда кириб келган Мингбоев Садовников, Шишкун билан қўл қисишиб, омонлашиб бўлгач, қурилиш бошлигининг таклифи билан катта ёзув столи ёнидаги креслога ўтиради. Қалам ўйнаб ўтирган, кайфи чоғ Георгий Исаевич Қоражонга зудлик билан Тошкентга тушишини, уни Марказий Комитетга чақиришा�ётганини маълум қилди.

— Нима гап? Тинчликми?

— Тинчлик. Яхшилик. Ҳамма гапни бориб биласиз,— деди Садовников кулимсираб.

Қоражон Мингбоев фронтдаги офицердек буйруқ олгач, қурилиш бошлиги кабинетидан чиқди. У ўз квартирасига кириб, наридан-бери соқолини қирди. Яхши кийинди. Поликлиникига бориб, бу ҳақда Гулгунга хабар қилди. Улар икковлари ҳам ҳеч нарсага тушунмай бошлари қотди. Ҳар хил хаёлларга боришиди. Қоражон Мингбоев ўзининг «ТТ»сига миниб, зудлик билан Тошкентга тушиб кетди.

Марказий Комитетга яхшилик билан чақирилади, деди ўзига-ўзи Қоражон, қурилишда ишлаётган ўnlарча инженерлар ичидан уни таклиф этишган экан, демак, яхшилик... Садовниковнинг кайфи чоғлиги ҳам эснаш каби дарҳол Қоражонга ўтди. Негадир унинг ҳам кайфи чоғ, юрагини завқу сурур қучган эди. Эҳтимол, бу қўлга кирган зирачанинг суғуриб олиб ташлангани, дўстлар орасига низо солиб юрган, мансаб-параст, икки юзламачи Ҳазратовнинг фош бўлишидир. Бу шахс жуда маккорлик билан иш тутиб ҳам ҳақиқат-

ни босиб-янчиб кетолмади. Эҳтимол, бу кайфичнолик ана шу мараздан халос бўлишгани шукронасидир. Инженер Мингбоев йўлда кета туриб, ўтган-кетган кулгили гапларни эсларди. Негадир унинг ёдига Файзулла Аҳмедович келди; Рихсиниса деган қўшниларининг қорни ҳеч бўш турмаслиги, ўн битта бола туқсан бўлса, шулардан тўрттасининг йили бир, яъни бир қизи 1967 йил январда туғилган бўлса, ўғилчаси шу йил декабрда туғилган эди. Эри Аппонбой қиёсрлаб: «Э, бу этагимнинг учи тегиб кетса ҳам туғади...» — дерди. Шундан кейин унинг хаёлини Обакихон қуршади. Ёмғир ёқсан кунни эслади. Жала қандай яхши, ғубору рутубатни йўқотади, дараҳт баргларию томларни ювиб тозалайди, ўт-ўлан барқ уради. Эртага ҳаво очил, бекетса, тоғлар тепасидан бош кўтарган қуёш ҳаммадан аввал кунгай Сижжакни чарогон этади. Бу жалә Гулгун бошига не-не туҳмат ғуссасини ёғдирган Обакихон макрини ҳам бир рутубатдек ювиб кетганида қандай яхши бўларди! Афсуски, бунинг ҳеч иложи йўқ. Чалтиб, дунё фақат ишратдан иборат, деб юрган бу аёлнинг «ярқираган» кунлари ўтиб, кўринмай қолди. У жуда қаттиқ янглишиб юрганини ўзи ҳам пайқамадимкан? У ёқ-бу ёғини бўяб, кўқракбурма кўйлак кийиб кўчага чиқсан билан ҳеч ким қарамасди. Сичқоннинг ини минг танга бўлиб, Сапчабошев ҳам кўринмай қолди. Обаки циркдаги ўргатилган, думи попук қилиниб, устига сарафан кийдирилган гўзал кучукчага ўхшарди. Чалпакка ўраб ташласа ит боқмайди, дегани шу бўлса керак. У шунчалар ўзига бино қўйгани билан бозори касод эди... Амир Равнақнинг айтишича, у ҳозир Файзулла Аҳмедовичларнинг ғашига тегиш билан овора эмиш. Бу баобрў хонадондан унга манфаат тегмагач, Музafferовнинг тарақ-туруқ, шовқин-суронни ёқтираслигини билиб, кўчада бақириб юради, радиоприёмникини бақиртириб қўярди. Бир-икки танбеҳ беришганида юқори ташкилотларга устидан ариза кўтариб борди. «Ҳа, бизга ўхшаган камбагалларни сўкишга Музafferовнинг нима ҳақи бор! Устидан ёзиб, партиядан ўчирираман! Прокурорга бераман!» — дерди. Сен ўзинг кимсан? Ҳали унга, ҳали бунга тегиб юрадиган суюқоёқ энди ҳақ бўлиб қолдингми, дейдиган одам йўқ.

Шу лаҳза унинг кўз олдига Амир Равнақ билан Ҳазратовнинг тўқнашуви келди. Бу воқеа бир ой муқаддам Чорвоқда юз берганди, тугруқхонадаги Ника-

норенко хотини адресига айтилган туҳмат гапдан ту-тақиб кетган шоир, Қоражон олдида Ҳазратовни тар-сакилаган эди.

— Отаси қарамай қўйған чақалоқнинг ноласи, тур-руқхонада ётган укпардай, сутдай пок бегуноҳ онанинг алам чекиши ғийбатчининг икки кўзини кўр қилмас-микан?

— Бу билан нима демоқчисиз? Аниқроқ гапи-ринг? — деган эди Ҳазратов.

— Яъни, бир нима деб сўксам ёки бир шапалоқ ур-сам, устимдан шикоят қиласиз... Шундайми?

— Тушунмаётирман!?

— Сиз бироннинг хотинини гап қилиш билан эски тўрвангиздаги ўтмас шақилдоқларингизни бозорга со-либ, пул топмоқчи бўлдингиз, лекин уйдаги икки гў-дакнинг маъюсланиши, эру хотиннинг жанжалига са-баб бўлдингиз. Тушунмаётирман, деяпсиз! Наҳотки?! Дунё яратилгандан буён нечта лўттибоз ўтган бўлса, барчаси сиздақа бўлган, бошқалар тушуниб етмасдан аввал тушунган! Акс савол бериб, оғзимдан «падаринг-га...» деган бир нима чиқиб кетса маҳкам ушлаб, судга бермоқчисиз. Шу билан қўрқитиб, ўз жиноятингизни бекитмоқчисиз. Эгри ишга эгри тўқмоқ — найрангин-гиз ўтмайди! Менинг эзиб гапиришдан мақсадим ири-ган-чириган юрагингизни эзиб ташлаш! Зора икки но-расида гўдак ва унинг мушфиқ онаси шу бахтли кунга етса. Никаноренконинг хотини яхши хотин! Сиз унга тил тегизманг!

Амир Равнақнинг тўғри сўз, ҳақгўйлиги Қоражонга ёқарди. Кейинги пайтда Музаффаровнинг ийқилиб қол-ганига сабаб фақат ўғли эканини ҳам барча биларди. Иш кишиларни бирлаштиради, қадрдонлаштиради. Бўлмаса у Амир Равнақнинг номини матбуотдан бил-гани билан ўзини мутлақо танимасди. Файзулла Аҳме-дович қанча йиллар дарс бериб кетгани билан бу одам-лар билан шахсий танишлиги йўқ эди. Чорвоқ уларни бирлаштириб, дўст қилди. Инфаркт бўлиб, оғир ётган Музаффаровга ачинарди; эрта билан газетанинг тўр-тинчи саҳифасига қарашга юраги безиллар, қора рамка ичиди бу фамилия кўриниб қолишидан жуда ҳам қўр-қарди. Луқмони Ҳаким билан Афлотун қаттиқ баҳсла-шиб, Афлотун дорисидан бир қошиқ сув бўлиб эриб кетган Ҳакимнинг «яна битта қуй... яна битта қуй...» деб ётгани, нобоп шогирди уни ташлаб кетгани ҳақида-ги афсонани дилидан ўтказди. Хайрушка ўша нопоб

шогирддан ҳам баттарин бўлиб чиқди. У ўз отасини қулатиб, ўлим тўшагига тортди. Қадим у Чотқол бағридаги Майдонтол кенгликларида мол боқиб юрганида, Башқизилсой, Серкалислар қучоғида дам олганида дунёда бунаقا гаплар, фитнаю фирибгарликлар, керилишлар борлигини билмас эди. У бегубор, бўз болалар орасида юарди. Ундаги ҳаёт табиат каби содда ва покиза эди...

Юз бор келса, юз бор янгилик кўриниб турадиган гўзал Гошкент, боғлар, янги бинолар, кўчалар, анҳору ариқлар... Ўзбекларнинг ҳам қадими, ҳам навқирон шаҳри. Қоражон бу ердан фронтга кетган, шу ерда ўқиди. Ҳаётию иши бу муаззам шаҳарга боғлиқ. Қоражон Ленин кўчасидан ўнгга бурилиб, Ўзбекистон Компартияси Марказий Комитети биноси ёнида машинасини тўхтатди. Машинани бир четга қўйиб, ҳашаматли бинога қаради. Шундан сўнг, ҳужжат кўрсатиб, ичкарига кирди. Юқори қаватга кўтарилиди. Ўзбекистон партия Марказий Комитетининг секретари уни ўзининг кенг ва ёрқин кабинетида қабул қилди. Бу ерда саноат ва қурилиш бўлими мудири, Республика сув хўжалиги ва мелиорация министри ҳам ҳозир эди. Марказий Комитет секретари инженер Қоражон Мингбоев билан ҳолаҳвол сўрашиб бўлгач, асосий гапга ўтди:

— Ўртоқ Мингбоев, Намангандаги Чортоқ сув омборининг тўғони бузилиб, сув уриб кетганидан хабарингиз борми?

— Ҳа, қисман хабарим бор.

— Мутахассисларнинг айтишича, экспертизанинг кўрсатишича, тўғон бошидан бошлаб яхши шиббаланмаган. Массанинг зичлиги сифатсиз бўлган. Умуман, иш анча сифатсиз бажарилган. Яна бошқа сабаблар ҳам бор... Вазифа — шу ишни тузатиш. Бешқа иложимиз йўқ! Ўртоқ Мингбоев, Наманганга боришга тўғри келади. Министрлик, Облводстрой, ҳаммамиз нима ёрдам керак бўлса, беришга тайёрмиз. Ҳамма гап шундан иборат. Сиз ўзингиз нима дейсиз?

— Биз солдатмиз, ўртоқ секретарь.

Марказий Комитет секретари чап ёнидаги телефонлардан бирини кўтариб, Наманган обкомини сўради. Орадан бир лаҳза ўтмасданоқ, «Эшитаман, ўртоқ секретарь», деган товуш ўтирганларга ҳам эшитилди.

— Инженер Мингбоев Чортоқ сув омбори қурилишига бошлиқ этиб тайинланган. Уни тузатади ва учин-

чи қисм қурилиш ишларини бошлаб юборади. Кечака Сиз билан маслаҳатлашганимизга кўра, Чорвоқ тўғонидан уни олиб обком ихтиёрига юбораётимиз. Чорвоқ тўғони деярли битган. Инженер Мингбоев фронтовик, Чорвоқ қурилиши бошлангандан буён участка бошлиғи бўлиб ишлаб келади. Принципиал, ўз ишини яхши биладиган инженер. Унга ҳамма шароитлар яратиб берилишини илтимос қиласман.

Марказий Комитет секретарининг бу гапларини эшитиб турган Қоражоннинг юзлари қизаршиб кетди. Бу самимий гаплар уни яна катта-катта ишларни бажаришга ундарди. У солдат камарини яна бир карра сиқиб боғлагандай бўлди. Масала равшан, топшириқни яхшилаб уқиб олган Қоражон Мингбоев ўрнидан турди. Секретарь ҳам. Улар самимий қўл қисишиб хайрлашишди. Қоражон Мингбоев кабинетдаги бошқа кишилар билан ҳам хайрлашишди. У кабинетдан чиққач, лифт орқали пастга тушди-да, машинасига ўтириб, Чорвоқча жўнади. Кеч, қош қорайишига яқин тўғонга етиб борди. Иккинчи смена катта прожекторлар ёруғида «БелАЗ»ларни гумбурлатиб ишларди. У ёқдан-бу ёққа юриб, шунча вақтдан буён тер тўкиб ишлаган тўғон устидан кўлга қаради. Инсон қўли билан яратилган буюк тўғон ўз елкасида турган қора йигитга гап қотгандай бўларди. Бу гап ер остидан чиқаётгандай, аллақандай гумбурлашларга ўхшаб кетарди. Қанчалаб «БелАЗ» машиналарининг шовқини ҳам бу овозга жўр бўларди:

«Ҳа, Минг-бо-ев, ке-тяп-санми? Бизни ташлаб-а? Қўнғирбуқа чўққисини, дengизни, одамларни? Туғи-либ ўсан жойларни-я? Бу ерга сенинг озмунча меҳнатинг сингдими? Қурилиш битай деганда кетасанми? Ошни дамлаб, ўзинг емайсанми?»

«Мен солдатман, эскидан солдатман! Юракдан солдатман, буни энди ўзгартириб бўлмайди! Партия амри — қонун! Хайр, буюк тўғон, хайр, Қўнғирбуқа тепалиги, хайр, қўл, ҳаммангизга хайр!»

Қоражон ўз машинасида тўғон устидан тушиб квартирасига борди. Гулгун уни бетоқатлик билан куттишиб ўтиради. У дамо-дам әшикка чиқиб, узоқ Хўжакент томонларда кўзи ялтираган машиналарга тикиларди. Қоражон уйга кириши билан бир йўла ҳамма гапни Гулгунга айтиб берди. Гулгун ҳайрон бўлди.

— Шу гап эканми?

— Ҳа, шу гап. Намангакга кетамиз! Фирибгар, лўт-тибоз «дўстимиз»нинг шалтоғини тозалаймиз...

— Йўқ, сиз ундаи деманг, сизни партия Марказий Комитети оғир участқага юборяпти. Сиз бунинг удда-сидан чиқасиз! Унинг номини тилга олманг.

Қоражон Гулгундан биринчи марта бундай гап эши-тиши эди. У кулимсиради:

— Бу, плакат — шиор гапни қаерда ўрган-динг?

— Йўқ, бу дилимдаги гап. Акажон, биз кўп вақт бир-биримиздан узоқ бўлдик. Сиз мени яхши билмай-сиз.

— Агар сен шунача, жуда яхши қиз бўлсанг, билмаганим ҳам маъқул. Лекин Амир Равнақ aka сенга шеър бағишлиб, бир мисрада дилингни денгизга ўхшатгани ҳам бежиз эмас экан.

— Ўша сиртини силаган фирибгар бизга кўп ёмонликлар қилди. Наҳотки, раҳбарларимиз шундай одамларни билишмаса! У ҳукуматга ҳам зиён етказди-ю! Нега бундай одамларнинг қўли ушланмайди?! Биз уни қўймаймиз, бизга кўп ёмонлик қилди! Сиз индамасан-гиз ҳам мен индайман — уни қамаш керак! У хотини-нинг ҳам шўри!

— Оғирроқ бўлсинлар,— деди Қоражон, Гулгун-нинг тутаб кетаётганини кўриб пилигини пасайтири-ди,— бу иш билан шугулланадиганлар бор. Улар ар-қонни узуроқ ташлаб қўйишган.

— Бу нотўғри! Нега арқонни узун ташлайди? У ярамас бутун бир денгизни халқ бошига ағдариб юборди! Фожиа... Тушунмайман, нега бундай фирибгарларга ён босишади? Садовников ҳам, Шишкин ҳам ён босди. Бу — факт! Конъяклар, кабоблар... уларнинг кўзи-ни шира бостириди.

— Бу гапингга қўшиламан. Тўғри! Лекин биз ишлайверамиз. Шунинг ўзи ўша нопокларни мажақлай-веради. Лекин биз, бу фирибгарни жазолэнглар, деб милицияга бормаймиз. Маъмурий органлар уларни сен билән мендан яхшироқ билади.

— Шоирни фельетон қилгандарига ҳайрон бўлиб қолдим. Дунё тескари бўлиб кетгандай. У жуда покиза одам, мен шу ёшгача яхши муаллимларни кўрдим, аммо бунақа олижаноб одамни кам кўрганман. Уни айирмачи дейишади. Бу туҳмат! У ўз ери, ўз халқини жонидек яхши кўради. Ҳамма шоирлар ҳам шундоқ бўлганда қандай яхши эди Афсус! Лекин Навоий ҳам,

Саъдий ҳам, Пушкин ҳам... шундай. Равнақ домланған бекорга хафа қилишди. У Чорвоқ атрофидаги қишлоқтарни сув босганини тушунмади. Сизга ўхшаганлар шоирга тушунтирганда у янгишмасди.

- Чорвоқ қурилиши ҳақида достон ёзяпти.
- Сиз қаҳрамони бўлсангиз керак?
- Ия, ўйлаб гапир! Уят бўлади бундоқ дейиш!
- Гулгун эркаланиб, ечинаётган эри бўйнига осилди...

У кичкина боладек Қоражонга осиларди.

Тунда эру хотин машинага ўтириб, аввал Сижжакка, ундан кейин Ёнқўргонга бориб, ота-оналари, ёр-биродарлари билан хайрлашиб келишди. Эрта билан Қоражон Мингбоев Бошқармага борди, ундан сўнг тўғонга, диспетчерликка, гаражга, ГЭС қурилишига... ишлаётган дўстларига йўлиқиб, уларга Наманганга кетаётганини айтиб, хайрлашиб келди. Юкларни саранжомлаб ўтирган Гулгунни олиб, Садовников машинасида эру хотин Тошкент аэропортига жўнашиди. Шу куни енгил самолёт қирқ минутча учиб Наманганга олиб келди. Обком, ундан сўнг Янгиқўргон район партия ташкилоти...

* * *

Қоражон Мингбоевларга Янгиқўргон райони марказидан жой кўрсатишиди.

Эртасига эри билан Чортоқ сув омбори тўғонига борган Гулгун узун тўғоннинг бетон туннелга туташган чап томони каттакон жар бўлиб ўпирилиб кетганини кўрди. Бу ердан кам деганда бир Чирчиқ дарёсича сув шиддат билан оқкан. Шу куниёқ инженер Мингбоев штабга кириб, бу ерга тўпланган одамлар билан танишиб чиққач, пастликда, тўғон тепасида айланди. Тўпланган одамлар асосан бульдозерчи, экскаваторчи, «МАЗ» шоффёrlари, райком вакили ва Облводстрой ходими, шу бугундан эътиборан унга муовин қилиб белгилangan Иномжон Одилов эди. Бу тўғон Чорвоқ тўғонни олдида миниатюрадек жуда кичик. Аммо унинг на зарида бу ерга ҳам учтўрт «БелАЗ» олиб келинмаса ҳеч иложи йўқ. Қоражон атрофни синчилаб текшириб, бу ерга тўпланган тупроқни олиб ташлаб, бошқатдан, обдан шиббалаб тўғон кўтаришни ўйлади. Иномжон кулди:

— Бунинг учун яна уч йил керак бўлади,— деди,— гапнингизда жон бор. Лекин иложимиз қанча, ўртоқ Мингбоев, дабдала бўлган тўғонни тузатишимиз керак.

Қоражон сукут сақлади. Қиласиган ишини қилиб, тинч оқаётган зилол сувга, узоқдаги Чотқол тизма тоглари этакларига, қир оралиқлари даги қишлоқларга тикилди. Шундан сўнг улар эр хотин машинага ўтириб, Чортойсой ичи билан сув босган ерларни кўргани Кораскон томон кетишиди. Кораскон қишлоғи вайронга бўлган эди, одамлар Тошкент зилзиласидаги дек палаткаларга кўчиб чиқсан. Кўчалар ботқоқ. Баъзи уйлар босган, баъзиларининг деворлари қулаган, пишиқ синчлар устида том илиниб турарди. Ҳар ер-ҳар ердан экскаваторлар билан ковлаб, сув остида қолган қора-молларни чуқурга кўмишарди. Кишиларнинг қовоги солик, кутилмаган офатнинг бениҳоя зарари бир томон, ваҳимаси бир томон бўлган. Колхоз раиси жафокаш Юсуфжон ака хотини билан айланиб юрган янги инженер йигитни кутиб олиб, ўша кунги сув босиб келиштафсилотини гапириб берди. У қўлидаги кетмонни бир йигитга бериб, қўлларини барига артиб, Қоражонга ҳаяжон билан гапира кетди. Корасконликлар бошига шунча мусибат тушганига қарамай, ботқоқ кўчаларда болалар илгаригидай қувноқ, югуришиб ўйнаб юришарди. Бу ҳол Гулгунга жуда таъсир қилди. Ҳар қандай фожия ва талафот болаликни синдиrolмас экан! Болалик ҳамма ерда ҳам, ҳар қандай шароитда ҳам болалик! Гулгун нигоҳини чопиб юрган болалардан узмасди. Том остида қолган қорамол ва эчкилар ўлигини кўмаётган кишилар билан хайр-хўшлашиб, раиснинг илтимосига кўра улар колхоз марказига келишиди. Раис: «Бир пиёла чой ичиб кетасиз! Бу колхоздя таомил!»— деб, эру хотинни қўйиб юбормади. Улаэр кетишаётганда, кимдир Қоражон билан Гулгунни обком партиядан келган кишилар хаёл қилиб, гап қотди:

— Цемент, ғишт, ёғоч... керак. Шагал билан қум ўзимизда топилади. Ёруғ ёзда уй солиб олишимиз лозим. Шундоқми, раис?

— Ҳа, албаттат!

— Сизга ҳам, бизга ҳам бу материаллар керак. Жуда тез керак!— деди Қоражон.

Юсуфжон ака эру хотинни машинага ўтқазиб, колхоз марказига олиб келди. У йўл-йўлакай сув босган

катта-катта майдонларни кўрсатди. А ллақандай қо-
рамтири ботқоқ пахтазорни босиб ётарди.

— Қайтадан ҳайдаб, гўза экяпмиз.

— Жуда жабр бўлибди,— деди Гулгун. У хаёлида,
Ҳазратовни шу ерга олиб келиб суд қилинса, яхши
бўларди, деб ўйларди. У Чорток ёнидаги «вилла»да
туриб, шу ерда Кимсанхонни йўлдан урганини эшит-
ган эди.

Раис ўз ҳовлисига бошлади. Болалари дастурхон
ёзиб, чой олиб келишди. Раиснинг рафиқаси жуда дил-
бар аёл экан, Гулгунга ёқиб қолди. Каттакон ҳовли-
нинг ёнгинасида меҳмонхона деб шинам уй-айвон со-
линган эди. Ҳовли қир этаги, дўнгликда бўлганлиги са-
бабли тошқин ялаб, молхона, ўтихоналарни қулатган
эди-ю, асосий турар жойи шикастланмаган эди. Раис
суҳбат ичиди Гулгуннинг медицина ходими эканлиги-
ни, институтни тугаллашига озгина қолганлигини би-
либ, қишлоқ касалхонасида ишлашни тавсия этди.
Райздрав мудири ҳам шу қишлоқдан, ўзининг жияни
эканини айтди. «Район марказида нима қиласизлар,
мана шу уй, айвон сизларга!»— деди раис. Бу гап Гул-
гунга ёқди. У Қоражоннинг қўлини яширинча сиқиб
қўйди.

— Колхозда қолинглар, бу ер тўғонга ҳам яқин.
Мен шоирFaфурҒулом билан оға-ини тутинганман. У
киши оламдан ўтганлар. Локин у зотга ҳам бу ерлар
жуда ёқиб, колхозингда уй-жой солиб, шу ерда қолиб
кетаман, дердилар. Мана, бир томонимиз Чорток сана-
торийси. Faфур акада ҳам озгина бод бор эди. Тошкент-
га борсам, доимо у кишининг уйларига тушардим. Бу
ердагилар мени, «FaфурҒуломнинг иниси», деб аташа-
ди. Тошкентга борганимда у киши мени «Муштум»
журналига олиб бориб, қирра бурунли, қўй кўз бир
шогирдлари билан таништирганлар. У билан мен
бир-биримизга жуда ўхшашлигимизни пайқаган
эдилар...

Гулгунга раиснинг «ташвиқотию» оила аъзолари-
нинг дилбар одамлар эканлигидан ташқари, бошقا бир
нарса қалбига, шу ерда қол, деган даъватни бера бош-
лаган эди. Партия Марказий Комитети ишни тўғри-
лаш, халққа ёрдам беришни унинг эрига топширган
екан, демак, бу унга ҳам тааллуқли! Қоражон пар-
тия учун жуда керак экан, демак, у ҳам керак! Бу
ерга у ойимтилла бўлиб ўтириш, эрининг кўйлагини
ювиб, шимини дазмоллаш учун келган әмас! Бу

ҳам керак, аммо у медик, бу ерда унга зор одамлар бор...

Гулгун колхозда, одамлар ичидә қолишига, шу ердаги касалхонада ишлашга қатъий қарор қилди. У раисдан райздрав мудири билан гаплашиб, ишни расмийлаштириб беришни илтимос қилди.

* * *

Поликлиника район марказида бўлиб, Ҳефизхон деган, олтмишларга борган, семиз, тепакал бир одам унда бош врач вазифасини бажаарди. Бу одам алми соқдан бери бу ерда ишлаб, даволаш ишларидан кўра кунлари Чортоқдаги чойхонада ошхўрлик қилиб, сув устидаги сўрида чўзилиб ётиб кунни ўтказиб юборишарди. Корасконликлар уни «Семиз дўхтири» деб аташарди-ю, унинг докторлиги қолмай, фақат семизлиги қолган эди. Келишган, чикка бел, қошлари қалдирғоч, чақнаб турган, аканг айлансин бир жувоннинг ишга келиши унга ёқиб тушди. У Гулгунга бошдан-оёқ тикилди; қўллар, кўкрагу сонлар қайроқдек... Чортоқ санаторийсига бориб, ҳури филмонларга тикилиб ўтиришнинг ҳожати қолмади. Гулгун бўлса Ҳефизхон акага бир қарашдаёқ кўзининг бежолигидан, ширин-шакар гапларидан, ўрнидан туриб, дікиллаб қолишидан унинг кимлигини билди. Райздрав мудири Ҳефизхоннинг эски қилигини билиб, секин унинг қулогига, «эри эски фронтовик, жаҳли тез, тагин бир қилиқ қилиб, думбадан ўқ еманг...» деган гапни айтиб қўйди. «Унда, Чортоқ тўғонимиз тамоман вайрон бўлиб, Намангандча сув босади», — деди. Ҳефизхон кўкрагига туфлади.

— Олтмишга кирдим, ака, ҳали ҳам мени шунаقا деб ўйлайсизми? У вақтлар ўтиб кетган. Бутун куч құдратимиз кўзда. Кўзга рухсат борми ёки уни ҳам ўраб ташлайликми?

— Кўз ўлсин, кўз ҳеч тўймайди-да! Тикилишга рухсат берамиз-ку, локин эвига! Эрталабдан кечгача бақадек тикилиб ўтирмасангиз керак! Эрталаб бир қараб қўйсангиз етади, бас!

— Ха-ха-ха-ха-ха-а! Етади денг. Энди кунимиз шунга қолди. Ҳолимизга маймунлар йиғлайди. Оҳ-оҳ, қандай вақтлар бўлган эди. Үшаларни ўйлаб, анави

ола сигирдек кавш қайтариб етамиз. Лекин бу чикка бел, мурча миён жуда зёр! Эрининг аҳволига қаранг, кундуз куни одам кўрса қўрқади!

— Фронтда куйган. Кулиб бўлмайди, Ҳефизхон!

— Тўғри-тўғри, ошнам, хато қилдик. Бу жонон беркорга бу инженернинг кетидан юрмагандир-ов, деб ўйладим ўзим ҳам.

— Балли! Сиз билан биздан кучлироқ бир томони бордирки, ёқсан. Сиз бўлсангиз ҳар куни қўй ёғига ош дамлаб ейсиз, натижа йўқ...

— Ха-ха-ха-ха-а! Қўй эмас, қора қўчкор ёғига... Натижа ёмон эмас, ука, тонготарини кеннаингиздан сўрайсиз...

— Оббо, Ҳефизхон ака-е! Поликлиника томорқа. Бахтингизга касал кам. Ёз бошланди, одамлар палаткада... Сиз ағаниб ётаверсангиз, кейин чатоқ бўлади!

— Тушундик. Ҳамма гаплар ҳазил эди,— деди Ҳефизхон бир сесканиб, жиддий тортиб.

Гулгун Янгиқўргон район поликлиникасига фельдшер бўлиб тайинланиб, ишлай бошлади. Орадан бир ҳафта ўтгач, бош врач Ҳефизхондан рухсат олиб, Кораскон участкасида медпункт очди. Бу ерда асосан ўзи ва яна бир ҳамшира галма-гал навбатчилик қилишди. «Семиз доктор», баъзи одамлар ҳазил қилгандек, ёмон одам бўлиб чиқмади. Гулгун назарида у ҳам раисга ўхшаган меҳрибон, дилкаш одам экан. У Гулгун ташаббусига ҳеч монелик кўрсатмади. Аксинча, медпунктга ўзи ҳам тез-тез келиб аптечкани янги дорилар билан муқаммал қилиб турди. Укол қилиш санъатида Гулгуннинг маҳоратини аввал Ҳефизхон, кейин поликлиникадаги бошқа ҳамширалар ҳам тан олишиб. Гулгун бу ҳунарни мединститутга қирмасдан илгариёқ, мактабда ўқиб юрганида инвалид отасига ёрдамлашиб, ўрганиб олганлигини айтди. Отаси оёғи қирқилганлиги ва танида осколка борлиги сабабли, мана, ўттиз йилдан бери оғриқни қолдира-диган укол олади. Бу уколни Гулгун бўлмаганда у ўзига-ўзи қиласди...

Қорабоғ, Алихон, Айқирон томонларида чорвада карантин бўлиб, йўлларга қоровул қўйилди. Иссик кунлар бошланиши билан палаткада яшайтганлар ўртасида ичбурууқ вируси тарқалиш хавфи бор эди. Райздрав буйруги билан Гулгун бир ҳафта ичидан

Кораскон территориясидаги барча кишиларни наゾратдан ўтказиб, вирусга қарши укол қилиб чиқди. Унинг тинимсизлиги, бир сўзлилиги бош врачга жуда ёқарди. У раисни ҳаммадан аввал медпунктга чақириб, ташқарида кутиб турган одамлар олдида укол қилди. Илгари кўплар бу ишга менсимай қарашарди. Ҳозир оқ халатли «Опа доктор» сўзини икки кишлишмади. Қишлоқ аҳли янги келган докторни (бу ерда у ҳамширами, врачми — фарқига боришмасди) «Опа доктор», деб атай бошлади. Кимнингдир иситмалаб ётган боласи пенициллин уколоидан кейин (диагнозни Ҳефизхон қўйиб бергандан сўнг) иситмаси пасайиб, икки кундан сўнг кўзини очгани, кейинчалик ўрнидан туриб, ўйнаб кетгани «Опа доктор»нинг обрўсими оширди. Одамлар «Семиз дўхтири»дан кўра кўпроқ дилбар «Опа доктор» келишини исташарди. Гулгун оқ халатда, елкасидаги сумка (бунда термометр, наушник, қон босимини ўлчайдиган асбоби, биринчи ёрдам дорилари, бинту йодгача муҳайё қилинганд)нинг оғир бўлиб кетганига қарамай дала кезар, уйма-уй юрарди. Баъзан машинада, баъзан тўрт гилдиракли аравада, баъзан пиёда. От мингган вақтлари ҳам бўлди. Кечқурун чарчаб уйга келар, раиснинг хотини уларга ажратилган меҳмонхонага бир косада ош олиб кириб, бир муддат дилкашлик қиласди. Қоражон Гулгуннинг терлаб-пишиб, жизғанак бўлиб ишлаб юрганини кўриб, хурсанд бўларди. Унинг бунчалик жонкуярлигини, шифокорликни яхши кўришини билмас экан.

— «Опа доктор», тўғон томонларга ҳам бора-сизми? Машина юборайми, бир одамимиз бетоб бўлиб қолди,— деди кечқурун ишдан қайтган Қоражон.

— У ёқ менга қарамайди!— деди Гулгун кулиб,— у территориядан фақат битта сизнинг касаллик карточкангиз менда.

— Бош врач Ҳефизхон ака билан гаплашсам, у томонга ҳам анави ҳамшира хотин билан бирга бориб турсангизлар бўлмайдими? Жиддий галирятман. Бир бульдозерчи қаттиқ бетоб.

— Бош врач билан гаплашинг,— деди Гулгун ўзини кулгидан тийиб. Бу ҳазил эмаслигини пайқаб қолди.

— Бир шоффёр йигитнинг қўлини мотор эзиб юборди. Штабда битта аптечка бор экан, ундаги йод ҳам

қуриб қолибди. Еинт тополмадик. Иш расво,— деди Қоражон,— бечорани ўн беш километр машинада йўл босиб, район марказига олиб келибмиз.

— Медпункт очиш керак! Шу ҳам қийин бўлибдими! Райзздрав билан, Ҳўжаев билан гаплашиш керак!

— Ўзинг гаплаш.

— Хўп. Гаплашаман, рухсат этсангиз.

— О, ўзимнинг «Доктор опам»дан,— Қоражон Гулгунга ташланди.

— Тсс! Дераза пардалари очиқ. Бекитиш керак! Раиснинг хотини бунаقا енгиллик қилганларни ёқтирамайди.

— Раиснинг хотини ёқтирамайди, деб энди ўламизми...

— Тўхтанг, тўхтанг!— Гулгун югуриб бориб дераза пардаларини, эшикни ёпиб қулфлади,— Наманган Тошкент эмас, акажон, эҳтиёт бўлиш керак. Обрўни тўкиб қўймайлик. Бу ерда хотинлар жуда тақвдор, юзларига оқ рўмол тутиб, бекитиб юришар экан.

— Тушунтириш керак! Баъзилар паранжини ташлаб ёруғликка чиққанликларини ёддан чиқарганга ўхшайдилар. Ёки бу ерда жаҳолат кишиларининг таъсири кучлимикан?

— Мана бу гап ҳақиқатга яқин,— деди Гулгун. У Қоражон билан бу томонларга келганидан норизо эмас эди. Агар у институтни тамомлаган бўлганида яна ҳам яхши бўларди. Икки йилгина қолганида «бир шўриши ғавғо» уни академик отпуска олишга мажбур қилди.

Колхоз қишлоқларининг, айниқса, Кораскон аҳлиниг «Опа доктор»га муҳаббати ошди. Улар ўзлигидан кечиб, чопқиллаб юрган янги ҳамқишлоқларида мамнун эдилар. Бу ердаги ёш жувонлар, келинлар, бўйи етган қизлар у билан дугона тутинишли. У ҳамма билан тил топиша оларди, учрашганларида дарров гап ҳам топила қоларди. Фақат ишга вақтинчалик келганидан норизо эдилар. Уларни бу ерда бутунлай қолишга даъват этишарди. Шу давр ичida район газетасида унинг фотосурати билан мақодиша ҳам чиқди. Орадан бир ҳафта ўтгач, «Қишлоқ врачи» деган шеър босилди. Бу шеър китобдан олинган эди:

Уни «Доктор опа», дейишади,
Барча уни танир қишлоқда.
У ҳар доим тайёр, эрта ва кеч,
Йўқдир унинг маълум иш вақти.

«Доктор опа», дейди кекса ва ёш —
Юрагида юртнинг ғами бор.
Ана ўзи, чуст дўпписига
Чилвир сочин қилибди чамбар.

Кабинети ёруг, озода —
Стол, термометр, каравот...
Атлас кўйлагининг устидан
Кийиб олган эди оқ халат.

Далаларда юрар, тиним йўқ,
Элнинг ғами тушган юракка.
Ўзоқ ҳовлилардан тоҳ машинада,
Гоҳ ўзи қайтарди якка.

Беморларга бўлар парвона,
Кеча демас ва демас кундуз.
Болаларга бўлар эди она,
Оналарга бўлар эди қиз.

Колхозларда юрар уйма-уй,
Допм унинг ишлари жадал,
Гоҳо ширин уйқусини бузиб
Чақиришар ярим кечада.

Беморларнинг худди ўзи каби
Юқтирумайди бир ерига гард.
Кириб келганида, уни кўриб,
Шу ҳовлидан чиқиб кетар дард.

Томир ушлар, термометр қўяр,
Аҳвол сўрар ва берар далда...
Одамларнинг меҳри тушган унга,
Уни барча севар далада.

«Доктор опа», дейди катта-кичик,
Таърифи зўр, дорилари ясили.

Қишлоқлардан қувмоқчи дардни,
Соғлом ўссин, дейди, ёш насл.

Шеър район газетасида босилиб чиққан куни эрта билан семиз бош врач Ҳефизхон ҳалпиллаб Корас-кондаги медпунктга кириб келди. Унинг тили оғзига сиғмасди.

— Шунча вақт ишлаб, бизнинг медиклар ҳақида шеър ёзилмаган эди. Қизим, сизга бағишиланган шеърни жуда түгри ёзибди, зўр! Маладес!

Гулгун қулимсираб индамай турарди.

XXXIX боб

ҚОРАЖОННИНГ БАХТИ

Энди икки оғиз сўзни Қоражон Мингбоевдан эшигинг.

Қоражон ўша куни Иномжон иштироқида тўғонда ишлаётган барча шофёр ва экскаваторчиларни штабга чақириб, танишиб олгач, тўғоннинг бузилган участкаси ва бўлғуси ишларни бошлиш учун мўлжалланган пул ва қурилиш материаллари сметасини қайта тузишга киришди. Тўққиз миллион кубометр сув тўплашга мўлжаллаб, иш бошланажаги ҳақида обкомга, Сув хўжалиги ва мелиорация министрлигига докладнома тайёрлади. Қурилиш штабида ишлаётган бухгалтер, ҳисобчи ва кассир, кадрларни ҳисобга оловчи секретарь ва иш юритувчилар, Маша деган машинистка аёл ҳам сув тошқини фожиасидан кейин, бири касал, бири яна бир баҳона билан ишни ташлаб кетишган экан. Бухгалтер ҳам нималардандир ваҳимага тушиб, бошқа шаҳарга қочиб кетибди. Штабдаги ҳужжатлар ўз ҳолига ташлаб қўйилган. Янги инженер Мингбоев аввал бориб, секретарь-машинисткани уйидан топиб келтирди. Ҳеч қандай хавф-хатар йўқлиги, бу ерда суд ва текширув ишлари кетмаслиги, тезроқ ишни яхшилаш кераклигини, янги келган бошлиқ бундаги одамларни жавобгарликка тортиш, қувринг қилиш эмас, аксинча, ишнинг кўзини биладиган одамлар билан ишни тузатмоқчи эканини билишгач, штабнинг столда ўтириб, чўт қоқадиган, хат

ёзадиган барча ходимлари бошқатдан тўпланиб келишиди. Янги инженер ўзи ҳақида, фронтда, танкда куйгани сабабли юзлари чандиқ бўлиб қолганини, хотини ҳам шу ерга келиб фельдшер бўлиб ишлаётганини гапириб берди. Унинг ҳеч нарсани сир тутмагани, камтарлиги одамларни йигиб олишга қўл келди. Фожиа сабабчиси илгариги инженер Ҳазратов номини асло тилга олмади. У атай бу фожиани, кутилмаган фалокат, деб атади. Шошмашошарлик билан шиббалаш пухта бўлмаган, деди, бунинг устига тўғон фақат слти миллион кубометр сувга мўлжалланганлигини, ёмғир — жала сувни саккиз миллионга чиқариб юборгани оқибатида бу фожиа юз берганини айтди. Ҳиссиётга қул бўлиб, одамларни айблашга уринмади. Ишга қайтиб келиб, машинкасини чиқиллатиб ўтирган Маша деган рангпар жувон ҳам бу ердаги ишга алоқадор жуда кўп сирлардан хабардор экан, Қоражон унга яхши муомала қилиб, ҳамма гапни билиб олди. Шофёр, бульдозерчи ҳамда экскаваторчилар ҳақида ҳам тўла маълумот тўплади. Уларнинг феъли, заифу кучли томонларигача ўрганди. Бир неча катта машина — «БелАЗ»ни бу ерга юбориш ҳақида Облводстрой бошлиғига хат ёзди. Қайтадан геодезист бу ер хусусиятларини текширувчи мутахассислар чақириб, ерни ўрганди. Илгариги тўплangan маълумотларни ҳам қайта кўриб чиқди. Қир тупроғи бўшлиғига учун бетон туннель билан ёпишиб, зичланмаётгани; тўғон тагида шағал қатлами борлигини, сувнинг вақтингчалик ер тагидан сирқиётганини аниқлаб, яна ўттиз метр ўзунлигига, унча баланд бўлмаган дамба қуришни лозим кўриб, лойиҳа авторларига хат ёзди. Узгидропроект институтидан бир неча мутахассис келиб, Мингбоев ва Одиловлар билан бу таклифни муҳокама қилишди. Инженер Мингбоев фикри лойиҳа авторларига ҳам ёқди. Олти ойга чўзиладиган иш давомида тўғон лойиҳаси авторларидан бири бу ерда бўлиб, қурувчилар ишини кузатишини ҳам талаб қилди. Лойиҳа авторлари янги, бир сўзлик, бу ерга Марказий Комитет маҳсус юборган инженер илтимосига кўнмасликнинг иложини топишолмади. «Бир бўлган фалокат, ишни пишиқ қилмасак, иккинчи марта ҳам такрорланиши мумкин. Унинг қайтарилмаслиги, умуман, сел келадиган бу районларда бундай фожианинг тамоман олдини олиш учун курашувимиз керак», — деди инженер Қоражон Мингбоев.

Кўп иншиотларда лойиҳа автори қурилчиша доимо гитирок этиши лозим эмас эди. Лекин Қоражон бу ерда лойиҳа автори бўлмаганида ҳам, унинг вакили иш ўнгланиб олгунига қадар қолишини талаб этди. Биз ишимизни, трамбовкамизни лабораторияда анализ қиласмиз. Шу анализ натижасини лойиҳа авторлари ҳам билиб туришлари керак. Чорвоқ тўғонида иш тартиби шундоқ, деди кечки муҳокама йиғинида. Бундай йиғинларда, дастлабки кунлари деярли барча бульдозерчилар, шофёrlар, «МАЗ»да шиббалаётганлар ҳам иштирок этишарди.

Чоршанба куни Қоражон доклад хати билан Наманганга, обкомга борди.

Қоражон билан Гулгуннинг ишга тушиб кетгани, бири чангга ботиб, иккинчиси далама-дала юриб, фаоллик кўрсатишгаётгани атрофдагиларга ўзгача таъсир қилди. Ёки Наманган иқлими кишига гайрат бағишлиармикан? Нега бундай? Кейинги кунларда, гарчи хат, телеграмма, баъзида телефон орқали гаплашиб турганига қарамай, Гулгун онасини жуда соғинди. «Хипча бел, мўрчамиёнлик» ҳам ўзгара бошлади — хусн абадий эмас-ку! Ҳомиладорлик — гунчалик, кўзи ёригандан сўнг яна очилиб, яшнаб кетади аёллар.

* * *

Кечга яқин раис эшиги тақиллади. Югуриб чиққан кенжатой эшик олдида юзларини оқ рўмол билан ўраган бир аёл турганини кўрди. Колхоз аъзоларидан бири бўлса керак, дадамларда иши бордир, деб ўйлаб, «Дадамлар келганлари йўқ», деб жавоб қилди.

— Менга даданг эмас, «Доктор опа» керак эди, бормилар?

— Ҳа, борлар.

— У кишининг әрлари, инженер ҳам келганмилар?

— Ҳа, келганлар.

— Вўлмаса, айланай сендан, кириб айтгин, бир хотиннинг сизларда зарур гапи бор экан, кирсалар майлимни, деб сўрагин!

Бола ичкарига қайтиб кириб, бир зумдан кейин яна қайтиб чиқди.

— Китаверинг, майли, дейиши.

Оқ рўмолга юзини ўраган аёл тўппа-тўғри ичкарига кириб, Қоражон билан Гулгун олдида юзини очди. Эру хотин ҳайрон бўлиб қолиши: уларнинг рўпараларида Обакихон турарди. Қиёмхўжа Ҳазратов, Ишларбек Сапчабошевларнинг ўйнаши... Бу бузуқ хотин Гулгун бошига не-не маломатлар ёғдирмади, эри билан ораларининг бузилишига сабабчи бўлди!

— Мени танидингизми? Ҳа, мен ўшаман...

Гулгун билан Қоражон миқ этмай қотиб қолиши. Улар нима дейишини билишмади. Бу бузуқ хотин орқамиздан таъқиб қилиб юрибди, деб Гулгуннинг ранги ўчди. Қоражон ҳам лол қотди.

— Сизга нима керак? — Қоражон нафрату титроқ билан сўради.

— Мен асли шу ерликман. Авлод-аждодим шу ерда ўтган. Мен шу ерда катта бўлганман, шу ҳовлига ҳам кириб турардим. Шу кўчаларда ўсганман. Мен бузуқ эмас эдим... — У бирдан ҳўнграб йиғлаб юборди. У ўзини тутолмас, елкалари титрарди. Кўзидан ёш оқиб, кафтларини ҳўл қилди.— Мен, мен... — у фикрини тушунтиrolмай йиғларди.

— Стулга ўтиринг,— деди Қоражон.

— Раҳмат,— деди у эшик олдидаги стулга енгил ўтириб, қўлидаги оқ рўмол билан кўз ёшлиарни артиб.— Бу ерга келганларингни эшитиб, юрагим ёрилгудай севиндим. Сизлар бунда менинг қишлоғими ни тузатаман, одамларга яхшилик қиласман, деб юрсанглар, мен унда ёмон ишлар қилиб юрсам, ҳам-қишлоқларим юзини ерга қаратсам. Ўша одам... Ҳазратов бу ёққа келиб ишлаганида мени лақиллатган... Мени алдаб Тошкентга олиб кетди. Хотиним билан ажралишаман, сени оламан, деб йўлдан урди. Унинг ошналари ҳам мени лақиллатиб, ёмон йўлга бошладилар...

У яна ўзини тутолмай йиғлади.

— Мен сизларнинг ёнингизга бир иш билан келдим, мени кечиринглар. Олдимда икки йўл бор: ё ўзимни ўлдириш, ё менинг бузилганлигимни ҳеч ким юзимга солмаслиги... Мен колхозчи бўлиб, уруғларим ичиди ишлашни истайман. Сиздан илтимос қиласман, раисга мени ёмон хотин деб айтманг, менга фақат шу керак. Тошкентда эшитганларингизни айтманг. Мен хато йўлимдан қайтдим. Менинг асли исмим

Кимсанхон. «Обакихон» эмас! Мени бузуқ, деб айтманглар.

— Агар ишлаб, пок яшамоқчи бўлсангиз, биз раисга ҳеч нима демаймиз. Бизга бунинг нима кераги бор?

Обакихон Қоражон билан Гулгун ёнидан йиглаб-йиглаб чиқиб кетди. Шу кеча эру хотин кўзига уйқу келмади. Обакихоннинг йифиси, асли шу ерлик экани уларни жуда ўйлатиб қўйди. Ҳазратов бу ерларда гашт қилиб юрганида қурбон бўлганлардан бири эканини пайқашди. Эру хотин ўз сўзларига, берган ваъдаларига амал қилиб, Кимсанхон ҳақида ҳеч ёмён сўз айтишмади, аксинча, раис олдидা уни ҳимоя қилишди. Иш беришни, қариндош-уруглари ичida юзини шамгин қиладиган гаплар бўлмаслигини таинлашди. Бу гаплардан оз-моз хабари бор раис, инженер Мингбоев ҳурматини қилиб, Кимсанхонни колхозга қабул қилиб олди. Унинг сув босган уйини тузатишга қараашди.

Кейинчалик маълум бўлишича, Кимсанхон Бегматова ўз сўзи устидан чиқди. Туғилиб ўсган уйини бузиб, укаси билан бирга янги уй сола бошлади. У ўз қариндошларидан бирининг бригадасида ишламоқда. Раиснинг айтишича, шу бригададаги хотини ўлган йигитга «бир лаган ош билан» никоҳ қилиб қўйишибди. Ҳозир у ўша йигитнинг боғини обод қиласётгани эми

* * *

Ойлар ўта бошлади. Оғироёқ бўлиб, пишиллаб қолган Гулгун ўз қишлоғига, Сижжакка, онаси ёнига боргиси келди. Негадир ўша ерда кўзи ёришини жуда истай бошлади. У баъзида кун бўйи уйда ётар, лекин ҳомиладорликда секин-аста юриб туриш фойдали эканини билгани учун баъзан машинада эри ёнига, баъзан поликлиникага бораради. Агар Сижжакка бориш жуда лозим бўлса, ўзим элтиб қўйиб келаман, деб Қоражон самолётга билет олган куни Гулгунни тунда дард тутиб, «Тез ёрдам» машинасида туғруқхонага олиб борди. Тонготарга яқин Гулгуннинг кўзи ёриди. У ўғил түгди...

Ҳамширадан бу гапни эшитган Қоражоннинг оғзи қулоғида, илжайиб, тўппа-тўғри штабга борди.

Бу гапни Иномжонга, секретарь қиз Машага гапирди. Шоффёр йигитлар ҳам эшитиб қолиб, дарҳол штабдаги ёзув столларидан иккитасини бирлаштириб, устига газета ёзишиди. Бир неча бутилка ароқ, шампань виноси, шоколад, олмалар тўкилди. Янги меҳмон шарафига тоза ичишиди. Кайфи ошиб қолган Қоражон, «сиз маст эмассиз-ку, дўстим, сиз штабда туринг», деб, уйга жўнади. Иномжон Қоражондан кўра ҳам маст эди. У «мен сизга айтсан...» бўлиб қолган эди. Қоражоннинг шоффёри ҳам «тортган»лиги сабабли ўткинчи бир машинага қўл кўтариб, Корасконга етиб олди — гандираклаб, ашула айтиб раис ҳовлисига кирди.

— Э, ўзлари жуда қувноқ бўлуттилар-ку! — деди раис инженерни биринчи марта бу аҳволда кўриб. У доимо жиддий одам бўлиб юрарди.

— Раис, ҳурматли раисимиз, — у Юсуфжон акани қучоқлаб ўпа бошлади, — фарзанд кўрдим..

— Э, муборак бўлсин! Умри билан бергани бўлсин! Узингизга ўшаган баҳодир бўлсин!

— Азизим, мен... мен қирқдан ошиб кетганман-а! Биласизми! Мен... Мен фронтда дабдала бўлган одамман-а! Биласизми? Мен... уйлана олмаганман... Мени хунук деб тегишимади... Биласиз-а! Локин, мана шу Гулгун чин инсон. Ўлгунимча уни бошимга қўйиб юрсам арзиди... — Қоражон ҳўнгиллаб йиғларди. Раис инженерни бундай ҳолатда ҳеч кўрмаган. Ву ўта хурсандчилик, мастиқдан эканини билиб турарди. — Мен ўғил кўрдим. Менинг садоқатли, бебаҳә хотиним ўғил туғиб берди. Сиз боя «баҳодир» дедингизми? Шундай дедингиз-а? Келинг, раис бува, сиз айтгандек, исми Баҳодир бўлсин! Менга бу исм ёқади!

Шу куни ёқ иморат солишаётган корасконликларнинг деярли ҳаммаси инженернинг оғзи қулоғида, ўғил кўриб, хурсанд бўлиб юрганини эшишиди.

Қоражон Мингбоев ҳар куни икки мартадан туғруқхонага қатнарди, раис хонадонидаги дўсара аёлларни ҳисобга олмаганда, Гулгуннинг Қоражондан бўлак бунда ҳеч кими йўқ эди. Эрининг туғруқхонага тез-тез келиб туриши, фарзандини кўриши она учун катта баҳт.

ИУЛБАРС ИЗИДАН, УЗБЕК СУЗИДАН ҚАЙТМАС

«Наманган область Чортоқ сув омбори қурилиши, инженер Минбоевга, Азизим, сизни Ленин ордени билан мукофотланганингизни чин юракдан табриклаймиз. Олтинчи ноябрда Чорвоқ ГЭСининг тўла эксплуатацияга топширилиши ва плотинанинг битишига багишланган тантанали митингга сизни ҳамда Мингбоеевни таклиф этамиз.

Садовников».

1975 йил, 28 октябрь эди... Штабда, стол устида ётган бу телеграммага кўзи тушган Иномжон аzonлаб, унинг ўз сўзи билан айтганда, «сўфилар оёқ ювмасдан» қайтадан велосипедига миниб, Кораскон томонга югурди. Афтидан, бу телеграммани почтальон Довдир мирза кечакурун олиб келгану, бу ерда одам бўлмагани сабабли стол устига ташлаб кетаверган. Иномжон велосипеди билан тўғри раис ҳовлисига кирди. Елкасига беқасам тўн ташлаб лўмбиллаган ўғлини қучоқлаб, бамайлихотир айвонда чой ичиб ўтирган Қоражон ялт этиб «муовинига» қаради-дэ, бир кори ҳол бўлдими, деб бақрайиб қолди. Гулгун ҳам қўлидаги пиёлани хонтахта устига қўйиб, Иномжонга тикилди.

— Хурсандчилик! Ҳайрон бўлманглар, хурсандчилик! — деди энтикиб Иномжон. — Яхши одам хушхабар беришдан завқланади, хушхабар! — У телеграммани Қоражонга узатди, — Ленин ордени билан табриклайман!

Қоражон телеграммани ўқиб, кейин Гулгунга узатди. Гулгун ҳам бир қарашда ҳамма гапни билди.

— Табриклайман, адаси, Ленин ордени билан! Баҳодиржон номидан ҳам адасини Ленин ордени билан табриклаймиз!

Қоражон кўзига ёш келди. У бир лаҳзалик бу ҳолатни асло сездирмади.

— Бу ёққа чиқинг, Иномжон, дастурхон ёнига ўтиринг!

— Қаранг, саломлашишни ҳам унутибмиз. Ассалому алайкум!

— Салом! — Улар қўл қисишиб омонлашиши. — Ичамизми? Озгина қовурдоқ қилиб юборасанми?

- Ака, шу ишни кечқурун қилайлик.
- Бўпти,— деди Қоражон,— Гулгунойнинг отпускалари, кечқурунни ҳисобга олиб қўядилар...
- Яна ичиш! Кўп ичмасаларинг дастурхонни боплайман. Ош дамлайман, дўлма қиламан...
- Намангандага келганимиз бизга ёқяпти,— деди Қоражон,— Ленин ордени, фарзанд... Бизнинг келишимиз намангандикларга ҳам ёқса соз бўларди. Зора қутоёқ бўлсан...
- Ака, бирингиз, мана, қанча вақтдан бери чанг ютиб, тўғон қуриб, элни сувга сероб этсангиз, бирингиз шу эл саломатлиги учун ўзликдан кечиб даволасангизу, сизлар қутоёқ бўлмай, ким қутоёқ бўлади! Район аҳли сизларни жуда яхши билади. Янгиқўргонликлар одам танийдиган ҳалқ, ҳаммани ҳам бунчалик эъзозлайвермайди, ака!

Эртанги газеталарда СССР Олий Совети Президиумининг Фармони эълон қилинди; арматурачи Абдуманноп Содиков билан «БелАЗ» ҳайдовчи Пётр Петрович Можаевга Социалистик Меҳнат Қаҳрамони, қурилиш бошлиғи Георгий Исаевич Садовников, участка бошлиғи Қоражон Мингбоев, одий шофёр Азамат Пўлатов, монтажчи Сергей Исаевич Соколовлар Ленин ордени билан мукофотланган. Орден ва медаллар билан мукофотланганлар орасида Иван Иванович Шишкин, Михаил Трофимович Никаноренко, Абдуманноп Чоршанбахўжаев ва бошқалар ҳам бор... Тўғон тепасидан қураб тушиб, ҳалок бўлган шофёр, марҳум Раҳимжонов номи «Ҳурмат Белгиси» ордени рўйхатида. Қоражон мукофотланган ошналарига алоҳида-алоҳида телеграмма йўллади. Шу куни Қоражонга Файзулла Аҳмедовичдан, Шишкин ва Галинадан, Амир Равнақдан, Никаноренкодан, Милтиқбой акадан ва бошқалардан ҳам табрик телеграммалари келди.

Байрам арафасида, бешинчи ноябрь куни Қоражон хотини, боласини олиб, тантанали митингда иштирок этиш учун Тошкентга учди. Бу хабарни эшитган Кимсанхон эри билан бир сават корзинкага яхшилаб анжир териб, битта челякда ҳусайни, чарос узум кўтаришиб келиб, Гулгуну Қоражон билан хайрлашишди. Қоражон «Обаки»нинг тамоман бошқа одамга айланганини кўриб ҳайрон қолди. Жамоа, атрофидаги меҳнат аҳли киши феълу ҳаракатини, одобини ўзгартириб юборишини ўз кўзи билан кўрди.

Подшонинг ўғли қирқ йигитни бузгани ҳақидаги латифани айтиб, ишқилиб, худо шундоқ бўлишдан асрасин, деган эди Қоражон Гулгунга. Йўқ, бунинг тескариси бўлди. Мехнатдан қочмайдиган, ҳалол кишиларни ёмон йўлга бошлаб бўлмайди! Кораскон қишлоғини сув босиб, эртасига ярим белдан сув — ботқоқ кечиб юрганларида, шу корасконлик икки аёл қазноқдаги ипак қуртларини кўтариб юриб, фалокатдан асраб қолишганини эшитган Гулгун ҳам қойил қолган эди.

Қоражонларни аэропортга Юсуфжон aka, Иномжон, Ҳефизхон ва район милициясининг бошлиғи Жўрабеклар олиб чиқиб, кузатиб қолишли. Тезроқ қайтиб келишни, «Наманган граждани» Баҳодир полвон ҳам тезроқ қайтишини сўрашди.

Улар Тошкентга омон-эсон етиб келиб қўнишгач, такси билан шаҳар марказига келишиди, машинадан чиқишишгач, Қоражон костюмининг ён чўнтағидан дафтарчасини олиб, унинг ичидаги кўпдан ётган, увадаси чиққан, йиртиқ бир сўмликни олиб, таксичига узатди.

— Э, пулнингизнинг номери йўқ-ку? — деди таксичи. — Бу увадаси чиққан пулни мен нима қиласман? Мен хизматимга оласман!

Гулгун ялт этиб эрига, кейин увада бир сўмликка қаради. У бу пулни эслади.

— Укажон, бу пулни мен ҳам хизматимга олгансман. Номери бор. Пулнинг эски-янгиси бўлмайди, — деди кулди.

Шу лаҳза Гулгун сумкасидан шалдироқ, янги уч сўмлик олиб, таксичига узатди.

— Олинг, бу менинг хизматимга берилган пул!

— Бу бошқа гап! — деди таксичи янги пулни олиб, эски пулни Гулгунга қайтарди.

— Адаси, бу увадаси чиққан бир сўмлик пул шу кунгача етиб келибди, мен уни йўқотмайман. Олиб қўйиб, Баҳодиржоннинг хотинига бераман. У таксига ишлатади.

— Мен ҳам шунаقا қиласмиш, деб ёнимда неча йилдан бери олиб юрган эдим.

— Оббо сиз-е! — Гулгун хаёлидан тоғда жала қўйган кунда Қоражон юзидан қўрқиб, ҳадиксираганлари ёдига тушибди. Бу «қўрқинчли» одам ҳаммадан яхши, асил бўлиб чиқди. Яна бир машинани кира қилиб Сижжакка, тоғ оралиқларининг мўйловдор оқсоқоли,

Баҳодирнинг бобоси — Милтиқбой ака бағрига жўнашди. Узоқда, буюк тўғон устида Политбюро аъзолари ва аъзоликка кандидатларнинг портретлари турибди.

ГЭС биносидан сал берироқقا, тепаликка бронзадан ишланган Фарҳод қўйилган эди. Бу водийга жуда ярашиб турибди. Хўжакент кўпригидан ўтишда йўл четига донгдор қурувчиларнинг матога чизилган катта портретлари ҳам қатор қўйилган эди. Байробу шиорлар... Улар орасидаги «Инженер Қ. Мингбоев» портретига ҳам Гулгун билан Қоражоннинг кўзи тушди. Ҳамма ёқ байрам либосида. Сўнгги ҳужум бораради — улкан тўғон атрофида «БелАЗ»лар гумбурлаб югуран, бульдозерлар йўл четида кучаниб тош-шағал еурар, «МАЗ», «КрАЗ»лар бетон-арматура таширди. Пайвандчиларнинг чарс-чурси... Пастда Чирчиқ дарёси шовиллар, қурувчилар шаҳарчаси томонда радиокарнайлардан аллақандай музика шовқини ҳам келиб турарди. Қадим, кимсасиз, жимжит водий одамлар билан гавжум эди. Уларнинг ҳаммаси Қоражоннинг шериклари, сафдошлари. Уларнинг ишини кўриб, Қоражон тўлиқинланар, ҳаяжонини босолмасди, ҳозироқ кичик машина ичидан чиқиб кетгиси келарди. Унинг қўлида гўдак, ёнида Гулгун, аммо хаёлан у ҳозир тўғон устида эди. Бундай иш қизгин, ҳаяжонли дақиқаларда четда, машина ичиди, дўйстларидан ажралгандек ҳис қиласиди. Лекин аслида у ўз дўйстлари билан бирга, бир сафдадир. Чортоқ ҳам, Чорвоқ ҳам битта мамлакат, битта Ватанинг икки ёноғидирки, бир-бисрисиз яшаши мумкин эмас. Улар ҳатто Али, Вали деб ака-уқага қўйилган номдек: Чорвоқ — Чортоқдир. Бунақа қофиядоси сўзларни текис чиққан ғиштдек Амир Равнақ дарров бир шеърида ишлатиб юборади.

Қоражонларни байрамга, тантанали митингга таклиф этилганини, улар аввал бобоникига келишликларини Милтиқбой ака билган эди. У ҳали неварасини кўргани йўқ, кўрмана ҳам бергани йўқ. У албатта неварар биринчи галда мени келиб кўради, деб ҳовлига чиройли бир тойчани боғлаб қўйди. Кўчаларга сув сепилган, каттакон тўйга тайёргарлик кетарди. Молхонада бир-икки қўй Қоражонлар қадамига мунтазир... Бутун қишлоқ аҳлини, мана бугун — бешинчи, олтинчи числоларда Намангандан фарзандларим келади, ҳамма бизникига тўйга, деб хабарлаган эди. Қўлтиқтаёқли эски жангари солдат, қишлоқдаги ўзига ўхшаган

кексалар билан бир ҳафтадан бери маслаҳат оши устиға маслаҳат оши берарди. «Невара кўрармиш, куёви Ленин ордени билан мукофотланармишу, у тўй бермай, ким тўй берсин», — дерди ариллаган оқсоқол. «Тўйни биз қиласиз! Ўттиз йил аввал шу мамлакатни саломат сақлаб қолдикми, энди унда катта иншоотлар қуриб, Ленин ордени олдикми, тўйни биз қиласиз. Тўй қилганда ҳам жамшидона қиласиз», — деб ҳотамтойлиги тутиб кетган Милтиқбой ака ҳеч нарсани аямасди. «Йўлбарс изидан, ўзбек сўзидан қайтмас! Беш миллиондан ошириб пахта берамиз, дедик, бердик! Ўзсўзлилик биз, ўзбекларнинг қонимизда!» — дерди у ҳамма жойда. Милтиқбой аканинг гаплари ўзига ярасиб турарди.

Қоражонлар тушган машина Сижжакнинг қия, пасту баланд кўчаларидан ўтиб, Милтиқбой ака дарвозаси олдида тўхтади. Бу ерда тўдалашиб юрган болалар юрганича ҳовлига кириб кетишиди. Чойхонада ўтирган кексалар ҳам бугун беш кундан бўён пойлаб ўтирганлари — қаҳрамон йигитнинг истиқболига келишиди. Янглишиб қўлтиқтаёғини ўнгга олганича Милтиқбой ака, ундан олдинроқ баркаш кўтариб ҳовлига тушган Санобархон болалари устидан сочқи сочди: тангаю чақалар жаранглади. Шундан сўнг югуриб бориб, болаларини қучоқлади. Милтиқбой ака ҳам ҳаккачақлаб бориб, болаларини қучоқлади. «Хой, Ҳикматулло, қўйни сўй! Болаларимнинг келишига, қадамига сўйиб юбор. Бизни ҳам шунча фронтдай жойлардан омон-эсон келиб, мундоқ кунларга етказар экан. Худога шукур!» Санобархон хокандозга тайёрлаб қўйган исириғни тутатиб юборди. Қўшни қиз хокандозни кўтариб, Гулгун, Қоражон атрофидан айлантириди. Санобархон машинада пишиллаб ухлаб қолган Баҳодиржонни қўлига олиб, қучоқлади, тўйиб-тўйиб ўпиб, уйготиб юборди. Айвонга чиқишигач, чақалоқни Милтиқбой ака тиззасига қўйиб, дарҳол айвон устунига илинган чамбаракдаги қатиқни олиб, Қоражон билан Гулгунга ичирди. Шундан сўнг ҳамма Милтиқбой ака атрофига ўтириди, у қўлини фотиҳага очди: «Қани, қадам етди, бало етмасин, ҳаммаларингиз саломат бўлинглар, омин, облоҳу акбар!»

Бирпастдан сўнг ҳовли одамга тўлиб кетди. Қўни-қўшни, ёр-биродарлар, болалар «Ленин ордени билан мукофотланган қаҳрамонни кўриш»га интилишарди. Қоражоннинг барча хатти-ҳаракатларини кузатишарди,

Дастурхонлар ёзилиб, зиёфат бошланиб кетди.

Бир-икки соатдан кейин Қоражон, Гулгун, неварани олиб, машинада Ёнқўргонга боришиди. Айланма тоғ йўллари орқали бу қишлоқ Сижжакдан машинада яrim соатлик йўл эди. Кутимаганда кириб бориб, «алағ-чалағ тушлар кўриб чиққан» Қандил бувини хурсандчиликдан ўтакасини ёриб юборай дейишди. Қоражон ҳақида хушхабарларни эшитган она бугун-эрта ўғли келишини кутиб ўтирган эди. Гулгун Қандил бувига сумкадаги товар кўйлак, маҳси-калишларни, атиросунни олиб тухфа этди.

— Ойи, буларни тепкилаб кийинг! — деди Гулгун.

— Сандиққа солиб қулфлаб, ўлимлик қилинмасин! — деди Қоражон кулиб.

— Б-о-о, болам, саникини ўлимлик қилмайман, кияман! Ўтган жума оқшанба куни ёнимиздаги Зумратхон қазо қилдилар, ўлимлеклари йўқ экан, мандаги ўлимлик ўлгурларни олиб кетишиди. Сандинимда байталмондан қолмади. Ман шўрлик яна бир йил овора бўлиб, ўлимлик йигадиганга ўхшайман.

Қоражон билан Гулгун кулишиди. Кампир она неварани қучоқлади:

— Эҳтимол, шуни кўраман, деб юргандирман. Етказганингга шукур, э худо! Мана, сани ҳам, болангни кўрдим...

Қоражонинг қайнатасиникида катта тўй. Қудава қудагайларни тез олиб келинглар, дейишганини айтиб, Қандил бувини, синглисими машинага ўтқазишиди. Ака-ука, жиянлари, кеннойиларининг бошқа машинада боришлирини тайинлаб, улар яна йўлга тушишиди.

Эру хотин Ёнқўргонга кетганларида, ҳовлидаги меҳмонлардан ҳеч ким ўрнидан қўзгалмади. Қоражон улардан икки соатга рухсат сўраган эди. Шу пайт ичида Милтиқбой aka қишлоқ Совети идорасидаги телефонга бориб, ўтган куни ваъдалашилганига мувофиқ, Чорвоққа қадрдони Музafferovga сим қоқди. Бу қўнгироқни Файзулла Аҳмедович билан Амир Равнағ кутиб ўтирган эдилар. Уларга қўшилиб Иван Иванович Шишкин хотини билан Файзулла Аҳмедовичнинг қизи Таманно, Никаноренко, Абдуманноп ва яна бир неча Қоражоннинг қадрдонлари кириб келишиди. Ҳамманинг чеҳрасида қувонч, байрам шодиёнаси барқурарди.

Қандил буви, Гулгунлар ҳовлига кириб келиши би-

лан Чорвоқнинг казо-казолари ҳам етиб келди. Милтиқбой ака дарвозаси атрофи, шу ердаги кўчалар машинага тўлиб кетди.

Ҳовлига кирган баланд бўйли Файзулла Аҳмедович Гулгун билан омонлашиб, уни янги фарзанд билан табриклиди. Гулгун Файзулла Аҳмедовичнинг бетобликдан тузалгани билан қутлади. Дарҳол Марҳаматхон аясини нега олиб келмадингиз, деб сўради. «Э, қизим... Марҳаматхонга бу шодиёналар буюргани экан, у катта қизим билан қамоққа — анавини кўргани кетди», — деди. Гулгун Тамано билан қучоқлашиб кўришди.

Таманно онаси ҳақида тортинмай ҳамма гапни айтди, чунки Марҳаматхон ая Гулгунни жуда яхши кўрарди. Дил дилга ойна. Аммо шилдир ўғил отани инфаркт, онани сарсон-саргардон қилди.

Онаизор... Йилда бир учрашувга рухсат берилгани сабабли, Марҳаматхон ўғлининг олдига кетган эди. Нобоп ўғил Хайрушка қамоқда. Умрида бунчалик қиинчиликларни кўрмаган она икки корзинкани ширинлик, қази, чесноқ, тамаки, қуруқ чойлар билан тўлдирив борди... Маҳбус ўғлини кўриб, Марҳаматхон йиғлади, кейин бир-бирларига далда беришиб, «кўргилик», «ойнинг ўн беши қоронги бўлса, ўн беши ёруғ...» дейишди. Байрам арафасида мана, бир неча кундан бўён Марҳаматхон қамоқ атрофида ўғли Хайрушкани деб сарсон-саргардон бўлиб юрибди.

Кейинги кунларда Амир Равнақ дардга чалиниб қолди. Дўстлар бирлашиб, китоблари икки жилда нашр этилиб, ишлари юришган бир пайтда унинг тез-тез юраги санчиб, ҳушидан кетиб қоларди. Врачлар бир неча бор кардиограмма олишди, укол қилишди. Ўзингизни кўп уринтирмай ётинг, дейишди. У врачларнинг ҳамма гапларига амал қилди, лекин Чорвоқ қурувчилари ҳақидаги достонини ётган жойида ёзарди. Ҳамма ишлар яхши бўлиб, Файзулла Аҳмедович ишга тушиб кетганида, Қоражонларнинг ҳам оиласлари тинчиб, унвон берилиб, омади келганида у юрагини чанглалаб қолди. «Сартарошлар обдан уста бўлганида қўли қалтироқ бўлиб қолар экан», — деб куларди халқ шоирини камтарона кўрсатиб. Газета-журналларда унинг шеърлари тез-тез чиқиб турарди.

Шоир шу ҳолига қарамай, тантанали митингда дос-тонимдан парча ўқийман, Қоражон Мингбоевни, Гулгунни, Милтиқбой акани кўраман, деб Файзулла Аҳме-

довичга ёпишиб, бу томонларда юрарди. Эҳ, саломатлик ўлгур яхши бўлганда шу Милтиқбой ҳақида роман ёзардим. Минг афсус, саломатлик йўқ. Бунинг устига ёш ўтиб кетди, дерди.

Бугун шу одам хонадонида тўй! Милтиқбой ака ўзида йўқ шод, у ҳаммага гап қотар — иш буюар, меҳмонлар зерикиб қолмасин, деб ҳазил-мутойиба гаплар айтиб ташларди. Телевизорни ҳам ҳовлига олиб тушиб қўйган; ёшлар «фигурали катания»ни томоша қилишарди.

— Ҳой, қудажон, айнаниб кетай, мана бу нозу неъматлардан еб ўтириング. Ўлгандан кейин жаннатга тушаб бапуржа шафтоли ейман, анжир ейман, босвoldи қувун ейман, деб у дунёни ўйламай қўя қолинг,— дерди у ҳазиллашиб Қандил бувига. Улар бир-бирларининг ҳазилларини кўтаришарди,— ҳозир шу ерда еб қолинг! У ёқда йўқмиш, Сапчабошевга ўхшаган олибсоларлар килосини ўн сўмдан сотиб юборишибди.

— Ҳазилингиз қурсин, ҳой, қуда, сизлар томонга газ келдими? — деди Қандил буви кафтларини қошига соябон қилиб, Милтиқбой акага гап қотди,— газда пишган қайнатма ўйрва иссиқлик бўлармиш, шу ростми? Сулфиддин деган дорининг ўрнига валиддин дегани чиқиби, шу ростми? Шимса ҳам бўлармиш, носяйга ўхшатиб кафтга ташлаб отса ҳам бўлармиш... Шўро ҳукумати хўп ҳунарвон чиқди-а? Ҳовлига ҳам текис қилиб, яхшилаб сув сепибсизлар, шланда сепгандирсиз-а? Шлан ҳам хўп чиқди-да, бир текис шариллатиб сепади. Илгариги вақтда пақирда сепардик, ҳовли юзи олачалпак бўлиб қоларди. Йилдан-йилга ҳар хил нарсалар чиқвотти. Шўро ҳукуматимиз омон бўлсин, жуда ҳунарвон!

— Тўгри, қуда! — дерди озгина оқидан тортиб олган, ширақайф Милтиқбой ака,— дориларни қўйинг, мана бу луччак шафтолидан енг! Оғзингизда эриб котади.

— Э, қудажон, бу ўлгур совуқлик! Манга дўхтирилар иссиқлик енг дейишган!

— Узумдан енг бўлмас!

— Ҳусайнни даройию шакарангулу... ҳамма-ҳаммаси уйимда кўп, ишкомда осилишиб ётодир. Қани энди менда иштаҳа бўлсаю шу ўлгурлардан есам. Анави келганимда, айиқ ёғи топиб қўяман, деган эдингиз. Айиқ қолмабдими? Тўнғизни отишса бўлмайдими овчилар! Яна бод ўлгур қўзғаяпти. Порсо домла, бўрсий

ёғи сурсангиз ҳам бўлади, деган эдилар. Бўрсиқ ўлгир ҳам йўқ.

— Бод деган ярамас сиз билан менга ўхшаган худонинг энг азиз бандаларига ёпишмай қўя қолса нима қиласарди! Назаримда, худои таолонинг энг ишонган бандалари бу дунёда иккаламиз қолдик. Бўрсиқ ёғи нима деган нарса! Шу нарса ҳам топилмаса-я! Э, қудратингдан! Бу тоғу тошларда совуқлик нарсалардан кўра, иссиқлик, шу бўрсиқ ўлгурларни қўпайтирсанг бўлмасмиди! Тўнгиз кўп, овчилар отиб келяпти, локин унинг ёғи бодга ўтмайди! Қудажон, авваламбор биз ўлмайлик. Агар ўладиган бўлсак, бизлар бесўроқ шундоқ жаннатга кириб кетаверамиз! Лекин анави, «онаси чўмич билан қўшиб туққанлар» бўлса ҳеч ошхонадан чиқмайди. Ҳа, майли, бугун хурсандчилик, озгина шўхроқмиз-да, хафа бўлмайсиз, қудажон!

— Йўқ, йўқ, мен энди унинг Чорвоқдаги квартирасига бориб ўтиrolмайман! — деди яхши эшитмай буви,— уйининг таги тахта, каламуш чиқади. Чинни тօғорага пеҷоб қилишади. Йўқ, йўқ, зўрлашса ҳам бормайман! Номоз ўқийман десанг, қўбланинг қаёқдалигини билмайсан!

Милтиқбой ака ҳингиллаб кулиб, бошқа меҳмонлар ёнига борди. Стакану пиёлаларга арақ, коњяк, вино қуйиб, тўлдириб берарди. Унинг кайфи чоғ, у онадан туғилиб, ҳали бунчалик қувончу шодликни кўрмагандек. Созандалар машқни бошлагач, чирмандинг серзавқ гижбангига биринчи бўлиб ўзи ўйинга тушди. Ҳовлига, айвону уйларга меҳмонлар тўлиб кетган. Дамо-дам кабобу сомсалар, лаганда гўшту жаркоп тортилиб туради. Шу орада райком секретари, исполком раиси билан биргаликда Садовников ҳам кириб келиб, бу хонадоннинг отаси Милтиқбой ака билан омонлашиб, тўрга, Файзулла Аҳмедовичлар ёнига ўтиришди. Милтиқбой ака ўйнаб, ҳовлини бир айланниб чиққач, унинг таклифи билан бир неча ёш қизлар ҳам ўйинга тушишди. Ўйин тугагач, пўрим кийинган бир йигитча, у афтидан қишлоқ муаллими бўлса керак, микрофонни Файзулла Аҳмедовичга тутди.

— Илтимос қилишяпти, бир оғиз сўз айтсангиз,— шундан сўнг у йигит шошиб деди:— Ҳурматли меҳмонлар! Сўз Чорвоқ қурилиши партия бюросининг аъзоси, консультант, Ӯзбекистон Фанлар академиясининг мухбир аъзоси, инженер Файзулла Аҳмедович Музafferовга!

Тўй шов-шуви, гурунг бир лаҳзада сув қуйгандек жим бўлиб қолди. Каттадан-кичикининг нигоҳи ўрнидан турган баланд бўйли, кўзойнакли одамда. Файзулла Аҳмедович бурни устига тушиб кетган кўзойнагини итариб қўйгач, одамларга қаради:

— Баъзилар, уруш тугаганига ўттиз йилдан ошган бўлса ҳам сиз ҳамон уруш ҳақида гапирасиз, дейди. Ҳа, ҳали биз яна кўп йиллар гапирамиз! Бугун фронтчи, Улуг Ватан урушининг жасур солдати Милтиқбой Қўйбоқаров хонадонида катта тўй. Гитлер Милтиқбойни отиб ўлдириб, Ўзбекистонни босиб олмоқчи бўлди. Беомон жангда Милтиқбойлар фашистларнинг ўзини ўлдирди, юртни душманинг оёқости қилишига йўл қўйишмади. Мана, гап қаерда! Шу жасур солдат урушдан кейин ҳам ўттиз йил яшаб, тўй қилмоқда. Унинг куёви, яъни фарзанди ҳам фронтовик. Биз ҳам... Милтиқбойлар гўзал Ўзбекистонни обод этмоқда. Милтиқбойлар давом этмоқда — мана, дунёга қўчқордек ўғил келди. Унинг отаси эски фронтовик, меҳнат фронтида ҳам иш кўрсатиб, Ленин ордени билан мукофотланди. Қизимиз ёш врач... Демак, биз давом этяпмиз... Биз яшаяпмиз. Ҳар ким ҳалол бўлса улуғликка етишади, тўғри бўлса, мартабаси баланд бўлади. Уч нарса уч нарсадан топилади: сабрдан — нажот, саховатдан — улуғлик, адолатдан — зафар. Бахт кўз билан кўриб, қўл билан ушлаб бўлинадиган нарса эмас, фақат атрофдагиларга қарабгина ўз бахту саодатингни кўра оласан. Тўрт нарса иззат-обрўни кетказади: ёлгончилик, манманлик, эзмалик ва мунофиқлик. Менинг дўстим шулардан холис. Менинг дўстим юрагида саковат, жасорат, поклик мужассам. Менинг дўстим боғон, «Йўлбарс изидан, ўзбек сўзидан қайтмас» деган мақол унга тааллуқли, бизлар ўз сўзли одамлармиз! Келинглар, дўстлар, шу қадаҳни ажойиб одамлар учун кўтарайлик!

Сижжак яқин орада бундоқ катта тўйни кўрмаган эди. Ўйин-кулги, асқия, хонандаларнинг дилрабо кўйлари — хурсандчилик аzonгача давом этди. Баъзи меҳмонлар тонг ёришганда тарқалишди.

Эртасига, олтинчи ноябрь куни бутун Чорвоқ бўйлаб меҳнат ғалабасининг тантанаси ҳукм сурди.

Соат тўртда митинг бошланди.

Тантанали митинг очилишига яқин партия ва ҳукумат аъзолари орасида минбарга чиқиб кетаётган Қо-

ражоннинг кўзи чеккароқда, ўзини панага олиб, рапида шапкаси соябони билан кўзини бекитиб турган Ишларбек Сапчабошевга тушди. Бу қаламушнинг бунда ўралашиб юрганига тушунмади. Фирибгарлар бетсиз бўлади, деган гапни хаёлидан ўтказди. Думалоқ тарвузга икки чўп тиқиб, устига картошка қўйсангиз, шу шахснинг айнан ўзи пайдо бўлади. Бунинг устига, у ўлимдан шу даражада қўрқардики, қани энди унинг учун дунёда ўлим деган нарса бўлмаса! Агар, мабодо бу ишни йўқотиш мумкин бўлмаса, унда, бошқалар ўлавериб, у яшаб юраверса! Худди мана шу «жиддий масала»да жонга ора кирадигандек, Сапчабошев ўша пайтларда чунонам ваъзхон бўлдики, асти қўяверинг! Қурилиш бошқармасида биронта мажлисни сўзга чиқмай ўтказиб юборса, хотини талоқ бўларди. Сўз билан шаҳар олган одамлар ҳам бўлганини гапириб, ўзига-ўзи қувват берарди. У баъзи одамларнинг пиҳиллаб кулишига ҳам қарамай, минбарда туриб олиб жон-жаҳди билан сўзларди. Идорада ходимлардан бири Сапчабошевнинг мия мағзи ичидаги инсонни гапиртирадиган ҳужайралари тараққий топиб, кўпайиб кетганини айтибди. Агар ўша ҳужайралар кўпайиб кетмаганда хозснаб бошлиги Сапчабошев бунчалик серваъз бўлиб кетмас эди...

Лекин унинг Қоражонга туҳмат қилгани ҳеч қачон эсдан чиқмайди. У Кимсанхонни ҳам йўлдан оздириб, бадном қилди. Негадир унинг гапларига ишонардилар. Ҳазратов фош бўлганига қадар, Георгий Исаевич Садовников ҳам унинг гапларига оз-моз ишонган. Туҳмат аввал ҳақиқат бўлиб кўринади. У оппоқ ва ҳарир кийимда жилваланади. Унинг ичи бўш эканини пайқамайсиз. Вақт қиличи қирқиб, сабр-тоқат офтоби унинг юзидаги ниқобини куйдириб, асл башарасини кўрсатгач, инсон ўз бошига тушган дўзахий қийноқдан қутулади. Туҳмат йўқ бўлиб кетади, аммо бу ашаддий душманнинг юракда қолдирган қора изи анча вақтгача йўқолмайди. Бу «из» ҳам кейинчалик инсонни қулатиши мумкин. Лекин чинакам баҳодир киши ўзини эҳтиёт қилиши керак! Бошقا одамларга ҳам, ҳатто кейинги авлод бошига ҳам туҳмат тоши тегмаслиги учун ҳазратовчиликни ҳеч қачон кечирмаслик керак! Бир ёмонлик қилган душман ҳеч қачон яхшилик қилмайди.

Митинг бошланди. Қурилиш илғорлари, партия Марказий Комитети секретари ва Чорвоқ қурилиши

бошқармаси бошлиғи сўзлаган оташин нутқ ғодийда жаранглаб, тоғлардан акси садо берарди. Инженер Мингбоев ҳам қайноқ нутқ сўзлади. Тошкентдан меҳмон бўлиб келган, қурилиш ҳақида асар ёзаётган Амир Равнақ ҳам достонидан парча ўқиди. Қурувчиларномидан партиямиз Марказий Комитетининг Бош секретари СССР Олий Совети Президиумининг Раиси, қадрденимиз Леонид Ильич Брежнев номига ёзилган хат ўқиб берилди...

* * *

Эртасига Қоражон йўлга отланди, Наманганга бориши керак! У ерда ўртоқлар кутиб туришибди, тўғон устида иш қизгин.

Кечга яқин йўл анжомлари, чамадонларни тахт қилиб, ўғилчасини кўтариб олган Қоражон Гулгунни имлаб, Наволисой томон юришди. Бу ерда сув остида қолган Чоршанба ота боғи тепасига келишди. Қирра харсанг тошлар устида туриб ойнадек тиниқ сувга тикилишди. Беш, ўн метр пастликда иморат пойдеворлари, гишталар, ҳовли четидаги тандир қолдиқлари, сув остида қолган ёнгоқ ва тут дарахтлари шундоқ зилол сув остида кўриниб турарди.

— Мени бу ерга нега олиб келдингиз? — Гулгун ҳайратомуз эридан сўради.

Қоражон индамай кулиб тураверди. У икки кўзи ни сув остида қолган ҳовлию боғлардан олмас эди.

— Қани ўзинг топ-чи?

— Ёдимда йўқ...

— Сизлар шунақасиз-да! Дарров ёдингидан чиқади. Мана шу боғда, тўйда мен сени биринчи маротаба кўрган эдим. Юрагимга ўт ташлаб, ёндирган эдинг. Мен сенга бир-икки маротаба қараганимда аразлаб чиқиб кетган эдинг. Мен ўшандা, шу қизни олсам, дунёда армоним йўқ, деган эдим. Сен ҳеч қачон бундай гапни хаёлингдан ўтказмагансан. Сенинг васлингга етдим, мен бахтли одамман. Мұҳаббатимиз меваси — мана, Баҳодирбек ҳам катта бўлганда унга мана шу ҳовлини кўрсатаман, онанг мендан қўрқиб, тўйдан чиқиб кетган, дейман.

— Оҳ-хўй-үй... — деди Гулгун эри билан Баҳодирни қўшиб қучоқлаб, икковини ҳам ўиди, — Чоршанба ота жуда зўр тўй қилган эди. Ҳаммаси ёдимга тушди, ака-жон! Сиз жуда зўрсиз! Сиз, сиз, сиз...

Қўшнилари Эшмат буванинг қазо қилгани маълум бўлиб, Қоражон яна бир кун Сижжакда қолди; у қишлоқнинг отахонларидан бири, Милтиқбой аканинг қадрдони Эшмат бува тобутини елкада кўтариб, бобога катта ҳурмат кўрсатиб, уни тупроқа топшириди.

Моддий дунё доимо ҳаракатда, ўзгаришда — бирор келади, бирор кетади. Ҳаётни бир ерда ушлаб туриб бўлмаганидек, ҳар бир туғилиш уни қайтадан яшартিраверади. Елиб-югуриб ўқийсан, ишлайсан, қарийсан, вақти келиб ёруғ дунё билан видолашасан... Бу табиатнинг ўзгармас азалий бир қонунидирки, бўйеун-май иложинг йўқ! Бир ҳисобда шундай бўлгани, яъни ҳаёт дарёсининг айқириб оққани маъқул! Муҳими шуки, сен жамият учун иш қилиб, одамлар корига яролдингми? Ёки?.. Мана шу «ёки»дан кейин келадиган хаёллар гоятда даҳшатли! Дабдабалар, тўю ҳашамлар... бари ўтади. Ёшингни яшаб, ошингни ошаб, пилла қуртидек вақти етгач, ўзингни турмушнинг ипак илари билан ўраб, бу ҳаётни авлодга ташлаб кетаётганингда кечмиш-кечирмишларингни бир лаҳза бўлса ҳам хаёлингдан ўтказасан; меҳнат, садоқату олижанобликларинг учун одамлар сенга ташаккур айтиётган-дек бўлади. Қувонасан, ўлим ҳам бир ухлаш каби енгил ўтади. Қонуний никоҳ ва шодлик билан туғилиб, обрў, билан ўлишдек бахтга мушарраф бўласан. Аммо, хиёнатинг, пасткашликларинг, калондимоғлигу икки юзлилигинг... дом-дараксиз йўқолиб кетиш даҳшати ва танангга чирмашган дард азоби билан қўшилиб сени бўғиб ташлайди, бу бир оний азоб умринг бўйи кўрган роҳату фароғатларингни бир пул қилади!..

Улар икки машина бўлиб йўлга тушишди. Милтиқбой ака билан Санобархон фарзандларини Наманганга учирив юборишгандан сўнг шу куни Марҳаматхон аяларникида қоладиган бўлишди. Файзулла Аҳмедович ўтган куни зиёфатдан кейин Санобархонга, саккизинчига Марҳаматхон Учқудуқ томонлардан қайтиб кела-ди, албатта боринг, деган эди. Нобоп ўғил учун совурилиб, алам чекиб юрган Марҳаматхон кўнглини сўраб, ҳасратлашиб келиш керак эди, албатта. Олдинма-кейин кетаётган машиналар Чирчиқ кўпригидан ўтгач, боя-

дан бери индамай, ўнгда икки төгни ушлаб, Қоражонга жилмайиб қараб турган түғондан күз узмасди. Чотқолу Үгом төг тиэмалари баробар бўй чўзиб булутларга боши етиб Алломиш паҳлавондек кўкрак кериб турган түғон атрофидан тиллақўнгиз машиналар ичидагизиллаб ўтиб кетаётган қадрдони Қоражонга хаёлан гап қотгандек бўларди.

«Ҳа, Қора бола, йўл бўлсин? Ўн йил қадрдон бўлдик, ўн йил бирга ишлашдик... Йўл бўлсин энди? Бу ерда бизнинг ҳам қаддимиз кўтарилиб, энди абадул-абад хизмат қиласмиз. Елкамизда зилол денгиз, шу денигизни кўтариб турамиз. Бу зилол сувдан инсон, жони-ворлару даладаги жамики гиёҳларгача, осмонда учеб юрган қушларгача ичади. Пахтагача ичади... Ҳаммалари, сувдек сероб бўл, деб шаъннингга ташаккўр айтидилар. Биз энди абадул-абад халқ хизматидамиз. Ҳа, Қора бола, инженер бола, биз билан бирга ишлашиб сиз ҳам кам бўлганингиз йўқ. Қаддингиз кўтарилиди, кўксингизда Ленин ва Қизил Юлдуз орденлари ярқираб турибди. Шунаقا, азизим!»

Хаёл сурини келаётган Қоражон беихтиёр рулдаги йигитга мурожаат этди:

— Чапга буринг, укажон! Тўғон устига чиқайлик. Айланма йўллар билан ҳайданг, ўзим кўрсатаман.

— Кечикиб қолмаймизми? Самолёт нечада учади? — сўради дарҳол Гулгун.

— Вақт бор. Тўғон мени чақирапти, эшитяпсанми? Хайрлашиб кетмасам бўлмайди. Кўнглим тинчимайди,— деди кулиб Гулгунга қайрилиб боқиб,— у менни имлаб чақираётгандек бўляпти. Ана, ўзинг ҳам қарагин, тўғон мени чақирапти. Бориб у билан хайрлашмасам албатта хафа бўлади! Ўн йил отамлашиб ишласму шундоқ ёнидан ўтиб кетиб бўладими?! Бу мумкин эмас, асло мумкин эмас, Гулгуной!

Машина ғизиллаганча югуриб тўғон тепасига чиқди. Ғир-ғир шабада. Бунда чиройли бетон панжаралар, кундузгидек нур берадиган чироқлар қўйилган. Бир томонда водий, дарёлар ва пастда гугурт қутисидек ГЭС корпуси, нарида шаҳарча, бир томонда ойнадек ярқираган зилол денгиз...

— Бундай гўзал манзарани ҳеч қаердан тополмайсан! — деди Қоражон Гулгунга қараб,— буни қара! Мен бу ерларимни соғиниб қоламан. Хайр, хайр!

Бир муддатдан сўнг улар яна машинага ўтириб, тў,

ғон тепасидан пастга тушишди. Тошкент қайдасан, деб, тасмадек йўлда учиб кетиши. Бора-боргунча Қоражон хаёллар гирдобига чўмди. Ҳаётнинг чуқур, сермазмун ва ранго-ранг фалсафасини англай бошлади. Узоқда, Кушан қирлари тепасидаги олволизор боғда, эрта билан наҳорда қатиқ ичишни ёқтирадиган, заҳматкаш дўстлари, қани, бу ёққа келинглар, деб имлаб чақира-ётган Иномжону Юсуфжон раис, Ҳефизхонлар томон учиб кетиши.

1974—1976, Тошкент.